

LAXMI BOOK BINDING
DYE PRINTING WORKS
8, Kambuliata Lane
CALCUTTA-5.

ক্ষিতীশ-বংশাবলি-চরিত

অর্থাৎ

নবদ্বীপের রাজবংশের বিবরণ।

মহারাজেন্দ্র বাহাদুর কৃষ্ণচন্দ্রের পূর্বপুরুষ রাজা ক্ষিতীশের
পুত্র ভট্টনারায়ণের বাঙ্গালায় আধিপত্য স্থাপনাবধি
বর্তমান ক্ষিতীশচন্দ্রের সময় পর্য্যন্ত এই
রাজবংশের ইতিহাস

এবং

নবদ্বীপ প্রদেশের পুর্নতন ও

অধুনাতন অবস্থা

শ্রীকার্ত্তিকেয়চন্দ্র রায় কর্ত্ত্বক সঙ্কলিত।

কলিকাতা।


নূতন সংস্কৃত যন্ত্র।

সংবৎ ১৯৩২।

মূল্য ১।।০ এক টাকা আট আনা।

PRINTED By Mathuranath Chatterjee,
14, Goa Bagan Street, Calcutta.
The New Sanskrit Press.

PUBLISHED By Harimohan Mookerjee.



বিজ্ঞাপন ।



ক্ষিতীশ-বংশাবলি-চরিত নামা পুস্তক প্রচারিত হইল। এই পুস্তকের প্রয়োজন ও প্রতিপাদ্য প্রভৃতি অবগত হইলেই, মাদৃশ ব্যক্তির ঈদৃশ বিষয়ে প্রয়াস কেন, এই সংশয় নিরাকৃত হইবে।

নবম্বোপের রাজপরম্পারার যেরূপ ঐশ্বর্য ও আধিপত্য, মান সন্ত্রম তদপেক্ষা অনেক গুণ অধিক। তন্মধ্যে কোন কোন রাজা এরূপ গুণজ্ঞ ও বদান্য ছিলেন, যে তাঁহারা এক এক জন এক এক দিকপাল বলিয়া পরিগণিত হইয়া গিয়াছেন। পরিবর্তপ্রিয় কাল-বায়ু তাঁহাদিগের বিভব-কুসুম দিন দিন বিশোষিত করিয়াছে বটে, কিন্তু যশঃ-সৌরভে অদ্যাপি অনেক স্থল আমোদিত ও অমেককে পরিতৃপ্ত করিতেছে। কথাক্রমে রাজপরিবারের প্রসঙ্গ উপস্থিত হইলে অনেকে উহা আগ্রহ সহকারে শুনিয়া থাকেন এবং কখন কখন প্রাচীন পরম্পরাগত পুরাতন ইতিহাস শুনিয়া কোঁতুহল নিরন্তর করেন। এইরূপ শুভ্রবাদর্শনে ও তাঁহাদের বর্ণনোচিত গুণগ্রামে প্রবর্তিত হইয়া আমাকে এই পুস্তক প্রচারে প্ররত্ত হইতে হইয়াছে।

যৎকালে এই রাজবর্গের পূর্বপুরুষেরা ঢাকা অঞ্চলে আধিপত্য করিতেন, সেই সময় হইতে আমার পূর্বপুরুষেরা তাঁহাদের সংসারে দেওয়ানী প্রভৃতি প্রধান প্রধান পদে প্রতিষ্ঠিত ছিলেন। আমিও এই সংসারে চক্ষিণ বৎসর দেওয়ানী ও দশবৎসর অন্যান্য কার্য্য করিয়াছি। আমার রাজানুগত পরিবারে জন্মগ্রহণ, দীর্ঘকাল রাজ-সংসারে স্বীয় সংজ্ঞব, এবং রাজবাটীর পুরাতন কাগজ পত্র পাঠ প্রভৃতি উপায়ে এই বংশের বহুতর বর্ণনীয় রত্নাস্ত স্মরণ্য সহজেই সংগৃহীত হইয়াছিল। এই নিমিত্ত কয়েক বৎসর পূর্বে আমার মনে এই বাসনা উদ্ভূত হয়, যে যদি কোন যোগ্য ব্যক্তি এই রাজবংশের

ইতিহাস লিখিতে প্ররত্ত হন, তবে আমি যত্ন পূর্বক যত দূর পারি, তাহার উপকরণ সংগ্রহ করিয়া দিই। ইত্যবসরে মহারাজ সতীশচন্দ্র বাহাদুর ইচ্ছা লোকান্তর গমন করিলেন এবং তৎপরিত্যক্ত সম্পত্তি কোর্ট অব ওয়াড'সের অধীন হইল। একতঃ মহারাজার বিরহে যার পর নাই কাতর, অপরন্তু উক্ত কোর্টের অধীনতা বশতঃ তৎকালে আমার অবকাশ নিতান্ত বিরল হইয়া উঠিল; সুতরাং পূর্বোক্ত বাসনা অন্তঃকরণ হইতে এককালে অন্তর্হিত হইয়া গেল। কিছুকাল পরে আমার পরমাত্মীয় চব্বিশপরগণার ওয়াড'স ডিপার্টমেন্টের ডেপুটী কালেকটর জ্যাকব বাবু কালীচরণ ঘোষ আমাকে লিখিলেন, “যিনি যে ওয়াড'স সম্পত্তির কর্তব্যধ্যক্ষ হন, তিনি তত্ত্বৎশের ইতিহাস লিখিয়া কোর্টে অর্পণ করিয়া থাকেন; অতএব আপনি সম্প্রতি নবদ্বীপপতির কর্তব্যধ্যক্ষ, তত্ত্বৎশের একটি পুরাতন লিখিয়া কোর্টে প্রদান করিবেন।” আমি তদীয় নিয়োগানুসারে এই রাজ পরিবারের একটি সংক্ষিপ্ত বিবরণ লিখিয়া কতিপয় আত্মীয়কে দেখাইলাম। তাঁহারা পাঠ করিয়া কহিলেন “বঙ্গদেশবাসীদিগের এই রাজ-পরম্পরার যাদৃশ পুরাতন পাঠে পরিতৃপ্তি জন্মে, তাদৃশ পুস্তক একাল পর্যন্ত প্রকাশিত হয় নাই; অতএব তুমি এই বংশের এক খানি ইতিহাস পুস্তকাকারে প্রচারিত কর।” তাঁহাদের প্রবর্তনায় আমার বিগত বাসনা পুনরুজ্জীবিত হইয়া উঠে, এবং অবিলম্বে আমি নিজেই এ বিষয় সাধনে প্ররত্ত হই। যদিও আমার অবকাশ নিতান্ত অল্প, তথাপি আমি এ বিষয়ে যথা-সাধ্য যত্ন করিতে কিছুমাত্র ত্রুটি করি নাই।

কিন্তু যত্ন থাকিলেও এদেশের কোন পুরাতন লেখা যে সহজ ব্যাপার নয় ইহা অনেকেই জানেন। আমাদের দেশে ইতিহাস লিখিবার রীতি প্রায়ই ছিল না; সুতরাং, পুরাতন সঙ্কলনে প্ররত্ত হইলে, পরম্পরাগত প্রবাদে উপরি অনেক নির্ভর করিতে হয়। সৌভাগ্যক্রমে এই রাজবংশের পূর্ব রূপান্তর সংগ্রহে আমার কিস্বদম্ভীর প্রতি অধিক নির্ভর করিতে হয় নাই। ইতিহাস, পুরাতন কাগজ, ফরমান ইত্যাদি হইতে প্রায়ই এই ইতিহাস সংকলিত হইল।

কেবল যে সকল ঘটনা এই রাজবাটীতে বিশেষ রূপে প্রসিদ্ধ, এবং পুঙ্খ-পরম্পরায় অবগত, তাহা লিখিত প্রমাণ অভাবে বর্ণন করা গেল। যে সকল ফরমান ও পুরাতন কাগজ পত্র হইতে এই ইতিহাসের অধিকাংশ সংকলিত হইল, তৎসমুদয় অদ্যাপি রাজবাটীতে বিদ্যমান আছে। পূর্ব সংগ্রহীত পুস্তকের মধ্যে, ‘ক্ষিতীশ-বংশাবলি-চরিতম্,’ নামা গ্রন্থ হইতে অনেকাংশ গ্রহণ করা গিয়াছে। ঐ পুস্তক অতি সরল সংস্কৃত ভাষায় রচিত। ইহাতে কান্যকুব্জীয় ভট্টনারায়ণের বঙ্গদেশে উপনিবেশ হইতে রাজা কৃষ্ণচন্দ্র বাহাদুরের রাজ্যাভিষেক পর্য্যন্ত, এই রাজবংশের ইতিহাস সবিস্তর বর্ণিত আছে। এই গ্রন্থ প্রসিয়া রাজ্যের বর্লিন রাজধানীর রাজ-পুস্তকাগারে ছিল। ১৮৫২ খৃঃ অব্দে, ডব্লিউ পর্শ (W. Pertsh) নামক জর্মনক জার্মান জাতীয় পাণ্ডিত ইহা ইঙ্গরেজী অনুবাদের সহিত মুদ্রিত ও প্রচারিত করেন। ঐ পুস্তক ইদানীং ইউরোপের প্রায় সমস্ত প্রধান নগরে এবং কলিকাতার কোন কোন সাধারণ পুস্তকালয়েও বিদ্যমান আছে।

ভট্টনারায়ণ হইতে ষষ্ঠিদাস পর্য্যন্ত অষ্টাদশ পুঙ্খের ইতিহাস উক্ত পুস্তক ব্যতীত আর কুত্রাপি পাওয়া যায় না। সুতরাং, এই কয়েক পুঙ্খের রত্তান্ত কেবল ঐ গ্রন্থের উপরি নির্ভর করিয়াই লিখিত হইল। যদিচ কাশীনাথ রায় ও তৎপুত্র রামচন্দ্র সমাদ্দারের জীবনচরিত সংক্রান্ত কোন কাগজ পত্র রাজবাটীতে দৃষ্ট হয় নাই, তথাপি এই রাজসংসারের প্রায় সকল প্রাচীন লোকেই তাঁহাদের ইতিবৃত্ত অবগত ছিলেন। ভবানন্দ মজুমদার ও তৎপরবর্তী পুঙ্খদিগের সময়ের অনেক কাগজ পত্র রাজবাটীতে বর্তমান আছে। এই নিমিত্ত আমি এই কয়েক পুঙ্খের ইতিহাস সংগ্রহ জন্য, কেবল উক্ত ক্ষিতীশবংশাবলিচরিত মাত্র অবলম্বন করি নাই। যে স্থানে রাজবাটীর কাগজের সহিত উক্ত ক্ষিতীশ-বংশাবলিচরিতের অনেকাংশ দেখিয়াছি, সে স্থানে ঐ কাগজকেই অগ্রগণ্য করিয়াছি; সুতরাং, কোন কোন স্থানে উক্ত গ্রন্থের সহিত আমার বর্ণনীয় বিষয়ের অনেকাংশ হইয়াছে।

মুর্বন রাজত্বকালে ও ইঙ্গরেজদের প্রথম সময়ে, এই রাজাদিগের অধিকারস্থ সমস্ত প্রদেশের অবস্থা, রীতি, নীতি, ধর্ম, ব্যবসায়, বিদ্যা, বিচার, শাসনপ্রণালী ইত্যাদি যেসকল ছিল, এই রাজাদের সহিত তৎসমুহের সবিশেষ সম্বন্ধ থাকতে, আমি এই পুস্তকের প্রথম কয়েক অধ্যায়ে তত্ত্বান্ত বর্ণন করিলাম ; এবং, এই রাজ-বংশীয়দিগের বানস্থান, দিল্লীস্থর দত্ত ফরমানের মর্শ্ব, রাজা ও রাজ-পুত্রদিগের রচিত সংস্কৃতকবিতা, রাজাদিগের কৃত বিচারের মীমাংসাপত্র, পৈতৃক সম্পত্তি দানের শাস্ত্রীয় ব্যবস্থা প্রভৃতি ইতিহাসের মধ্যে সন্নিবেশিত করিলে পাছে সকল পাঠকের প্রীতিজনক না হয়, এ নিমিত্ত, তৎসমুদয় পরিশিষ্টে লিখিত হইল।

পরিশেষে, সক্রতজ্ঞহৃদয়ে কহিতেছি এই গ্রন্থের সঙ্কলন বিষয়ে কৃষ্ণনগরস্থ কতিপয় সন্ধিধান্ মহোদয় অনেক আনুকূল্য করিয়াছেন। বিশেষতঃ, ত্রীমুক্ত রায় যত্ননাথ রায় বাহাদুর ইতিহাসের সঙ্কলন বিষয়ে বহু সহপদেশ প্রদান করিয়াছেন এবং ত্রীমুক্ত লোহারাম শিরোরত্ন ও ব্রজনাথ মুখোপাধ্যায় মহাশয়েরা, পরি-শ্রম স্বীকারপূর্বক, পুস্তকের অনেকাংশ সংশোধন করিয়া দিয়াছেন।



ক্ষিতীশ-বংশাবলি-চরিত ।



রাজা কৃষ্ণচন্দ্র রায়ের অধিকার কালে তাঁহার রাজ্যের উত্তর সীমা মুরশিদাবাদ, দক্ষিণ সীমা গঙ্গামাগর, পূর্ব সীমা ধুলিয়াপুর ও পশ্চিম সীমা ভাগীরথী ছিল (১)। এতদ্ব্যতিরিক্ত ভাগীরথীর পশ্চিম পারে কুব্বেজপুর নামে এক বৃহৎ পরগণা অধিকৃত হইয়াছিল। এই রাজ্যের পরিমাণ ফল ৩৮৫০ বর্গকোশ। ইহা স্মৃইজারলও রাজ্য অপেক্ষাও কিঞ্চিৎ বৃহৎ। ইদানীং ইহার অধিকাংশ স্থান নদীয়া জেলার অন্তর্গত আছে, অবশিষ্ট অংশ চবিশপরগণা, মুরশিদাবাদ, যশোহর, এবং বর্ধমান জেলার অন্তর্ভুক্ত হইয়াছে। এই অধিকারে ভাগীরথী, জলঙ্গী (খড়িয়া), ইচ্ছামতী, ভৈরব, রায়মঙ্গল, চুর্নী, যমুনা এবং কতকগুলি ক্ষুদ্র নদী আছে। ইহার প্রধান নগর ও গ্রাম শাস্তিপুর, নবদ্বীপ, কৃষ্ণনগর, হালিসহর, কলিকাতা, অত্রদ্বীপ, চক্রদ্বীপ, কুশদ্বীপ, বহির্গাছি, শ্রীনগর, গোপালপুর প্রভৃতি; এবং প্রধান গঞ্জ, শাস্তিপুর, কলিকাতা, কৃষ্ণগঞ্জ, হাঁস-

(১) রাজ্যের উত্তর সীমা মুরশিদাবাদ। পশ্চিমের সীমা গঙ্গা ভাগীরথী খাদ ॥
দক্ষিণের সীমা গঙ্গানাগরের ধার। পূর্ব সীমা হুলাপুর বড় গঙ্গা পার ॥

খালি, নবদ্বীপ এবং চক্রেদ্বীপ ছিল। এই জমিদারীর সমস্ত ভূমি সমতল। কলিকাতার দক্ষিণ ও পূর্ব খাড়িজুড়ি ও ধুলিয়াপুর প্রভৃতি কতিপয় পরগণা ব্যতীত অন্য কোন প্রদেশে বৃহৎ বন ছিল না। ইহার প্রায় সমস্ত ভূমি উর্বরা। এই অধিকারে বিবিধ প্রকার আশু ও আমন ধান্য এবং সর্বপ্রকার হরিৎ শস্য উৎপন্ন হয়। ইহার উত্তর অঞ্চলে তুত জন্মিয়া থাকে। এখানে আত্র, কাঁঠাল, নারিকেল, রস্তা, দাড়িম্ব, আতা, জাম, নিচু, গোলাবজাম প্রভৃতি নানাবিধ সুস্বাদু ফল উৎপন্ন হয়। কলিকাতার সাত আট ক্রোশ উত্তর হইতে প্রায় মুরশিদাবাদ পর্য্যন্ত এ অধিকারস্থ সকল প্রদেশেরই জল বায়ু স্বাস্থ্যকর ছিল। বিশেষতঃ, খড়িয়া নদীর তটস্থ কৃষ্ণনগর প্রভৃতি গ্রাম সকলের জল বায়ু এতই উৎকৃষ্ট বলিয়া বিখ্যাত ছিল যে, বাঙ্গালার নানা অঞ্চলের লোক স্বাস্থ্য লাভার্থে কৃষ্ণনগরে আসিত। ১৮৩২ বা ৩৩ খৃঃ অব্দে যে সংক্রামক জ্বর বিকার আসিয়া উপস্থিত হয়, তাহাতেই এই অধিকারের প্রায় সমস্ত গওগ্রাম ও বিস্তর পল্লীগ্রাম অস্বাস্থ্যকর হইয়া উঠে, এবং তন্নিবন্ধন বিস্তর লোকের অকালে আত্মশেষ হয়। যদিও এ রোগ কোন স্থানে প্রায় চারি পাঁচ বৎসরের অধিক কাল ছিল না, কিন্তু যে স্থানে ইহার একবার আবির্ভাব হইয়াছিল, সে স্থান আর পূর্বের ন্যায় স্বাস্থ্যজনক হইতে পারে নাই।

এই বিষম রোগ, ১৮২৪ কি ২৫ খৃঃ অব্দে, যশোহর জেলার অন্তর্গত মহম্মদপুর গ্রামে প্রথমে দৃষ্ট হয়। ক্রমশঃ দালগা, নলডেঙ্গা ও চাসড়া গ্রামে যায়। কয়েককাল পরে ভৈরব নদের কূলবর্তী কশবা প্রভৃতি অন্য অন্য গ্রামে উপস্থিত হয়। ১৮৫৫ কি ৫৬ খৃঃ অব্দে, গদঘাট গ্রাম উজ্জ্বল করে। তদনন্তর, নিজ যশোহর নগর ও তৎসম্বন্ধিত অনেক গ্রামবাসীরা বহুকাল পর্য্যন্ত এই রোগে

যৎপরোনাস্তি ক্রেশ পায়। ১৮৩২ কি ৩৩ অব্দে, যশোহর হইতে নদীয়া জেলায় প্রবেশ করিয়া প্রথমে গদখালি গ্রাম আক্রমণ করে, তদনন্তর, গুয়াতেলি, কাঁদবিলা ও সুপপুখুরিয়া গ্রামে উপস্থিত হয়। ১৮৩৫ কি ৩৬ অব্দে, এই তিন গ্রাম উৎসন্ন হইয়া যায়। ১৮৪০ অব্দে ইহা পুনরায় গদখালি আক্রমণ করিয়া প্রায় জনশূন্য করে। ১৮৪৪। ৪৫ অব্দে শ্রীনগর গ্রামে আসিয়া দীর্ঘকাল অবস্থিত হয়। ঐ গ্রাম উচ্ছিন্ন করণানন্তর, গোপালনগর, বাহুরামপুর, দিগুড়ে, চোঁবাড়িয়া, শিমুলিয়া, গাঙ্গসারি প্রভৃতি কয়েক গ্রাম উচ্ছিন্ন দেয়। ১৮৫০। ৫১ অব্দে, শ্রীনগরের ছয় ক্রোশ দক্ষিণ গৌরপৌতা গ্রামে দেখা দেয়। তদনন্তর, দেবগ্রাম, যাবোর কালী, মুড়াগাহি, এবং অন্য অন্য গ্রামের মধ্য দিয়া, ১৮৫৬খৃঃ অব্দের বর্ষাকালে, উলাতে (বীর নগর) আইসে। তথা হইতে ১৮৫৭ খৃঃ অব্দে, রাণাঘাটের নিকটবর্তী আনুলিয়া, কায়েতপাড়া, জগপুর দিয়া চাকদহ পর্য্যন্ত যায়, এবং ঐ স্থান হইতে অনেক গ্রাম ধ্বংস করিতে করিতে ১৮৫৯ অব্দে কাঁচড়াপাড়ায় উপস্থিত হয়, এবং তথা হইতে দক্ষিণ দিকে বাইয়া ছুগলির উত্তর পূর্বাংশে ও প্রায় সমস্ত বারাশত জেলায় বিস্তারিত হইয়া পড়ে। এ দিকেও ঐ তিন বৎসরের মধ্যে উলার সন্নিহিত বারাশত, বাদকুল্লা, খামার শিমুলিয়া প্রভৃতি গ্রামে ব্যাপ্ত হয়। ১৮৫৯। ৬০ অব্দে, ফুলে, বেলগড়িয়া, মালিপৌতা দিয়া শান্তিপুরে আইসে। ১৮৬০ অব্দে, শান্তিপুরের উত্তর গোবিন্দপুর, দিগ্ননগর, ও তন্নিকটবর্তী অনেক গ্রাম আক্রমণ করে।

১৮৬৪ খৃঃ অব্দের জ্যৈষ্ঠ মাসে, কৃষ্ণনগরে দেখা দেয় এবং ১৮৬৭ অব্দ পর্য্যন্ত থাকিয়া নগরবাসীদিগের প্রায় তৃতীয়াংশ ধ্বংস করে।

রাজা কৃষ্ণচন্দ্রের সময়ে, এই জমীদারীর অন্তর্ভুক্ত ৪৯ পরগণা

এবং ৩৫ কিসমত্ (পরগণার কিয়দংশ) ছিল (১) । পরগণার নাম, নদীয়া, উখড়া, পাঁচনওর, মানপুর, মুলগড়, বাগোয়ান, মহৎপুর, রায়পুর, সুলতানপুর, সুলতান বেদারপুর, উলা, সাহাপুর, কতেপুর, লেপা, মাকপদহ, উমরপুর, গড়ুই টবি, রায়সা, জাফরপুর, ভালুকা, মণ্ডণা, মার্টিয়ারি, এন্সুরিয়া, কাশিমপুর, গয়াশপুর, আলানিয়া, মহিষপুর, ইসলামপুর, খাড়ি জুড়ি, মামুদপুর, কলারোয়া, এসমহিলপুর, শান্তিপুর, রাজপুর, নাটগাড়ি, আমিরনগর, মণ্ডা, আলমপুর, কুখরালি, চারঘাট, খাজরা, হলদহ, ইন্দুরখালি, খালিশপুর, ভাৎসিংহপুর, বেলগাঁও, আষাডশেনী, বুড়ন, খানপুর; এবং কিসমতের নাম, হালিসহর, হাজরাখালি, পাইকান, মানপুর, কলিকাতা, আমিরাবাদ, আমিরপুর, খোশদহ, আনারপুর, বালিয়া, পাইকহাটি, বালান্দা, কাথুলিয়া, মাইহাটি, জামিরা, পারধুলিয়াপুর, মুর্কই, নমক ও মোন, ধুলিয়াপুর, কুবাজপুর, জয়পুর, ভালুকা, বাগমারি, হোসেনপুর, হিলকি, তালা, কাটশালি, শোভনালি, পলাসি, বেহারোল, সহনন্দ, ভাবসিংহপুর, হাট আলমপুর, সিলেমপুর, আকদহ ।

এই সকল পরগণা ও কিসমতের মধ্যে ইদানীং কলিকাতা পরগণা অতি প্রসিদ্ধ । প্রথমে রাজা কৃষ্ণচন্দ্র রায়ের প্রপিতামহ রাজা কদ্র রায় ইহার চারি আনা এক গুণ্ডা অংশ প্রাপ্ত হন । এই অংশের রাজস্ব ৬২৫৪৮১৭ অবধারিত ছিল । পরে কদ্রের পুত্র রাজা রামজীবন রায়, বাৎ ১১১৬ অব্দে, রামশরণ ও রহমতুল্লা এই দুই ব্যক্তির অংশ পান । এই অংশের রাজস্ব ৩৮২৬৮৭ ছিল । রাজা কৃষ্ণচন্দ্র

(১) অধিকার রাজার চৌরাসী পরগণা । খাড়ি জুড়ি আদি কিয়দংশের গণনা ॥

আর কিয়দংশ বর্দ্ধিত করিলে, ইহার মোট রাজস্ব ১৬৭৪৭,১১ ।
ধার্য্য হয় ।

যখন রাজত্বকালে, মহারাজা কৃষ্ণচন্দ্র রায়ের অধিকারে উল্লিখিত ৮৪ পরগণা ও কিসমতের মোট রাজস্ব ৬৫০৮০৬(১৭৬ টাকা অব-
ধারিত ছিল, তদতিরিক্ত পেশকশ বলিয়া আর ২৫০০০ টাকা দিতে
হইত । নির্দ্ধারিত রাজস্বের প্রায় হ্রাস বৃদ্ধি হইত না, পুরুষানু-
ক্রমে প্রায় এক পরিমাণেই থাকিত । রাজা কদের অধিকার হইতে
তাঁহার প্রপৌত্র রাজা কৃষ্ণচন্দ্রের সময় পর্য্যন্ত ইহাদের সকল পর-
গণার রাজস্ব একরূপ ছিল, ইহা রাজবাটীর কাগজে স্পষ্ট প্রকাশ
আছে । কোন কোন নবাব, নজরানা বা পেশকশ বলিয়া, যেমন
ইহাদের নিকট হইতে কখন কখন অনেক টাকা লইতেন, তেমন
আবার ইহারাও সময় বিশেষে অনেক রাজস্ব ক্ষমা পাইতেন ।
খাজানা বাকী পড়িলে মহাল নিলাম হইত, ইংরেজ অধিকারের
পূর্বে আর এরূপ শুনা যায় নাই । নবাবেরা ভূম্যধিকারিগণকে
বন্দীভূত করিয়া, অথবা তাঁহাদের জমীদারীতে ক্রোক সাজওয়াল
দিয়া, বাকী রাজস্ব আদায় করিয়া লইতেন, এবং কখন কখন
মহাল খাস করিয়া অত্বের সহিত বন্দবস্ত করিতেন ।

রাজা ভবানন্দ হইতে রাজা কৃষ্ণচন্দ্রের অধিকার পর্য্যন্ত
এই জমীদারী ক্রমশঃ বর্দ্ধিত হয় । অন্য কোন জমীদার রাজস্ব
প্রদানে অশক্ত হইলে ইহারা তাঁহার জমীদারী সত্ৰাটের নিকট
বন্দবস্ত করিয়া লন, এবং কোন কোন জমীদারী অন্য জমীদারের
নিকট ক্রয় করিয়া সত্ৰাট সন্নিধানে তাহার ফরমাণ (রাজ সনন্দ)
গ্রহণ করেন (১) । ফরমাণের প্রথমে পরগণার নাম ও তাহার

(১) কোন কোন পরগণা ইহারা বল পূর্বক অধিকার করেন, এরূপ প্রবাদও আছে ।

রাজস্বের পরিমাণ উল্লিখিত হইত, তৎপরে সচরাচর এইরূপ বর্ণনা থাকিত যে “প্রজাগণ যে নির্দ্ধারিত রাজস্ব দিয়া থাকে, তাহার অধিক এক কপর্দকও লইবে না, এবং ছলে বা কোশলে তাহাদের নিকট আর কিছু লইবে না । তাহাদিগকে সুখে রাখিতে যত্ন করিবে, এবং তাহাদের প্রতি কেহ কোন দোষাত্ম্য করিতে না পারে তদ্বি-ষয়ে যত্নশীল থাকিবে । কাহারও জায়গিরের (নিষ্কর ভূমি) প্রতি হস্ত প্রদর্শন করিবে না । জমীদারীর উন্নতি সাধনে নিরন্তর যত্ন করিবে, এবং নির্দ্ধারিত রাজস্ব প্রদান পূর্বক আমার সরকারের মঙ্গলাভিলাষী থাকিবে ।”

পূর্বকালে এই অধিকারের মধ্যে শস্য ক্ষেত্রের কর গড় পড়-তায় প্রতি বিষায় দুই আনা ছিল । বাস্তু ও বাগানের ভূমির কর গড়ে প্রতি বিষায় দুই টাকার অধিক ছিল না । নিষ্কর ভূমির খাজানা আরও অল্প ছিল । প্রায় প্রতি গ্রামে নিষ্কর ভূমি থাকাতে কৃষিজীবীদিগের অতিশয় সুবিধা ছিল । যে সকল নিষ্কর ভূমির অধিকারিগণ নিজে কৃষিজীবী, তাহাদের ভূমিতে শস্য না জন্মিলেও ভূমির কর দিতে হইবে না বলিয়া, তাহারা বিশেষ ক্লেশ অনুভব করিতেন না । যাহারা অন্যের নিষ্কর ভূমির উপস্থিতভোগী, তাহাদের, মালের ভূমির কর অপেক্ষা অল্প কর দিতে হইত, এবং তাহাও নির্দ্ধারিত সময়ে দিতে হইত না বলিয়া, তত ব্যস্ত হইতে হইত না । ইদানীং এই সকল নিষ্কর ভূমির কিয়দংশ গবর্ণমেন্ট কর্তৃক, ও কিয়দংশ ভূম্যধিকারী কর্তৃক, সের হওয়াতে, নিষ্কর ভূমির পরিমাণ অতি ন্যূন হইয়া গিয়াছে, এবং নেই সক্ষে প্রজাদিগের এই সুবিধাটিও লুপ্তপ্রায় হইয়াছে ।

অধুনা ভূম্যধিকারিগণ প্রজার নিকট ভূকর ব্যতীত অন্য যে সকল কর লইয়া থাকেন, যবনাধিকারে ভূম্যধিকারীরা ভদতিরিজ

অনেক প্রকার কর লইতেন। তৈলকার, কুস্তকার, কর্মকার, স্বর্ণকার, হুত্ৰধর, গাঁড়ার, গোপ, ক্ষুরী, রজক, তন্তুবায় পুভূতি ব্যবসায়িগণ স্ব স্ব ব্যবসায়ের জন্য ভূম্যধিকারীকে কিছু কিছু কর দিত। ভূকরের ন্যায় এ সকল করও জমাওয়া দিলবাকী ভুক্ত হইত। যদিও ১৭৯৩ অব্দের অফ্টম বিধি অনুসারে এইরূপ অর্থ গ্রহণ নিষিদ্ধ হয়, তথাপি ভূম্যধিকারীরা, বহুকালাবধি, এই প্রকার বিধি-বিরুদ্ধ কর গ্রহণে ক্ষান্ত হন নাই, বরং কোন কোন ভূম্যধিকারী এখনও লইয়া থাকেন। পূর্বে ভূমির কর অল্প থাকাতে রাইয়তেরা এই রূপ অর্থ প্রদানে কাতর হইতেন না, বরং ইচ্ছাপূর্বক দিতেন, এবং জমীদারের শুভাশুভ কর্মকাণ্ডে যথেষ্ট সাহায্যও করিতেন। উপায়ক্ষম সম্ভানেরা যে রূপ প্রসন্ন চিত্তে পিতার সাহায্য করেন, তৎকালীন রাইয়তেরাও সেই রূপে জমীদারের আনুকূল্য করিতেন। কিন্তু ভূম্যধিকারী কর্তৃক ভূমির কর যতই বর্দ্ধিত হইতেছে, ততই তাঁহারা এই সকল কর প্রদানে অসম্মতি প্রকাশ ও আপত্তি উত্থাপন করিতেছেন।

ইংরাজ অধিকারের পূর্বে বঙ্গদেশে পত্তনি, দরপত্তনি, ছেপত্তনি ইত্যাদি বন্দবস্ত প্রচলিত ছিল না, এবং যদিও তালুকদারী বা ইজারা বন্দবস্তের প্রথা ছিল, তথাপি নদীয়ার রাজারা, প্রজাগণ অন্যের অধীন হইবে বলিয়া, তাদৃশ বন্দবস্ত করিতেন না। কর সংগ্রহার্থ প্রত্যেক পরগণায় একজন নায়েব, ও প্রতি গ্রামে একজন গোমস্তা, নিযুক্ত রাখিতেন, এবং তাঁহারা স্থায়ী কর্ম সম্পাদনে শৈথিল্য বা প্রবঞ্চনা করিলে, তাহাদিগকে কারাবদ্ধ করিতেন অথবা অন্য রূপ শাস্তি দিতেন। যদিও এরূপ প্রণালী দ্বারা কর সংগ্রহ ব্যাপার সুচারুরূপে নির্বাহিত হইত না, তথাপি প্রজার সহিত চির নিঃস্বস্ত হইবে মনে করিয়া, ভূম্যধিকারিগণ

তালুকদারী বন্দবস্ত করণে নিতান্ত নিকটস্থ থাকিতেন । যৎকালে এই অধিকারের জমীদার রাজা ঈশ্বরচন্দ্র রায় জমীদারী দশশালা বন্দবস্ত করিয়া লইলেন, তাহার কিঞ্চিৎ কাল পরেই নদীয়া জেলার দেওয়ানী ও কালেক্টরী প্রভৃতি পদাভিষিক্ত কোন সাহেব, এ জেলা পরিত্যাগ কালে, রাজাকে কহিলেন, “আপনি কর সংগ্রহার্থ প্রজা, নায়েব, গোমস্তা প্রভৃতিকে কারাবদ্ধ ও উৎপীড়িত করিয়া থাকেন, ইহা জানিয়াও প্রণয়ানুরোধে আমি আপনার প্রতি রাজ-নিয়মানুযায়ী কার্য্য করি নাই, কিন্তু যিনি আমার স্থলাভিষিক্ত হইয়া আসিতেছেন, তিনি কখনই আপনাকে এরূপ বিধি-বিকল্প কার্য্য করিতে দিবেন না । অতএব যত শীঘ্র পারেন, জমীদারী খাসে না রাখিয়া তালুকদারী অথবা অন্য কোনরূপ পাকা বন্দবস্ত করিবেন ।” যদিচ জমীদারী খাস তহসিলে রাখাতে রাইয়তের নিকট খাজানা বাকী পড়িতে লাগিল, এবং তন্নিমিত্ত রাজস্ব অপরিশোধিত থাকাতে পরগণা সকল উপর্য্যুপরি নিলাম হইতে আরম্ভ হইল, তথাপি রাজ্যসম্বন্ধ বন্ধন শিথিল হইবে শঙ্কা করিয়া ঐ রাজপুরুষের সচুপদেশানুযায়ী কার্য্য করিতে পারিলেন না ।

পূর্বে উল্লেখ করা গিয়াছে যে যখন রাজত্ব কালে রাজস্ব অপরিশোধিত থাকিলে জমীদারী নিলাম হইয়া যাইত না, একারণ তৎকালে তালুকদারী বা অন্য কোন প্রকার চিরস্থায়ী বন্দবস্ত করিবারও প্রয়োজন হইত না । রাজারা ভূম্যধিকারীর নিকট যে প্রণালীতে রাজস্ব আদায় করিয়া লইতেন, ভূম্যধিকারিগণও সেই প্রণালীতে প্রজার স্থানে কর সংগ্রহ করিতেন । এদেশ ইঙ্গরেজ অধিকৃত হইলেও ভূম্যধিকারীরা আপন আপন জমীদারী যে কয়েক বৎসর মেয়াদী বন্দবস্ত করিয়া লন, তাহার মধ্যেও প্রায় কোন জমীদার স্বীয় জমীদারীর কোন অংশের তালুকদারী বন্দবস্ত করেন

নাই। পরে যখন দশমালা বন্দবস্ত চিরস্থায়ী বন্দবস্তরূপে পরি-
গণিত হইল, সেই কালাবধি সুবিস্তীর্ণ জমীদারীর অধিকারীরা,
নির্দ্ধারিত সময় মধ্যে রাজস্ব পরিশোধে অসমর্থ হইলে জমীদারী
হস্তান্তরিত হইবে দেখিয়া, যাহাতে কোন নিরুপিত কাল মধ্যে সমস্ত
কর সংগৃহীত হয় তদ্বিষয়ে অনেক চিন্তা করিয়া, অবশেষে তালুক-
দারী বন্দবস্ত করিবার মানস করিলেন। যদিও ১৭৯৩ খৃঃাব্দের
৪৪ আইন দ্বারা দশ বৎসরের অধিক মেয়াদে জমীদারীর মফস্বল
বন্দবস্ত করা নিষিদ্ধ হইয়াছিল, তথাচ কোন কোন জমীদার এইরূপ
বন্দবস্ত করিতে আরম্ভ করিলেন। পরে, ১৭৯৩ অব্দের ৪৪ আই-
নের ব্যবস্থা, ১৮১২খৃঃ অব্দের পঞ্চম আইন দ্বারা, রহিত হওয়াতে
তালুকদারী বন্দবস্তকরিবার রীতি আরও প্রচলিত হইল, এবং ক্রমশঃ
জমীদারকে পণ দিয়া তালুকদারী পাট্টা লইবার প্রথা হইয়া উঠিল,
আর ঐরূপ তালুক পত্তনি-তালুক বলিয়া প্রসিদ্ধ হইল। পরে
ক্রমে ক্রমে দর-পত্তনি, সে-পত্তনী, চাহার-পত্তনীর সৃষ্টি হইয়া
উঠিল। পূর্বকালীন ভূম্যধিকারীদিগের মধ্যে যাহারা যে পরিমাণ
আপন আপন জমীদারীর ঐরূপ বন্দবস্ত করেন, তাঁহাদের সেই
পরিমাণে জমীদারী স্থিরতর থাকে। বঙ্গদেশ মধ্যে বর্দ্ধমানের
রাজারা আপনাদের প্রায় সমস্ত জমীদারী এইরূপ বন্দবস্ত করেন,
এ কারণ তাঁহাদের জমীদারী প্রায় কিছু মাত্র ক্ষয় প্রাপ্ত হয় নাই।

পূর্বের চিরস্থায়ী তালুকদারী বন্দবস্ত করিবার যে নিষেধ ছিল,
যদিও তাহা ১৮১২ খৃঃ অব্দের পঞ্চম আইন দ্বারা রহিত হয়, কিন্তু
চিরস্থায়ী বন্দবস্ত করণের স্পষ্ট বিধি প্রচারিত হয় নাই, তথাপি
অনেক জমীদার তালুকদারী বন্দবস্ত করণে প্রবৃত্ত হন; এবং যদিও
জমীদার, ঐরূপ তালুকের খাজনা অবিলম্বে আদায়ের নিমিত্ত
তালুকের এক বর্ষের কিছু মাত্র খাজনা দ্বিতীয় বৎসরের প্রথম

মাসের মধ্যে পরিশোধিত না হইলে, পত্তনী তালুক স্বীয় ক্ষমতায় খাস করিয়া লইব ইত্যাদি কঠিন পণ সকল পত্তনীদারের কবুলতিতে লিখিয়া লইতেন, তথাপি পত্তনীদার সহজে খাজনা নিয়ম মত না দিলে, জমীদার ঐখাজনা শীঘ্র আদায় করণার্থ কোন আইনের সাহায্য পাইতেন না। এ কারণ গবর্ণমেন্ট, ১৮১৯ খৃঃ অব্দের অষ্টম আইন দ্বারা, এই আদেশ করিলেন যে, পত্তনী দরপত্তনী প্রভৃতি যে সকল চিরস্থায়ী বন্দবস্ত হইয়াছে ও হইবেক, তাহা স্থিরতর থাকিবেক, এবং জমীদার, প্রত্যেক ষাণ্মাসিক খাজনা আদায়ের নিমিত্ত, কালেক্টর সাহেবের সহায়তায় তালুক নিলাম করিতে পারিবেন।

এই অষ্টম আইন ভূম্যধিকারীদিগের পক্ষে যেমন হিতকর হইল রাইয়তদিগের পক্ষে তেমনই অহিতকর হইয়া উঠিল। যদিচ পূর্বে পত্তনী বন্দবস্ত আরম্ভ হইয়াছিল, কিন্তু কোন অনুকূল আইন অভাবে সর্বত্র প্রচলিত হয় নাই। এক্ষণে এই আইন প্রচারিত হওয়াতে এই বন্দবস্তের রীতি সাধারণ হইয়া উঠিল, এবং তৎসঙ্গে রাইয়তদিগের কষ্টবৃদ্ধি হইতে লাগিল। যে হেতুক, জমীদার, বর্তমান লাভের সমুদায় বা অধিকাংশের অধিকারী থাকিতে পারেন, এইরূপ জমা অবধারিত করিয়া জমীদারী পত্তনী দেন। রাইয়তেরা যে জমা জমীদারকে দিতেন তাহা বৃদ্ধি না করিলে পত্তনীদারের লাভ থাকে না, সুতরাং পত্তনীদার, যেরূপে হয়, রাইয়তদিগের পূর্ব জমা বৃদ্ধি করিয়া লন। এইরূপে পত্তনী, দর-পত্তনী, সে-পত্তনী প্রভৃতি যত প্রকার পত্তনী বন্দবস্ত ক্রমাগত হইতে থাকে, ততই রাইয়তদিগের জমাও ক্রমশঃ বৃদ্ধি হইয়া উঠে। যতকাল কোন জমীদারী জমীদারের হস্তে থাকে, ততকাল এইরূপে জমা বৃদ্ধি করিবার বিশেষ প্রয়োজন হয় না, এবং রাইয়তগণেরও কোন অসুখ জন্মে না। আমরা

দেখিয়াছি যে, নদীয়া জেলার যে সকল প্রদেশ যাবৎ পুরাতন জমীদারের হস্তে ছিল, তাবৎ সেই সেই প্রদেশের রাইয়তগণের জমা কখনও বৃদ্ধি হয় নাই।

যদিও ১৭৯৩ অব্দের অষ্টম ও চতুর্থ আইন দ্বারা স্পষ্ট আদেশ হইয়াছিল যে, জমীদারগণ রাইয়তদিগকে তাহাদের অধিকৃত ভূমির পাট্টা অবশ্য দিবেন, এবং তাহারা প্রার্থনা করিলে যদি পাট্টা না দেন, তবে এ বিষয় ধর্ম্মাধিকরণে প্রমাণ হইলে, দণ্ডগ্রস্ত হইবেন, তথাপি পূর্বকালে পাট্টা লইবার ও দিবার প্রথা নদীয়ার রাজাদিগের অধিকার মধ্যে সম্পূর্ণ প্রচলিত ছিল না। নায়েব ও গোমস্তার স্বাক্ষরিত দুই এক খানি পাট্টা দৃষ্ট হয় বটে, কিন্তু রাজাদিগের প্রকৃত স্বাক্ষরিত ও মুদ্রাক্ষিত পাট্টা এক খানিও নয়নগোচর হয় না। অধিকাংশ রাইয়ত ওট্‌বন্দি নিয়মে ভূমি আবাদ করিত, এবং তাহা চিরদিনের জন্য রাখিবার বাসনা হইলে, নায়েব বা গোমস্তাকে কিঞ্চিৎ অর্থ দিয়া, জমাওয়াসিলবাকিতে তাহার নাম ও জমার সংখ্যা লেখাইত, অথবা নায়েব বা গোমস্তার স্বাক্ষরিত পাট্টা লইত। কিন্তু পাট্টা প্রদানের ক্ষমতা কোন নায়েব বা গোমস্তার প্রতি অর্পিত হইত, ইহা কখন আমাদের শ্রবণ-গোচর হয় নাই। বিশেষ অনুগ্রহপাত্র ব্যতীত, রাজারা স্বীয় স্বাক্ষরিত ও মোহরাক্ষিত পাট্টা কোন রাইয়তকে দিতেন না। রাজাদিগের স্বাক্ষরিত ও মোহরাক্ষিত যে সকল পাট্টা কখন কখন দৃষ্টিগোচর হয়, তাহা প্রায় সকলই কৃত্রিম।

এই রাজাদিগের জমীদারীর চতুর্থাংশ ভূমি নিষ্কর ছিল। রাজারা আপনাদের কুটুম্ব, প্রধান বা প্রিয় ভৃত্য, এবং শ্রদ্ধাস্পদ ব্রাহ্মণকে অধিক ভূমি নিষ্কররূপে দান করিতেন। এতদ্ব্যতীত কুটুম্ব ও প্রধান ব্রাহ্মণ ভৃত্যদিগের জামাতারাও নিষ্কররূপে ভূমি

পাইতেন । অধিকারস্থ সমস্ত ব্রাহ্মণকে তাহাদের বাসোপযুক্ত ভূমি নিষ্কররূপে দেওয়া হইত । এমন কি, এ প্রদেশে অত্ৰাপি এ কথা প্রচলিত আছে, যে, যে ব্রাহ্মণের নিষ্কর ভূমিতে বাস নয়, তিনি ব্রাহ্মণই নহেন । এইরূপ ভূমিদানের কোন নির্দিষ্ট নিয়ম ছিল না । রাজারা, যাহার প্রতি যেরূপ সদয় হইতেন, তাঁহাকে সেই পরিমাণ ভূমি দান করিতেন । নিকট কুটুম্ব বা অধ্যাপক বিশেষকে কখন কখন সমগ্র গ্রাম নিষ্কররূপে প্রদত্ত হইত । শূদ্র বর্ণের মধ্যে বিশেষ রূপাপাত্র বা বিশেষ গুণভাজন ব্যতীত কোন ব্যক্তিকে নিষ্কররূপে ভূমি প্রদত্ত হইত না । রাজারা, যবনজাতীয়-দিগকে, কেবল তাঁহাদের দেব সেবার ব্যয়ের নিমিত্ত, ভূমি দান করিতেন । যখন যে রাজা কোন বিগ্রহ প্রতিষ্ঠা করিতেন, তখন তিনি তাঁহার ব্যয় নির্বাহ যোগ্য কোন গ্রাম বা গ্রামের কিয়দংশ ভূমি নির্দিষ্ট করিয়া দিতেন, এবং নিজ অধিকার মধ্যে অন্য কেহ কোন দেবমূর্তি স্থাপিত করিবার প্রার্থী হইলে, ঐ বিগ্রহের সেবার্থ ভূমি দান করিতেন । রাজা কৃষ্ণচন্দ্র রায় তাঁহার দুই রাণীকে নানা গ্রামের অনেক ভূমি নিষ্কর রূপে দিয়া যান । জ্যেষ্ঠা রাণীর অংশ বড়দেউড়ি নামে ও কনিষ্ঠা রাণীর অংশ ছোটদেউড়ি নামে প্রসিদ্ধ আছে । প্রজা রঞ্জনার্থ প্রতিগ্রামের গাজনের শিবের সেবার ও চড়কের ধরচের জন্ত ভূমি প্রদত্ত হইত । এইরূপে জমীদারীর অনেক ভূমি নিষ্কর হইয়া উঠে । যে ভূমি, হিন্দুদিগের দেবসেবার্থ দেওয়া হয়, তাহা দেবোত্তর, যে ভূমি, যবনদিগের দেবতার নিমিত্ত, প্রদত্ত হয়, তাহা পিরোত্তর, যে ভূমি ব্রাহ্মণকে দান করা হয়, তাহা ব্রাহ্মত্তর, এবং যে ভূমি, শূদ্রকে দেওয়া হয়, তাহা মহত্তরাণ নামে খ্যাত আছে ।

এই জমীদারীর মধ্যে আরও দুই প্রকারে কতক ভূমি নিষ্কর হই-

রাছে । প্রথম প্রকার,—যে সকল শূদ্র জাতীয় ব্যক্তি রাজসংসারে নিযুক্ত থাকিত, তাহাদের মধ্যে কোন কোন ভৃত্যকে, নগদ বেতনের পরিবর্তে, ভূমি দেওয়া হইত । এইরূপ ভূমির নাম চাকরাণ । চাকরাণ দুই প্রকার, খুঁটি ও বেখুঁটি । খুঁটি চাকরাণ সকর ও বেখুঁটি চাকরাণ নিষ্কর । যে সকল ভৃত্য সকর চাকরাণ পাইত, তাহারা ঐ ভূমির যৎকিঞ্চিৎ কর দিত, এবং যে ভৃত্যগণ নিষ্কর চাকরাণ পাইত তাহারা তাহা নিষ্করে ভোগ করিত । যাহারা পুরুষানুক্রমে নিযুক্ত থাকিত, তাহারা ঐভূমি পুরুষানুক্রমে ভোগ করিতে থাকিত । যাহারা কর্মচ্যুত হইত তাহাদের চাকরাণ রাজসংসারে প্রতিগৃহীত হইত অথবা অন্য ভৃত্যকে দেওয়া যাইত । যৎকালে, গবর্ণমেন্ট কর্তৃক নিষ্কর ভূমির তায়দাদ করিবার আদেশ প্রচারিত হয়, সেই সময়ে, ঐচাকরাণ ভোগীদিগের মধ্যে অনেকে স্ব স্ব চাকরাণ ভূমি নিষ্কর উল্লেখ করিয়া তাহার তায়দাদ করিয়া লয় । দ্বিতীয় প্রকার,—পূর্বে ব্রাহ্মণ শ্রেণীর মধ্যে অনেকেই কৃষিজীবী ছিলেন এবং তাহারা অন্য শ্রেণীর ন্যায় গ্রামের মালের ভূমি জমা রাখিতেন । তাহাদের মধ্যে অনেকে আপনাদের জমাই ভূমির কিয়দংশ নিজের ব্রহ্মোত্তর বলিয়া প্রচার করিতেন এবং অবশেষে তাহার তায়দাদ করিয়া লইলেন । অনেক শূদ্রগণও আপন আপন জমাই ভূমি ঐরূপে মহত্তরাণ করিয়া লন । এতদ্ব্যতীত গ্রামের মণ্ডল ও হালশানা প্রভৃতির মালের কতক কতক ভূমি নিষ্কর করিয়া লয় ।

এ প্রদেশে নীলের চাস প্রবর্তিত হইলে অধিবাসীদিগের অবস্থার যেরূপ পরিবর্তন হয় সেরূপ আর কিছুতেই হয় নাই । কোম্পানির বাঙ্গালার দেওয়ানীর সমন্বদ প্রাপ্তির অব্যবহিত পরেই কতিপয় ইকরেজ নবদ্বীপ অধিকার মধ্যে নীলের কুটী স্থাপন

করেন, এবং এই ব্যবসায়ের লাভ দর্শনে ক্রমশঃ নীলকরের সংখ্যা বৃদ্ধি হইতে থাকে। তাঁহার নীলপাত উৎপাদনের জন্য নিজ আবাদ ও রাইয়তি আবাদ এই দুই প্রণালী অবলম্বন করেন। যে ভূমি নিজ আবাদ থাকিত, তাহার কতকাংশ নিজ ভৃত্য দ্বারা আবাদ করাইতেন, ও কতকাংশ রাইয়তের দ্বারা আবাদ করিয়া, লইতেন। রাইয়তী আবাদের বিবরণ এই যে, প্রত্যেক রাইয়ত যে পরিমাণ ভূমি আবাদ করিবে, তাহার একটা নির্দ্ধারণ করিয়া তাহাকে কিছু টাকা অগ্রে দাদন করিতেন, এবং তাহার দ্বারা এই মর্মে এক অঙ্গীকার পত্র লেখাইয়া লইতেন যে “আমি আপনার নিকট এত টাকা দাদন লইয়া এই অঙ্গীকার করিতেছি যে, আমি এত বৎসর পর্য্যন্ত এত পরিমাণ উত্তম উর্বর ভূমি যথোচিত রূপে আবাদ করিয়া তদুৎপন্ন নীলপাত আপনার অমুক কুটীতে পৌঁছ-
 ছিয়া দিব। যদি কোন দুষ্কাভিসন্ধি করিয়া ইহার অন্যথা করি, তবে আপনার যে ক্ষতি হইবে, তাহার দায়ী আমি ও আমার উত্ত-
 রাধিকারী হইব ও হইবেন।” এক বৎসর হইতে দশ বৎসর পর্য্যন্ত এই অঙ্গীকার পালনের নিয়ম হইত। রাইয়তকে প্রতি বিষায় দুই টাকা দাদন দেওয়া যাইত। রাইয়তের যে ভূমি উত্তম উর্বর ও উত্তম রূপে কর্ষিত হইত, তাহাতেই কুটীর ভৃত্যেরা নীল বপনের জন্য চিহ্নিত করিয়া দিত। নীলপাত পরিণত হইলে, রাইয়ত নিজ ব্যয়ে তাহা ছেদন করিয়া নির্দিষ্ট কুটীতে উপস্থিত করিত। নীলগাছ প্রতি টাকায় ৪ বা ৬ অথবা ৮ বাণ্ডিল করিয়া লওয়া হইত। ৬ ফিট শিকলের মধ্যে নীলগাছের মধ্যদেশ যত ঘরিতে পারে তাহাই বাণ্ডিল বলিয়া গৃহীত হইত। আশ্বিন কার্তিক মাসে নীলপাতের হিসাব করিয়া প্রত্যেক রাইয়তের প্রদত্ত নীলপাতের যে মূল্য অবধারিত হইত, তাহা হইতে দাদনের

টাকা, অঙ্গীকার পত্রের ইফ্ট্যান্সের মূল্য, এবং প্রতি বিঘার নীল-বীজের মূল্য চারি আনা হিসাবে কর্তন করিয়া লওয়া যাইত ।

যে পরিমাণ দাদন রাইয়তের অঙ্গীকার পত্রে লিখিত হইত, সকল নীলকরগণ, তাহা সম্পূর্ণ রূপে দিতেন না । যাহা দিতেন, তাহারও কিয়দংশ আবার এ দেশীয় ভূত্বেরা গ্রাস করিতেন । প্রায়ই অধার্মিক লোক নীলকর সাহেব দিগের কর্মে নিযুক্ত হইত । তাহারা, প্রভুর প্রিয়পাত্র হওনার্থ তাঁহার ইচ্ছা সাধনের জন্য, কোন বিগর্হিত কর্ম করিতে কুণ্ঠিত হইত না । যে সময়ে অন্য প্রকার ফসলের আবাদ করিলে যথেষ্ট লাভ হয়, সেই সময়ে, রাইয়ত দিগের নীলের আবাদ করিতে হইত । তাহারা নিজের ফসলের ভূমির আবাদ কখন স্বেচ্ছানুসারে করিতে পারিত না । শস্য বুনিবার জন্য যে ভূমি উত্তম রূপে আবাদ করিয়া রাখিত, তাহাতে নীলকরের চরেরা নীল বপন করাইত, এবং কোন উর্বরা ও উত্তম রূপে কর্ষিত ভূমিতে শস্য বুনানি হইলেও তাহা ভাঙ্গিয়া তাহাতে নীল বুনাইত । একে প্রতিবৎসর নীলপাত উত্তম রূপে উৎপন্ন হইত না, তাহার উপর আবার রাইয়তেরা তাহার সমুচিত মূল্যও পাইত না, সুতরাং তাহারা প্রায় কখনই দাদনের দায় হইতে বিমুক্ত হইতে পারিত না । একবার দাদন লইলে তিন চারি পুরুষ পর্য্যন্ত ঐ দাদন পরিশোধিত হইত না । তাহাদিগকে চিরদিন যন্ত্রণা ভোগ করিতে হইত । দাদন জালে পতিত না হইবার জন্য কেহ চেষ্টা করিলে তাহার জাতি, মান, ধন, প্রাণ সকলই যাইবার সম্ভাবনা হইয়া উঠিত । পল্লীগামবাসী দিগের মধ্যে যিনি যে অবস্থাপন্ন হউন, বা যে ব্যবসায় করুন না কেন, সকল-কেই ঐ দাদন লইতে হইত । যাহাদের নিজের লাঙ্গল গরু না থাকিত তাঁহাদের অন্যের দ্বারা ভূমি আবাদ করাইয়া নীলপাত

উৎপন্ন করিয়া দিতে হইত । এতদ্ব্যতীত নীলকরের নিজ আবাদী জমীতে নীল উৎপন্ন করিবার নিমিত্ত যে কোন কার্যের প্রয়োজন হইত, তাহাও নীলকরণে যৎকিঞ্চিৎ বেতনে রাইয়ত দ্বারা নিষ্পন্ন করিয়া লইতেন । ফলতঃ নীল প্রস্তুত করিতে যত প্রকার কার্যের প্রয়োজন, প্রায় তৎসমুদায়ই, রাইয়তকে বলপূর্ব্বক কিঞ্চিৎ দাদন গতাইয়া, তাঁহাদের দ্বারা নিষ্পাদিত করাইতেন । এতদ্ব্যতীত কুটীর প্রয়োজনানুসারে রাইয়তদিগের বাঁশ খড় ও বৃক্ষ ইত্যাদি বিনামূল্যে লওয়া হইত ।

রাইয়তদিগের দুঃখের সীমা এই পর্য্যন্ত হইলেও তাহারা কথঞ্চিৎ সুখে কালযাপন করিতে পারিত । কিন্তু স্ফোটকের অপেক্ষা বিস্ফোটকের যন্ত্রণায় আরও জর্জরীভূত হইয়াছিল । নীলকর সাহেবদিগের দেওয়ান নায়েব গোমস্তা তাকিদগীর প্রভৃতি এদেশীয় ভৃত্যেরা, প্রভুর অতীর্ক-সিদ্ধি করণানন্তর, আপনাদের ইচ্ছা সাধনে কৃতসংকল্প হইয়া, রাইয়তদিগের প্রায় সর্ব্বস্ব হরণ, এবং তাহাদিগকে বিবিধপ্রকারে জ্বালাতন করিতেন । নীলকর-সাহেবেরা নীলের দাদন বা কার্যের বেতন যাহা কিছু তাহাদিগকে দিতেন তাহারি কিয়দংশ এই কর্ম্মকারকেরা লইতেন । তাহারা যে নীলপাত কুটীতে উপস্থিত করিত, কর্ম্মচারিগণ, কিঞ্চিৎ নাপাইলে, তাহা যথোচিত রূপে পরিমাণ করিয়া লইতেন না, এবং কখন কখন এক রাইয়তের নীলপাত অন্য রাইয়তের নামে জমা করিয়া লইতেন । নীলপাতের হিসাব করিবার সময়ে আবার কিছু হস্তগত না হইলে যথার্থ হিসাব করিতেন না । রাইয়তেরা তাঁহাদিগকে আপন আপন ক্ষেত্র অথবা গৃহজাত কোন দ্রব্যের অংশ না দিলে তাহাদের যন্ত্রণা ও ক্রতির সীমা থাকিত না । নীলকর সাহেবেরা এ সকল বিষয় জানিয়াও জানিতেন না, এবং শুনিয়াও শুনিতেন না । নরহত্যা গোহত্যা

গৃহদাহ, বাটীভঙ্গ ইত্যাদি যে কিছু কার্যের প্রয়োজন হইত, ইহারা তাহা অসমুচিত চিন্তে সম্পাদন করিতেন। এ জেলার অনেক নীলকর সাহেব সর্বস্বান্ত হইয়া গিয়াছেন, কিন্তু তাঁহাদের দেওয়ান ও নায়েবের মধ্যে অনেকে কেহ বা জমীদার কেহ বা তালুকদার হইয়াছেন।

দাদনগ্রাহীকে নীলকরের বশীভূত রাখিবার নিমিত্ত, ১৮১৯ অব্দের ৭ আইন, ১৮২৩ অব্দের ৬ আইন, ১৮৩০ অব্দের ৫ আইন, ১৮৩৬ অব্দের ১০ আইন ইত্যাদি অনেক বিধি উপর্যুপরি প্রকাশিত হইতে লাগিল, কিন্তু দাদনগ্রহণকারিগণের কষ্ট নিবারণের জন্য প্রায় কোন বিধিই বিধিবদ্ধ হইল না। যদিচ প্রথমে, ভারতবর্ষে ভূসম্পত্তি অধিকার করিতে ব্রিটেন-বাসীদিগের প্রতি গবর্ণমেন্টের নিষেধ ছিল, তথাপি নীলকরগণ রাইয়ত বশীকরণার্থ, জমীদারের নিকট অনেক গ্রাম, তাঁহাদের এ দেশীয় ভৃত্যদিগের নামে ইজারা লইতেন। ঐ নিষেধ রহিত হইলে যে গ্রামের প্রজারা নীল দাদন লইতে অসম্মত হইত, সেই গ্রাম যে রূপে হউক, পত্তনি বা ইজারা লইয়া তাহাদিগকে বশীভূত করিতেন। যে জমীদার নীলকরের বাসনা পূর্ণ করণে পরাধীন থাকিতেন, তাঁহাদের সঙ্কিত ঘোরতর বিবাদে প্রবৃত্ত হইতেন এবং দুর্বল জমীদার পাইলে তাহাকে অবসন্ন করিয়া ফেলিতেন। নীলকরসাহেবদিগের বা তাহাদের ভৃত্যদিগের নামে নরহত্যা, গ্রামদাহ, বাটীভঙ্গ, উদ্যানকর্তন, গোধনহরণ, রাইয়তকে বন্দী বা অনুদ্দেশ করণ প্রভৃতি নানাবিধ অপরাধের শত শত অভিযোগ রাজদ্বারে উপস্থিত হইত, এবং কখন কখন তাঁহাদের ভৃত্যেরা অপকৃপাতী বিচারে বিলক্ষণ শাস্তিও পাইত, তথাপি তৎকালীন দণ্ডবিধি আইনানুসারে ইঙ্গরেজেরা জেলা আদালতের বিচারাধীন না থাকিতে তাঁহাদের

কোন শারীরিক দণ্ড হইত না বলিয়া তাঁহারা আপনাদের অতীত-সাধনে নিঃশঙ্কচিত্তে অটল থাকিতেন । কোম কোম জমীদার বা সম্ভ্রান্ত ও সমৃদ্ধিশালী রাইয়ত এই রূপ বিবাদে এক কালে উৎসন্ন হইয়া যান । নীলকরেরা গ্রাম সকল যে জমায় পত্তনী বা ইজারা লইবার প্রসঙ্গ করিতেন, তাহাতে জমীদারের লাভ ব্যতীত ক্ষতি হইত না, কিন্তু রাইয়তের ভাবী দুর্দশা ভাবিয়া তাঁহারা নীলকরের প্রস্তাবে সম্মত হইতেন না । অবশেষে যখন দেখিলেন যে, নীলকরের সহিত বিবাদ করিলে বিষম বিপদে পতিত হইতে হয়, তখন অগত্যা অনেক জমীদার প্রজ্ঞার মায়া পরিত্যাগ করিয়া তাঁহাদের মনোরথ পূর্ণ করিতে লাগিলেন । এই রূপে নবদ্বীপ অধিকারের প্রায় সকল প্রদেশেই নীলকর সাহেবদিগের কুটী ও অধিকার সংস্থাপিত হইল । অবশেষে রাইয়ত গণের অবস্থা ঠিক এমেরিকা দেশের দাসদিগের সদৃশ হইয়া উঠিল । অনেক সম্ভ্রান্ত ও ভদ্রলোক, তাঁহাদের উৎপীড়নে, কেহ বা বহুপুঙ্খের বাসস্থান পরিত্যাগ পূর্বক স্থানান্তরে উপনিবেশ করিলেন, কেহ বা মান ও সম্ভ্রমে জলাঞ্জলি দিয়া নীলকরের ও তাঁহাদের ভৃত্যদিগের পদানত হইয়া থাকিলেন ।

১৮৫৭ অব্দে সেপাহি সৈন্য রাজবিদ্রোহী হইলে, অনেক নীলকর সাহেব গবর্ণমেন্টকর্তৃক এসিস্ট্যান্ট মাজিস্ট্রেটের ক্ষমতা পাইলে, রাইয়তদিগের ক্রেশ আরও বৃদ্ধি হইল । দুর্ভাগ্য রাইয়তদিগের কষ্ট নিবারণের জন্ত, দেশস্থ মহোদয়গণ ও কয়েকজন সম্মদয় মিশনারি বিবিধ চেষ্টা করিতে লাগিলেন ; অপকৃপাতী সম্বাদ পত্রের সম্পাদকগণ তাহাদের দুঃবস্থা সম্বাদপত্রে লিখিয়া সর্বসাধারণের গোচর করিতে লাগিলেন ; এবং কোম কোম রাজপুঙ্খও এ বিষয়ের প্রতিবিধানার্থ যত্ন করিতে লাগিলেন ;

তথাপি নীলকর সাহেবদিগের দল ও বল এতই প্রবল ছিল, যে কেহই তাহাদের দুঃখ মোচনে সমর্থ হইলেন না।

নীলকর সাহেবেরা ও ইংরেজ রাজপুরুষেরা উভয় সম্প্রদায়ই একদেশবাসী, একজাতীয়, একধর্মাবলম্বী, এবং উভয় দলের পরস্পর আহার ব্যবহার, আত্মীয়তা, ও আদান প্রদান থাকাতে, আর রাজপুরুষদিগের মধ্যে কেহ কেহ কখন নীলকরের সাহায্য করাতে, এ প্রদেশস্থ সাধারণ লোকের মনে এই দৃঢ় সংস্কার জন্মে যে, নীল ব্যবসায়ের গবর্ণমেন্টের বিশেষ স্বার্থ আছে, সুতরাং আমাদের যতই দুঃখ হউক, গবর্ণমেন্ট কখনই আমাদের প্রতিকূল ব্যতীত অনুকূল হইবেন না, এবং আমাদের ক্রেশের অবসান কখনই হইবে না। এই ভাবিয়া রাইয়তেরা এ কাল পর্য্যন্ত অসাধারণ ধৈর্য্যাবলম্বন পূর্ব্বক সকল কষ্ট সহ্য করিয়া আসিতে-ছিল। কাল সহকারে মক্ষ্মলের অনেক লোক স্মৃশিক্ষিত হইয়া উঠিলেন, এবং জেলার নানা বিভাগে এদেশীয় সুবিজ্ঞ ডেপুটী কালেক্টর ও পুলিশের কার্য্যে স্মৃশিক্ষিত ও ধর্ম্ম-ভীত দারোগা সকল নিযুক্ত হইতে লাগিলেন। ইহাদের দ্বারা রাইয়তদিগের পূর্ব্ব অমূলক সংস্কার ক্রমশঃ দূরীভূত হইতে আরম্ভ হইল, এবং আইনের অর্থ ও গবর্ণমেন্টের অভিপ্রায় অনুভূত হইতে লাগিল। এইরূপে তাহাদের নির্জীব আশা ক্রমে ক্রমে সজীব হইয়া উঠিল। নদীয়া প্রদেশস্থ ভদ্র অভদ্র সকল দাদনগ্রাহী রাইয়ত আপনাদের দুঃখ-শৃঙ্খল ছেদন করিবার যন্ত্রণা করিতে লাগিলেন, এবং কোন কোন স্থানের রাইতেরা ইহা সাধন করণেও প্রবৃত্ত হইলেন। এই সময়ে জেলা বারাসতের তদানীন্তন মাজিষ্ট্রেট অনরেল আশলি ইডন সাহেব, ঐ জেলার নীলকর ও রাইয়তদিগের পরস্পর বিবাদ উপস্থিত হওয়াতে, পুলিশের উপর এইরূপ এক পরওয়ানা

দিলেন যে, রাইয়তেরা আপনাদের ভূমিতে যে ফসল ইচ্ছা সেই ফসল বুনিতে পারিবে, তাহাতে অন্য কেহই বাধা দিতে পারিবেন না। পূর্বে রাইয়তদিগের চিত্তক্ষেত্রে আশাভরসার যে অঙ্কুর হইয়াছিল, তাহা এই পরওয়ানা দ্বারা এক কালে বর্ধিত হইয়া উঠিল। ১৮৫৯ খৃঃ অব্দে, সমস্ত রাইয়ত “অদৃষ্টে বাহাই ঘটুক, নীল বুনা নি আর কোন মতেই করিব না” এই দৃঢ় সংকল্প করিলেন। অনতি দীর্ঘকাল মধ্যেই নীলকর ও রাইয়তের মধ্যে বিষম বিবাদ আরম্ভ হইল। সে সময় মহামতি জে. পি. গ্রান্ট সাহেব বঙ্গ রাজ্যের লেপ্টেন্যান্ট গবর্নর হইয়াছিলেন। তাঁহার প্রস্তাবানুসারে নীলকরের আশু অনিষ্ট নিবারণ, নীল কার্যের প্রচলিত প্রণালীর তত্ত্বানুসন্ধান, এবং এই কার্যের কোন নির্দোষ প্রণালী নির্ধারণ নিমিত্ত ১৮৬০ অব্দের একাদশ বিধি প্রকাশিত হইল। প্রথমোক্ত বিষয় নিষ্পাদনের জন্য মাজিস্ট্রেটেরা যত্ন করিতে লাগিলেন এবং শেষোক্ত কার্য দ্বয় সম্পাদনার্থ পাঁচজন কমিশনার * নিযুক্ত হইলেন। কমিশনারগণ, জজ ও মাজিস্ট্রেট প্রভৃতি অনেক প্রধান প্রধান রাজপুরুষ, মিশনারি সাহেব, জমীদার, নীলকর ও রাইয়ত প্রভৃতি বিবিধ শ্রেণীর লোকের সাক্ষ্য গ্রহণ, এবং নীল সম্বন্ধীয় বিবিধ কাগজ পত্র দর্শন করণানন্তর তাঁহাদের মধ্যে চারিজন বর্তমান নীলকার্য প্রণালীর বহুবিধ দোষ কীর্তন করিয়া গবর্নমেন্টের নিকট বিজ্ঞাপনী প্রদান করিলেন। ইহাতে নীলকর সাহেবেরা পূর্বমত বল প্রয়োগে অশক্ত হইয়া বহুতর চুক্তি ভঙ্গের মোকদ্দমা উত্থাপন করিতে লাগিলেন। এই সকল মোকদ্দমার নিষ্পত্তির নিমিত্ত গবর্নমেন্টের

* W. S. Setonkar, President, R. Temple, W. F. Ferguson, Reverend I Sale, Baboo Chunder Nath Chatterjee

অনেক ডেপুটী কালেক্টর নিযুক্ত করিতে হইল । যদিও এইরূপ মোকদ্দমায় অনেক রাইয়তের সর্বনাশ হইয়া গেল, তথাপি তাহাদের নীল না করার প্রতিজ্ঞা অটলই থাকিল । অল্প কাল মধ্যেই নীলকরগণের সোভাগ্য-সূর্য্য অস্তমিত হইল । অনেকেরই কুটী ও ভূসম্পত্তি বিক্রীত হইয়া গেল । এই জেলার মধ্যে ইদানীং যে সকল নীলকর সাহেব আছেন, তাঁহাদের আর পূর্ব্বমত প্রাদুর্ভাব নাই । অধিবাসীদিগের মধ্যে যাহারা নীল ব্যবসায় করিয়াছেন ও করিতেছেন, তাঁহাদের দ্বারা রাইয়তের অবস্থার কোন বিশেষ পরিবর্তন হয় নাই বলিয়া, আমি তাঁহাদের বিষয় কিছু লিখিলাম না । *

দ্বিতীয় অধ্যায় ।



যবনাধিকারে বঙ্গ রাজ্যের এ প্রদেশে স্বত্বাস্বত্বের ও অপরাধের যে রূপ বিচার প্রণালী ছিল, তাহার সংক্ষিপ্ত বিবরণ এই যে, নবাব নাজিম প্রতি রবিবারে গুরুতর অপরাধের বিচার করিতেন । ঐ দিবস রোজ আদালত্ অর্থাৎ বিচারের দিন বলিয়া খ্যাত ছিল । দেওয়ানের প্রতি ভূসম্পত্তির সত্বাস্বত্বের বিচার করিবার ভার ছিল । কিন্তু তিনি প্রায় স্বয়ং বিচারাসনে বসিতেন না, আদালৎ দেওয়ানীর দারোগা তাঁহার প্রতিনিধি স্বরূপ হইয়া ঐক্যায় সম্পন্ন করিতেন । দারোগায় আদালতল আলিয়া অর্থাৎ প্রধান

* নীল বিদ্রোহ বিষয়ের তদন্ত জন্য ১৮৬০ অব্দে গবর্ণমেন্ট কর্তৃক নিয়োজিত কমিশনারদিগের রিপোর্ট হইতে ইহার অধিকাংশ সঙ্কলিত ।
পৃ. ১৫, ১৬, ১৭, ২১, ৩১, ৩২, ৩৩, ৪১, ৫২ ।



জি - 282
Acc 22269
29/08/2026

আদালতের দারোগা ভূমি ব্যতীত অন্য সম্পত্তির সত্বাসত্ত্বের বিচার কার্যে নিযুক্ত থাকিতেন, এবং কোন কোন অপরাধের প্রমাণ গ্রহণ পূর্বক নবাব নাজিম সম্মিধানে তদ্বিবরণ জানাইতেন। কোর্জদার লঘু অপরাধের বিচার করিতেন, এবং গুরু অপরাধের প্রমাণ লইয়া তাহার অবস্থা সমস্ত নবাব সমীপে লিখিয়া পাঠাইতেন। কাজি যখন সম্প্রদায়ের উত্তরাধিকারিত্বের বিচার ও পৌরহিত্য করিতেন। মহতসব মদমত্ততার শাসন ও দোকানীদিগের বাটখরার পরীক্ষা করিয়া বেড়াইতেন। মুক্তি ধর্মশাস্ত্রের ব্যাখ্যা কারক ছিলেন, এবং কাজিও মহতসবের বিচার কার্যের সহায়তা করিতেন। তিনি বাদী প্রতিবাদীর পক্ষের সাক্ষ্য ও প্রমাণ লইয়া ফতোয়া অর্থাৎ ব্যবস্থা দিতেন, এবং কাজি ঐ ব্যবস্থানুসারে বিচার নিষ্পন্ন করিতেন। কাজির ও মহতসবের বিবেচনায় ঐ ব্যবস্থা ন্যায্যানুগত অথবা শাস্ত্রানুমত বোধ না হইলে, নবাব নাজিম কাজি, মহতসব, মুক্তি, দারোগা এবং মৌলবিকে আহ্বান পূর্বক এক সভা করিয়া ঐ বিষয়ের মীমাংসা করিয়া দিতেন। কানুনগো ভূসম্পত্তির রেজিষ্টার ছিলেন। তাঁহার নিজের কোন ক্ষমতা ছিল না, কোন স্থানের ভূমির উর্বরতা কি রূপ, তাহার ন্যায্য কর কত ইত্যাদি বিষয়ের হিসাব রাখিতেন এবং নবাব, দেওয়ান এবং দারোগার নিকট তাহা জানাইতেন। কোতওয়াল কোর্জদারের অধীনে থাকিয়া রাত্রিতে নগর রক্ষা করিতেন। এই সমস্ত রাজ-পুরুষ বঙ্গদেশের প্রধান রাজধানীতে অবস্থিতি করিতেন। ইংরাজ অধিকারের অব্যবহিত পূর্বে মুরশিদাবাদ বঙ্গদেশের প্রধান রাজধানী ছিল। সকল প্রদেশের মোকদ্দমা তথায় হইতে পারিত, কিন্তু যাহারা স্বয়ং উপস্থিত হওনে অসমর্থ হইতেন তাঁহাদের মোকদ্দমা ঐ স্থানে হইবার উপায় ছিল না। কাজির প্রতিনিধি

সকল প্রদেশে থাকিতেন । রাজধানীর বহিঃপ্রদেশে উপরোক্ত সমস্ত কার্যের মধ্যে কাজির কার্য ব্যতীত আর আর বিচার কার্য জমীদার, ইজারদার, শিকদার, এবং রাজস্ব সংক্রান্ত অন্য অন্য কর্মচারীগণ নির্বাহ করিতেন * ।

কোম্পানীর বঙ্গরাজ্যের দেওয়ানী সনন্দ প্রাপ্তির পর ৪ বৎসর পর্যন্ত বঙ্গদেশের শাসন ভার পূর্বমত অধিবাসীদিগের হস্তেই থাকে । খৃঃ ১৭৬৯ অব্দে এদেশের প্রতি বৃহৎ বিভাগে এক এক জন ইংরাজ সুপারবাইজর নিযুক্ত হন । খৃঃ ১৭৭২ অব্দে গবর্নর জেনেরল ওয়ারিন্ হেস্টিংস্ সাহেব রাজ্যের বিচার কার্য স্বহস্তে লন । তিনি, সুপারবাইজরের পদ উঠাইয়া দিয়া, এ দেশের প্রতি বিভাগে কালেক্টরী ও দেওয়ানী কার্য নির্বাহের জন্য এক এক জন ইংরাজ নিযুক্ত করেন, এবং ফৌজদারী কার্য এ দেশীয় লোকদিগের হস্তেই রাখেন ; কিন্তু তাঁহাদিগকে কালেক্টরের অধীন করিয়া দেন । মুরশিদাবাদ হইতে রেবিনিউ বোর্ড কলিকাতায় উঠিয়া যায়, এবং কর সংগ্রহ কার্যের কাছারী মুরশিদাবাদ হইতে কলিকাতায় আনীত হয় । দুই বৎসর অতীত না হইতেই কালেক্টরের পদ উঠিয়া যায় এবং তৎসংক্রান্ত কার্য পুনরায় অধিবাসীদিগের হস্তে অর্পিত হয় । ১৭৮১ অব্দে ফৌজদারী পদ রহিত হইয়া তৎসম্বন্ধীয় কার্য সম্পাদনের ভার সিবিল্ জজ ও ভূম্যধিকারিগণের প্রতি প্রদত্ত হয় † । তদনন্তর লর্ড

* খৃঃ ১৭৭২ অব্দের আগষ্ট মাসের পঞ্চদশ দিবসে কমিটি আব সার্কিট নামক রাজপুরুষগণ কাশিমবাজার হইতে কলিকাতার কৌনসল্কে যে পত্র লেখেন তাহা হইতে উদ্ধৃত ।

† Hunter's Annals of Rural Bengal, pp. 262, 265, 266, 392, 393.

করণওয়ালিস্ দেশের রীতি নীতি অবগত হইবার নিমিত্ত প্রত্যেক বিভাগে এক এক জন প্রবীন ও প্রাজ্ঞ ইংরাজ নিযুক্ত করেন, এবং তাহাদের হস্তে কালেক্টরী, দেওয়ানী, ফৌজদারী, এবং পুলিশের কার্যের ভার দেন । এই নিয়ম তিন বৎসর থাকে * ।

পূর্বে খৃঃ ১৭৬৫ অব্দে নবাবের সহিত কোম্পানির এই রূপ সন্ধি হয় যে, রাজস্ব সংগ্রহের ভার ইংরাজেরা লইবেন এবং ফৌজদারী কার্য নবাব সম্পাদন করিবেন । কিন্তু নবাবকে কর্তব্য নিষ্পাদনে অসমর্থ বলিয়া, হেষ্টিংস্ সাহেব, ১৭৭২ অব্দে, এক প্রধান ফৌজদারী আদালত কলিকাতায় এবং তদধীনে এক এক ফৌজদারী আদালৎ প্রতি জেলায় সংস্থাপিত করেন, কিন্তু ১৭৭৫ অব্দে পুনরায় ঐ ফৌজদারী বিচারের ভার নবাবের হস্তে যায় এবং ১৭৯০ অব্দ পর্য্যন্ত থাকে † । লর্ড করণওয়ালিস্ প্রথম ৪ বৎসর এ বিষয়ে হস্তক্ষেপণ করিতে সাহস করেন না, কিন্তু উক্ত কার্য সম্পাদনে নবাবকে নিতান্ত অক্ষম দেখিয়া, অবশেষে কলিকাতায় গবর্নর জেনারেলের কর্তৃত্বাধীন এক সুপ্রীম ক্রিমিন্যাল কোর্ট, এক কোর্নসিল, এবং চারি কোর্ট আব্ সার্কিট সংস্থাপিত করেন । এই সকল বিচারালয়ের বিচারের অযোগ্য ক্ষুদ্র ক্ষুদ্র অপরাধের বিচারের ভার জেলার ইংরাজ মাজিষ্ট্রেটের প্রতি অর্পিত হয় । এই সমস্ত রাজপুরুষদিগের কার্যপর্যালোচনার্থ কলিকাতায় এক সুপ্রিম্ কোর্ট সংস্থাপিত হয় । অপরাধের বিচার মুসলমান শাস্ত্রানুসারে হইতে থাকে, এবং তজ্জন্য মুসলমান্ এসেসর রাখিতে হয় ‡ ।

* Hunter's Annals of Rural Bengal, P. 267.

† Do. Do. p. 329.

‡ Do. Do. p. 330.

এইরূপে অধিবাসীদিগের হস্ত হইতে প্রায় সমস্ত বিচারের কার্য উঠিয়া যায় ; কেবল কাজির হস্তে সনন্দ রেজিষ্টরি করিবার ক্ষমতা এবং জমীদারদিগের দশ টাকার অনধিক দাবীর মোকদ্দমার বিচার করিবার অধিকার থাকে । কিয়ৎ কালানন্তর জেলায় জেলায় ফৌজদারী ও দেওয়ানী বিচারালয় সংস্থাপিত হইলে জমীদারগণের ঐ ক্ষমতা রহিত হইয়া যায়, এবং কাজির সনন্দ রেজিষ্টরি করণের যে ক্ষমতা থাকে তাহাও ১৮৬৪ খৃঃ অব্দের একাদশ বিধি দ্বারা বর্জিত হয় ।

রাজবাটীতে জনশ্রুতি আছে, যে যখন রাজত্ব কালে নবদ্বীপের রাজারা আপন অধিকার মধ্যে সর্বপ্রকার সম্পত্তির স্বত্বাশ্বত্বের ও সর্বপ্রকার অপরাধের বিচার করিতেন । রাজা, প্রতিদিন কোন নির্দিষ্ট সময়ে, বিচারাসনে বসিয়া, সর্বসাধারণের আবেদন শুনিতেন ও তাহার বিচার করিতেন । স্বত্বাশ্বত্বের বিচার প্রথমে তাঁহার দেওয়ান করিতেন কিন্তু তাহার চূড়ান্ত আদেশ রাজা দিতেন । অপরাধের বিচারের ভার তাঁহার ফৌজদারের প্রতি অর্পিত ছিল । এই উভয় কর্মচারীর কৃত বিচারের আপীল রাজ-সন্নিধানে হইত । রাজা অবিচার করিলে তাহার আপীল নবাবের নিকট হইতে পারিত । কিন্তু রাজার বিচারের বিরুদ্ধে আপীল করা অতি দুঃসাহসের কর্ম ছিল । অর্থ ও শারীরিক উভয়বিধ দণ্ড প্রচলিত ছিল । সুশাসনভাবে জমীদারী মধ্যে কোন বিশৃঙ্খলা ঘটিলে রাজা বা তাঁহার প্রধান কর্মচারীরা নবাবকর্তৃক দণ্ডিত হইতেন । রাজা কৃষ্ণচন্দ্র রায়ের সময়ে, হুগলির ফৌজদারের প্রেরিত রাজস্ব পলাশী গ্রামে অপহৃত হওয়াতে রাজার দেওয়ান রঘুনন্দন মিত্র নবাবের আদেশানুসারে নিহত হন । ইহার বিস্তারিত বিবরণ যথাস্থানে বর্ণিত হইবে ।

তৃতীয় অধ্যায় ।

মব্বাপের রাজারা অশ্রুপূর্ণ অপরাধে অতি গুরুতর দণ্ড বিধান করিতেন । শূনিয়াছি, চৌর্য্যাপরাধীরা বিবিধ শারীরিক দণ্ড পাইত, বন্দীভূত থাকিত, এবং ধাত্ত ভোজন করিয়া জীবন ধারণ করিত । কিন্তু শাসনের সুপ্রণালী অভাবে অধিবাসীরা নিশ্চিন্ত চিত্তে কাল-যাপন করিতে পারিতেন না । পাছে দস্যুদিগের লোভপথে পতিত হন, এই আশঙ্কায় যঁহারা স্বচ্ছন্দাবস্থায় কালাতিপাত করণে সমর্থ ছিলেন, তাঁহারাও অতি দীনাবস্থায় থাকিতেন । তাঁহাদের অর্থ চন্দ্র সূর্য্যেরও গোচর হইত না, নিয়ত গৃহের প্রাচীর মধ্যে অথবা ভূগর্ভে নিহিত থাকিত । ঋণের আদান প্রদান কার্য্য পর্য্যন্ত অতি সঙ্কোপনে সম্পাদিত হইত । অধিক লোকের বিদিত হইবার আশঙ্কায়, ঋণপত্রে অথ সাক্ষী না করিয়া কখন কখন কেবল ধর্ম্ম সাক্ষী লিখিত হইত । দস্যু তস্কর ভয়ে সাধারণ লোকেরা ঘরের মেঝের মধ্যস্থলে একটি গর্ত্ত রাখিতেন, এবং রাত্রিতে আভরণ ও তৈজসাদি তন্মধ্যে রাখিয়া তত্পরি এক কাষ্ঠ-কলক প্রদান পূর্ব্বক তাহার উপর শয্যা করিয়া নিদ্রা যাইতেন । সন্ধ্যার পর প্রায়ান্তরে যাইতে হইলে বিষম বিপদ উপস্থিত হইত । স্থলপথ অপেক্ষা জলপথ আরও বিপজ্জনক ছিল ।

যখন-রাজত্বকালে দস্যুদিগের যে শাসন ছিল, ইংরাজাধিকার প্রারম্ভে তাহাও লুপ্তপ্রায় হয়, এবং দেশমধ্যে নিতান্ত অরাজ-কতা হইয়া উঠে । পূর্বে ভূম্যধিকারীদিগের যে কমতা ও প্রভুত্ব থাকিতে দস্যুত্বের অনেক দমন ছিল, এদেশে ইংরাজ অধিকৃত

হইলে সে ক্ষমতা ও প্রভুত্ব থাকিল না, অথচ তাহার পরিবর্তে কোন সুশাসন প্রণালীও সংস্থাপিত হইল না। সুতরাং দস্যুদল আরও প্রবল হইয়া উঠিল। অনেক জমীদারী-চ্যুত জমীদারগণ বহু দস্যুপোষণ করিয়া চৌর্য্যবৃত্তি অবলম্বন করিল। অপহারকগণ কখন কোম্পানির সৈন্তের পরিচ্ছদ পরিয়া লুট করিতে লাগিল, কখন সন্ন্যাসী বা ককিরের বেশ ধারণ পূর্ব্বক, কখন ভিক্ষা কখন চুরি আরম্ভ করিল। ১৭৭০ খৃঃ অব্দের দুর্ভিক্ষের পর অনেক কৃষকেরাও চৌর্য্যবৃত্তি অবলম্বন করিয়াছিল। তাহারা অনেক বার কোম্পানির সৈন্যকেও হত আহত করে। পূর্ব্ব ঠগ ও ডাকাইত নামে দুই তরুর-সম্প্রদায় ছিল। ইহারা গ্রামে অগ্নি দিয়া লুট করিত। ইংরাজ রাজপুরুষদিগের বহু চেষ্টা সত্ত্বেও ৭৫ বৎসর পর্য্যন্ত বঙ্গদেশবাসীরা এইরূপ অত্যাচারে প্রীড়িত হয়। ১৭৮০ খৃঃ অব্দে দস্যুরা কলিকাতায় পঞ্চদশ সহস্র গৃহ ও দুইশত লোক ভস্মসাৎ করে*। কলিকাতাবাসী ইংরাজরাও রাত্রে ভোজনের সময়ে দ্বার বন্ধ করিয়া রাখিতেন, এবং যাবৎ তাহাদের ভোজন ও পান পাত্র নিরাপদ স্থানে রক্ষিত না হইত, তাবৎ দ্বার উদ্ঘাটিত করিতেন না†।

বর্তমান শতাব্দীর প্রথমে কৃষ্ণনগরের পূর্বাংশে ৬ ক্রোশ মধ্যে বিশ্বনাথ, বৈদ্যনাথ, এবং পীতাম্বর নামে ৩ জন প্রসিদ্ধ দস্যু ছিল। প্রায় পাঁচ শত লোক তাহাদের দলভুক্ত হইয়াছিল। প্রথমোক্ত দুই ব্যক্তি বাগ্দী ও শেষোক্ত ব্যক্তি মোসলমান। কয়েক বর্ষাবধি এপ্রদেশবাসীরা ইহাদিগের ভয়ে সর্ব্বদা উৎকণ্ঠায়

* Hunter's "Annals of Rural Bengal," pp. 70, 71—73.

† Do. Do. p. 74.

কালষাপন করিতেন । রজনীতে প্রায় ধনী মাত্রে স্ন্যুপ্তিজনিভ স্নুখ সম্ভোগে বঞ্চিত থাকিতেন । তৎকরগণের ঈদৃশী স্পর্দ্ধা হইয়াছিল যে, তাহারা কখন কখন ধনশালী ব্যক্তিদিগকে লিখিয়া পাঠাইত যে তুমি অমুক সময়ে অমুক স্থানে এত টাকা পাঠাইবে । যদি না পাঠাও তবে রাত্রিতে তোমার সহিত আমাদের সাক্ষাৎ হইবে । তাহারা অনেক জমিদারের বাটী ও নীলকরের কুটী পর্য্যন্ত লুণ্ঠন করে ।

যদিও তাহাদের আবাসস্থল পুলিশের অগোচর ছিল না, এবং যদিও তাহারা নিতান্ত লুণ্ঠায়িত থাকিত না, তথাপি তৎকালে পুলিশ এতই দুর্বল ও অপটু ছিল যে, কয়েক বৎসরাবধি তাহাদিগকে ধরিতে পারে নাই । অবশেষে ১২১৫ বাঃ অঙ্গে তাহাদের দলভুক্ত দুই এক জনের বিশ্বাসঘাতকতায় তাহারা পুলিশের হস্তে পতিত হয় । ইহাদের মধ্যে অনেকেরই কাঁশি হইয়াছিল । বিশ্বনাথ যেমন ধনীদিগের ধন অপহরণ করিয়া লইত তেমনই দুঃখী দরিদ্রদিগকে যথেষ্ট অর্থ দানও করিত । এই কারণে সে বিশ্বনাথ বাবু নামে প্রসিদ্ধ হইয়াছিল । নবদ্বীপের রাজসংস্রষ্ট কোন ব্যক্তির ধন অপহরণ করিত না । তাদৃশ কোন লোক, তাহাদের হস্তে পতিত হইলে, যদি বলিত যে আমি রাজার চাকর অথবা এই দ্রব্য রাজার, তবে তাহার সঙ্গে নিজের লোক দিয়া নির্দ্বিগ্ন স্থানে পৌঁছাইয়া দিত । বিশ্বনাথের পুত্র অদ্যাপি বর্তমান আছে ।

চতুর্থ অধ্যায় ।

এই জমীদারী নবদ্বীপ, অগ্রদ্বীপ, চক্রদ্বীপ, কুশদ্বীপ, এই চারি সমাজে বিভক্ত ছিল। জমীদারিস্থ ব্রাহ্মণ, শূদ্র প্রভৃতি সমস্ত বর্ণ এই চারিসমাজভুক্ত ছিলেন। জমীদারীর কোন্ প্রদেশ কোন্ সমাজের অন্তর্ভুক্ত, এক্ষণে তাহার কোন নিদর্শন পাওয়া যায় না। কিন্তু কোন কোন প্রাচীন রাজকুটুম্ব মুখে শুনিয়াছি, যে এই জমীদারীর উত্তর প্রদেশ অগ্রদ্বীপ সমাজ, মধ্য প্রদেশ নবদ্বীপ সমাজ, দক্ষিণ প্রদেশ চক্রদ্বীপ সমাজ, এবং পূর্বপ্রদেশ কুশদ্বীপ সমাজের অন্তর্গত ছিল। চক্রদ্বীপ ও কুশদ্বীপ ইদানীং চাকদহ ও কুশদহ নামে খ্যাত আছে। ব্রাহ্মণ সম্প্রদায়ের অধিকাংশ প্রায়ই শাক্ত ও অত্যাশ্রয় বৈষ্ণব, এবং শূদ্রবর্ণের অধিকাংশ বৈষ্ণব ও ক্রিয়দংশ শাক্ত ছিল। রাজারা শাক্ত, কিন্তু বৈষ্ণব ধর্মের প্রতিও বিশেষ শ্রদ্ধা করিতেন। ইহারা পুরাণোক্ত বিবিধ অবতারের ধাতু প্রস্তরময়ী প্রতিমূর্তি প্রতিষ্ঠা করিয়াছেন, এবং তাঁহাদের সেবার নিমিত্ত বিস্তর ভূমি দান করিয়াছেন। কালী কৃষ্ণ উভয়েরই প্রতি ইহাদের নির্বিশেষ ভক্তি ছিল। ইহারা কেবল চৈতন্যোপাসক সম্প্রদায়ের প্রতি বিশেষ বিদ্বেষ করিতেন।

এই রাজারা উল্লিখিত চারি সমাজের পতি বলিয়া প্রসিদ্ধ ছিলেন, এবং পুরোেল্লিখিত সমস্ত বর্ণের উপর তাঁহাদের অবিসম্বাদিনী প্রভুতা ছিল। ধর্ম কর্ম সম্বন্ধে তাঁহারা যে কোন ব্যবস্থা করিতেন তাহাই বঙ্গদেশের সর্বত্র আদরের সহিত পরিগৃহীত হইত। কদাচারীদিগকে জাতি-চ্যুত এবং পতিতকে উদ্ধার করিতেন।

শূদ্র জাতির মধ্যে কেহ দুর্কর্ম দোষে পতিত হইলে রাজসনন্দব্যতীত কখনই সমাজ-চলিত হইত না। ধর্ম বিষয়ে কোন সংশয় উপস্থিত হইলে, অন্য প্রদেশের রাজারাও ইহাদের নিকট ব্যবস্থা লইতেন। রাজা কৃষ্ণচন্দ্র রায় জগদ্ধাত্রী ও অন্নপূর্ণা পূজা প্রবর্তিত করেন। ইদানীং বঙ্গদেশের প্রায় সর্বত্র এবং অন্য অন্য দেশের কোন কোন স্থানে এই পূজা মহা সমারোহপূর্বক সম্পাদিত হইয়া থাকে। উজনিয়া গোপ সম্প্রদায়ের জল পূর্বে ব্যবহৃত ছিল না। এই রাজারা এপ্রদেশে তাহাদিগকে চলিত করেন। শুনিয়াছি রাজারা যে কোন শূদ্র জাতীয় বালক ক্রয় করিয়া আপনাদের পরিচর্যা কার্যে নিযুক্ত করিতেন, তাহারা যে জাতি হউক না কেন তাহাদিগকে কায়স্থ বলিয়া প্রসিদ্ধ করিতেন। যদিও তাহারা পূর্বে কায়স্থ শ্রেণীর মধ্যে অপদস্থ ছিল, কিন্তু ইদানীং তাহাদের কেহ কেহ সৌভাগ্য প্রভাবে অন্য অন্য কায়স্থগণের সমকক্ষ হইয়া উঠিয়াছে।

শাস্ত্রে নির্দেশ আছে যে, ব্রাহ্মণ স্ববৃত্তি দ্বারা জীবিকা নির্বাহে অসমর্থ হইলে ক্ষত্রিয়বৃত্তি অবলম্বন করিবেন, এবং তাহাতেও জীবনযাত্রা সমাধান না হইলে বৈশ্য বৃত্তির আশ্রয় লইবেন; কিন্তু বঙ্গদেশীয় ব্রাহ্মণগণ যে কখন ক্ষত্রিয়বৃত্তি অবলম্বন করিয়াছেন এরূপ শ্রবণগোচর হয় নাই। এ অধিকারস্থ বিপ্র সম্প্রদায়ের মধ্যে অত্যুৎপন্ন লোক অধ্যাপন, যাজন এবং মন্ত্রদান ব্যবসায় করিতেন। ওদ্ব্যতীত প্রায় সমস্ত ব্রাহ্মণ বৈশ্যবৃত্তি বা কৃষিজীবী অথবা শূদ্রবৃত্তি বা চাকুরে ছিলেন। কৃষিজীবী বিপ্রগণ কৃষিসংক্রান্ত কোন কার্য্য স্বহস্তে করিতেন না, শূদ্র বা যবন জাতীয় ভূত্য দ্বারা সকল কর্ম সম্পন্ন করাইতেন। লেখা পড়া চাকুরীর সহিত কিঞ্চিৎ প্রভুত্ব থাকে বলিয়া তাহারা প্রায় সকলেই এই চাকুরীর অভিলষী

হইতেন । কিন্তু পূর্বকালে এরূপ চাকুরীর সংখ্যা অতি অল্প ছিল । কারণ তৎকালে জমিদারী কার্য ব্যতীত লেখা পড়ার অন্য কোন-রূপ কর্ম অধিক ছিল না । রাজাদের সদর কাছারিতে ন্যূনাধিক দুই শত কর্মচারী থাকিতেন । মকস্মলে প্রত্যেক পরগণায় নায়েব, পেস্কার, খাজাকি, আখাট্টা, নবিস্, ও মুহুরী প্রভৃতি দশ বার জন কর্মকারক নিযুক্ত হইতেন, এবং তাঁহাদের অধীন প্রতিগ্রামে সচরাচর এক জন গোমস্তা, ও বৃহৎ গ্রাম হইলে এক জন গোমস্তা ও এক জন মুহুরী কর্ম করিতেন । তদানীন্তন কায়স্থ জাতীয়েরা এই সকল কার্যে বিশেষ পটু ছিলেন, সুতরাং ব্রাহ্মণ-শ্রেণীর অধিক লোক এ সকল কর্ম প্রাপ্ত হইতেন না ।

অধুনাতন বিপ্রসন্তানগণ যে সকল ক্ষত্রিয়বৃত্তি অবলম্বন করিয়া সম্মান ও যশের সহিত কাল যাপন করিতেছেন, পঞ্চাশ বৎসর পূর্বের ব্রাহ্মণেরা ঐ সকল বৃত্তি অবলম্বন করিলে অপদস্থ হইতেন । তৎকালীন বিপ্রগণ নাজির বা দারোগার পদ পর্য্যন্ত গ্রহণ করিতে পারিতেন না । এ রাজবাটীর প্রধান দ্বারের জমাদারী পদ অতি সম্ভ্রান্ত ছিল । জমাদার অন্যান্য সম্ভ্রান্ত পদস্থ কর্মচারীর ন্যায় সভায় বসিতে পাইতেন, ও রাজভবন গমনাগমন ও নগর ভ্রমণ কালে দশ জন অখারোহী তাঁহার সমভিব্যাহারে চলিত । কাণ্ডকুজের অতি সদাচারী ও সম্ভ্রান্ত ব্রাহ্মণেরাও ঐ পদ প্রাপ্ত হইলে আপনাকে চরিতার্থ মনে করিতেন, কিন্তু এ প্রদেশস্থ অতি সামান্য ব্রাহ্মণ, যিনি ঐ জমাদারের অধীনে বৎসামান্য মুহুরিগিরী কর্ম করিতেন, তিনিও জমাদারী পদ গ্রহণ করিতেন না । এক্ষণে ইদানীন্তন দ্বিজগণ কনফেবলী কর্ম করিতেছেন, তথাপি সমাজচ্যুত বা অপদস্থ হইতেছেন না ।

ইদানীং বিপ্রসন্তানেরা বিবিধ প্রকার দ্রব্যের বিপণি করিয়া

ক্রয় বিক্রয় করত খ্যাতি ও প্রতিপত্তি লাভ করিতেছেন, কিন্তু পূর্বকালীন ব্রাহ্মণেরা লোক দ্বারা ঐ সকল ব্যবসায় করিলেও সমাজ বহির্ভূত হইতেন। ইদানীন্তন ব্রাহ্মণ পণ্ডিতগণের আচার ব্যবহার যেরূপ হইয়াছে, পুরা কালে সেরূপ ছিল না। তদানীন্তন ব্রাহ্মণ পণ্ডিতেরা, যে সকল জাতিকে অধ্যাপন বা মন্ত্রদান করিলে অথবা যে জাতির যাজকতা বা দান গ্রহণ করিলে, আপনাকে পাপ-গ্রস্ত জ্ঞান করিতেন এবং ভদ্র মণ্ডলীতে বিশেষ দোষাম্পদ হইতেন, অধুনাতন ব্রাহ্মণ পণ্ডিতদিগের মধ্যে অনেকে সেই জাতির অধ্যাপন, মন্ত্রদান, অথবা দান গ্রহণ করিতে কিস্কিন্মাত্র কুণ্ঠিত হন না।

ব্রাহ্মণ শ্রেণীর মধ্যে পূর্বে আর এক প্রকার ব্যবসায় ছিল, (এক্ষণেও কিয়ৎ পরিমাণে আছে) বোধহয় বঙ্গদেশ ব্যতীত এরূপ আশ্চর্য্য অশ্রদ্ধেয় ব্যবসায় অন্য কুত্রাপি প্রচলিত নাই। ইহার নাম বিবাহ ব্যবসায়। কুলীন ব্রাহ্মণ ও কতকগুলি ভঙ্গকুলীনদিগের মধ্যে অধিকাংশ এই ব্যবসায়ী ছিলেন। তাঁহারা অন্য কোন বিষয় কর্ম করিতেন না, কেবল মনোমত অর্থলাভ হইলেই যত ইচ্ছা বিবাহ করিতেন। তাঁহারা কদাচিৎ নিজ নিকেতনে এবং প্রায় সর্বদাই নিজের বা পুত্রের শ্বশুরালয়ে অবস্থান করিতেন। যিনি যতই দার-পরিগ্রহ করুন, প্রায়ই একটি স্ত্রী লইয়া সংসার ধর্ম্য করিতেন। আপনার বা তনয়ের উদ্ধাহে যে ধন উপার্জন করিতেন, এবং মধ্যে মধ্যে শ্রোত্রিয়ের বাটীতে বিবাহ উপলক্ষে কুলীন বিদায় বলিয়া যে কিঞ্চিৎ অর্থ প্রাপ্ত হইতেন, তাহাই তাঁহাদের সংসার-যাত্রা নির্বাহের সম্বল হইত। এই কুলীনদিগের মধ্যে প্রায় কেহই কোন বিদ্যানুশীলন করিতেন না, এবং অনেকে সন্ধ্যা আঙ্কিক পর্য্যন্তও শিখিতেন না। অহঙ্কারপূর্বক কহিতেন যে আমরা

কুলীন সম্ভান, আমাদের বিদ্যাভ্যাসের প্রয়োজন কি ? নবদ্বীপ অধিকারস্থ কুলীনদিগের মধ্যে ইদানীং এরূপ ব্যবসায়ের দিন দিন হ্রাস হইতেছে। অধুনাতন অনেক কুলীনেরা শ্রোত্রিয়দিগের স্থায় বিদ্যাভ্যাস করিয়া কৃতবিদ্য হইতেছেন, এবং ধনোপার্জন করিয়া আপন আপন পরিবার প্রতিপালন করিতেছেন। আর কোলীন্যাভিমান রক্ষা ব্যতীত ধন-লোভে বহু বিবাহ করা ক্রমেই মন্দীভূত হইয়া আসিতেছে।

পূর্বের শূদ্র জাতির যেরূপ ব্যবসায় ও আচার ব্যবহার ছিল তাহারও বিস্তর পরিবর্ত হইয়াছে। তৎকালে তন্তুবায়ের বস্ত্র বয়ন, কৰ্ম্মকারের লোহ দ্রব্য গঠন, স্বর্ণকারের অলঙ্কার নির্মাণ ইত্যাদি যে যে সম্প্রদায়ের যে যে ব্যবসায়, তাহারা তাহাই করিত। সামাজিক নিয়ম লঙ্ঘন শঙ্কায় ভিন্ন-সম্প্রদায়ের ব্যবসায়ে প্রবৃত্ত হইত না। ইদানীং যাহার যে ব্যবসায় করিতে ইচ্ছা অথবা সুবিধা হইতেছে তাহাই করিতেছেন। মুচি হাড়ি প্রভৃতি কতিপয় অত্যন্ত অন্ত্যজ জাতির ব্যবসায়ই স্ব স্ব সম্প্রদায় মধ্যে বদ্ধ রহিয়াছে।

এই অধিকারস্থ ব্রাহ্মণদিগের মধ্যে রাঢ়ীয়, বারেন্দ্র, বৈদিক, সপ্তসতি এবং কান্যকুব্জ এই কয়েক শ্রেণী ব্রাহ্মণ ছিলেন এবং এক্ষণেও আছেন। পূর্ব কালে ইহাদের মধ্যে পরস্পর আহার ব্যবহার ছিল না। যদি ঘটনাক্রমে এক শ্রেণীর লোক অত্র শ্রেণীর অন্ন ভোজন করিতেন, তবে তাঁহার নিন্দার সীমা থাকিত না। কেহ স্বশ্রেণীর মধ্যেও সজাতি ভিন্ন অন্যের অন্ন ভক্ষণ করিতেন না। অম্মকের অন্ন গ্রহণ করা হইবেক না, অম্মক দোষী ব্যক্তির অন্ন খাইয়াছেন, অতএব তাঁহার সহিত একত্র আহার করা যাইতে পারে না, ইত্যাদি বিষয় লইয়া সৰ্বদাই গোলযোগ এবং

দলাদলী উপস্থিত হইত। ব্রাহ্মণের অন্নভোজনে শূদ্র জাতির কোন আপত্তি ছিল না। তাহারা বিপ্রেয় পত্রাবশিষ্ট অন্নও দেবতার প্রসাদের স্থায় জ্ঞান করিয়া অতি ভক্তি সহকারে ভোজন করিতেন। কিন্তু আপন আপন জাতির মধ্যে ব্রাহ্মণদিগের স্থায় বিলক্ষণ আঁচাআঁচি ছিল। ইদানীং ব্রাহ্মণ শ্রেণীর মধ্যে অন্ন বিচার যেরূপ শিথিলীভূত হইয়া আসিতেছে, শূদ্র সম্প্রদায়ের মধ্যেও ক্রমে ক্রমে সেইরূপ ভাব লক্ষিত হইতেছে।

পূর্বকালে পানভোজনের যে প্রণালী ছিল, অদ্যাপি তাহার অধিক ব্যতিক্রম হয় নাই। অন্ন, ডাল, নিরামিষ ব্যঞ্জন, মৎস্য, দধি, দুগ্ধ, ঘৃত, এই কয়েক ধাত্ত দ্রব্য তদানীন্তন সাধারণ লোকের সচরাচর আহার ছিল। শাক্ত সম্প্রদায়ী লোকে কখন কখন ছাপ মাংস ভোজন করিতেন, কিন্তু এই ছাগ কোন শক্তি পূজার উদ্দেশে ছিন্ন না হইলে তাহার মাংস ভক্ষণ করিতেন না। কদাচিৎ কেহ মেষ ও যুগ মাংসও ভোজন করিতেন। গোধূম বা ঘব চূর্ণ পিষ্টকাদি কোন বিশেষ প্রয়োজন ব্যতীত ব্যবহৃত হইত না। ব্রাহ্মণ ও সংশূদ্রের বিধবারা নিরামিষ ভোজন ও একাহার করিতেন। বৈষ্ণব সম্প্রদায়ী লোক মাত্রেই মাংস স্পর্শ করিতেন না, এবং অনেকে মৎস্য আহারেও বিরত থাকিতেন। ৪০ বৎসর হইতে হিন্দু শাস্ত্র নিষিদ্ধ পান ভোজন কিয়ৎ পরিমাণে প্রচলিত হইতে আরম্ভ হইয়াছে।

ইদানীন্তন স্ত্রী পুরুষেরা যে রূপ পরিচ্ছদ পরিধান করিতেছেন, পূর্বকালীন লোকের সেরূপ পরিচ্ছদ ছিল না। তৎকালে, মধ্যবিত্ত ও হীনবিত্ত পুরুষেরা গ্রীষ্মকালে ধুতি ও দোবজা অথবা এক পাট্টা এবং শীতকালে ধুতি ও হামাম বা গ্লাপ ব্যবহার করিতেন। শীতকালে কদাচিৎ কেহ গায়ে বেনিয়ান বা মেজাই ও

মস্তকে টুণী দিতেন অথবা উকীষ বাঁধিতেন। মধ্যবিত্ত কোন কোন প্রবীণ ব্যক্তি প্রাতে বনাং ও রাত্রিতে কার্পাসপূর্ণ রেজাই ব্যবহার করিতেন। তরুণবয়স্কেরা শীত নিবারণার্থ দোলাই ব্যবহার করিত। কোন কোন ধনী সময় বিশেষে পটু বস্ত্র পরিধান করিতেন। শাল কমাল জামেয়ার প্রভৃতি মূল্যবান বস্ত্র অতি অল্প লোকেরই থাকিত। কি গ্রীষ্ম কি শীত সকল সময়েই, স্ত্রীগণের এক শাটী মাত্র পরিধেয় ছিল। তাহারা শীতানুভব করিলে আর এক খানি শাটী গাত্রে দিত। রাজসংসারের উচ্চ পদস্থ পুরুষেরা রাজভবন গমন কালে জামা ইজার ও পাকুড়ি ব্যবহার করিতেন। করচরণাচ্ছাদনার্থ কোন প্রকার বস্ত্র ব্যবহার করিতেন না। নবদ্বীপের রাজারা দেবার্চন ভোজন ও শয়ন কালে ধূতি ও দোবজা পরিতেন। কিন্তু অন্য অন্য সময়ে পশ্চিমোত্তরীয় নানাবিধ পরিচ্ছদ পরিধান করিতেন। রাজ্ঞী রাজবধু ও রাজকন্যারা কার্পাস বা কোষেয় শাটী পরিতেন; কিন্তু প্রায় সমস্ত শুভকর্মোপলক্ষে পশ্চিমোত্তর দেশীয় সম্ভ্রান্ত মহিলাগণের ন্যায় কাঁচুলি, ষাগরা এবং ওড়না পরিধান করিতেন। ইহারা শীত কালে বিবিধ বহুমূল্য কোষেয় ও রাক্ষব বস্ত্র অঙ্গে দিতেন এবং চর্মপাত্রকা ব্যবহার করিতেন। পূর্ব কালে কি উত্তম কি মধ্যম কি অধম কোন শ্রেণীর লোকই পাতলা কাপড় পরিতেন না। কেহ তাদৃশ বস্ত্র পরিলে জনসমাজে অতিশয় নিন্দাম্পদ এবং উপহাস-ভাজন হইতেন।

প্রথমতঃ নবদ্বীপ অধিকারেই শান্তিপুরে পাতলা ধূতি ও শাটী নির্মিত হইতে আরম্ভ হয়। ঢাকা নগরে বহুকালাবধি অতি সূক্ষ্ম ও পাতলা এক প্রকার বস্ত্র নির্মিত হইয়া থাকে, ইহা এদেশে শব-নম্ ও ইউরোপে ঢাকাই ব্রজলিন নামে খ্যাত এবং অতি

আগ্রহ সহকারে গৃহীত হয় । এতদেশীয় হিন্দু সমাজে তথাবিধ বস্ত্র ব্যবহৃত ছিল কিনা তাহার কোন নিদর্শন পাওয়া যায় না । অত্রত্য রাজবাটিতে অথবা অন্যত্র এরূপ বস্ত্র দৃষ্টিগোচর হয় নাই । যদিও শান্তিপুরের তন্তুবায়গণ নিজ ব্যবসায়ে বিশেষ নিপুণ, তথাপি এদেশে ব্যবহার না থাকাতে পাতলা ধুতি বা শাটী বয়ন করিত না । পরে যখন ঐ নগরে কোম্পানির বস্ত্র ব্যবসায়ের কুটী সংস্থাপিত হইল, তখন হইতেই ঐ কোম্পানির নিদেশানুসারে তন্তুবায়গণ ঢাকাই মজলিনের সদৃশ সূক্ষ্ম বস্ত্র প্রস্তুত করিতে লাগিল । আমি শান্তিপুরনিবাসী শতবর্ষ-দেশীয় এক জন তন্তুবায় মুখে অবগত হইয়াছি এবং তত্রত্য অন্য অন্য প্রাচীন লোক মুখে শুনিয়াছি যে, পূর্বে সূক্ষ্ম বস্ত্র বয়নোপযোগী তাঁত পর্য্যন্ত এ অধিকারে ছিল না । কোম্পানির লোকেরা শান্তিপুরের তাঁতিদিগকে এরূপ তাঁত প্রস্তুত করিয়া দেন । কুটীর কার্য বন্দ হইলে, তন্তুবায়গণ ঐ তাঁতে পাতলা ধুতি, উড়ানি ও শাটী বুনিতে আরম্ভ করে । ইহারা তৎপূর্বে নকশা পাড় বুনিতে জানিত না । কটক প্রদেশের এক জন তন্তুবায় তথা হইতে আসিয়া শান্তিপুরে অবস্থিতি করে । শান্তিপুরের তাঁতিরা তাহারই নিকট নকশা পাড় বুনিতে শিখে । সূক্ষ্ম বস্ত্রে নকশা পাড় ষেরূপ সূচাক হয়, ঘন বস্ত্রে সেরূপ হয় না । সুতরাং চিরাত্যস্ত সূক্ষ্ম বস্ত্রে নকশা পেড়ে ধুতি ও শাটী অতি সুন্দররূপে প্রস্তুত হইতে লাগিল ।

এই সকল পাতলা কাপড় প্রথমে শান্তিপুর বাসীরাই ব্যবহার করেন । তদনন্তর কলিকাতা অঞ্চলে ব্যবহৃত হইতে আরম্ভ হয় । ইতি পূর্বে বেশ ভূষা বিষয়ে এ প্রদেশস্থ লোকেরা শান্তিপুর ও কলিকাতা বাসীদিগের অনুকরণ করিতে উৎসুক ছিলেন ।

সুতরাং ঐ প্রকার বস্ত্র ক্রমশঃ এ প্রদেশের সর্বত্র পরিগৃহীত হইতে লাগিল । যদিও ইদানীং সৌভাগ্যক্রমে বিবিধ ঘন বুনানী বস্ত্র এদেশে আমদানি হওয়াতে অনেক পুরুষেরা পাতলা ধুতি পরিধানে বিরত হইয়াছেন, তথাপি তাঁহাদের অন্তঃপুরবাসিনীরা অদ্যাপি সকলে ঐরূপ বস্ত্রের ব্যবহার লজ্জাকর বোধ করেন না । যে সকল লজ্জাশীলা রমণীরা স্বীয় দেবরের সম্মুখেও অনবগুণ্ঠিত হইতে লজ্জিতা হন, তাঁহারাও ঐরূপ নাম মাত্র বস্ত্র পরিয়া সর্ব সমক্ষে উপস্থিত হইতে কিছু মাত্র সঙ্কুচিতা হন না ।

পূর্ব কালে এদেশে বিলাতী সূতার আমদানী ছিল না । এ দেশস্থ স্ত্রীলোকেরা যে সূত্র প্রস্তুত করিতেন তাহাতেই সর্ব-প্রকার বস্ত্র প্রস্তুত হইত । এ প্রদেশে সূতা কাটিবার দ্বিবিধ যন্ত্র বিদ্যমান আছে । তক্কু ও চরকা । প্রথমোক্ত যন্ত্র দ্বারা সূক্ষ্ম সূত্র ও শেষোক্ত যন্ত্র দ্বারা স্থূল সূত্র প্রস্তুত হয় । কিন্তু তক্কু অপেক্ষা চরকায় অল্পকাল মধ্যে অধিক সূত্র হয় বলিয়া অধিকাংশ যোষাগণ চরকা ব্যবহার করিতেন । প্রতিবেশী তন্তু-বায়গণ ঐ সকল সূতা কিনিয়া লইত । যাঁহারা যেরূপ সূক্ষ্ম সূত্র কর্তনে সমর্থ হইতেন তাঁহারা সেইরূপ অর্থ লাভ করিতে পারিতেন, এবং স্ত্রী মণ্ডলে তদনুরূপ প্রশংসা ভাজন হইতেন । এই ব্যবসায় দ্বারা নিঃস্ব লোকের সংসার যাত্রা নির্বাহের অনেক আনুকূল্য হইত । যদিচ মধ্যবিত্ত লোকেরা এই ব্যবসায়কে অপ-মানকর জ্ঞান করিতেন, তথাপি তাঁহাদের স্ত্রীলোকেরা যজ্ঞ-সূত্র বা নিজের বস্ত্র নির্মাণের ছলে অধিক সূত্র কর্তন করিতেন, এবং অতি সঙ্কোপনে অন্য স্ত্রীলোক দ্বারা বিক্রয় করাইয়া কিঞ্চিৎ কিঞ্চিৎ অর্থ সঞ্চয়ে সমর্থ হইতেন । এই সকল সীমাস্ত্রনীদিগের সূত্র কর্তনের অবস্থা স্মৃতিপথারূঢ় হইলে, অদ্যাপি হৃদয় আনন্দরসে অভিষিক্ত

হয়। তাঁহারা অকণোদয়ের পূর্বে গাত্ৰোত্থান করিয়া গৃহকার্য্যে প্রবৃত্ত হইতেন, এবং ক্রমান্বয়ে গৃহ মার্জ্জন, পানভোজন, পাত্র প্রক্ষালন, রন্ধন, পরিবেশন ইত্যাদি কার্য্য সমাপনানন্তর ভোজন করিতেন, এবং তৎপরে দিবসের শেষ ভাগে তিন চারি জন একত্রিত হইয়া সূত্র কর্ত্তনে বসিতেন। ঐ সময়ে তাঁহারা কখন মধুকরীর ন্যায় মৃদু মধুর স্বরে গান করিতেন অথবা বিবিধ মধুরালাপে পরস্পর আমোদিত হইতেন।

পূর্বে বিশেষ ধনবান্ ও সম্ভ্রান্ত না হইলে, আপনাদিগের কামিনীগণকে অধিক রত্নাভরণ ও স্বর্ণভূষণ দিতেন না। মধ্যবিত্ত মহিলাগণ নাশিকায় নথ, কর্ণদ্বয়ে নল ঝুম্কা বা ধেঁড়ি ঝুম্কা, গলদেশে পাঁচনর বা শাতনর বা কণ্ঠমালা, এই কয়েক খানি স্বর্ণালঙ্কার পরিতেন। আর বাহুদ্বয়ে তাড়, হস্ত দ্বয়ে বার্ডটি, গজরা, কশুন, কুশী, কঙ্কণ ও পুঁইচা, কটিদেশে গোট বা চন্দ্রহার, পাদ যুগলে মল, পদাঙ্গুলিতে পাশুলি, এই কয়েক খানি রজত নির্মিত আভরণ পরিধান করিতেন। অপেক্ষাকৃত হীনবিত্ত রমণীরা স্বর্ণাভরণের মধ্যে কেহ বা কেবল নথ ও কণ্ঠমালা, এবং তিন চারি খানি রূপার অলঙ্কার পাইলেই চরিতার্থ হইতেন। অধমাবস্থার স্ত্রীলোকের স্বর্ণ বা রজত নির্মিত কোন অলঙ্কার থাকিত না। তাঁহারা কাংস্য ও পিত্তলের আভরণ পাইলেই কৃতার্থম্বন্য হইতেন। রাজপরিবারস্থ কামিনীগণ, তৎকালেও, বিবিধ রত্ন খচিত স্বর্ণ ভূষণে ভূষিত থাকিতেন।

পঞ্চম অধ্যায় ।

নবদ্বীপাধিকারে সংস্কৃত, পারস্য, এবং বঙ্গভাষার অনুশীলন ছিল। ব্রাহ্মণপণ্ডিত, বৈদ্য, ষটক, কুলজ্ঞ সম্ভানেরা প্রায় সকলেই বাল্যাবস্থায় সংস্কৃত ভাষা অভ্যাসে প্রবৃত্ত হইতেন। এতদ্ভিন্ন, রাজকুমার, কোন কোন রাজকুটুম্ব, ও প্রধান রাজকর্মচারীদিগের পুত্রেরাও, এই ভাষা কিয়ৎ পরিমাণে শিখিতেন। পূর্বে নবদ্বীপ, ভাটপাড়া, কামালপুর, কুমারহট্ট, শান্তিপুর, উলা, বহিরাগাছি, বিলুপুষ্করিণী, বিলুগ্রাম প্রভৃতি কয়েক স্থানে অনেক টোল চতুষ্পাটী ছিল। বিদ্যার্থীগণ নানা প্রদেশ হইতে ঐ সকল স্থানে অধ্যয়ন করিতে আসিতেন। এতদ্ব্যতীত অনেক গ্রামে ক্ষুদ্র ক্ষুদ্র টোল ছিল। নিকটস্থ অধ্যয়নার্থীরা তথায় অধ্যয়ন করিতেন, এবং তন্মধ্যে যাহাদের অধিক বিদ্যালোভের অভিলାষ হইত, তাঁহারা ঐ সকল টোলে কিয়দূর পাঠ সমাপন করিয়া, প্রাপ্তক কোন এক স্থানের টোলে প্রবিষ্ট হইতেন। তদানীন্তন ব্রাহ্মণপণ্ডিতগণ কেবল অধ্যয়ন, অধ্যাপন, ধর্ম্মালোচনা ও গ্রন্থ রচনা এই সকল অনুষ্ঠানেই জীবন যাপন করিতেন। সাংসারিক সুখ দুঃখের প্রতি প্রায় কিছুই মনোনিবেশ করিতেন না। নবদ্বীপের রাজারা, তাঁহাদের সংসার যাত্রা ও ছাত্রগণের আবশ্যক ব্যয় নির্বাহার্থে যে কিছু ভূমি দান বা বাৎসরিক বৃত্তি প্রদান করিতেন, তাহাতেই তাঁহারা পরিতুষ্ট থাকিতেন। ব্রাহ্মণ ব্যতীত অন্য কোন বর্ণের দান গ্রহণ করিতেন না। প্রবাদ আছে যে একদা রাজা কৃষ্ণচন্দ্র রায় নবদ্বীপের কোন এক প্রধান নিঃস্ব নৈয়ায়িককে জিজ্ঞাসা করেন যে, আপনার কোন অনুপপত্তি আছে

কি না। স্থল বিশেষে অনুপপত্তি পদে অসঙ্গতি বুঝায়। রাজার প্রশ্নের তাৎপর্য এই যে ভট্টাচার্যের সাংসারিক অসঙ্গতি অর্থাৎ অভাব আছে কি না। কিন্তু ভট্টাচার্যের সাংসারিক বিষয়ে এতই অনাস্থা ছিল যে রাজার মনোগত ভাবের প্রতি কিছু মাত্র লক্ষ্য না করিয়া অনুপপত্তি পদে শাস্ত্রীয় অসঙ্গতি অর্থাৎ অসংলগ্নতা ভাবিয়া উত্তর করিলেন যে চারি চিন্তামণির মধ্যে আমার কোন অনুপপত্তি নাই, অর্থাৎ চারি খণ্ড চিন্তামণি গ্রন্থের মধ্যে কোন স্থলই তাঁহার অলাগ ছিল না।

পূর্বোল্লিখিত স্থান সমূহে পূর্বে এ বিদ্যার আলোচনা যেরূপ ছিল ইদানীং আর সেরূপ নাই। কোন স্থানের টোল চতুষ্পাটী এক কালে উঠিয়া গিয়াছে এবং কোন স্থানে অতি সামান্যাবস্থায় রহিয়াছে। একে এই রাজারা নিঃস্ব হওয়াতে ইদানীন্তন পণ্ডিতগণ পূর্ববৎ রাজদত্ত আনুকূল্য লাভে বঞ্চিত হইয়াছেন, তাহাতে আবার বিষয়ী লোকদিগের ন্যায় তাঁহাদের ভোগাভিলাষ প্রবল হইয়া উঠিয়াছে। সুতরাং তাঁহারা যাহাতে শীত্র শীত্র অধ্যাপনা পূর্বক সর্বত্র নিমন্ত্রণ পাইয়া অর্থ লাভ করিতে পারেন, তদ্বিষয়েই তাঁহাদের মন ধাবিত হইতেছে। একারণ অধুনাতন ছাত্রগণ ব্যাকরণ, অভিধান, ভাট্ট ও নৈষধের কিয়দংশ পাঠানন্তর কেহবা স্মৃতি কেহবা ন্যায়শাস্ত্র অধ্যয়নে প্রবৃত্ত হন, এবং নব্য ও প্রাচীন স্মৃতির কিয়দংশ অথবা ন্যায় শাস্ত্রের দুই এক খণ্ডের মাথুরী ও জাগদীনী টীকা ও গদাধরী পাতড়া পাঠ করিয়াই অধ্যাপনা করিতে আরম্ভ করেন। আর যাহাতে অধিক নিমন্ত্রণ পত্র পান এবং সভায় বৃথা বাদ বিতণ্ডা পূর্বক জয়ী হইতে পারেন তৎপ্রতিই ঐকান্তিক যত্ন করিতে থাকেন। এদিকে অনেক মূল গ্রন্থ তাঁহাদের নয়নগোচরও হয় না।

অধুনা সংস্কৃত কালেজ ব্যতীত এ অধিকারে নবদ্বীপ ও ভাট পাড়ায় সংস্কৃত শাস্ত্রের অধিক আলোচনা আছে । যদিও ইদানীং নবদ্বীপে পূর্বতন পণ্ডিতগণের তুল্য অধ্যাপকের অসম্ভাব হইয়াছে, তথাপি নানাদেশ হইতে বিদ্যার্থীরা তথায় আসিয়া অধ্যয়ন করিয়া থাকেন । এক্ষণে নবদ্বীপে ধর্মশাস্ত্রের টোল ৯, ন্যায় শাস্ত্রের টোল ৭ এবং বেদান্ত মীমাংসা সাজ্ব্য ও পাতঞ্জল দর্শন ইত্যাদির টোল ১ খানি আছে ।

পূর্বকালে, এই অধিকার মধ্যে সংস্কৃত ভাষার যেমন উৎকৃষ্ট-বস্থা হইয়াছিল, বঙ্গ ভাষার তেমনই নিরুচ্চাবস্থা ছিল । তৎকালে গুরু মহাশয়ের পাঠশালাই বঙ্গভাষানুশীলনের টোল চতুষ্পাঠী ছিল । গুরুমহাশয়গণ প্রায়ই কায়স্থ জাতীয় ছিলেন, এবং বর্দ্ধমান প্রদেশ হইতে এদেশে আসিয়া পাঠশালা করিয়া শিক্ষা দিতেন । তাঁহারা শুভকরীয় অঙ্ক, জমীদারী কার্যোপযোগী বিদ্যা, এবং পত্র লিখিবার পাঠাপাঠ জানিতেন । তাঁহাদের শিষ্যগণকে তাহা শিখাইতে পারিলেই আপনাদিগকে কৃতার্থ মনে করিতেন । তাঁহাদের পাঠশালায় কোন প্রকার পুস্তক অধীত হইত না । প্রত্যেক ভদ্র গ্রামে এক এক জন গুরুমহাশয়ের অবস্থান হইত, এবং সম্বিহিত তিন চারি গ্রামের বালক আসিয়া তাঁহার পাঠশালায় লেখাপড়া করিত । পাঠশালার নিমিত্ত স্বতন্ত্র স্থানের প্রয়োজন হইত না, গ্রামের কোন এক ভদ্র লোকের চণ্ডীমণ্ডপ পাঠ গৃহের প্রয়োজন সাধন করিত । প্রথমে মাটির উপর খড়ি দিয়া লিখিয়া বালকেরা বর্ণপরিচয় করিতে শিখিত, অনন্তর কলা বানান লেখা ও অঙ্ক শিক্ষার জন্য তাল পত্র তৎপরে রস্তাপত্র এবং জমীদারী কাগজ পত্র শিক্ষা ও হস্তাকরের সৌন্দর্য্য সাধনের নিমিত্ত কাগজ ব্যবহৃত হইত । ভাষা শিক্ষার প্রণালী কিছু মাত্র ছিল না ।

বালকদিগের কেবল সামান্য অঙ্ক শিক্ষা ও হস্তাক্ষরের সৌন্দর্য্য সম্পাদনের প্রতি যত্ন হইত। সুতরাং তাহাদের ভাষা জ্ঞান প্রায় কিছু মাত্রই হইত না। কিন্তু জমীদারী ও বাণিজ্য কার্য্য নির্বাহোপযোগী বিষয়ে তাহারা এরূপ পারদর্শী হইত যে, তাহারা অঙ্কপাত না করিয়া অল্প কাল মধ্যে যে সকল প্রশ্ন অনায়াসে সমাধান করিত, এক্ষণকার কালেজের সুশিক্ষিত ছাত্র-গণ অঙ্কপাত করিয়া তাহার দ্বিগুণ সময় মধ্যেও এই সকল অঙ্ক সমাধান করিতে পারেন না। পূর্বে যবনজাতীয় দিগের মধ্যে গ্রামের মণ্ডল ব্যতীত প্রায় কেহই বঙ্গ ভাষার আলোচনা করিত না।

তৎকালে পরিশুদ্ধ বঙ্গভাষা কহিবার বা লিখিবার প্রথাই ছিল না। সকল কথোপকথন ও লিখনের মধ্যে স্থানে স্থানে অনেক পারস্য ও হিন্দী শব্দ ব্যবহৃত হইত। এ রাজবাটীর মুন্সীরা (পত্র ইত্যাদি লেখকেরা) সংস্কৃত ভাষায় বিলক্ষণ অভিজ্ঞ ছিলেন, কিন্তু তাঁহারাও পত্র মধ্যে অপর ভাষা প্রয়োগ করিতেন। তদানীন্তন পণ্ডিতগণ প্রায়ই অপর ভাষা কহিতেন না, কিন্তু পত্র লিখিবার সময়ে হয় সম্পূর্ণ সংস্কৃত, নয় ত সংস্কৃত মিশ্রিত ভাষা লিখিতেন।

নবদ্বীপের রাজারা এ প্রদেশে সংস্কৃত ভাষার উন্নতি সাধনে বহুতর যত্ন করিয়াছেন বটে, কিন্তু বঙ্গ ভাষার উন্নতি সাধনে কিছু মাত্র মনোযোগ করেন নাই। রাজারা কেন ভাগীরথীর পূর্বপারস্থ ^{৪. 73 5. 10. 11.} ~~প্রায়-কোন~~ ব্যক্তি দ্বারাই মাতৃ ভাষার উন্নতি সাধন হয় নাই। ইহার যে কিছু উন্নতি লক্ষিত হইতেছে—তাহা ভাগীরথীর পশ্চিমপারস্থ অধিবাসীদিগের দ্বারাই সম্পাদিত হইয়াছে। আদি কবি বিদ্যাপতি, প্রাচীন কবি চণ্ডীদাস, চৈতন্যচরিতামৃত

রচয়িতা কৃষ্ণদাস কবিরাজ, চণ্ডীকাব্য রচয়িতা কবিকঙ্কণ মুকুন্দরাম চক্রবর্তী, মহাভারতের অনুবাদক কাশীরাম দাস, শিবসঙ্কীর্তন রচয়িতা রামেশ্বর ভট্টাচার্য্য, এবং রাজা কৃষ্ণচন্দ্রের সভাসদ অন্নদামঙ্গল রচয়িতা ভারতচন্দ্র রায় গুণাকর প্রভৃতি সকল কবিগণই ভাগীরথীর পশ্চিম পার্বে বাসী । (১) ভাগীরথীর পূর্ব পার্বে কেবল চৈতন্যমঙ্গল কাব্য রচয়িতা বৃন্দাবন দাস, রামায়ণ কাব্য রচয়িতা কৃষ্ণিবাস, এবং বিদ্যা সুনন্দর, কালী ও কৃষ্ণ কীর্তন রচয়িতা রাম প্রসাদ সেন প্রাহুভূত হন । (২)

কিন্তু এই তিন জন কবি মধ্যেও প্রাচীন কবি বৃন্দাবন দাসের পিতার বাসস্থান ভাগীরথীর পশ্চিম পার্বে ছিল । নবদ্বীপ নিবাসী ত্রিনিবাস পাণ্ডিতের ছুহিতা নারায়ণীর গর্ভে বৃন্দাবন দাসের জন্ম হয় । বঙ্গ ভাষায় গদ্য লিখিবার যে বিশুদ্ধ প্রণালী প্রচলিত হইয়াছে, তাহাও পর-পারবর্তী প্রদেশ বিশেষের মহোদয়গণ কর্তৃক উদ্ভাবিত । প্রথমে রাজা রামমোহন রায় ইহার সূত্রপাত করেন, পরে অক্ষয়কুমার দত্ত ও ঈশ্বরচন্দ্র বিদ্যাসাগর মহাশয়ের ইহার বর্তমান উন্নত অবস্থা করিয়া তুলেন । ঐ প্রদেশ-বাসীরাই চণ্ডীর গান, যাত্রা, কীর্তন, গাছ রামায়ণ, প্রভৃতির আদর্শ

(১) বিদ্যাপতি,—বাঁকুড়ার অন্তর্গত ছাতনা প্রদেশ বাসী ।

চণ্ডীদাস,—বীরভূমের অন্তঃপাতি নামুর গ্রাম বাসী ।

কৃষ্ণদাস কবিরাজ,—বর্ধমান জেলার অন্তর্ভূত কামুটপুর বাসী ।

কবিকঙ্কণ মুকুন্দরাম চক্রবর্তী,—ঐ জেলার অন্তর্গত দায়ুন্যা গ্রাম বাসী ।

কাশীরাম,—ঐ জেলার অন্তর্ভূত সিঙ্গি গ্রাম বাসী ।

রামেশ্বর ভট্টাচার্য্য,—মেদিনীপুরের অন্তঃপাতি কর্ণগড় বাসী ।

ভারতচন্দ্র,—বর্ধমান প্রদেশের অন্তর্গত পেঁড়ে গ্রাম বাসী ।

(২) বৃন্দাবন দাস,—নবদ্বীপ নিবাসী ।

কৃষ্ণিবাস,—নদীয়া জেলার অন্তর্গত ফুলিয়া গ্রাম বাসী ।

রাম প্রসাদ সেন,—ঐ জেলার অন্তর্ভূত কুমার হাট বাসী ।

প্রদর্শন করেন। অক বিদ্যার জ্যোতিও এই পার হইতে এই পারে বিকীর্ণ হয়। কারণ এ প্রদেশে যে সকল পাঠশালা ছিল তাহার গুরু মহাশয়েরা প্রায়ই পশ্চিম পার বাসী ছিলেন।

পূর্ব কালে রাজপুত্র, রাজদৌহিত্র, এবং রাজার প্রধান কর্মচারীগণের তনয়েরা পারস্য ভাষা শিক্ষা করিতেন। এ বিদ্যা নিতান্ত অর্থকরী বলিয়া প্রতীতি থাকাতে এবং রাজসংসারের দুই একটি কর্ম ব্যতীত আর কোন কার্যে ব্যবহার না থাকাতে, লোক সাধারণে আপনাদের পুত্রগণকে এই ভাষা শিখাইবার অভিলাষী হইতেন না। নবাব সংসার ও ফৌজদার প্রভৃতি সম্রাটের প্রধান কর্মচারীর সহিত কথোপকথনে ও লিখন পঠনে, উর্দু ও পারস্য ব্যতীত অন্য কোন ভাষার ব্যবহার না থাকায়, রাজা ও তাঁহার প্রধান কর্মসচিবগণ বাল্যাবস্থায় এই বিদ্যা অভ্যাস করিতেন। আর যে সকল নগরে নবাব ও ফৌজদার অবস্থান করিতেন, সেই সেই নগরে ও তৎপার্শ্ববর্তী কতিপয় গ্রামে এই ভাষার অনুশীলন হইত। পরে এদেশ ইংরাজ অধিকৃত হইলে মুসলমান রাজাদিগের প্রধানুসারে সকল বিচারালয়ে এই ভাষা প্রচলিত হওয়াতে, এই বিদ্যার ক্রমশঃ সর্বত্র প্রচলন হইয়া উঠে। অনেক গণ্ডগ্রামের ধনশালী ব্যক্তির আশ্রয় আপন আপন ভবনে এক এক জন উক্ত ভাষাবিজ্ঞ-যবন জাতীয় শিক্ষক রাখিয়া স্থায়ী স্থায়ী সম্ভানগণকে এই ভাষা শিক্ষা দিতে আরম্ভ করেন, এবং প্রতি-বাসীদিগের মধ্যে কেহ কেহ তাঁহাদের দূর্দান্তের অনুগামী হন। এই সকল শিক্ষকের অনেকেই শিক্ষা দান কার্যে পারদর্শী ছিলেন না। তাঁহারা মাসিক পাঁচ ছয় টাকা পাইলেই সন্তুষ্ট হইতেন। একারণ যৎকিঞ্চিৎ অধ্যয়ন করিয়াই অধ্যাপনা করিতে আরম্ভ করিতেন। ছাত্রগণ দশ বার খানি পুস্তক পাঠ করিয়া কোন বিচা-

রালয়ের প্রচলিত কার্য্য প্রণালী শিখিতে প্রবৃত্ত হইতেন । যদিও তাঁহাদের অধীত পুস্তকের মধ্যে পন্দনামা, গোলেন্স্তা, বোস্তা তিন খানি উৎকৃষ্ট নীতিগর্ভ গ্রন্থ আছে, তথাপি শিক্ষা পদ্ধতির দোষে বালকেরা ঐ কয়েক খানি গ্রন্থের অর্থ বোধেও সমর্থ হইত না । রচনাশক্তি লাভের প্রতিই পাঠকবৃন্দের বিশেষ মনোনিবেশ থাকিত । ধনবান্ মুসলমানদিগের মধ্যে অনেকে পারস্য ও আরব্য উভয় ভাষাতেই পারদর্শী হইতেন । কিন্তু পারস্য শিক্ষার দ্বারা কি হিন্দু কি মুসলমান কোন সম্প্রদায়ের বালকেরা ধর্ম্মনীতির ফল লাভ করিতে পারিতেন না ।

যখন ১৮৩৭খৃঃ অব্দের ২৯ বিধি অনুসারে, ১৮৩৮ অব্দে, বঙ্গ দেশের জেলার বিচারালয়ে পারস্য ভাষার পরিবর্তে বঙ্গভাষা ব্যবহৃত হইতে আরম্ভ হইল, সেই সময় হইতে হিন্দু সমাজ মধ্যে পারস্য ভাষার অনুশীলন রহিত হইয়া গেল, এবং মুসলমানদিগের মধ্যেও ইহার আলোচনা ক্রমশঃ মন্দীভূত হইয়া আসিল । আর বঙ্গভাষার আলোচনা অধিক পরিমাণে হইতে লাগিল ।

ষষ্ঠ অধ্যায় ।

মুসলমান অধিপতিদিগের ত্রায় প্রদেশ শাসন কর্ত্তা ও ভূম্য-ধিকারীরাও স্বেচ্ছাচারী ছিলেন । যে প্রদেশের শাসন কর্ত্তা ও ভূম্যধিকারী বুদ্ধিমান্ ও ত্রায়বান্, তৎপ্রদেশবাসীরা সুখে ও স্বচ্ছন্দে কালাতিপাত করিতে পারিতেন, এবং যে প্রদেশের শাসন কর্ত্তা ও ভূম্যধিকারী অবিবেচক ও অধার্ম্মিক, সে প্রদেশের লোকেরা অসুখে ও অস্বচ্ছন্দে কালযাপন করিতেন । যদিচ

এই রাজারাও স্বেচ্ছাচারী ছিলেন, তথাপি ইহাদের প্রজারঞ্জন-বিষয়ে বিশেষ সুখ্যাতি ছিল। যে সকল পরগণা পূর্বাধিকারিগণ কর্তৃক প্রাপীড়িত হইয়া জনশূন্য হইয়া যাইত, সে সকল পরগণা এ রাজাদিগের হস্তে আসিলে পুনরায় জনাকীর্ণ হইত। দিল্লী-স্বরের যে সকল ফরমাণ রাজবাটীতে বর্তমান আছে, তাহার কোন কোন ফরমাণে এই রাজারা প্রজারঞ্জক বলিয়া উল্লিখিত হইয়াছেন। প্রজাগণের সুখ সাধন ও অনিষ্ট নিবারণ বিষয়ে ইহাদের আন্তরিক যত্ন ছিল, ইহা অনেক প্রাচীন লোক মুখে শুনিয়াছি এবং ইহার প্রত্যক্ষ প্রমাণও অদ্যাপি দীপ্যমান আছে। প্রজাপুঞ্জের জল-সুখের জন্য বিপুল অর্থব্যয় স্বীকার করিয়া এই বিস্তীর্ণ অধিকার মধ্যে স্থানে স্থানে সুদীর্ঘ জলাশয় সকল প্রস্তুত করিয়া দিয়াছেন। ঐ সকল জলাশয়ের মধ্যে অদ্যাপি অনেক বর্তমান আছে। ইহারা প্রজার স্থানে অন্যায় ও অসঙ্গত কর গ্রহণে কখনই প্রবৃত্ত হইতেন না, বরং শস্যোৎপত্তির কোন বিষয় হইলে নির্দ্ধারিত করেরও কিয়দংশ ক্ষমা করিতেন। আপন অধিকার মধ্যে ব্রাহ্মণ শ্রেণীর অধিক বসতি হইবার নিমিত্ত ব্রাহ্মণ মাত্রেই বাস্তব ভূমির কর গ্রহণ করিতেন না। গুণের উৎসাহার্থে গুণবানকে যথেষ্ট ভূমি দান করিতেন (১)। স্বীয় ইচ্ছাকর হইলেও প্রজাদিগের অনিষ্টকর কার্য্যে প্রবৃত্ত হইতেন না। জমীদারী মধ্যে মদ্য বিক্রীত হইলে প্রজাপুঞ্জের অমঙ্গল হইবেক বলিয়া সুরা বা তাড়ি প্রস্তুত করণে দৃঢ়তর নিষেধ ছিল।

ইংরাজ অধিকারের পূর্বে এই রাজাদিগের জমীদারী মধ্যে

(১) হিদাম সুবল নামে এক কীর্তন সম্প্রদায়কে শান্তিপুরের সমিহিত হরিপুরের চরে শতাধিক বিঘা ভূমি দিয়াছিলেন। ঐ ভূমি অদ্যাপি তাহাদের নামে খ্যাত আছে।

সিদ্ধি ও গাঁজা ব্যতীত আর কোন মাদক দ্রব্য প্রায়ই ব্যবহার ছিল না। সিদ্ধি ভঞ্জে কোন অনিষ্ট বা নিন্দা ছিল না এ নিমিত্ত ভদ্র সমাজস্থ অনেক লোকে ইহারই অনুরাগী ছিলেন। ত্বরিতানন্দ প্রায় ছোট লোকের মধ্যেই ব্যবহৃত হইত। ভদ্র লোকের মধ্যে যিনি ইহাতে আশক্ত হইতেন তিনি অতিশয় নিন্দাস্পদ হইতেন। মদ্যপায়ী ব্যক্তি সমাজ মধ্যে কোন রূপেই স্বপদস্থ থাকিতে পারিত না। সুতরাং প্রায় কেহই ইহাতে অনুরক্ত হইতে সাহসী হইত না। ইংরাজ রাজত্বে এই মাদক দ্রব্যের এতাদৃশ আদর হইয়া উঠিয়াছে। সুপ্রসিদ্ধ রাজপুত্র অনরেল শোর সাহেব কহিয়া গিয়াছেন যে, মদ মত্ততা ও অন্য অন্য মাদক দ্রব্যের ব্যবহার ইংরাজ রাজ্যে অতীব বৃদ্ধি হইয়াছে। ঐ সাহেব আরও কহিয়াছেন যে, “প্রায় ৬০ বর্ষ পূর্বে এক জন ভদ্র ইংরাজ ভারতবর্ষে আসিয়াছিলেন। তিনি এদেশীয় এক জন রাজার ব্যবহারের বিষয় এইরূপে বর্ণন করেন যে, তাঁহার ভারতবর্ষে উপস্থিতির অব্যবহিত পরেই, তিনি কৃষ্ণনগরে অবস্থিতি করেন, এবং তাঁহার জটৈক বন্ধুর নিমিত্ত কিঞ্চিৎ তাড়ি সংগ্রহার্থে এক জন লোকের জন্য তৎপ্রদেশের রাজার নিকট প্রার্থনা করেন। রাজা এই বলিয়া সম্মতি দিলেন যে, যে ব্যক্তি তাড়ি আনিবেক সে পাছে প্রয়োজনের অতিরিক্ত আনিয়া মদ্য প্রস্তুত করিয়া বিক্রয় পূর্বক তাঁহার প্রজাগণের মধ্যে মত্ততার উৎপত্তি করিয়া দেয়, এ কারণ ঐ লোকের সঙ্গে এক জন প্লাহরী যাইবেক (১)।” যদিচ ইহাদের মধ্যে কোন কোন রাজা লোভ ক্রোধ বা অন্য কোন নিকৃষ্ট বৃত্তির বশবর্তী হইয়া কখন কখন ব্যক্তি বিশেষকে মর্মান্তিক বেদনা দিয়াছেন, তথাপি

এই রাজবংশের প্রায় সকলেই এ প্রদেশবাসী সাধারণের অতীব স্নেহ ও আদরের পাত্র ছিলেন । ইংলণ্ডবাসীরা যেমন ঈশ্বরের উপাসনা সমাপনান্তে প্রথমে স্বদেশের রাজার মঙ্গল প্রার্থনা করিয়া থাকেন, সেইরূপ এ প্রদেশস্থ স্ত্রীপুরুষ সকলেই, প্রতি দিন স্বীয় ইষ্টদেবতার পূজা সমাপনান্তে, অগ্রে এই রাজাদিগকে আশীর্বাদ করিয়া পরে স্বীয় সম্মান সম্ভূতি প্রভৃতিকে আশীর্বাদ করিতেন ।

এই রাজাদিগের জমিদারী মধ্যে অতীব খাদ্য-মুখ ছিল । ৪০ বৎসর পূর্বে আমরা দেখিয়াছি যে এ প্রদেশ মধ্যে সামান্য তণ্ডুলের মন ৫০ আনা, কলাই ছোলা ও অড়হরের মন ৥০ আনা, মুগের মণ ১ টাকা, তৈলের মন ৫ টাকা, ঘূতের মন ১০ টাকা, মটর খেঁশারি ও মুহুরির মন ১৬ আনা ছিল । অন্য অন্য খাদ্যও ঐরূপ অুলভ মূল্যে পাওয়া যাইত । ইহার পূর্বে এই সকল দ্রব্যের মূল্য আরও অল্প ছিল । যখন আশ্বিনপত্য সময়ে ইহাদের অধিকার মধ্যে যে কখন দুর্ভিক্ষ হইয়াছে ইহা কোন ইতিহাসে পাঠ করি নাই এবং কোন প্রাচীন লোকের মুখেও শুনি নাই । ইংরাজ অধিকার কালের প্রথমে ১৭৭০ খৃঃ অব্দে যে দুর্ভিক্ষ হয়, ইহাই বঙ্গ দেশের প্রথম দুর্ভিক্ষ বলিয়া প্রসিদ্ধ আছে । উক্ত অব্দ ও ১৮৬৬ অব্দের মধ্যবর্তী কাল মধ্যে এই প্রদেশে আর তাদৃশী দুর্ঘটনা সংঘটিত হয় নাই ।

এই রাজাদিগের মধ্যে প্রায় সকলেই বিদ্যাৎসাহী ছিলেন । নানা অঞ্চল হইতে বিবিধ বিদ্যা বিশারদপণ্ডিতগণকে আনিয়া স্বীয়াধিকার মধ্যে স্থাপন করিতেন, অথবা রাজধানীতে আদর পূর্বক রাখিতেন । সকল টোল ও চতুষ্পাঠীর অধ্যাপকদিগকে তাঁহাদের ব্যয় নির্বাহ যোগ্য ভূমি প্রদান করিতেন, এবং পাঠকগণের আবশ্যক ব্যয়ের নিমিত্ত প্রত্যেক টোলে কিছু কিছু বার্ষিক

বৃত্তি-দিতেন । যখন কোন ছাত্র, আপনার পাঠ সমাপনান্তর, অধ্যাপনা করিবার মানস করিতেন, তখন তিনি রাজসদনে সমাগত হইয়া আপন বিদ্যার পরিচয় দিতেন, এবং, অধ্যাপনকর্ম হইলে, নিয়মিত বৃত্তি পাইতেন । পাঠকগণ, অধ্যয়ন সমাপন করিয়া, রাজ-সম্মিধানে পরীক্ষা প্রদানপূর্ব্বক উপাধি গ্রহণ করিতেন । এতদ্ব্যতীত ছাত্রগণ, মধ্যে মধ্যে, রাজসমীপে আসিয়া বিদ্যার পরিচয় দিতেন, এবং রাজাকে সন্তুষ্ট করণে সমর্থ হইলে পারিতোষিক প্রাপ্ত হইতেন । অবকাশানুসারে রাজারাও, সময়ে সময়ে, চতুষ্পাঠীতে যাইয়া অধ্যাপকদিগের সহিত শাস্ত্রালাপ করিতেন, এবং পাঠক-গণকে উৎসাহ প্রদানে যত্নবান্ হইতেন । আর প্রত্যহ কোন নির্দিষ্ট সময়ে, সভাস্থ ও অভ্যাগত পণ্ডিতগণের সহিত নানাবিধ শাস্ত্রের আলাপ করিতেন । মধ্যে মধ্যে, ভিন্ন ভিন্ন প্রদেশ হইতে বিখ্যাত পণ্ডিতেরা আসিতেন ; রাজা তাঁহাদিগকে যার পর নাই সমাদরে রাখিতেন, এবং যথোপযুক্ত পুরস্কার দিয়া বিদায় করিতেন । ইহারা কেবল নিজ অধিকারস্থ অধ্যাপকদিগের আনুকূল্য করিতেন এমন নহে ; ইহারা ভিন্ন অধিকারের প্রধান প্রধান অধ্যাপকগণেরও যথেষ্ট উৎসাহ বর্দ্ধন করিতেন । গুপ্তিপাড়াবাসী প্রসিদ্ধ বাণেশ্বর বিদ্যালঙ্কার ও ত্রিবেণীনিবাসী বিখ্যাত জগন্নাথ তর্কপঞ্চানন, যদিও অন্যের অধিকারে বাস করিতেন, তথাপি এই রাজাদিগের সভাসদ ছিলেন । বাকলা বিক্রমপুর প্রভৃতি দূরবর্তী প্রদেশের পণ্ডিতগণ, এই রাজাদিগের নিকট ব্রহ্মোত্তর পাইয়াছেন, এবং অদ্যাপি তাঁহাদের বংশীয়েরা ভোগ করিতেছেন ।

রাজারা আপনাদের সম্ভানদিগকে সংস্কৃত বিদ্যা উত্তমরূপে শিখাইবার বিশেষ যত্ন পাইতেন । রাজা কৃষ্ণচন্দ্রের ও তদীয় পুত্র-গণের রচিত যে কয়েকটি কবিতা পরিশিষ্টে উদ্ধৃত করা গেল,

তাহা পাঠ করিলে, পাঠকবৃন্দ তাঁহাদের বিদ্যার পরিচয় পাইবেন, এবং বোধ করি প্রীতও হইবেন । রাজবাটীতে এই ভাষা এত দূর ব্যবহৃত হইত যে, যে সকল পরিচারকেরা সৰ্বদা রাজার সম্মুখে থাকিত, তাহাদের মধ্যে অনেকে সংস্কৃত কথা বুঝিতে পারিত । বঙ্গ রাজ্য ইংরাজ অধিকৃত হইলে, নিষ্কররূপে ভূমি দানের ক্ষমতা আইনানুসারে রহিত হইলেও এই রাজাদিগের যত দিন বিভব ছিল, তত দিন এই বিদ্যার উৎসাহ বর্দ্ধনের নিমিত্ত, ইহারা কিঞ্চিৎমাত্র ক্রটি করেন নাই ।

× ইহারা নিজাধিকার মধ্যে সঙ্গীত শাস্ত্রের উন্নতি সাধনার্থ, দিল্লী হইতে সুপ্রসিদ্ধ সঙ্গীত-বিদ্যা-বিশারদগণকে আনাইয়া, আপনার ও অপর ব্যক্তিদিগের সম্ভানগণকে, এই বিদ্যা শিক্ষা দেওয়াইতেন । এই কারণে যে পর্য্যন্ত এই রাজাদিগের ঐশ্বর্য্য ছিল, সে পর্য্যন্ত এ প্রদেশস্থ অনেক ব্যক্তি সঙ্গীত বিদ্যায় পারদর্শী ছিলেন । রোশন চৌকি, দম্পবাঁশী, এবং নওবৎ এই তিন প্রকার মনোহর বাদ্য, অতি পূর্বে এ প্রদেশে প্রচলিত ছিল না । এই রাজারাই পশ্চিমাঞ্চল হইতে সুনিপুণ বাদক আনাইয়া, এ প্রদেশীয় লোককে ঐ সকল বিদ্যা শিক্ষা দেওয়ান । ইংরাজী বাদ্য, (ব্যাণ্ড) পূর্বে এ দেশস্থ লোকের মধ্যে, কেবল কলিকাতার নিকটস্থ স্থান বাসী ক্ষুদ্রীরা জানিত । বহু ব্যয় সমর্থ না হইলে দূরবর্তী লোকেরা তাহাদিগকে আনিতে পারিতেন না । এই রাজবংশোদ্ভব রাজা গিরীশচন্দ্র, কলিকাতার এক দল ইংরাজ বাদ্যকর কৃষ্ণনগরে আনিয়া, চর্ম্মকার জাতীয় কয়েক জনকে তাহাদের দ্বারা শিক্ষা দেওয়ান ।

রাজা কৃষ্ণচন্দ্রের প্রপিতামহ রাজা কদ্র, ঢাকা হইতে আলাল-দস্ত নামক এক জন প্রসিদ্ধ স্থপতিকে আনাইয়া, কৃষ্ণনগরের রাজ-

বাটীর চক ও নওবৎখানা ইত্যাদি প্রাসাদ নির্মাণ করান ; এবং তাহাকে এখানে রাখিয়া অত্রত্য গাঁড়ার জাতীয় অনেক ব্যক্তিকে তদ্বারা স্থপতি বিদ্যা শিক্ষা দেওয়ান । এই জাতির মধ্যে একরূপ সুনিপুণ স্থপতি সকল হয়, যে তাহারা কৃষ্ণনগরের রাজভবনে যে বৃহৎ ও শোভান্বিত পূজার দালান ও শিবনিবাসের যে তিন দেব মন্দির নির্মাণ করে, তাহার কল কৌশল অদ্যাপি দেখিলে দর্শকগণ প্রীত ও চমৎকৃত হন । এমন সুন্দর, সুপ্রশস্ত ও সুদৃঢ় পূজার প্রাসাদ, এবং একরূপ উন্নত ও দৃঢ়তর মন্দির, বঙ্গদেশের মধ্যে অন্য কোন স্থানে নয়নগোচর হয় না । প্রথমোক্ত অটালিকা প্রায় সাত্বৈদিক শত বর্ষ পূর্বে নির্মিত হইয়াছে, এবং তাহার আবশ্যক সংস্কার প্রায় কখনই হয় নাই, তথাপি তাহার কোন স্থানে একটি ছিদ্রও দৃষ্ট হয় না । শিবনিবাসের কোন কোন অটালিকার প্রাচীরে চূণ ও সুরকি ইত্যাদি সামান্য উপকরণ দ্বারা একরূপ সুন্দর ও সুদৃঢ় জাকরি নির্মিত হইয়াছে যে, যদিও তাহাতে ডেড় শত বৎসর পর্য্যন্ত বাদ ও বৃষ্টির আঘাত লাগিতেছে, তথাপি এক্ষণ পর্য্যন্ত তাহা অব্যাহত রহিয়াছে । ইহা দেখিলে প্রস্তুত ব্যতীত আর কিছু অনুমিত হয় না ।

কৃষ্ণনগরের যে কুম্ভকার জাতি ইদানীং নানাবিধ মৃগয় মূর্তি নির্মাণ করিয়া লণ্ডন ও প্যারিস্ প্রভৃতি সুপ্রসিদ্ধ নগরের এগজি-বিশনে প্রেরণ করিয়া, প্রতিষ্ঠা ও পুরস্কার লাভ করিতেছে, এবং প্রতিমূর্তি নির্মিত করিয়া প্রশংসাজনক হইতেছে, তাহাদের পূর্ব-পুরুষেরা এই রাজাদিগের দ্বারা উৎসাহ প্রাপ্ত হওয়াতেই, ইহারা এক্ষণে এতাদিক কৃতকর্ম্য হইয়াছে । পূর্বে এই রাজারা নানা দেব-মূর্তি প্রকাশ করিয়া কুম্ভকারগণকে তাহার মৃগমূর্তি নির্মাণ করিতে আদেশ দিতেন । যাহারা সূচাৰুৰূপে তাহা নির্মাণ করিতে সমর্থ

হইত তাহার। যথেষ্ট পারিতোষিক পাইত। ক্রমশঃ ঐ সকল প্রতিমা অনেকে পূজা করিতে আরম্ভ করিলে, কুম্ভকারগণ, প্রতি-বৎসর বহুতর মূর্তি নির্মাণ করিতে লাগিল, এবং ক্রমে ক্রমে এ বিষয়ে নিপুণ হইয়া উঠিল। অত্যা অত্যা বাটীতে যে সকল প্রতিমা পূজা হইত, গৃহস্বামীরা তৎসমুদায় রাজভবনে লইয়া যাইতেন। যে সকল মূর্তি অগাঠিত হইত, তাহাদের নির্মাতাগণ রাজ-পুরস্কার পাইয়া আপনাদিগকে কৃতার্থ মনে করিত। এই রূপে এ প্রদেশস্থ কুম্ভকারগণ ক্রমশঃ মূর্তি নির্মাণে অপরগ হইয়া উঠিল।

সপ্তম অধ্যায় ।

বঙ্গদেশ মধ্যে নবদ্বীপ যেরূপ প্রসিদ্ধ স্থান, এবং যে স্থানের অধিপতি বলিয়া এই রাজবংশের এত অধিক গৌরব, তাহার পূর্ব বৃত্তান্ত যত দূর অবগত হইতে সমর্থ হইয়াছি, তাহা এ স্থলে বর্ণনা করিলে বোধ হয় পাঠকবর্গের অপ্রীতিকর হইবে না।

ইতিহাস ও কিস্বদন্তী দ্বারা এই মাত্র অবগত হওয়া যায়, যে বৈদ্য-জাতীয় সেনবংশোদ্ভূত বঙ্গদেশাধিপতি রাজা লক্ষণ সেন নবদ্বীপে অবস্থান করিতেন, এবং ১২০৩ খৃঃ শতাব্দীতে, বখতিয়ার খিলজি নামক যবন সেনাপতি কর্তৃক আক্রান্ত হইয়া, ঐ স্থান পরিত্যাগ করিয়া পলায়ন করেন। কিন্তু তাঁহার পূর্বে, বা তাঁহার সময়ে, ঐ স্থানের কিরূপ অবস্থা ছিল, এবং কোন্ কালে ঐ স্থান নবদ্বীপ নামে খ্যাত হয়, তদ্বৃত্তান্ত কোনরূপে জানিতে পারা যায় না। প্রথিত আছে যে, ঐ লক্ষণসেনের পূর্বপুরুষ রাজা বল্লালসেন অধুনাতন নবদ্বীপের উত্তর-পূর্ব সার্ক ক্রোশ অন্তর একবাটী নির্মাণ

ও এক দীর্ঘিকা খনন করান । ঐ স্থান বল্লাল দীঘী নামে প্রসিদ্ধ । দীঘীর ও বাটীর চিহ্ন অদ্যাপি বর্তমান আছে । বল্লাল দীঘীর উত্তর দিকে বল্লালসেনের ঢিবি নামে যে একটি উন্নত স্থান আছে, তথায় বল্লালের বাটী ছিল এইরূপ প্রসিদ্ধি আছে । ঐ স্থান খনন করিয়া অনেকে কোন কোন দ্রব্য পাইয়াছে । রাজা কৃষ্ণচন্দ্রের পূর্ব-পুরুষেরা ঐ ঢিবি হইতে অনেকগুলি প্রস্তর স্তম্ভ ও নানারূপ প্রস্তর খণ্ড লইয়া আইসেন, রাজবাটীতে এইমত প্রবাদ আছে । যে স্থান এক্ষণে বল্লাল দীঘী বলিয়া খ্যাত, তাহাকেও পূর্বে নবদ্বীপ কহিত ।

উক্ত বঙ্গেশ্বরের রাজত্বকালে নবদ্বীপের যে স্থানে নগর ছিল, সে স্থান ভাগীরথী স্রোতে বিলুপ্ত হইয়া গিয়াছে । পূর্বে, নবদ্বীপের পশ্চিম ও দক্ষিণে ভাগীরথী, ও পূর্বদিকে ঋড়িয়া নদী ছিল ; এই উভয় স্রোতস্রতী নবদ্বীপের দুই ক্রোশ দক্ষিণ গোয়ালপাড়া গ্রামের নিকট মিলিত হয় । তৎকালে ঐ সন্ধি স্থানকে ত্রিমোহনী বলিত । নবদ্বীপের উত্তরে বিলুপ্তকীর্তি ও যে স্থান বল্লালদীঘী বলিয়া খ্যাত হইয়াছে, সেই স্থান ছিল । পরে, জাহ্নবী, নবদ্বীপের উত্তর পশ্চিমাংশে যে স্থানে দক্ষিণ মুখী হইয়াছিলেন, সেই স্থান হইতে পূর্বাস্যা হইয়া, নবদ্বীপের উত্তরাংশ ভগ্ন করতঃ, বল্লালদীঘীর দক্ষিণে ঋড়িয়া নদীর সহিত মিলিত হইয়া দক্ষিণবাহিনী হন । ইদানীং নগরের উত্তরে যে স্থানে সুরধুনী প্রবাহিতা আছেন, সে স্থান হইতে ঐ প্রবাহ, তৎকালে, প্রায় দুই ক্রোশ দূরবর্তী ছিল । পরে, ক্রমশঃ নগরের উত্তর ভাগ উদরস্থ করিতে করিতে দক্ষিণাভিমুখে অগ্রসর হন । যে অংশ নদী-গর্ভস্থ হইতে লাগিল, সেই অংশেই পূর্ববাসী-দিগের বসতি ছিল । যাহাদের বাস স্থান জলসাগ্র হইল, তাহাদের মধ্যে কেহ বা গ্রামান্তরে, কেহ বা গ্রামের দক্ষিণভাগে যে চর ছিল তথায়, বসতি করিল । এইরূপে, যে ভাগে পৌরদিগের নিকেতন

বৈষ্ণবেরা এই সকল ব্যাপার কে বাল্যলীলা কহিয়া থাকেন * ।
প্রথমে তিনি গঙ্গাধর পণ্ডিতের নিকট ব্যাকরণ অধ্যয়ন করেন ।
শৈশব কালেই তাঁহার অপ্রমেয় ধীশক্তি দর্শনে সকলেই
বিস্ময়াবিষ্ট হইতেন ; এবং কেহ কেহ তাঁহাকে ঐশিক শক্তি
সম্পন্ন জ্ঞান করিতেন । অল্প বয়সেই তিনি সংস্কৃত শাস্ত্রের
পারদর্শী হইলেন, এবং অনতি দীর্ঘকাল মধ্যেই অধ্যাপনা করিতে
আরম্ভ করিলেন ।

শ্রীমদ্ভাগবত পুরাণে তাঁহার বিশেষ শ্রদ্ধা ও গাঢ় অনুরাগ
জন্মিল এবং বৈষ্ণব ধর্ম সর্ব ধর্মের সারভূত বলিয়া প্রতীত হইল ।
তৎকালে এ প্রদেশস্থ প্রায় যাবতীয় লোক শক্তি উপাসক ছিলেন ।
তন্মধ্যে অনেকে তন্ত্রোক্ত ক্রিয়ার অনুষ্ঠানোপলক্ষে পানাসক্ত ও
ইন্দ্রিয়পরায়ণ হইতেন । একারণ শক্তির উপাসনার প্রতি
চৈতন্যের তীব্র অশ্রদ্ধা জন্মিল, এবং ভাগবত প্রণীত ধর্ম
বিস্তারে তাঁহার ঐকান্তিক আগ্রহ হইল । প্রথমতঃ কতিপয়
ব্যক্তিকে স্বমতাবলম্বী করিয়া, তাঁহাদের সহিত, আপন আত্মীয়
ও ভক্ত শ্রীনিবাসের আবাসে, রজনীতে বৈষ্ণব ধর্মের আলোচনা
ও হরিসঙ্কীর্তন করিতে লাগিলেন । এইরূপে এক বর্ষ অতীত

* কহেন আমায় পূজ আমি দিব বর । গঙ্গা ছুর্গা দানী মোর মহেশ
কিঙ্কর ॥ আপনি চন্দন পরি আর ফুল মালা । নৈবেদ্য কাড়িয়া খান সন্দেশ
ও কলা ॥ প্রভু কহে তোমা সবে দিব আমি বর । তোমাদের ভর্তা হবে পরম
সুন্দর ॥ পণ্ডিত বিদগ্ধ যুবা ধন-ধান্যবান । শীত পুত্র হবে চিরায়ু
মতিমান ॥ যদি নৈবেদ্য নাদেও হইবে কুপনী । বুড়া ভর্তা হইবে আর
চারি সতিনী ॥

চৈতন্যচরিতায়ত আদিলীলা ।

হইলে রাজবর্ষে সন্ধীর্জন আরম্ভ করিলেন । জগাই মাধাই প্রভৃতি সাধারণ লোকের মধ্যে বাঁহারা প্রথমে ঐ সকল অনুষ্ঠানের প্রতিকূলাচরণ করিতেন, তাঁহারা ক্রমশঃ তাঁহার প্রচারিত ধর্মে রত হইতে লাগিলেন । ক্রিয়ৎকালানন্তর অন্য অন্য নানা স্থানে ধর্ম প্রচার করিতে প্রবৃত্ত হইলেন । তাঁহার এমন মনোহর রূপ ও স্নমধুর স্বভাব ছিল যে, তাঁহাকে দর্শনমাত্রে তাঁহার প্রতি জনসাধারণের শ্রদ্ধা ও ভক্তি জন্মিত এবং তাঁহার সহিত কণকাল আলাপ করিলে সকলে সান্তিশয় প্রাপ্তি ও সন্তোষ লাভ করিতেন । আর তাঁহার ধর্মোপদেশের এরূপ চমৎকার মোহিনী শক্তি ছিল যে, তদীয় উপদেশ শ্রবণ মাত্রে সাধারণ-জ্ঞান-সম্পন্ন ব্যক্তিবৃন্দের হৃদয়গ্রাহিণী হইত । একারণ অনতিকাল মধ্যেই বিবিধ জাতীয় লোক তাঁহার ধর্মে আকৃষ্ট হইতে লাগিল । প্রথমে শূদ্র বর্ণের মধ্যে এ ধর্ম যে পরিমাণে বিস্তৃত হয়, ব্রাহ্মণ সম্প্রদায় মধ্যে সে পরিমাণে হয় নাই । ক্রিয়ৎকাল পরে তিনি গয়ায় গমন করিলেন, এবং তথায় ঈশ্বর পুরী নামে জনৈক মন্ত্রদাতার দ্বারা দীক্ষিত হইলেন । প্রথমে তিনি লক্ষ্মী নাম্নী কামিনীকে বিবাহ করেন । কিছু কাল পরে লক্ষ্মী সর্পাঘাতে গতাস্থ হন । এক্ষণে গয়া হইতে প্রত্যাগত হইয়া বিষ্ণুপ্রিয়া নামে সীমন্তিনীকে সহধর্মিণী করিলেন (১) ।

(১) তবেত করিলা প্রভু গয়াতে গমন ।

ঈশ্বর পুরীর সঙ্গে তথায় মিলন ॥

দীক্ষা অনন্তরে কৈল প্রেম পরকাশ ।

দেশে আগমন পুনঃ প্রেমের বিলাস ॥

চৈতন্যচরিতামৃত আদিলীলা ।

চৈতন্য, ১৪৩১ শকে, খৃঃ ১৫০৯ অব্দে, ২৫ বৎসর বয়সে, পরিবারের অগোচরে কাটোয়া গ্রামে যাইয়া, কেশব ভারতী নামক এক জন দণ্ডীর নিকট সন্ন্যাস-ধর্ম গ্রহণ করিলেন। কাটোয়া হইতে বৃন্দাবন গমনোদ্দেশে রাত্ৰ দেশে উপনীত হইলেন, এবং প্রেমাবেশে উন্মত্ত হইয়া দিগ্দিগ্‌ জ্ঞান শূন্য হইয়া ইতস্ততঃ ভ্রমণ করিতে লাগিলেন। এই সুযোগে নিত্যানন্দ ও অদ্বৈত তাঁহাকে পথ ভুলাইয়া শান্তিপুরে আনিলেন এবং শচীদেবীকে আনাইয়া অদ্বৈত গোস্বামীর বাটীতে তাঁহার সহিত সাক্ষাৎ করাইলেন। চৈতন্য কিছু দিন জননীর সহিত তথায় অবস্থান করণানন্তর জগন্নাথ দর্শনার্থ লীলাচলে গমন করিলেন, এবং তথায় কিয়ৎকাল অবস্থিত হইলেন। তদনন্তর দণ্ডকারণ্য, ত্রীরুপস্তন ইত্যাদি নানা তীর্থ পর্যটন, ও তৎ-প্রদেশস্থ অনেক বৌদ্ধধর্মাবলম্বিগণকে বৈষ্ণব করেন। পরে নানাদেশ ভ্রমণ করণানন্তর ধর্ম বিস্তারার্থে স্বদেশে পুনরায় আসিলেন। কিছু কাল পরে দাক্ষিণাত্যে গমন করিলেন। উড়িষ্যার উত্তর-পশ্চিম দেশীয় অনেক জাতি বৈষ্ণব ধর্ম গ্রহণ করেন। তথা হইতে বৃন্দাবন গমন কালে তিনি বারাণসীতে উত্তীর্ণ হইলে, কাশীবাসী বৈদান্তিক পৌরাণিক প্রভৃতি বিবিধ ধর্মাবলম্বী ও শাস্ত্রব্যবসারিগণ তাঁহার সহিত সাক্ষাৎ ও আলাপ করিতে আইসেন। তিনি বৈদান্তিকগণের সহিত বহুতর বিচার করিলেন, কিন্তু স্বধর্মের প্রাধান্য কোন মতে প্রতিপন্ন করিতে পারিলেন না। কাশী হইতে তিনি মথুরায় গমন করিলেন এবং অল্পকাল মধ্যেই পুনরায় কাশীতে আসিলেন। চৈতন্য সন্ন্যাসাশ্রমী হইয়া বেদান্ত পাঠ করেন না, সাকারবাদীদিগের ন্যায় সর্বদা হরিনাম ও হরিসঙ্কীর্তন করিয়া বেড়ান, ইনি

অতি মুখ, সন্ন্যাসধর্মের তত্ত্ব কিছুই না বুঝিয়া সন্ন্যাসী হইয়া-
ছেন,—ইত্যাদি নানা প্রকার, মায়াবাদী দণ্ডিগণ তাঁহার নিন্দাবাদ
করিতে লাগিলেন । এক দিবস এক বিপ্রালয়ে তাঁহার ভিকার
নিমন্ত্ৰণ হইল । তিনি তথায় উপনীত হইয়া দেখিলেন, অনেক
গুলি সন্ন্যাসী বসিয়া আছেন । তিনি তাঁহাদিগকে প্রণাম
করণানন্তর দূরে বসিলেন । সন্ন্যাসিসম্প্রদায়ের প্রধান প্রকাশ-
নন্দ সম্মানপূর্ব্বক তাঁহাকে আপনার আসনে বসাইলেন, এবং
জিজ্ঞাসা করিলেন যে, আপনি সন্ন্যাসী হইয়া সন্ন্যাস ধর্মের
বিপরীতাচরণ কেন করেন । তিনি উত্তর করিলেন যে, যদি
আপনারা সুস্থির হইয়া শ্রবণ করেন, তবে আমি তাহার কারণ
বর্ণন করি । সন্ন্যাসিগণ এই প্রস্তাবে সম্মত হওয়াতে, তিনি
কহিতে লাগিলেন যে, আমার গুরু আমাকে সন্ন্যাসধর্ম
দীক্ষিত করিয়া কহিলেন যে, তুমি মুখ, তোমার বেদান্তে অধিকার
নাই, অতএব কৃষ্ণনাম জপ কর, তাহাতে তোমার মোক্ষ
লাভ হইবেক, এই কথা বলিয়া আমাকে এই শ্লোক শিখাইয়া
দিলেন যে,—

হরেনাম হরেনাম হরেনামৈব কেবলং ।

কলৌ নাস্ত্যেব নাস্ত্যেব নাস্ত্যেব গতিরন্যথা ॥

এই আজ্ঞানুসারে আমি হরিনাম ও হরি কীর্তন করিয়া
থাকি । ইহা কহিয়া তিনি কৃষ্ণনামের মহিমা বিষয়ে এক অপূর্ব্ব
মনোহর বক্তৃতা করিলেন । সন্ন্যাসিগণ সাতিশয় পুলকিত
মনে ইহা শ্রবণ করিলেন এবং তাঁহার মতাবলম্বী হইলেন ।

অনতিকাল মধ্যে তাঁহার খ্যাতি বারাণসী মধ্যে সর্বত্র বিস্তারিত হইল এবং তাঁহার ভক্তের শ্রেণী সুদীর্ঘ হইতে লাগিল (১)।

অনন্তর তিনি কালীতে দুই মাসাধিক কাল অবস্থান করণানন্তর প্রয়াগে প্রস্থান করিলেন, এবং তথায় কিয়ৎকাল যাপন করিয়া বৃন্দাবনে উপনীত হইলেন। এই রূপে নানাদেশ ভ্রমণ ও ধর্ম প্রচারণে ষড়্‌বর্ষ অতীত হয়। অবশিষ্ট অষ্টাদশ বৎসর লীলাচলে কাল যাপন করেন। তিনি পূর্বে কখন কখন ভক্তিভাবে অভিভূত হইয়া উন্মত্ত প্রায় হইতেন। যৎকালে তিনি নবদ্বীপে অধ্যাপনা করিতেন, তখন এক দিবস তাঁহার এক ছাত্র তদীয় নিকটে যাইয়া দেখিলেন যে, তিনি ‘গোপী গোপী’ শব্দ করিতেছেন। ইহা শুনিয়া ছাত্র কহিল যে, আপনি কৃষ্ণনাম না লইয়া গোপীনাম কেন লইতেছেন। ইহা শ্রবণে চৈতন্য রাগান্বিত হইয়া যক্তি গ্রহণ পূর্বক তাহার পশ্চাৎ ধাবমান হইলেন। আর যখন সম্যাস ধর্ম গ্রহণ করণানন্তর বৃন্দাবন গমনোদ্দেশে ভ্রমণ করেন, তখনও তিনি জ্ঞান-শূন্য হন। বস্তুতঃ যখন তাঁহার হৃদয় প্রেমরসে পরিপূর্ণ হইত, তখনই তিনি প্রায় উন্মাদগ্রস্ত হইতেন (২)।

(১) এইরূপে সব সূত্রের ব্যাখ্যান শুনিয়া ।

সকল সম্যাসী কহে বিনয় করিয়া ॥

বেদময় মূর্তি তুমি সাক্ষাৎ নারায়ণ ।

কম অপরাধ পূর্বে যে কৈল নিন্দন ॥

এইরূপে সম্যাসীর ফিরে গেল মন ।

কৃষ্ণ কৃষ্ণ নাম সদা করয়ে গ্রহণ ॥

চৈতন্যচরিতামৃত আদিলীলা ।

(২) এত বলি চলে প্রভু প্রেমোন্মাদের চিহ্ন ।

দিধিদিধি জ্ঞান নাই চলে রাজি দিন ॥

ইদানীং বয়োবৃদ্ধি সহকারে এই উন্নততা আরও বৃদ্ধি পাইয়াছিল । প্রতিবৎসর বঙ্গদেশ হইতে বহুতর লোক তাঁহার দর্শনার্থ যাইতেন, এবং তিন চারি মাস তাঁহার সম্বিহিত থাকিতেন । চৈতন্য তাঁহাদের সহিত আমোদ প্রমোদে উন্নত হইতেন । এক জ্যোৎস্না-ময়ী যামিনীতে জলধি-নীর মধ্যে শুধাংশু কিরণের অপূৰ্ণ শোভা সন্দর্শনে শ্রীকৃষ্ণ যমুনায জল-কেলী করিতেছেন জ্ঞান করিয়া জল মধ্যে বাম্প প্রদান করেন । পরদিন তাঁহার দেহ ধীবরের জাল দ্বারা উত্তোলিত হয় । বৈষ্ণবদিগের মধ্যে এই প্রবাদ আছে যে, যখন সাগরগর্ভ হইতে তাঁহাকে উত্তোলন করে, তখন তিনি জীবিত ছিলেন এবং কিয়ৎকালানন্তর জগন্নাথ দেবের দেহে লীন হন । অষ্টচত্বারিংশত বর্ষ বয়সে তিনি মানব লীলা সম্বরণ করেন ।

চৈতন্য যাঁহাকে পরমেশ্বর বলিয়া জানিতেন, তাঁহার সহিত এত দূর প্রীতি করিয়াছিলেন যে, তিনি তাঁহার প্রেমে অভিভূত হইয়া কখন কখন উন্নতপ্রায় হইয়াছেন । এবং তাঁহার বাল্যাবস্থাধি জীবনের শেষাবস্থা পর্য্যন্ত তাঁহার উপাস্ত পরমেশ্বরের প্রতি তিনি একাদিক্রমে এতাদৃশ প্রগাঢ় প্রেম প্রকাশ করিয়াছেন যে, বোধ হয়, অবনীমণ্ডলে কোন নায়ক নায়িকাও তাঁহাদের প্রাণাধিক প্রিয়জনের প্রতি তাদৃশ অসদৃশ প্রণয় প্রদর্শন করিতে পারেন নাই । তিনি স্বীয় শ্রদ্ধা ও ভক্তিভাজন জনক জননী, হৃদয়-কাসিনী প্রণয়িনী, প্রাণোপম বন্ধুগণ এবং অতি প্রিয় জন্মভূমি পরিত্যাগ করিয়া পরমেশ্বরের পশ্চাদ্ধাবমান হইয়াছিলেন । তিনি

মিত্যানন্দ আচার্য্য রত্ন যুক্ল তিন জন ।

এতু পাছে পাছে তিন করেন গমন ॥

চৈতন্যচরিতামৃত মধ্যলীলা ।

কোন নূতন ধর্মের প্রচার ও বিস্তার করেন নাই। তাঁহার জন্ম গ্রহণের পূর্বে বৈষ্ণবদিগের যে ধর্ম ছিল, তাঁহারও সেই ধর্ম। বৈষ্ণবেরা যে নন্দের নন্দন শ্রীকৃষ্ণকে পরব্রহ্ম বলিতেন, ইনিও সেই শ্রীকৃষ্ণকে পরব্রহ্ম বলিয়াছেন। যে শ্রীকৃষ্ণ তাঁহাদের উপাস্য, সেই শ্রীকৃষ্ণ তাঁহারও উপাস্য। ভক্তি, জ্ঞান, তপস্যা, যোগ, দান, বৈরাগ্য, অহিংসা, নম্রতা, অকপটতা, চন্দন বিষ্ঠায় তুল্য জ্ঞান, ইত্যাদি উপাসনার প্রধান অঙ্গ; ইহা তাঁহারাও বলিতেন এবং ইনিও বলিয়াছেন। কেহ কেহ বলেন যে, তিনি ধর্মশাস্ত্রানুসৃত ও দেশাচার বিহিত আচার ব্যবহারের অনুবর্তী ছিলেন না, এবং জাতিভেদ মানিতেন না। আর তিনি সকল জাতিকে শিষ্য এবং সকল জাতির সহিত আহার ব্যবহার করিয়াছেন। কিন্তু তাঁহার সম্প্রদায়ের রচিত গ্রন্থে দৃষ্ট হয় যে, তাঁহার আচার ব্যবহার সকলই ধর্মশাস্ত্রানুসৃত ছিল। তিনি কোন শাস্ত্র বিরুদ্ধ কার্য করেন নাই। তিনি যথাশাস্ত্র গুরু-সম্মিধানে মন্ত্র গ্রহণ করিয়াছিলেন, এবং পরে বেদবিহিত সম্ম্যসধর্ম গ্রহণ করিয়া তদুপযোগী আচরণ করেন। তিনি স্বয়ং কোন ব্যক্তিকে মন্ত্র প্রদান করেন নাই। শ্রীকৃষ্ণে প্রীতি করিলে এবং তাঁহার প্রিয়কার্য সাধন করিতে পারিলে, কি হিন্দু কি শ্লেচ্ছ সকলেরই মুক্তিলাভ হইবেক, এই মাত্র প্রচার করিয়াছেন। নীচ বা শ্লেচ্ছ জাতি বলিয়া কোন জনকে ঘৃণা করেন নাই। তিনি সকল ভক্তকেই আলিঙ্গন ও স্নেহ করিতেন। কিন্তু শূদ্রের ভক্ষণ বা শূদ্রের সহিত একত্রে আহার কখন করেন নাই। তিনি শূদ্রের বাড়ীতে থাকিতেন, কিন্তু ব্রাহ্মণভবনে ভোজন করিতেন (১)।

(১) কাশীতে লেখক শূদ্র চন্দ্রশেখর ।

তার ঘরে রহিল। প্রভু স্বতন্ত্র ঈশ্বর ॥

চৈতন্যের ধর্ম প্রচারকগণের মধ্যে অদ্বৈত, নিত্যানন্দ, রূপ ও সনাতন গোস্বামী এই চারি জন সুপ্রসিদ্ধ । কৃষ্ণদাস কবিরাজ কর্তৃক বঙ্গভাষায় রচিত ছাপার চৈতন্যচরিতামৃত গ্রন্থ পাঠ করিলে, রূপ ও সনাতনকে হঠাৎ স্নেহ বলিয়া প্রতীত হয় । যখন তাঁহাদের চৈতন্যের সহিত প্রথম মিলন হয়, তখন তাহারা চৈতন্যকে, আমরা স্নেহ জাতি, স্নেহ সঙ্গী এবং স্নেহ কর্ম করি ইত্যাদি অনেক কথা বলেন (১) । কিন্তু বাস্তবিক তাঁহারা ব্রাহ্মণ ছিলেন । স্নেহের দাসত্ব করিতেন বলিয়া আপনাদিগকে আক্ষেপ পূর্বক স্নেহ বলিয়াছিলেন । দাবির ও সাক্ষর মল্লিক রূপ ও সনাতনের পদসংক্রান্ত উপাধি । তাঁহাদের ভ্রাতৃ-পুত্র শ্রীজীব গোস্বামী রুত লঘুতোষণী গ্রন্থে এই রূপ বর্ণিত আছে যে, কর্ণাটরাজ অনিরুদ্ধের দুই পুত্র, রূপেশ্বর ও হরিহর । রূপেশ্বর ঐক্য-রাজ্য হইয়া সন্ত্রীক পৌরন্দ্র দেশে উপনিবেশ করেন । তাঁহার তনয় পদ্মনাভ গঙ্গাতীরে অবস্থিত হন । পদ্মনাভের চতুর্থ নন্দন মুকুন্দের কুমার নামক পুত্র বঙ্গ দেশে আই-সেন । কুমারের পুত্র সনাতন ও রূপ । রূপ সনাতনের চৈতন্যের সহিত সম্মিলনের পূর্বে, তৎকৃত হংসদূত ও পদ্যাবলি ইত্যাদি কতিপয় গ্রন্থ প্রচলিত হইয়াছিল । চৈতন্যের ভক্তগণের মধ্যে হরিদাস নামে এক জন যবন ছিলেন । তিনি যবন হরিদাস

তপন মিশ্রের যের ভিক। সম্পাদন ।

সম্মানসীল সঙ্গ নাহি মানে নিমজ্ঞগ ॥

চৈতন্যচরিতামৃত আদি লীলা ।

(১) স্নেহ জাতি স্নেহ সঙ্গী করি স্নেহ কর্ম ।

গো ব্রাহ্মণ দ্রোহী সঙ্গ আমার সঙ্গম ॥

বলিয়া প্রসিদ্ধ। প্রবাদ আছে, যদিও তিনি বৈষ্ণব ধর্ম গ্রহণ করিয়াছিলেন, তথাপি যখন জাতি বলিয়া জগন্নাথ দেবের পুরী প্রবেশ করিতে পান নাই। ইহাতে স্পষ্ট বোধ হইতেছে যে, চৈতন্য সম্প্রদায় মধ্যেও জাতিভেদ বিলক্ষণ প্রচলিত ছিল। স্মৃতরাং রূপ ও সনাতন যখন জাতি হইলে কখনই হিন্দু বলিয়া পরিগণিত হইতে পারিতেন না। চৈতন্যের জন্মের পূর্বে বঙ্গদেশ বাসীদিগের মধ্যে অত্যন্ত লোক বৈষ্ণব-ধর্মাবলম্বী ছিলেন, ইদানীং তাঁহাদিগের তৃতীয়াংশ বৈষ্ণব হইয়াছেন। কিন্তু যে উৎকৃষ্ট ফলোদ্দেশ্যে চৈতন্য এই ধর্ম বিস্তার করণে এত যত্ন করিয়াছিলেন, সে ফল উৎপন্ন হয় নাই। বৈষ্ণব সম্প্রদায় মাঝে তাঁহাকে বিষ্ণুর অবতার বলিয়া বিশ্বাস করেন, অথচ তাঁহার প্রদর্শিত পথের পথিক হইতে পরাঙ্মুখ থাকেন। যে সকল দোষ দর্শনে, চৈতন্যের শাক্ত ধর্মের প্রতি অশ্রদ্ধা জন্মে, সেই সকল দোষ ইহাদিগের মধ্যে বহুল পরিমাণে রহিয়াছে, এবং এ ধর্ম ব্যভিচার দোষের এক প্রকার আশ্রয় স্থল হইয়াছে বলিলেও অত্যাুক্তি হয় না।

নবদ্বীপের রাজা বা পণ্ডিতগণ চৈতন্যকে অবতারের মধ্যে কখন গণ্য করেন নাই; একারণ যদিও চৈতন্যের প্রবর্তিত ধর্ম প্রচারক, অদ্বৈত ও নিত্যানন্দ গোস্বামী, ও তাঁহাদের পরপুরুষগণ, এই রাজাদিগের অধিকারের চতুঃপার্শ্বে ভূরি ভূরি শিষ্য করিয়াছেন, তথাপি যে প্রদেশে তাঁহাদের বাস, সে প্রদেশে প্রথমে বহুতর শিষ্য করিতে পারেন নাই।

রঘুনন্দন ভট্টাচার্য্য নবদ্বীপে জন্মেন, কি স্থানান্তর হইতে তথায় অধিবসতি করেন, তাহা নিশ্চয় জানা যায় না। তাঁহার পূর্বে মিথিলাপ্রদেশস্থ বাচস্পতিমিশ্র, বিবেককার শূলপাণি,

ধর্মরত্ন-সংগ্রাহক জীমূতবাহন প্রভৃতি স্মৃতি-সংগ্রাহকারগণের ব্যবস্থানুসারে বঙ্গদেশে কর্মকাণ্ড ইত্যাদি চলিয়া আসিত। রঘুনন্দন, স্বরূপ ব্যাখ্যা দ্বারা ঐ মতের দোষ দর্শাইয়া, পুরাতন স্মৃতি সমূহকে শুদ্ধিতত্ত্ব, উদ্ধাহতত্ত্ব, তিথিতত্ত্ব, মলমাসতত্ত্ব, সংস্কারতত্ত্ব, দায়তত্ত্ব, একাদশীতত্ত্ব প্রভৃতি অষ্টাবিংশতি তত্ত্বে বিভক্ত করেন। ইদানীং বঙ্গদেশের প্রায় সমস্ত প্রদেশ মধ্যে পূজা বিবাহ প্রভৃতি কর্মকাণ্ড তাঁহার মতানুসারে হইতেছে।

তিনি প্রাচীন মতের দোষ প্রদর্শন করিয়া যে অভিনব মত প্রকাশ করিয়া গিয়াছেন, তদ্বারা কি ধর্ম রক্ষা করিয়াছেন তাহা বুদ্ধিগম্য হয় না। প্রাচীন মতে, বিধবাগণ অত্যন্ত অসুস্থাবস্থা, অতি শৈশবাবস্থা, অথবা অতি বৃদ্ধাবস্থা ইত্যাদি স্থলে একাদশী দিবসে উপবাসের পরিবর্তে যে অনুকম্প করিতে পারিতেন, রঘুনন্দন উক্ত মত ধ্বংস পূর্বক সেই অনুকম্প শাস্ত্র-বিরুদ্ধ বলিয়া নির্দেশ করিলেন। সংসারের ইচ্ছা সাধন ও অনিচ্ছা নিবারণ জন্যই ব্যবস্থার প্রয়োজন হয় এবং এই উত্তর সঙ্কল্প যে ব্যবস্থা দ্বারা সম্পন্ন হয় তাহাই যথার্থ শাস্ত্রানুমত ও ন্যায্যানুগত। যে ব্যবস্থা দ্বারা মাতৃহত্যা, ভগ্নীহত্যা, কন্যাহত্যা ইত্যাদি ভয়ানক বিগর্হিত কর্ম করিতে হয়, তাহা কোন মতেই যথার্থ শাস্ত্রানুমোদিত হইতে পারে না। পীড়িতাবস্থায় যে ঐষধ সেবনে এক দণ্ড বিলম্ব হইলে বিগত জীবন হইতে হয়, সেই ঐষধ অর্থাৎ প্রহর সেবনে নিষেধ। কি আশ্চর্য্য! বোধ হয় যত দিন দেশের অবস্থার উন্নতি হইতে থাকে, তত দিন বদ্বারা লোকের মঙ্গল হয়, এইরূপ সরল ও হিতজনক বিধি ব্যবস্থাপকগণের লেখনী হইতে নিঃসৃত হয়, এবং বধন দেশের অগৌরব হইতে আরম্ভ হয়, তখন

অনিষ্টকর ও কুটিল ব্যবস্থার প্রতি তাঁহাদের মন ধাবিত হইতে থাকে। যাহা হউক, যদিও সৌভাগ্যক্রমে ঐ মত বঙ্গ দেশের সর্বত্র প্রচলিত হয় নাই, তথাপি তাঁহার জন্মভূমির সম্বিহিত প্রদেশ সমূহ, তাঁহার ঐ নিতান্ত নিষ্ঠুর ও বিগর্হিত ব্যবস্থানুসারে, অশেষ ক্লেশ ভোগ করিতেছে এবং যার পর নাই মনস্তাপ পাইতেছে।

রঘুনাথ শিরোমণি নৈয়ায়িক ছিলেন। ইতিপূর্বে মিথিলাতে ন্যায়শাস্ত্রের যেরূপ চর্চা ছিল, বঙ্গদেশ মধ্যে সেরূপ ছিল না; এ কারণ রঘুনাথের উপাধ্যায় বাসুদেব সার্কর্ভোম তথায় গমন পূর্বক ন্যায়শাস্ত্রের পাঠ সমাপ্ত করিয়া আইসেন। রঘুনাথের সময়ে মিথিলাতে পক্ষধর মিশ্র নামে এক মহা-মহোপাধ্যায় নৈয়ায়িক ছিলেন। তাঁহার এই নিয়ম ছিল যে, কোন বিচারার্থী আইলে প্রথমতঃ তদীয় কয়েক জন ছাত্রের সহিত ক্রমান্বয়ে বিচার করিতে হইবেক। যদি ছাত্রগণ সকলেই পরাস্ত হন, তখন তাঁহার সহিত বিচার হইবেক। ছাত্রেরা এরূপ পণ্ডিত ও স্মৃত্যর্কিক ছিলেন, যে তাঁহাদের সকলকে পরাজয় করা এ পর্য্যন্ত কাহারও ভাগ্যে ঘটে নাই। রঘুনাথ, সার্কর্ভোমের নিকট পাঠ সমাপ্ত করণানন্তর মিথিলায় গমন পূর্বক, প্রথমে শিষ্যগণকে ও তদনন্তর উপাধ্যায়কে বিচারে পরাভূত করিয়া পক্ষধরের গর্ব খর্ব করিলেন। তৎপরে স্বদেশে প্রত্যাগমন করিয়া অধ্যাপনা করিতে লাগিলেন। তাঁহার খ্যাতি অনতি দীর্ঘ কাল মধ্যে সর্বত্র বিস্তারিত হইল, এবং নানা দেশের পাঠার্থীগণের আগমনে তাঁহার চতুষ্পাঠী পূর্ণ হইয়া গেল। তিনি চিস্তামণি নামক ন্যায়শাস্ত্রের মূল গ্রন্থের খণ্ড চতু-কুয়ের দীর্ঘিতি নামে টীকা, ও বৌদ্ধাধিকারের গঙ্গেশোপাধ্যায়-

কৃত মূল গ্রন্থের টীকা, এবং অনেক বাদার্থ রচনা করেন । তাঁহাকে কাণাভট্ট শিরোমণিও বলিয়া থাকে । তাঁহার সময় হইতেই নবদ্বীপে ন্যায়শাস্ত্রের অধিক আলোচনা ও গ্রন্থ রচনা হইতে থাকে । তাঁহার পরে, রামভদ্র সিদ্ধান্ত, রাজসাহির অন্তঃপাতি নিশিন্দা গ্রাম বাসী উদয়নাচার্য্য ভাট্ট কৃত কুম্মাঞ্জলি গ্রন্থের রামভদ্রীয় নামে টীকা ; ও ভবানন্দ সিদ্ধান্তবাগীশ, রঘুনাথ শিরোমণি কৃত দীধিতি গ্রন্থের টীকা ও বহু বাদার্থ গ্রন্থ ; তদনন্তর মথুরানাথ তর্কবাগীশ, চারি খণ্ড চিন্তামণি গ্রন্থের টীকা, এবং শিরোমণি কৃত দীধিতি গ্রন্থের টীকা ও বহু বাদার্থ গ্রন্থ ; তৎপরে জগদীশ তর্কালঙ্কার, সমস্ত দীধিতি গ্রন্থের টীকা, এবং শব্দশক্তি-প্রকাশিকা নামে প্রসিদ্ধ বাদার্থ ইত্যাদি নানা গ্রন্থ ; তদনন্তর গদাধর ভট্টাচার্য্য, শক্তিবাদ, মুক্তিবাদ এবং ব্যুৎপত্তিবাদ ও রঘুনাথ কৃত বৌদ্ধাধিকারের বিবরণ গ্রন্থের টীকা ইত্যাদি রচনা করেন ।

রঘুনন্দন ও রঘুনাথ শিরোমণির সময়ে বা তাহার কিঞ্চিৎ পরে, নবদ্বীপে কৃষ্ণানন্দ নামক এক জন অসাধারণ তত্ত্বশাস্ত্র বিশারদ প্রাদুর্ভূত হন । তিনিই তত্ত্বসার গ্রন্থ সঙ্কলন করিয়া আপনাকে সুবিখ্যাত করিয়া গিয়াছেন ।

ক্রমশঃ নবদ্বীপে যেমন বিবিধ গ্রন্থ রচিত ও চতুষ্পাঠীর সংখ্যা বর্দ্ধিত হইতে আরম্ভ হইল, তেমনি নানা অঞ্চল হইতে বিদ্যার্থীগণের সমাগম ত্রোত দিন দিন বৃদ্ধি হইতে লাগিল । কেহ কেহ পাঠ সমাপনান্তে এই খানেই অধ্যাপনা করিতে প্রবৃত্ত হইলেন । নবদ্বীপের রাজারা, অধ্যাপকগণের জীবিকা নির্বাহার্থে, যথেষ্ট নিষ্কর ভূমি দান, ও ছাত্রদিগকে ছাত্রবৃত্তি প্রদান ইত্যাদি বিবিধ প্রকারে বিদ্যোন্নতির প্রাতি বিশেষ উৎসাহ দিতে লাগিলেন ।

এই সকল কারণ প্রযুক্ত নবদ্বীপ বিদ্যোপাধ্বজনের এক অদ্বিতীয় স্থান হইয়া উঠিল। বৈষ্ণবদিগের মধ্যে চৈতন্য গোরাঙ্গ অবতার বলিয়া বিশ্বাস হওয়াতে নবদ্বীপের মাহাত্ম্য আরও বৃদ্ধি হইল। বৎসর বৎসর নানা স্থান হইতে লোক সমূহ নানা বোলে চৈতন্যের অবতরণ স্থান দর্শন ও ভদ্রানুসঙ্গিক মঙ্গলবাগান করিতে আসিতে লাগিল। এই রূপে নবদ্বীপ তীর্থাবলী মধ্যেও পরিগণিত হইয়া উঠিল।

যবনাধিকার কালে নবদ্বীপ নদীয়া পরগণা বলিয়া খ্যাত হইয়াছিল। নবদ্বীপ হইতে নদীয়া নামের উৎপত্তি হয় তাহার কোন সন্দেহ নাই। এই রাজাদিগের পূর্বপুরুষ ভবানন্দ মজুমদার এই পরগণা প্রাপ্ত হন। কালীনাথ রায় নামে এক ব্যক্তি ইহার পূর্ব জমিদার ছিলেন। ইহার রাজস্ব তৎকালে ৩৯৪৯৮ নির্দিষ্ট ছিল। এই পরগণার অন্তর্গত অনেক গ্রাম ইদানীং অন্য অন্য পরগণা ভুক্ত হইয়াছে। ক্ষিতীশ-বংশাবলি-চরিতে বর্ণিত আছে যে, প্রথমে ভবানন্দের বৃদ্ধ প্রপৌত্র রাজা রাম-কৃষ্ণ, নবদ্বীপাধিপতি উপাধি ধারণ করেন। অনুমান হয় যে, এই রাজাদিগের অধিকার মধ্যে নবদ্বীপ সর্বপ্রধান ও সুপ্রসিদ্ধ স্থান হেতুক, তিনি ও তাঁহার পর পুরুষেরা ইহার অধিপতি বলিয়া আপনাদিগের পরিচয় দিয়াছেন, এবং ক্রমশঃ ঐ নামে সর্বত্র প্রসিদ্ধ হইয়াছেন।

অষ্টম অধ্যায় ।

১০৭৭ খৃঃ আদে (শক ১১৯৯) বঙ্গদেশের রাজা আদিশূর কোন যোগের অনুষ্ঠান করেন। সেই যজ্ঞ সম্পাদনে এ দেশস্থ ব্রাহ্মণ-

গণকে অসমর্থ দেখিয়া, কান্যকুব্জরাজের নিকট প্রার্থনা করিয়া, ভট্টনারায়ণ, দক্ষ, শ্রীহর্ব, ছান্দড়, এবং বেদগর্ভ নামে শাস্ত্রজ্ঞ সদাচারী পঞ্চ ব্রাহ্মণকে আনয়ন করেন। তাঁহারা স্ব স্ব সহধর্মিণীকে সমভিব্যাহারে লইয়া আইসেন, এবং যাগ সমাপনান্তে, রাজার নির্বন্ধানুসারে এদেশে সপরিবারে উপনিবেশ করেন (১)। তাঁহাদের মধ্যে ভট্টনারায়ণ সর্বপ্রধান। তিনি কান্যকুব্জান্তর্ভূত কোন প্রদেশের ক্ষিতীশ নামক রাজার পুত্র। একারণ বঙ্গাধিপতি তাঁহাকে কতিপয় গ্রাম দান করিবার প্রস্তাব করিলেন। ভট্টনারায়ণের সঙ্গে অপরিচিন্ত অর্থ ছিল। তিনি, দান গ্রহণে অসম্মত হইয়া, মূল্য প্রদান পূর্বক প্রস্তাবিত কয়েক খানি গ্রাম গ্রহণ করিলেন। তিনি, ইতিপূর্বে, অপর লোকের নিকট আরও কতকগুলি নিষ্কর গ্রাম ক্রয় করিয়াছিলেন। এইরূপে তাঁহার একটি ক্ষুদ্র রাজ্য সংস্থাপিত হয়। (২)

(১) ইতি ঞ্জা তেন ব্রাহ্মণেন সর্ভিঃ দুতানু প্রেয্য বহুমানপুরঃসরং ভট্টনারায়ণ-দক্ষ-শ্রীহর্ব-ছান্দড়-বেদগর্ভ-সংজ্ঞকানু পত্নীভিঃ সহিতান সায়িকানু যজ্ঞোপকরণ-সামগ্রী-সংভূত্যানানীয নবনবত্যাধিক-নবশতী-শকাঙ্কে প্রাপ্ত-কম্পিত-বাসে নিবেসয়ামাস।

ক্ষিতীশবংশাবলিচরিতম্।

(২) অথ কান্যকুব্জে বিদিত-প্রভাব-ক্ষিতীশনামনরেন্দ্র-পুত্রস্য ভট্টস্য লোকাভিত-কর্মভির্ভূশঃ পরিভূষ্ট রাজাহ। প্রভো ময়া কিরন্তো গ্রামা দীয়ন্তে কুপয়া তানু এহীতুমর্হসি। ভট্ট প্রাহ হুপ্রতিগ্রহ-গোহিরণ্যভিলসৌহাদি-সহিতা গ্রামা ময়া ন এহীতব্যা। রাজাহ অহুগ্রহেণ কিররেণ ময়া ভদ্রা কিং কর্তব্যং, মম পারলৌকিক সদৃশভির্বা কথং ভবিষ্যতি। ইতি ঞ্জা ভট্টঃ পুনরাহ। মম ধনানি বহুনি বিদ্যন্তে তৈর্ময়া কতিচিদ্গ্রামাঃ কীরন্তে, ভবতা বিক্রীতভাং, ভবতো বন্ধি-সমোপকারে বাঞ্ছান্তি তন্মৈব, অমুচিভোপকারঃ

পূর্বে হিন্দু ও যবন রাজাদিগের সময়ে, বঙ্গরাজ্যে গোড় ও বিক্রমপুর দুই রাজধানী ছিল। রাজারা কখন গোড়ে কখন বিক্রমপুরে অবস্থান করিতেন। রাজা আদিশূর যখন এই যাগের অনুষ্ঠান করেন, তখন তিনি কোন্ রাজধানীতে ছিলেন, তাহা কোন ইতিহাসে ব্যক্ত নাই। কিন্তু ভট্টনারায়ণের পরপুরুষেরা যে স্থানে অবস্থিতি ও আধিপত্য করিতেন, তাহা বিক্রমপুরের সম্বিহিত; একারণ অনুমান হয় যে, উল্লিখিত যজ্ঞানুষ্ঠান কালে, আদিশূর বিক্রমপুরে অধিষ্ঠিত ছিলেন। যাহা হউক, ভট্টনারায়ণ, নিপু, হলায়ুধ, হরিহর, কন্দর্প, বিশ্বস্তর, নরহরি, নারায়ণ, প্রিয়ঙ্কর, ধর্মাস্তদ, তারাপতি, কামদেব এই দ্বাদশ পুরুষ, ক্রমান্বয়ে ১৩৯৯ খঃ অব্দ পর্যন্ত, সর্বশুদ্ধ ৩২২ বৎসর এই রাজ্য ভোগ করেন।

কামদেবের চারি পুত্র। পিতার লোকান্তর গমনের পর, তাঁহারা, পৈতৃক রাজ্যের অংশ পাইবার নিমিত্ত, পরস্পর বিবাদ করিতে লাগিলেন। তাঁহাদের কলহানল ক্রমশঃ প্রজ্বলিত হইয়া উঠিল। অবশেষে, তাঁহারা এই বিবাদ ভঞ্জনার্থ দিল্লির সম্রাটের নিকট আবেদন করিলেন। দিল্লীশ্বর লোভ-পরবশত প্রযুক্ত বিরোধি-রাজ্যের রাজস্বাভিলাষী হইলেন। আত্মগণের মধ্যে তিনজন রাজ্যভ্রা পালনে নানা প্রকার আপত্তি করিতে লাগিলেন, কেবল জ্যেষ্ঠ ভ্রাতা বিশ্বনাথ রাজস্ব প্রদানে

ক্রিয়তাং । অস্তা রাজাহ তথৈবান্ত । ততঃ স্বপ্নেন মূল্যেন বহবঃ গ্রামা
বিক্রীতাঃ তেষু চ প্রতিবর্লকব্যকরা গ্রামান্তরলক্যকরেষু বহ্বিতাঃ । তট্টেন
চ ক্রীতা গ্রামাঃ চতুর্বিংশতিবর্ষান্ নিষ্করং ভূজন্তেষু ।

কিতীশবংশাবলিচরিতম্ ।

সম্মত হইলেন। সত্ৰাট, তাঁহার উপর সাতিশয় সম্ভুক্ত হইয়া, তাঁহাকে উক্ত সমগ্র রাজ্যের অধিকারী করিলেন। কিয়ৎকাল পরে, বিশ্বনাথ, সত্ৰাটের অনুগ্রহে কাঁকুদি প্রভৃতি আরও অনেক গুলি পরগণা প্রাপ্ত হইলেন। তিনি, রামচন্দ্র, মুরুদ্বি, কংসারি, ত্রিলোচন, ষষ্ঠিদাস, কাশীনাথ, এই সপ্ত-পুরুষ, একাদি ক্রমে, ১৫৯৭ খঃ অব্দ পর্য্যন্ত, সর্বসাকুল্যে ১৯৮ বৎসর, এই জমীদারী ভোগ করেন।

কাশীনাথের অধিকার কালে, ত্রিপুরাধিপতির প্রেরিত কতক গুলি হস্তী তাঁহার জমীদারীর মধ্য দিয়া, দিল্লি-অভিমুখে যাইতেছিল; হঠাৎ তন্মধ্যে একটি হস্তী, মত্ত হইয়া এক গ্রাম প্রবেশ পূর্বক, প্রজাপুঞ্জের বৎপরোনাস্তি ক্ষতি করিতে লাগিল। কাশীনাথ এই ব্যাপার শ্রবণ করিয়া, এই করীকে হত্যা করিতে আদেশ দিলেন। তদানীন্তন বঙ্গদেশের নবাবের সহিত তাঁহার অতিশয় অস্বরস ছিল। নবাব অনেক দিবসাবধি বৈরনির্যাতনের ছল অন্বেষণ করিতে ছিলেন, কিন্তু এপর্য্যন্ত কোন ছল পাইয়া উঠেন নাই। এক্ষণে পূর্বোক্ত ব্যাপার শত্রু নিপাতের একটি, বিলক্ষণ সুযোগ ঘটিয়াছে ভাবিয়া নানাবিধ কল্পিত দোষারোপ পূর্বক সত্ৰাট আকবরের নিকট এই বৃত্তান্ত লিখিয়া পাঠাইলেন। সত্ৰাট নবাবের কল্পিত বাক্যে প্রভারিত হইয়া, রোষ-পরবশ হইলেন, এবং কাশীনাথকে বন্দীভূত করিয়া দিল্লি প্রেরণের আদেশ দিলেন। কাশীনাথ, সংবাদ পাইবা মাত্র, অতিশয় ব্যস্ত সমস্ত হইয়া, স্বীয় সহধর্ম্মিণী ও কতিপয় অনুচর সমভিব্যাহারে দক্ষিণ দিকে পলায়ন করিলেন। নবাবসৈন্যও তাঁহার অনুসরণে ধাবমান হইল। কতিপয় দিবসের পর, তিনি জলঙ্গী নদীর অদূরবর্তী বাগওয়ান পরগণার

অন্তর্গত আন্দুলিয়া গ্রামে উপনীত হইলেন । ঐ গ্রামে মৎস্য বিক্রয় হইতেছে দেখিয়া, ধীবরজ্ঞীর হস্তে স্বীয় অঙ্গুরীয় প্রদান পূর্বক, “আমার ভৃত্যেরা পশ্চাৎ আসিতেছে, তাহাদিগকে এই অঙ্গুরীয় দিলে মৎস্যের স্বীকৃত মূল্য পাইবে” এইকথা বলিয়া মৎস্য লইয়া নদী অভিমুখে গমন করিলেন, এবং তথায় অবগাহন পূর্বক ঈশ্বরার্চনা করিতে বসিলেন । এদিকে নবাবসৈন্যও ঐ গ্রামে আসিয়া লোক মুখে অঙ্গুরীয় সংক্রান্ত কথা শুনিতে পাইল, এবং মৎস্য-ক্রেতাকে দেখাইয়া দিবার জন্য ধীবর-পত্নীকে তাড়না করিতে লাগিল । সে নদী-তীরে গিয়া তাঁহাকে দেখাইয়া দিল । নবাব-সেনাপতি কাশীনাথকে বন্দীভূত করিয়া দিল্লি অভিমুখে প্রস্থান করিলেন । কাশীনাথের মৃত্যুর দ্বিবিধ প্রবাদ আছে । ক্ষিতীশ বংশাবলি-চরিতে লিখিত আছে তিনি ধৃত হইয়া নবাব সেনানীর হস্তে নিহত হন, কিন্তু রাজবাটীতে প্রথিত আছে দিল্লির কারাগারে তাঁহার মৃত্যু হয় ।

নবম অধ্যায় ।

কাশীনাথের অনাধিনী পত্নী,—একজন ব্রাহ্মণ, একজন দাস, ও একটি দাসী এবং দুই সহস্র স্বর্ণ মুদ্রা সহিত, আন্দুলিয়া নিবাসী বাগওয়ান পরগণার জমীদার হরেকৃষ্ণ সমাদ্রারের আলয়ে আশ্রয় লইলেন, এবং তথায় সম্মান ও সমাদর পূর্বক

গৃহীতা হইলেন । (১) হরেকৃষ্ণ নিঃসন্তান ছিলেন । তিনি ঐ কামিনীকে অতি সুশীলা দেখিয়া দুহিতৃ-নির্কিংশেমে স্নেহ করিতে লাগিলেন । উক্ত রমণী গর্ভবতী ছিলেন, যথাকালে পুত্রবতী হইলেন । হরেকৃষ্ণ, নবকুমারের অপরূপ রূপলাবণ্য দর্শনে পরম প্রীত হইয়া, অন্ন-প্রাশনের সময়, তাঁহার নাম রামচন্দ্র রাখিলেন ; এবং যথাকালে তাঁহার উপনয়ন ও বিবাহ দিলেন । পরিশেষে, তাঁহাকে স্ত্রীয় সম্পত্তি সমূহের উত্তরাধিকারী করিলেন, এবং স্ববংশের সমাদ্দার উপাধি ধারণ করাইলেন । এই কারণেই কাশীনাথ রায়ের পুত্র রাম সমাদ্দার নামে খ্যাত । (২)

রামচন্দ্র সমাদ্দারের চারি পুত্র । ভবানন্দ, জগদীশ, হরিবল্লভ ও সুবুদ্ধি । ভবানন্দ অতি তরুণ বয়সেই সংস্কৃত বিদ্যার পারদর্শী হইলেন এবং অসাধারণ ধীশক্তি প্রকাশ করিতে লাগিলেন । যখন তাঁহার বয়ঃক্রম ১৩ কি ১৪ বৎসর, তখন এক দিবস জলঙ্গী নদীর তীরে ইতস্ততঃ বিচরণ ও দৃষ্টি সঞ্চারণ করিতেছিলেন, এমন সময়ে, কতকগুলি নৌকা শ্রেণীবদ্ধ হইয়া তথায় আসিতে লাগিল । অন্য অন্য যাঁহারা তথায় ছিলেন, তাঁহারা তরুণীতে মৈনিক পুরুষের লক্ষণাক্রান্ত লোক দেখিয়া সভয়ে প্রস্থান করিলেন ;

(১) কাশীনাথ-পত্নী চ সসত্বা স্ববর্ণশতদ্বয়-সহিতা একেন ভৃত্যেনৈকয়া দাস্যা পরিচারকৈকভ্রাক্ষণেন চ সহিতা হরিকৃষ্ণ-সমুদ্বারস্য বাট্যাং পিতৃ-মন্দিরেইব তস্থে ।

ক্ষিতীশবংশাবলিচরিতম্ ।

(২) সমুদ্বার-বাটী-জাতদ্বাং প্রাপ্ত-সমুদ্বার-রাজদ্বাচ্চ ত্রয়পি সৰ্বৈ রাম-সমুদ্বার-নামা প্রথয়ন্তি ।

ক্ষিতীশবংশাবলিচরিতম্ ।

কিন্তু তিনি নিঃশঙ্ক চিত্তে পোতাবলির সম্বিহিত হইলেন । বস্তুতঃ ঐ নৌকারোহিণী রাজসংক্রান্ত লোকই ছিলেন । দিল্লির সম্রাট প্রেরিত একজন যবনজাতীয় প্রদেশ-শাসনকর্তা হুগলি অঞ্চলে যাইতেছিলেন ।

পূর্বকালে, হুগলির উত্তরে সরস্বতী নদী তীরস্থ সপ্তগ্রাম নামে এক নগর বঙ্গরাজ্যের প্রধান বাণিজ্য-স্থান ছিল । ঐ নগরের অনতিদূরে গঙ্গা, যমুনা, ও সরস্বতী এই নদীত্রয়ের সন্ধিস্থান ছিল । পুরাণে বর্ণিত আছে যে, এই তিনটি নদী প্রয়াগে মিলিত হইয়া, এই স্থান পর্য্যন্ত আইসে, এবং এখানে পরস্পর স্বতন্ত্র হইয়া ভিন্ন ভিন্ন স্থানাভিমুখে গমন করে । যে স্থানে তাহাদের মিলন হয় তাহার নাম যুক্তবেণী, ও যে স্থানে বিচ্ছেদ হয় তাহার নাম মুক্তবেণী । এই উভয় স্থানই ত্রিবেণী নামে খ্যাত এবং তীর্থ মধ্যে পরিগণিত । মুক্তবেণী হইতে গঙ্গা দক্ষিণ মুখী হইয়া কলিকাতা ও খিদিরপুরের মধ্য দিয়া, পূর্ব-দক্ষিণ গমন পূর্বক সুন্দরবন প্রবেশ করে । যমুনা ওস্তের নিকট পূর্ববাহিনী হইয়া, টাকির সম্বিহিত ইচ্ছামতী নদীর সহিত সম্মিলিতা হয় । সরস্বতী, প্রথমে পশ্চিম-দক্ষিণ ও তৎপরে পূর্ব-দক্ষিণ বাহিনী হইয়া, সাঁথ্রালের ও রাজগঞ্জের নিকট গিয়া, পরিশেষে দক্ষিণাশ্রা হয়, ও তদনন্তর অন্য নদীর সহিত মিলিতা হইয়া উলুবাড়িয়া অভিমুখে যায় । এই সকল নদী দ্বারা ভারতভূমি-জাত নানাবিধ পণ্য দ্রব্য নৌকা যোগে সপ্তগ্রামে উপস্থিত হইত, এবং যে সকল বণিকপোত সাগর বাহিয়া আইসে সে সকল সরস্বতী দিয়া তথায় আসিত । যদিও অতি প্রাচীন কালাবধি এই নগর বঙ্গ রাজ্যের এক প্রধান স্থান বলিয়া প্রসিদ্ধ ছিল, তথাপি হিন্দু রাজত্ব সময়ে, এই নগরে রাজ কার্য্য কতদূর হইত তাহার

কোন নিদর্শন পাওয়া যায় না। কিন্তু যখন অধিকার কালে, এই নগরে একজন প্রধান রাজপুরুষ থাকিয়া রাজকার্য্য নির্বাহ করিতেন, ইহা ইতিহাস পাঠে স্পষ্ট বোধ হয়। সত্রাট্ সাহা জাহান, যখন হুগলি হইতে পটুগিজদিগকে দূরীভূত করিয়া, তথায় ঐ নগরের সমস্ত রাজকার্য্যের কাগজপত্র আনিতে আদেশ দেন, এবং কোজদার উপাধি (১) দিয়া একজন রাজপুরুষ নিযুক্ত করেন, তখন, নিশ্চয় অনুমিত হয় যে, পূর্বে সপ্তগ্রামে একজন প্রধান রাজপুরুষ থাকিতেন, এবং এ প্রদেশের অনেক রাজকার্য্যের ভার তাঁহার উপর অর্পিত থাকিত। যাবনিক ভাষাতে ঐ নগরকে সাতগাঁও কহিত। বাঙ্গালার দক্ষিণাঞ্চল সাতগাঁও, সলিমাবাদ, ও সোলতানপুর প্রভৃতি যে কয়েক বিভাগে বিভক্ত ছিল, তাহার মধ্যে সাতগাঁও অতি প্রধান। এই রাজবাটীতে দিল্লির সত্রাট্ দস্ত যে সকল ফরমাণ আছে, তাহাতে এই রাজা-দিগের অধিকারস্থ পরগণার অধিকাংশ সরকার সাতগাঁওর অন্তর্গত বলিয়া উল্লিখিত হইয়াছে।

অনন্তর, পূর্বোল্লিখিত শাসনকর্তা ভবানন্দকে নির্ভরচিত্ত দর্শনে, কোঁতুহলাক্রান্ত হইয়া, তাঁহাকে আহ্বান করিলেন এবং তাঁহার পরিচয় জিজ্ঞাসিলেন। ভবানন্দ, স্বীয় বংশ-বৃত্তান্ত যাহা অবগত ছিলেন তাহা কহিলেন। তদনন্তর এই রাজপুরুষ, কোন্ কোন্ নদী দিয়া ও কত দিনে হুগলি উত্তীর্ণ হইতে পারেন, তদ্বৃত্তান্ত জিজ্ঞাসা করিলেন। ভবানন্দ যে যে নদী বাহিয়া ও যে যে প্রধান গ্রামের নিকট দিয়া যাইতে হইবেক, তাহার

(১) কোজদার ছুটের শাসন ও অপরাধের বিচার করিতেন, এবং কখন কখন ভূম্যধিকারিগণের স্বামে রাজস্ব সংগ্রহ কার্য্যে নিযুক্ত হইতেন।

যথাযথ বর্ণন করিলেন। ইহা শ্রবণে রাজপুত্র জিজ্ঞাসিলেন “তুমি কখন এই পথে গিয়াছিলে?” তিনি বলিলেন “না মহাশয়, আমি যাই নাই। যে সকল নাবিকেরা ভুগলি অঞ্চলে গমনাগমন করে, তাহাদের মুখে এই সকল বৃত্তান্ত শুনিয়াছি।” রাজপুত্র, ঈদৃশ অসম্ভব বালকের মুখে এতদৃশ কথাবার্তা শ্রবণে অতিশয় চমৎকৃত ও প্রীত হইয়া, তাঁহাকে কহিলেন “আমার ইচ্ছা, তোমাকে সঙ্গে লইয়া যাইয়া বিদ্যাভ্যাস করাই।” ভবানন্দ, “যদি আমার আত্মীয়-দিগের অনতিমত না হয়, তবে আমি নিশ্চয় আপনার সঙ্গে যাইব” এই বলিয়া, বাটী প্রত্যাগত হইলেন। অনন্তর, তিনি স্নহৃদ্বর্গের পরামর্শানুসারে এই শাসনকর্তার সঙ্গে সপ্ত-গ্রাম গমন করিলেন এবং অনতি দীর্ঘকাল মধ্যে পারস্য বিদ্যায় ও রাজকার্য্যে পারদর্শী হইলেন। রাজপুত্র, তাঁহার উপর যৎপরোনাস্তি সন্তুষ্ট হইয়া, তদীয় উন্নতির নিমিত্ত, তাঁহাকে এক অনুরোধ পত্র দিয়া নবাবের নিকট পাঠাইয়া দিলেন।

ইতি পূর্বে বঙ্গদেশের শাসনকর্তৃগণ গোড় অথবা রাজ-মহলে অবস্থান করিতেন। পরে, সম্রাট জাঁহাঙ্গিরের রাজত্ব কালে যখন পর্তুগীজ জল-দস্যুগণ সমুদ্রতীরস্থ প্রদেশ সকল বারংবার লুণ্ঠিত ও উৎপাদিত করে, সেই সময়ে, তাহাদের আশু দমনের জন্য, ১৬০৮ খৃঃ অব্দে, নবাব এম্বাইল খাঁ ঢাকা নগর স্থাপন পূর্বক আপনার আবাসস্থল করেন, এবং সম্রাটের নামে তাহার নাম জাঁহাঙ্গির নগর রাখেন। ভবানন্দ ঐ নগরে গমনপূর্বক নবাবের সহিত সাক্ষাৎ করিয়া স্বীয় বংশের ও বিদ্যার পরিচয় দিলেন। নবাব তাঁহার প্রতি প্রসন্ন হইয়া তাঁহাকে কানুনগুই

পদে (১) নিযুক্ত করিলেন, এবং সত্ৰাটের নিকট হইতে তাহার সমন্দের ও মজুন্দের (২) উপাধি আনাইয়া দিলেন। সেই অবধি তিনি ভবানন্দ মজুন্দের নামে খ্যাত হইলেন।

কতিপয় বর্ষ পরে, তিনি তাঁহার পিতা রাম সমাদ্দারের জমীদারী আপনার ও ভ্রাতৃগণের মধ্যে বিভাগ করিলেন। হরিবল্লভকে কতেপুর, জগদীশকে কুড়ালগাছি, শ্রুদ্ভিককে পাটকা-বাড়ি দিলেন, এবং অবশিষ্ট জমীদারী আপনি লইলেন। তদনন্তর, তিনি বল্লভপুরে, এবং অন্তরে স্ব স্ব গ্রামে বসতি করিলেন। (৩)

এই সময়ে, যশোহরের রাজা প্রতাপাদিত্য দিল্লীশ্বরের অবাধ্য হইয়া স্বাভাব্য অবলম্বন করেন, এবং পার্শ্ববর্তী ভূম্য-ধিকারিগণের জমীদারী অধিকৃত করিয়া লন। বঙ্গদেশের শাসন-কর্ত্তা তাঁহাকে কোন মতে পরাভূত করিতে পারেন নাই। প্রতাপাদিত্য, স্বীয় পিতৃব্য বসন্ত রায়ের প্রাণসংহার করিয়া, তদীয় পুত্রকেও হত্যা করিতে চেষ্টিত হইয়াছিলেন; কিন্তু রাজ্ঞী নানা কৌশলে ঐ যুবকের জীবন রক্ষা করেন। একবার কচুবনে লুণ্ঠিত হইয়া আসন্ন মৃত্যু হইতে রক্ষা পাওয়াতে, তিনি কচু

(১) এই পদের কার্য্য দ্বিতীয় অধ্যায়ে লিখিত হইয়াছে।

(২) জেলার রাজস্ব সংগ্রাহকের হিসাবের পরীক্ষক।

(৩) কিরংকালানন্তরং নিজালয়মাগত্য ভ্রাতৃভির্বিভক্তো বল্লভপুর-নাম-নগরে পুরীং নির্মায় সমুদ্রার-প্রাপ্ত-পৈতৃক-রাজ্যং বিংশতিবর্ষান্ শাসাম। হরিবল্লভরায়শ্চ কতেপুরনামগ্রামে জগদীশঃ কুড়ালগাছি-গ্রামে শ্রুদ্ভিকরায়ঃ পাটকাবাড়িগ্রামে পুরীং নির্মায় স্বথমবাংস্র্যঃ।

কিত্তীশবংশাবলিচরিতম্।

রায় নামে খ্যাত হইয়াছিলেন। অবশেষে কচুরায় পলায়ন করিয়া সত্ৰাটের শরণাগত হইলেন। তৎকালে সত্ৰাট জাঁহা-গির দিল্লির রাজ সিংহাসনে আসীন হইয়াছিলেন। তিনি প্রতাপাদিত্যের নৃশংস ব্যবহারে অতিশয় ক্রোধান্বিত হইয়া তাঁহার দমনার্থে রাজা মানসিংহকে পাঠাইলেন (১)।

মানসিংহ বহু সৈন্য সমেত বর্দ্ধমানে উপনীত হইলেন। তৎকালে বীরসিংহের পুত্র ধীরসিংহ বর্দ্ধমানের রাজা ছিলেন। ভবানন্দ কানুনগুই পদোপলক্ষে মানসিংহের সহিত সাক্ষাৎ করিলেন। মানসিংহ বঙ্গদেশের বিবিধ-বিষয়ক সংবাদ তাঁহাকে জিজ্ঞাসা করিলেন। ভবানন্দ তৎসমূহের যথাযথ উত্তর দিলেন। মানসিংহ, তাঁহার বুদ্ধিমত্তা, বিচক্ষণতা ও বহুদর্শিতা দর্শনে সন্তুষ্ট হইয়া, তাঁহাকে সন্নিকটে রাখিলেন এবং যথেষ্ট অনুগ্রহ করিতে লাগিলেন। তিনি এক দিন সুন্দরের সুবিখ্যাত সুড়ঙ্গের বৃত্তান্ত মজুমদারকে জিজ্ঞাসা করিলেন। মজুমদার বীরসিংহ-দুহিতা বিদ্যার বিবাহের পণ, কাঞ্চিপুরাধিপতির পুত্র সুন্দরের বর্দ্ধমানে আগমন, ও তৎপরে সুড়ঙ্গ খনন করিয়া বিদ্যা বিদ্যমানে গমন, ও তদনন্তর রাজকুমারীকে বিচারে পরাস্ত করিয়া তাঁহার সহিত গান্ধারবিবাহ সম্পাদন ইত্যাদি প্রবাদ সকল সবিস্তর বর্ণন করিলেন (২)।

মানসিংহ বর্দ্ধমান হইতে প্রস্থান করণানন্তর, অগ্রদ্বীপে আগমন করিয়া চৈতন্যশিষ্য ঘোষ ঠাকুরের প্রতিষ্ঠিত বিখ্যাত পোপীনাথ বিগ্রহ দর্শন করিলেন। তথা হইতে নবদ্বীপে আগমন

(১) পার্শ্ব সাহেবের ক্ষিতীশ বংশাবলি চরিতের উপক্রমণিকা। পৃঃ ১২

(২) এই উপলক্ষ করিয়া কবিবর ভারতচন্দ্র বিদ্যাসুন্দর কাব্য রচনা করেন।

পূর্বক অধ্যাপকগণের সহিত আলাপ করিয়া সাতশয় প্রীতি লাভ করিলেন । নবদ্বীপ হইতে যাত্রা করিয়া বঙ্গতপুর্নে ভবানন্দের ভবনে উত্তীর্ণ হইলেন, এবং তৎসম্বন্ধিত এক স্থানে শিবির সন্নিবেসিত করিলেন । তথায় অকস্মাৎ অশ্রুতপূর্বক ঝড় বৃষ্টি আরম্ভ হইল । এই দুর্যোগ সপ্ত দিন স্থায়ী হয় । ভবানন্দের আশ্রয়ে গোবিন্দদেব নামে এক দেব-মূর্তি স্থাপিত ছিল । ঐ সময়ে এই ঠাকুরের ঠাকুরাণী প্রতিষ্ঠা করিবার দিন স্থির হয় । প্রতিষ্ঠা কার্য্য অতি সমৃদ্ধিপূর্বক নির্বাহ করণোদ্দেশে, ভবানন্দ বিস্তর খাদ্য দ্রব্য আহরণ করিয়াছিলেন । এক্ষণে তিনি ঐ সকল দ্রব্য সৈন্যবর্গকে বিতরণ করিতে লাগিলেন, এবং তাহাদের কষ্ট নিবারণার্থে অসাধারণ যত্ন ও শ্রম করিলেন । ভবানন্দের বংশ-বৃত্তান্ত শ্রবণে এবং তাঁহার দক্ষতা ও ভদ্রতা দর্শনে, মানসিংহের হৃদয়ে তাঁহার উন্নতি সাধনের যে ইচ্ছার অঙ্কুর হইয়াছিল, তাহা এই আনুকূল্য দ্বারা বর্দ্ধিত হইল । দুর্যোগাবসান হইলে, তিনি মজুমদারকে কহিলেন “যদি প্রতাপাদিত্যের সহিত যুদ্ধে জয়ী হইতে পারি, তবে তোমার এ অসদৃশ উপকারের বিশেষ প্রত্যুপকার করিব ।”

অনন্তর, মানসিংহ ভবানন্দকে সঙ্গে লইয়া যশোহরাভিমুখে যাত্রা করিলেন, এবং তথায় উপনীত হইয়া প্রতাপাদিত্যকে সংগ্রামে পরাভূত ও পিঞ্জরবদ্ধ করিয়া দিল্লিতে প্রেরণ করিলেন । যশোহর হইতে প্রত্যগমন কালে, তিনি ভবানন্দকে, তাঁহার প্রার্থনানুসারে মহুপু, নদীয়া, মারুপদহ, লেপা, সুলতানপুর, কাশিমপুর, বয়শা, যশুগা প্রভৃতি ১৪ পরগণার জমীদারী প্রদান করিলেন, এবং বঙ্গদেশ হইতে দিল্লী গমন সময়ে, তাঁহাকে সঙ্গে লইয়া গেলেন । তথায় উপনীত হইয়া, ভবানন্দের বংশের

ইতিহাস, তাঁহার পিতামহের প্রতি সত্ৰাট আকবরের অবিচার, বাগওয়ানে দুর্যোগ সময়ে তাঁহার অসাধারণ আনুকূল্য, এবং যশোহরের যুদ্ধ-কালে তাঁহার স্মৃদ্ধগণ ইত্যাদি সত্ৰাট সমীপে বিশেষরূপে বর্ণন করণানন্তর, তাঁহাকে মহৎপুর প্রভৃতি ১৪ পরগণার ফরমাণ অর্থাৎ রাজ-সনন্দ প্রদানের বিষয় कहিলেন । সত্ৰাট, ভবানন্দের বংশবৃত্তান্ত ও সদৃশ্যের বিবরণ শ্রবণ করিয়া, তাঁহার প্রতি সাতিশয় প্রসন্ন হইলেন, এবং মানসিংহ প্রদত্ত চতুর্দশ পরগণার ফরমাণ দিতে অনুজ্ঞা দিলেন (১) । আর তাঁহাকে স্বসম্মিধানে আনাইয়া, তাঁহার সহিত হিন্দু ধর্ম প্রভৃতি নানাবিধ বিষয়ে কথোপকথন করিলেন । কিছু দিন পরে, ভবানন্দ, সত্ৰাটের নিকট বিদায় লইয়া, ফরমাণ, ও নওবৎ, ডঙ্কা, ঘড়ি ও নিশান ইত্যাদি সম্মানসূচক দ্রব্য সহিত, স্বদেশে প্রত্যাগত হইলেন । (২)

ভবানন্দ বাটী আসিয়া কিছু দিন পরে, তাঁহার অধিকারের মধ্যস্থলে মাটিয়ারি গ্রামে এক রাজবাটী প্রাপ্ত করিলেন, এবং তথায় অবস্থিত হইয়া রাজকার্য্য করিতে লাগিলেন । সপ্ত বর্ষ পরে, সত্ৰাটের অনুগ্রহে উখুড়া, ভালুকা, এসমাইলপুর, এসলামপুর প্রভৃতি আর কয়েক পরগণা প্রাপ্ত হইলেন । (৩) তাঁহার

(১) এই ফরমাণের তারিখ হিজরী ১০১৫ খৃঃ ১৬০৬ অব্দ ।

(২) ক্ষিতীশ বংশাবলি চরিতে বর্ণিত আছে যে, ভবানন্দ জমীদারীর সহিত রাজা উপাধি প্রাপ্ত হন । যথা,—অনন্তরং যবনাধিপো মানসিংহেন মন্ত্রয়িত্বা মজুমদারায় অভিলষিতং রাজ্যং দাতুংঙ্গীচকার তৎ-প্রেষিত-পত্রার্থং রাজ্যেতি প্রসিদ্ধখ্যাতিং চ সাক্ষরেণামুমোদয়ামাস ।

(৩) এই ফরমাণের তারিখ হিজরী ১০২২ খৃঃ ১৬১৩ অব্দ ।

তিন পুত্র ; শ্রীকৃষ্ণ, গোপাল ও গোবিন্দ । এই তিন পুত্রের মধ্যে গোপাল বিচক্ষণ ও কর্মদক্ষ ছিলেন ; একারণ ভবানন্দ, অন্য তনয়দ্বয়কে তাঁহাদের ভরণপোষণোপযোগী বিষয় নির্দিষ্ট করিয়া দিয়া, গোপালকে স্থায়ী উত্তরাধিকারী করিলেন, এবং কিয়ৎকালানন্তর পরলোকগামী হইলেন । তিনি যেরূপ বিচক্ষণতা, উদ্যোগিতা, কর্মদক্ষতা ইত্যাদি বিবিধ গুণালঙ্কৃত ছিলেন তাহার বর্ণন করা বাহুল্য ; কারণ তাঁহার বাল্যাবধি শেষ বয়স পর্য্যন্ত তদীয় সমুদয় কার্য্যে এই সকল গুণ প্রতিভাত হইয়াছে । যদিও তাঁহার পূর্ব পুরুষ ভট্টনারায়ণ এ প্রদেশে প্রথমাধিপত্য স্থাপন করেন, কিন্তু সে আধিপত্য কাশীনাথের জীবনের সঙ্গে অন্তর্মিত হইয়াছিল, সুতরাং ভবানন্দকেই নবদ্বীপের এ রাজবংশের প্রথম সূত্রসংস্থাপয়িতা বলিতে হয় ।

দশম অধ্যায় ।

গোপাল সত্রাটের নিকট হইতে শাস্তিপুর, সাহাপুর, তালুকা, রাজপুর প্রভৃতি কয়েক পরগণার জমীদারী পান । তিনি নরেন্দ্র, রামেশ্বর, ও রাঘব এই তিন পুত্র রাখিয়া লোকান্তর গমন করেন । নরেন্দ্র অতি উদ্ধত-স্বভাব ও প্রজাপুঞ্জের নিতান্ত অপ্রিয় ছিলেন । রামেশ্বরের বিষয় বুদ্ধির বিলক্ষণ অভাব ছিল । রাঘব প্রজারঞ্জক, কর্মদক্ষ এবং ধার্মিক ছিলেন, এজন্য, তিনিই পৈতৃক সম্পত্তির উত্তরাধিকারী হইলেন, এবং তাঁহার ভ্রাতৃগণকে মাসিক রুত্তি নিরূপিত করিয়া দিলেন । তিনি পৈতৃক জমীদারীর অতিরিক্ত রায়পুর, বেদারপুর, আল-নিয়া, খাড়িছুড়ি, মূলগড় প্রভৃতি কতিপয় পরগণা সত্রাট সাজাঁহার

নিকট প্রাপ্ত হন, এবং আরও কয়েক পরগণা কোন কোন জমীদারের স্থানে ক্রয় করেন। তিনি মাটিয়ারি পরিত্যাগ করিয়া রেউই (কৃষ্ণনগর) গ্রামে রাজধানী করিয়াছিলেন। তৎকালে কৃষ্ণনগর অতি ক্ষুদ্র গ্রাম ছিল। এখানে ব্রাহ্মণ, বৈদ্য, ও কায়স্থের বসতি প্রায় ছিল না। বিস্তর গোপের বাস ছিল। কেবল গঙ্গার নিকটস্থ বলিয়া এ স্থানে বাসস্থান করেন। ইদানীং যে সকল ভদ্র লোকের বসতি দৃষ্ট হয়, তাঁহারা প্রায় সকলেই রাজকুটুম্ব, রাজকর্মচারী এবং রাজার আনীত।

রাঘব গ্রামের চতুর্দিকে পরিখা খনন করান। ঐ পরিখা সহর পানার গড় নামে খ্যাত, এবং অদ্যাপি নগরের স্থানে স্থানে বর্তমান আছে। শান্তিপুর ও কৃষ্ণনগরের মধ্যস্থলে দোগনগর নামে যে গ্রাম আছে, তাঁহার সময়ে, ঐ গ্রামের নিকট কোন ভাল জলাশয় না থাকায়, গ্রীষ্মকালে অনেক ঊলি গ্রামের লোকের ও পশ্বাদির নিরতিশয় জলকষ্ট হইত, এ কারণ তিনি ঐ গ্রামে একটি সুদীর্ঘ দীর্ঘিকা খনন করাইলেন, এবং গ্রামের নাম দীঘীনগর রাখিলেন। ইহার জলকর দীর্ঘে ১৪৫২ হস্ত ও প্রস্থে ৪২০ হস্ত। সাধারণের হিতকর এই কার্য্য নিষ্পাদন করিতে বিংশতি সহস্র মুদ্রা ব্যয়িত হইয়াছিল। প্রথমাবধি প্রতি বৎসর বর্ষাকালে নিকটস্থ প্রান্তর হইতে জল-স্রোতের সহিত বিস্তর মৃত্তিকা ইহার মধ্যে আসিয়া পতিত হইতেছে, কিন্তু অদ্যাপি ইহাতে সম্বৎসর অবধি জল থাকে। এরূপ সুপ্রশস্ত দীর্ঘিকা নদীয় জেলার কোন স্থানে আর দৃষ্ট হয় না। এই জলাশয়ের পূর্ব তটে এক বৃহৎ ঘাট, ও এক অটালিকা নির্মিত, এবং তাহার অনতিদূরে, রাঘবেশ্বর নামে এক শিব প্রতিষ্ঠিত হইয়াছিল। অটালিকা ও ঘাট

ভগ্ন হইয়া গিয়াছে, কেবল দুইটি মন্দির মাত্র অবশিষ্ট আছে । তিনি মর্দনা গ্রামে (তীনগর) সুদীর্ঘ পরিখা বেষ্টিত আর একটি পুরী নির্মাণ করাইয়াছিলেন । তথায় মধ্যে মধ্যে বাইয়া অবস্থান করিতেন । তৎকালে ঐ স্থানের সম্বিহিত গোপাল নগর প্রভৃতি গ্রামে অনেক ধনবান্ বণিকের বসতি ছিল, এবং বিপুল বাণিজ্য ব্যবসায় হইত । রাঘব স্বীয় সদ্গুণে সত্ৰাটের অনুগ্রহ পাত্র হইয়াছিলেন এবং তাঁহার নিকট হইতে হস্তী প্রভৃতি নানাবিধ সম্মানসূচক উপহার পাইয়াছিলেন (১) । ইনি অতিশয় দয়াশীল ছিলেন, ব্রাহ্মণ ও অধ্যাপকদিগকে অনেক ভূমি দান করেন ।

রাঘবের দুই পুত্র, কদ্র ও প্রতাপনারায়ণ । কদ্র বিদ্বান্, বুদ্ধিমান্ এবং ধার্মিক । প্রতাপনারায়ণ প্রজা-পীড়ক ও পিতার অবাধ্য । এ কারণ রাঘব, সত্ৰাটের অনুমতি লইয়া, জমীদারীর দশাংশ কদ্রকে ও ছয় অংশ প্রতাপকে দিয়া যান । কিন্তু কদ্র, জনকের লোকান্তর গমনের পর, ভ্রাতাকে সম্মত করিয়া বাগওয়ান প্রভৃতি কতিপয় পরগণা তাঁহার হস্তে রাখেন ও আর আর যাবতীয় জমীদারী আপনি অধিকার করেন । ১০৮৭ হিজরিতে (১৬৭৬ খৃঃ অক) সত্ৰাট আলমগীরের নিকট হইতে ইহার ফরমান লইয়াছিলেন । দিল্লীখর তাঁহাকে সাতিশয় অনুগ্রহ করিতেন । তিনি কদ্রকে গয়াশপুর, হোসেনপুর, বাগ্‌মারি প্রভৃতি কয়েক সুবিস্তৃত পরগণা প্রদান করেন, এবং তাঁহার অটালিকার উপর কাকরা নির্মাণ করিবার অনুমতি দেন । মোসলমানদের রাজত্ব সময়ে, রাজার

(১) কিতাববংশাবলিচরিতে বর্ণিত আছে যে তৎপূর্বে গোড় ও তৎপার্শ্ববর্তী কোন প্রদেশের রাজার। দিল্লীখরের নিকট হস্তী উপহার পান নাই ।

বিশেষ অনুগ্রহের পাত্র ব্যতীত, কেহই ঐরূপ ভূষণ দ্বারা আপনার ভদ্রাসন স্নশোভিত করিতে পারিতেন না । ঐ সৌধ-ভূষণ যেমন শোভাকর, তদপেক্ষা অধিক সম্মানসূচক ছিল । কোন অট্টালিকার উপরিভাগে কাক্সরা দৃষ্ট হইলেই, সেই অট্টালিকা কোন বিশেষ রাজ-সম্মানিত ব্যক্তির আলয় বলিয়া দর্শকের প্রতীতি জন্মিত । অদ্যাপি এই কাক্সরা কৃষ্ণনগরের চকের ও নওবৎখানার শিরো-ভাগে স্থানে স্থানে বিদ্যমান আছে । বোধ হয় কাক্সরার আদর্শ দেখিয়াই এ প্রদেশে প্রতিমার চালের কল্কার সৃষ্টি হইয়াছে (১) ।

তৎকালে রেউই নগরে অনেক গোপের বসতি ছিল, এবং তাহারা মহা সমারোহপূর্বক কৃষ্ণের পূজা করিত, এ কারণ রুদ্র রেউইর নাম কৃষ্ণনগর রাখিলেন (২) । জাঁহাঙ্গীর নগর (ঢাকা) হইতে আলালবখ্শ নামে এক সুপ্রসিদ্ধ ও সুনিপুণ স্থপতিকে আনাইয়া চক ও নওবৎখানা প্রভৃতি নানাবিধ স্মরম্য হর্ম্য নির্মিত করিলেন । জাঁহাঙ্গীর নগর ব্যতীত এরূপ সুন্দর চক ও নওবৎখানা বঙ্গদেশের আর কোন স্থানে নাই । যদিও এক্ষণে এই দুই অট্টালিকা অতিশয় জীর্ণ ও ভগ্নাবস্থায় আছে, এবং সহসা দর্শনে কিছুই নয়নপ্রীতিকর বলিয়া বোধ হয় না, তথাপি কিঞ্চিৎ অভিনিবেশপূর্বক নিরীক্ষণ করিলে, ইহার শিল্প-চাতুর্য্য বিলক্ষণ রূপে প্রতীয়মান হয় । রুদ্র রাজবাটীর তিন দিকে প্রশস্ত পরিখা

(১) ক্ষিতীশবংশাবলিচরিতে উল্লিখিত আছে যে সম্রাট রুদ্রকে মহা-রাজা উপাধি প্রদান করিয়াছিলেন ।

(২) রেউই ইতি প্রসিদ্ধগ্রামে গোগোপানাং বহুনামাধিষ্ঠানামতঃ প্রশস্তঃ কৃষ্ণনামস্মরণাদ্যর্থঃ চ তদগ্রামস্য কৃষ্ণনগরেতিসংজ্ঞাং চকার ।

ও পশ্চিম দিকে এক প্রকাণ্ড দীর্ঘিকা খনন করান। এক্ষণে যে স্থানে ঐ দীঘী অবস্থিত আছে,—পূর্বে ঐ স্থানে অঞ্জনা নদী প্রবাহিত ছিল। এই স্রোতস্বতী জলঙ্গী নদীর একটি শাখা। ইহা কৃষ্ণনগরের পশ্চিম দিয়া দক্ষিণাভিমুখে গমন পূর্বক, যাত্রাপুর গ্রামের অনতিদূরে দ্বিধারা হয়। এক ধারা, জয়পুর, জালালখালি, ধর্মদা, বাদকুল্লা প্রভৃতি গ্রামের নিকট দিয়া আড়ংঘাটা সম্বিহিত মামজোয়ান গ্রামের নিকট যাইয়া দক্ষিণ বাহিনী হয়; অপর ধারা, যাত্রাপুর ও বেৎনা প্রভৃতি কতিপয় গ্রামের নিকট দিয়া, হাঁসখালি গ্রামের সমীপস্থ হয়, এবং তদনন্তর, দক্ষিণ মুখে যাইয়া মামজোয়ানের নিকট পূর্ব ধারার সহিত মিলিত হইয়া যায়। বৃদ্ধের সময়েও অঞ্জনা নদী বদ্ধ প্রায় হইয়াছিল। কেবল বর্ষাকালে প্রবাহিত হইত। একদা এক যবন সেনাপতি ঐ নদী দিয়া যাইতেছিলেন। তাঁহার সমভিব্যাহারী নৌকা সকল রাজার খিড়কীর ঘাটে উপস্থিত হইলে, দৌবারিকগণ তথায় নৌকা লাগাইতে নিষেধ করিল, যবনেরা তাহাদিগের কথা শুনিল না। ক্রমশঃ উভয় দলের মধ্যে যুদ্ধ উপস্থিত হইয়া দুই পক্ষেরই কতিপয় লোক হত আহত হইল। একারণ বৃদ্ধ পরবর্ষে নদী বদ্ধ করিয়া দিলেন। এই রূপ বদ্ধ করা তাঁহার নিতান্ত আবশ্যক হইয়াছিল সন্দেহ নাই; কিন্তু পুরবাসীদিগের যথেষ্ট অসুবিধা ঘটিয়াছিল।

বৃদ্ধ যেমন উল্লিখিত কর্মটি দ্বারা লোকের অনিষ্ট করিয়াছিলেন, তেমনি আর একটি কর্মের দ্বারা সাধারণের যথেষ্ট হিতসাধন করিয়াছিলেন। তৎকালে কৃষ্ণনগর হইতে শাস্তিপুরে গমনাগমনের ভাল বজ্র না থাকায়, এ প্রদেশস্থ জনসাধারণের নিরতিশয় কষ্ট হইত। তিনি বহু ব্যয় পূর্বক প্রথমোক্ত নগর হইতে শেষোক্ত

নগর পর্য্যন্ত এক প্রশস্ত রাজপথ প্রস্তুত করিয়া দেন, এবং তাহার উভয় পার্শ্বে অশ্বখ ও বট-বৃক্ষের শ্রেণী রোপণ করেন । ঐ পথ অদ্যাপি বর্তমান রহিয়াছে, কিন্তু বৃক্ষশ্রেণী লয়প্রাপ্ত হইয়াছে । (১) মর্দনার সমীপবর্তী জলাশয় সকলে অসঙ্গ্য বিকশিত কমলের অপূর্ব শোভা সন্দর্শনে, তিনি ঐ নগরের নাম ত্রীনগর রাখেন, এবং তাঁহার পিতা যেমন অবকাশানুসারে তথায় অবস্থান করিতেন, তিনিও তেমনি মধ্যে মধ্যে ঐ নগরে যাইয়া অবস্থিত হইতেন । ঐ স্থান এত রমণীয় ছিল, যে তাঁহার পৌত্র রঘুরাম প্রায় সর্বদাই ঐ বাটীতে কালযাপন করিতেন । এক্ষণে ঐ নিকেতনের নিদর্শনের মধ্যে কেবল গড় মাত্র আছে । নগরটি সংক্রামক জ্বরে উৎসন্ন হইয়া গিয়াছে । এ প্রদেশে এক প্রবাদ আছে যে, রাজা কদ্র ঐ বাটীতে কয়েক লক্ষ টাকা প্রোথিত করিয়া রাখিয়াছিলেন । ঐ ধন কোন্ স্থানে নিহিত হয়, ইহা তাঁহার কোষাধ্যক্ষ ব্যতীত আর কেহই জানিত না । কদ্র তাঁহাকে প্রতিশ্রুত করিয়া লন যে, কোন বিশেষ বিপদপাত ব্যতীত তদীয় উত্তরাধিকারিগণকে ঐ ধন দেখাইয়া দিবেন না । কদ্র লোকান্তর গমন করিলে পর, তদীয় পুত্র ঐ ধন দেখাইয়া দিবার জন্য উক্ত ধনাধ্যক্ষকে আদেশ করেন । ধনরক্ষক, পূর্ব প্রতিশ্রুতি স্মরণ করিয়া, তাঁহার আজ্ঞা পালনে অসম্মত হন । ইহাতে নির্কোষ রাজপুত্র রাগান্বিত হইয়া তাঁহাকে প্রহার করিতে বলেন । কোষাধ্যক্ষ ঐ প্রহারে প্রাণত্যাগ করেন । কদ্রের পর পুরুষ-গণের সকলেরই ঐ ধনের বিষয়ে অটল বিশ্বাস ছিল ; সুতরাং

(১) কদ্রের পিতা রাঘব এই পথ প্রস্তুত করিতে আরম্ভ করেন বলিয়া ইহা রাঘব রায়ের জাঙ্গাল নামে প্রসিদ্ধ আছে ।

প্রায় সকলেই উহার অব্যবহায়ে প্রবৃত্ত হইয়াছিলেন, কিন্তু কেহই পূর্ণমনোরথ হইতে পারেন নাই। রাজা কৃষ্ণচন্দ্রের কনিষ্ঠ পুত্রের বর্তমান পুত্রের মুখে শুনিয়াছি যে, তাঁহার পিতা ও অগ্রজ ক্রমান্বয়ে ঐ ধন লাভের চেষ্টা করিয়াছিলেন। সাত কি আট বৎসর হইল, এক জন কৃষক ঐ স্থান কর্ষণ করিতে একটি কাঁচের জালার কয়দংশ অনেকের নয়নগোচর হয়। ইহাতে এই জনরব হইয়া উঠে যে, ঐ জালার মধ্যে টাকা ছিল, এবং ঐ কৃষক তাহা পাইয়াছে। মহারাজা সতীশচন্দ্রের নিকট এ বিষয় উত্থাপিত হয়, কিন্তু তাঁহার বিশ্বাস না হওয়াতে ইহার কোন অনুসন্ধান হয় নাই।

কদ্দের দুই রাণী। জ্যেষ্ঠা রাজ্ঞীর গর্ভে রামচন্দ্র ও রাম-জীবন, এবং কনিষ্ঠা মহিষীর গর্ভে রামকৃষ্ণ জন্মেন। রামচন্দ্র অসাধারণ বলবান ও যুগয়াশীল ছিলেন।(১) তিনি সতত যুগয়ায় কালক্ষেপণ করিতেন; বিদ্যানুশীলন বা বিষয় কর্মে তাঁহার কিছুমাত্র অনুরাগ ছিল না। রামজীবন সর্বদা শাস্ত্রানুশীলন ও রাজকার্য্য পর্যালোচনা করিতেন। একারণে প্রথমোক্ত কুমার পিতার অপ্রিয়, ও শেষোক্ত কুমার তদীয় প্রিয়পাত্র হইয়া-ছিলেন। কদ্দ, রামচন্দ্রকে স্থায়ী উক্তরাধিকারী না করিবার যথা-

(১) তাঁহার বিক্রমের বহুতর প্রবাদ আছে। তাহার মধ্যে একটি এই, একদা দ্বাবিংশতি নাবিক কর্তৃক বাহিত এক নৌকা তাঁহার সম্বাহিত হইলে তিনি এরূপ প্রতিঘাত করেন যে, তরঙ্গী নক্ষত্র বেগে পূরপারে যাইয়া ভগ্ন হয়। দ্বিতীয়টি এই যে, একবার তিনি যুগয়া করিতেছেন, এমন সময়ে এক ভীষণাকার মহিষ তাঁহাকে আক্রমণ করে। তিনি অনায়াসে তাহাকে বহু দূরে উৎক্ষেপণ করেন, এবং তদনন্তর এক গদাঘাতে তাহাকে সংহার করিয়া দুই হস্তে তাহার উভয় শৃঙ্গধারণ পূর্বক এক টানে উৎপাটন করিয়া লন।

যশ কারণ লিখিয়া রামজীবনকে জমীদারী দিবার জন্ত সত্রাটের অনুমতি আনাইয়াছিলেন ; কিন্তু তাঁহার পরলোক গমনানন্তর, রামচন্দ্র, হুগলির কোজদারের ও জাহাঁগীর নগরের নবাবের স্বপক্ষতায়, পৈতৃক জমীদারীর অধিকারী হইলেন । কিছু দিনানন্তর রামজীবন, রামচন্দ্রকে যুদ্ধে পরাজিত করিয়া, জমীদারী অধিকার করেন । তাহার এক বর্ষ পরে রাম চন্দ্র পুনরায় ইহা হস্তগত করিয়া লন । কিয়ৎকালানন্তর, তাঁহার লোকান্তর গমন হইলে, রামজীবন পুনর্বার জমীদারীর অধিকারী হন ; কিন্তু অধিক কাল ভোগ করিতে পারেন নাই । তদীয় বৈমাত্র ভ্রাতা রামকৃষ্ণ, তাঁহাকে সংগ্রামে পরাভূত করিয়া, জমীদারী অধিকার করেন, এবং নবাবের সহিত কোঁশল করিয়া তাঁহাকে জাহাঁগীর নগরে কারাবদ্ধ করিয়া রাখেন ।

রাম কৃষ্ণের সময়ে (১৬৯৫ খৃঃ অঙ্গে) বর্দ্ধমানের অন্তর্ভূত জোতয়ার জমীদার শোভা সিংহ, উড়িষ্যা দেশস্থ আফগানদিগের সহায়তায়, বর্দ্ধমানের রাজার সহিত সংগ্রাম করিয়া তাঁহার শ্রাণ সংহার পূর্বক তদীয় সমস্ত জমীদারী অধিকার করেন । তদনন্তর, ক্রমশঃ বর্দ্ধমানের পার্শ্বস্থ জামীদারগণের জমীদারী বল পূর্বক হস্ত গত করিলেন । বর্দ্ধমানের রাজনন্দন স্ত্রীবেশ ধারণ পূর্বক রামকৃষ্ণের রাজধানীতে উপস্থিত হন । (১) রামকৃষ্ণ তাঁহাকে মাটিয়ারির বাটীতে লুক্কায়িত রাখেন । কিন্তু রাজা

(১) তদানিম্বেব কৃষ্ণরাম-রায়েন পরবলমায়াতীতি বিজ্ঞাতং সপরিবারস্য পলায়নারসর-কালো নাস্তি যুদ্ধ-সামগ্ৰী চ পূর্বং ন কৃত্য ক উপায় ; সপরি-
বারস্য নাশ উপস্থিত ইতি চিন্তয়ন্ স্বপুত্রং স্রীগতরামনামানং স্ত্রীবেশ-
ধারণং কৃত্বা স্ত্রীনামারোহণযোগ্যথানেন পরবলৈরমুপলক্ষিতঃ রামকৃষ্ণ-
রায়স্য সন্নিধৌ কৃষ্ণনগরে প্রেষয়ামাস ।

ক্ষিতীশবংশাবলিচরিতম্ ।

ছুহিত। শত্রু-হস্তে পতিত হইয়াছিলেন। শোভা সিংহ তদীয় রূপলাবণ্যে মোহিত হইয়া তাঁহার প্রণয়কাজ্জ্বলী হইয়া পড়েন। একদা সুরাপানে ইতচেতন হইয়া শয্যাশায়ী ছিলেন, সেই সুযোগে রাজবালা ছুরিকাঘাতে তাঁহাকে ঘমায়ে পাঠাইলেন। শোভাসিংহের মৃত্যু-সংবাদ পাইয়া তাঁহার অনুজ হেমাংগ সিংহ অনতিদীর্ঘকাল মধ্যে বর্দ্ধমানে আসিয়া নগর লুণ্ঠন করিলেন, এবং অগ্রজের স্থলাভিষিক্ত হইলেন। তদনন্তর, বর্দ্ধমানের রাজপুত্রকে রামকৃষ্ণ আশ্রয় দিয়াছেন বলিয়া, তাঁহার জমীদারী লুণ্ঠনার্থে বহু সৈন্য সামন্ত পাঠাইলেন। কিন্তু এখানে কিছুই করিতে পারিলেন না। তিনি যতবার এ প্রদেশে সৈন্ত পাঠাইয়াছিলেন, ততবারই রামকৃষ্ণ তাহাদিগকে পরাজিত করেন। দিল্লীশ্বর আলমগীর, এই সকল সংবাদ পাইয়া, তাঁহার প্রিয়পুত্র আজিমখানকে বাক্সালার পাঠাইয়া দিলেন। রাজপুত্র বর্দ্ধমান প্রদেশে উত্তীর্ণ হইয়া অবিলম্বে হেমাংগ সিংহকে পরাভূত, এবং তৎকর্তৃক জমীদারীচ্যুত জমীদারগণকে তাঁহাদের স্ব স্ব জমীদারীতে পুনঃস্থাপন করিলেন।

এই সকল কার্য সম্পাদনার্থ আজিমখান যখন বর্দ্ধমানে অবস্থান করেন, সে সময়ে, বঙ্গদেশস্থ অনেক ভূম্যধিকারী তাঁহার সহিত সাক্ষাৎ করিতে যান। তৎকালে এই প্রথা ছিল যে, বাদ-সাহা বা নবাবের সহিত সাক্ষাৎ করিতে হইলে, স্ব স্ব অবস্থানুযায়ী আড়ম্বর না করিয়া অতি দীনাবস্থায় যাওয়া হইত, স্তবরাং, অথ অন্য ভূম্যধিকারিগণ ঐ প্রথানুবর্তী হইয়া যৎসামান্যাবস্থায় গিয়াছিলেন। সম্রাটপুত্রও তাঁহাদিগকে সামান্য রূপে সমাদর করিলেন। কিন্তু রামকৃষ্ণ উক্ত প্রথা অবহেলন করিয়া বহু সমারোহ পূর্বক উপস্থিত হওয়াতে বিশেষ সম্মান পূর্বক গৃহীত হইলেন।

আজিমস্থান তাঁহার সহিত নানা প্রকার আলাপ করিলেন, এবং তৎপরে তাঁহার প্রতি অতীব অনুগ্রহ করিতে লাগিলেন । ক্রমশঃ উভয়ের মধ্যে বিলক্ষণ প্রণয় জন্মিল । আজিমস্থান রামকৃষ্ণের অনেক প্রশংসার কথা সত্ৰাটকে লেখেন, এবং রামকৃষ্ণ যখন যাহা প্রার্থনা করিতেন, তাহাই তিনি আত্মদানপূর্বক সিদ্ধ করিয়া দিতেন । রামকৃষ্ণের তিন সহস্র অশ্বারোহী ও সপ্ত সহস্র পদাতিক সৈন্য ছিল, এতদ্ব্যতীত, তৎকালে কলিকাতার দক্ষিণে যে ইউরোপীয়গণ বাস করিতেন, তাঁহাদের অধ্যক্ষ বেদা সাহেবের সহিত তাঁহার বিশেষ সখ্য থাকাতে, সাহেব স্বীয় সুশিক্ষিত দ্বি-সহস্র পঞ্চাশৎ সৈন্য তাঁহাকে দিয়াছিলেন । এই কারণে তিনি এ প্রদেশে মহাবল পরাক্রান্ত ভূম্যধিকারী হইয়া উঠেন । একদা জমীদারীর সীমা লইয়া যশোহরের রাজার সহিত বিবাদ হওয়াতে, তিনি, বহু সৈন্য সহিত যশোহরে গমন পূর্বক, রাজাকে সংগ্রামে পরাজিত করিয়া তাঁহার নগর লুণ্ঠন করেন । তদর্শনে তদীয় সমকালীন জমীদারগণ তাঁহার সহিত সৌহৃদ্য রাখিবার বিশেষ যত্ন করিতেন । তিনি জমীদারীর রাজস্ব যথানিয়মে দিতেন না, তথাপি তিনি আজিমস্থানের প্রিয়পাত্র বলিয়া, তৎকালীন নবাব মুরশিদকুলি খাঁ তাঁহার প্রতি কোন উৎপাত করিতে সাহসী হইতেন না । একাদশবর্ষ এইরূপে স্বেচ্ছামত রাজস্ব দেওয়াতে, অনেক রাজস্ব দেনা হইল । পরিশেষে নবাব কোন বিশ্বাসঘাতী কোশলে তাঁহাকে ঢাকায় লইয়া যাইয়া কারাবদ্ধ করিলেন । রামকৃষ্ণ অল্প দিনের মধ্যে বসন্ত-রোগাক্রান্ত হইয়া কারাগারেই পঞ্চত্ব পাইলেন ।

এই রাজা স্বীয় পূর্বপুরুষ অপেক্ষা এ প্রদেশে বিদ্যার উন্নতি সাধন বিষয়ে অধিকতর যত্নবান্ ও উৎসাহী ছিলেন ।

তিনি অধ্যাপকগণকে, তাঁহাদের সংসারযাত্রা নির্বাহার্থে, ভূরি ভূরি নিষ্কর ভূমি দান করেন, এবং নবদ্বীপে বিদেশীয় পাঠকদিগের ব্যয়ের নিমিত্ত, অনেক টাকার সম্পত্তি নির্দিষ্ট করিয়া দেন। ঐ টাকা অধ্যাপকগণ প্রত্যেক রাজার সময়ে রাজকোষ হইতে পাইতেন। পরে যখন, এই রাজবংশোদ্ভূত রাজা দীপচন্দ্রের সহিত জমিদারী দশসাল বন্দবস্ত হইল, তখন, যে সম্পত্তির আয় হইতে এই রাজারা ঐ টাকা দিতেন, গবর্ণমেন্ট, তাহা স্বহস্তে লইয়া, অধ্যাপকগণকে সরকারী রাজকোষ হইতে মাসিক দুই শত টাকা দিবার বন্দবস্ত করেন। অদ্যাপি অধ্যাপকেরা নদীয়া জেলার কালেক্টরী হইতে মাসিক এক শত টাকা প্রাপ্ত হইতেছেন। কি কারণে, ও কোন্ সময় হইতে, দুই শত টাকার স্থলে এক শত টাকা অবধারিত হয়, তাহা অবগত হইতে পারা যায় নাই। এখনও ঐ টাকা রাজা রামকৃষ্ণের প্রদত্ত বলিয়া খ্যাত আছে।

টাকার কারাগারে রামকৃষ্ণের মৃত্যু হইলে, আজিমখান তাঁহাকে যেরূপ রূপা করিতেন, তাহা স্মরণ করিয়া, নবাব আজিমখানকে রামকৃষ্ণের মৃত্যু সংবাদ লিখিয়া, এক্ষণে তাঁহার স্থলাভিষিক্ত কাহাকে করা যাইবেক, ইহা জানিতে প্রার্থনা করিলেন। রাজপুত্র রামকৃষ্ণের মৃত্যু সংবাদ শ্রবণে যৎপরোনাস্তি ব্যথিতহৃদয় হইলেন, এবং নবাবের পত্রের এই উত্তর দিলেন, “যদি রামকৃষ্ণের পুত্র পৌত্র অথবা দৌহিত্র কেহ থাকে তাহাকেই জমিদারী দিবে।” নবাব প্রত্যুত্তরে লিখিলেন “তাঁহার স্বসম্পর্কীয় এরূপ কোন ব্যক্তি নাই।” এই প্রত্যুত্তর পাইয়া আজিমখান এই আদেশ দিলেন যে “রামকৃষ্ণের পরিবারের প্রতিপালন ও বিষয়াদি রক্ষণাবেক্ষণে সমর্থ এরূপ কোন যোগ্য ও বিশ্বস্ত ব্যক্তি তাঁহার কর্মচারীর মধ্যে থাকিলে তাঁহার হস্তেই এই জমিদারী বিত্তস্ত করিবে।” তদুত্তরে

নবাব লিখিলেন “তঁাহার এরূপ কোন কর্ম্মকারক নাই ; তঁাহার ভ্রাতা রামজীবন বহুকালাবধি বন্দীভূত আছেন, তঁাহাকে জমীদারী দিবার অনুমতি হইলে উত্তম হয় ।” আজিমখান আদেশ প্রদান করিলেন “আচ্ছা তাহাই করিবে।” এই রূপে রামজীবন কারামুক্ত ও পৈতৃক সম্পত্তি পুনঃপ্রাপ্ত হইলেন, কিন্তু কিয়ৎকাল পরেই মানব-লীলা সম্বরণ করেন ।

রামজীবনের কবিত্ব ও গীতশক্তি ছিল । তঁাহার দয়ার সীমা ছিলনা । যখন কারাগারে বাস করিতেন, তখনও বিস্তর ভূমি ও অর্থ দান করিয়াছিলেন । তঁাহার তিন রানী, প্রথম রানীর গর্ভে রাজারাম ও কৃষ্ণরাম ; দ্বিতীয়া মহিষীর গর্ভে রঘুরাম ; তৃতীয়া রাজ্ঞীর গর্ভে রামগোপাল জন্মেন । রঘুরাম সর্কাপেক্ষা কার্য্যদক্ষ, ধর্ম্মপরায়ণ ও প্রজারঞ্জক ছিলেন, একারণ রামজীবন পরলোক গমন কালে, তঁাহাকেই আপন উত্তরাধিকারী করিয়া যান । কৃষ্ণনগর হইতে নবদ্বীপের সন্নিহিত ভাগীরথী পর্য্যন্ত যে বর্ষা অত্রাপি বর্ত্তমান আছে, তাহা রাজা রামকৃষ্ণের যত্নে প্রাপ্ত হইয়াছে, কিন্তু এ রাজপথের উভয় পার্শ্বে যে সকল অতি প্রাচীন অশ্বখ ও বট বৃক্ষ দেখিতে পাওয়া যায়, সে সমস্তই রাজা রামজীবনের রোপিত এই নিমিত্ত ঐ বৃক্ষশ্রেণী রামজীবনের সার বলিয়া প্রসিদ্ধ ।

রাজা রঘুরাম অত্যন্ত বলবান্, সাহসী এবং অসামান্য ধনুর্দ্ধর ছিলেন । এ প্রদেশ মধ্যে তিনি রঘুবীর বলিয়া খ্যাত । নবাব মুরশিদকুলি খাঁ, ১৭০৪ খৃঃ অব্দে, ভাগীরথী তীরে এক নগর পত্তন করিয়া তাহাতে আপনার রাজধানী করেন, এবং স্বীয় নামানুসারে ঐ নগরের নাম মুরশিদাবাদ রাখেন । তিনি অনাদারী রাজস্ব আদায়ের জন্য, সমস্ত জমীদারকে মুরশিদাবাদে বন্দীভূত করেন । ঐ সঙ্গে রাজা রামজীবনও কারাবদ্ধ

হন। এই সময়ে, রাজসাহির রাজা উদয়চাঁদের সহিত নবাবের এক যুদ্ধ উপস্থিত হয়। রঘুরাম পিতার সমভিব্যাহারে যুরশি-দাবাদে ছিলেন। তিনি নবাব-সেনাপতি লাহরিমালের সঙ্গে ঐ যুদ্ধে গমন করেন। উভয় পক্ষের সৈন্য বারাকোটি গ্রামের নিকটে উপস্থিত হইলে, লাহরিমাল স্বীয় সেনা নিবেশের বহুদূরে রঘুরামের সহিত কি মন্ত্ৰণা করিতে ছিলেন। ঐ সময়ে, তাঁহার পাঁচটি মাত্র যোদ্ধা সঙ্গে ছিল। এই অসতর্কতার সুযোগ পাইয়া, উদয় রায়ের সেনাধ্যক্ষ আলি মহম্মদ, অসি চর্ম ধারণপূর্বক অশ্বারোহণে বিবিধ অস্ত্র শস্ত্রধারী উনবিংশতি জন সৈন্য সমভিব্যাহারে, লাহরিমালের দিকে আসিতে লাগিলেন। তদর্শনে লাহরি অতিমাত্র ভীত ও ব্যস্ত সমস্ত হইয়া রঘুরামকে কহিলেন, “আমাদের সৈন্যগণ বহুদূর আছে, শত্রু নিকটে আসিল, এক্ষণে উপায় কি। আমরা যেরূপ দুর্বল, এবং বিপক্ষ পক্ষ যেরূপ প্রবল, তাহাতে যুদ্ধে প্রবৃত্ত হইলে, নিশ্চয়ই পরাভূত হইতে হইবে।” রঘুরাম উত্তর করিলেন, “প্রথমতঃ রণবিমুখ হওরা অতি লজ্জাকর। দ্বিতীয়তঃ আমরা পলায়ন করিলে, আমাদের সৈন্যগণ অবশ্যই পলাইবে। তৃতীয়তঃ এইরূপে পরাভূত হইলে, শত্রু হস্তেই হউক, আর নবাবের হস্তেই হউক, আমাদের বিষম দুর্দশা ঘটিবেক। আপনি বিচলিত-চিত্ত হইবেন না, প্রথমে চারি পাঁচ জন আমার হস্তেই নিহত হইবে, এবং তৎপরে, আর কয়েক জনকে অবশ্যই পরাভূত করিতে পারা যাইবেক।”

তাঁহারা এইরূপ কথোপকথন করিতেছেন, এমন সময়ে, আলিমহম্মদ, নিষ্কোষিত অসি হস্তে কালাস্ত্রকের ন্যায়, নবাব-সেনাপতির অভিমুখে আগমন করিতে লাগিলেন। লাহরিমাল

কম্পিত কলেবর হইয়া রঘুরামের পশ্চাৎ ভাগে আসিয়া কহিলেন, “শত্রু নিকটস্থ হইল তথাপি তুমি নিশ্চিন্ত হইয়া রহিয়াছ।” রামজীবন-পুত্র বলিলেন “ও আর একটু অগ্রসর হইলেই আমি যথাবিধান করিতেছি।” তদনন্তর, রঘুরাম আকর্ণ পূরিত শরসন্ধানপূর্বক আলিমহম্মদের প্রতি নিক্ষেপ করিলেন। তাঁহার বাণ শত্রুর বর্ম্ম ও দেহ ভেদ করিয়া বহু দূরে বিক্ষিপ্ত হইল। আলি মহম্মদ অশ্ব হইতে পতিত হইলেন, এবং অতি কাতরস্বরে স্বীয় সংহর্তাকে কহিলেন, “আমি অনেক সংগ্রাম দেখিয়াছি ও অনেক যুদ্ধ করিয়াছি, কিন্তু তোমার তুল্য ধনুর্দ্ধর কখন দর্শন করি নাই। দেখ, তোমার বলবিক্রম দর্শনে আমার সমস্ত সঙ্গী পলায়ন করিয়াছে। আমার অত্যন্ত পিপাসা হইয়াছে, আমাকে কিঞ্চিৎ জল দেও।” দয়াদ্র-চিত্ত রঘুরাম তাঁহাকে বারি প্রদান পূর্বক কহিলেন, “আমার ইচ্ছা তোমাকে আমাদের শিবিরে লইয়া গিয়া চিকিৎসা ও সেবা শুশ্রূষা করি। যদি তোমার আর কোন ইচ্ছা থাকে বল, আমি যত্ন পূর্বক তাহা সম্পাদন করিব”। পরাজিত পুরুষ উত্তর করিলেন “আর ও কথা কেন বল। তোমার বজ্রসম শরাবাতে আমার আয়ুঃ শেষ হইয়াছে। এমন বীরপুরুষের হস্তে মৃত্যু উপস্থিত হওয়ায় অকালমরণ নিমিত্ত আমার কিছুমাত্র দুঃখ হইতেছে না। আমার সপক্ষগণ আমাকে পরিত্যাগ করিয়াছে, অতএব, যতক্ষণ জীবিত আছি, তুমি আমার নিকটে থাক, আমার এই প্রার্থনা”। এই কথা শুনিয়া, সদয়স্বভাব রঘুরামের নেত্র যুগল হইতে অজস্র অশ্রু ধারা বিগলিত হইতে লাগিল, ক্রিয়াক্ষণ পরেই, আহত সেনানী বিগত জীবন হইলেন। তদনন্তর, লাহরিমাল জয়পতাকা উড্ডীন করিয়া মুরশিদাবাদে উপনীত হইলেন। নবাব রঘুরামের বীরত্বের বিবরণ শ্রবণ করিয়া সাতিশয় সন্তুষ্ট হইলেন,

এবং তাঁহার গুণের পুরস্কার স্বরূপ, তদীয় পিতার কারামোচনের আদেশ প্রদান করিলেন (১) ।

রঘুরাম প্রায়ই জ্ঞানগরের বাটীতে থাকিতেন । তাঁহার পূর্বপুরুষের সময়ে যে বিপুল রাজস্ব দেনা ছিল, তাহা পরিশোধ করিতে না পারাতে, তিনি বারংবার মুরশিদাবাদে কারাগারস্থ হন । প্রথিত আছে যে, তাঁহার এমনই দানশীলতা ছিল যে, যখন তিনি বন্দিশালায় অশেষ যন্ত্রণা ভোগ করিতে ছিলেন, তখনও পাত্র বিশেষে যথেষ্ট ভূমি দান করেন । ১৭২৮ খঃাব্দে (১৬৫০ শক) তিনি পরলোক যাত্রা করেন । রামসমাদারের জন্ম হইতে রঘুরামের মৃত্যু পর্য্যন্ত ১৩১ বৎসর গত হয় (২) ।

(১) রঘুরামের অসাধারণ বলের অনেক প্রবাদ আছে । একদা মুরশিদাবাদে নবাব বাটীতে ছই প্রসিদ্ধ মল্ল আইসে । তাহাদের প্রতিযোগী তৎপ্রদেণে নাথাকাতে নবাব রঘুরামকে ছই তিন জন মল্ল পাঠাইতে লিখিলেন । রঘুরাম উক্ত মল্লদ্বয়ের বিক্রম শূনিয়া তথায় স্বয়ং উপস্থিত হইলেন । নিরুপিত দিবসে নবাব তাঁহাকে জিজ্ঞাসিলেন যে, তোমার মল্লেরা কোথায় ? তিনি উত্তর করিলেন তাহারা নিকটে আছে এই কথা বলিয়া তিনি গাত্র হইতে জামা ও বস্ত্র হইতে উকীষ উন্মোচন করিয়া রণভূমিতে অবতীর্ণ হইলেন, এবং যেমন মল্লদ্বয় দণ্ডায়মান ছিল, অদনি উভয়ের গলদেশে আপনার বাহুযুগলে বদ্ধ করিলেন । ক্ষণেক কাল পরে নবাব কহিলেন, “যুদ্ধ কর” । তিনি উত্তর করিলেন যে, “যাহাদের সহিত যুদ্ধ করিব, তাহারা পঞ্চত্ব পাইয়াছে ।”

(২) ততঃ স্বয়মপি কৃতযাগাদিক্রিয়ঃ ত্রয়োদশবর্ষ-শাসিতরাজ্যঃ পঞ্চাশদধিক-ষোড়শশতীর্ষকে ভাগীরথীতীরে মুক্তপ্রাণঃ পরম গতিমবাপ ।

ততশ্চন্দ্ৰিন বর্ষে মুরশিদাবাদাধিকৃত-যবনানুমত্যা তৎস্বতঃ

ঐক্যচন্দ্রনামানং বহুগুণনিধানমমাত্য রাজ্যোঃ ভিষিচুঃ ।

ক্ষিতীশ বংশাবলি চরিতম ।

একাদশ অধ্যায় ।

যখন রাজা রঘুরাম লোকান্তরগত হন, তখন তদীয় তনয় সুপ্রসিদ্ধ রাজা কৃষ্ণচন্দ্রের বয়ঃক্রম অষ্টাদশ বর্ষ । রাজা রামজীবন বর্তমানে ১৭১০ খৃঃ অব্দে (১৬৩২শক) তাঁহার জন্ম হয় । রাজ-বাটীতে এরূপ প্রবাদ আছে যে রঘুরাম, আপন উত্তরাধিকারী হুঁহাকে না করিয়া, নিজ বৈমাত্র ভ্রাতা রামগোপালকে করিবার জন্য, নবাবের সম্মতি লইয়াছিলেন । তিনি কি কারণে পুত্রকে বঞ্চিত করিয়া ভ্রাতাকে সমস্ত সম্পত্তি প্রদানের বাসনা করেন, তাহার নিগূঢ় বৃত্তান্ত কেহই অবগত নহেন । ফলতঃ, তিনি পরলোক গত হইলে, রামগোপাল নবাবের সন্নিধানে রাজ্য অধিকার প্রার্থনা করিলেন । এ দিকে, কৃষ্ণচন্দ্র পিতৃব্যের অতীষ্ট ব্যর্থ করিবার জন্য, নবাবের প্রধান প্রধান অমাত্য ও কর্মধ্যক্ষ, এবং জগৎশেষ্ঠ প্রভৃতি অতীব প্রতিপন্ন ব্যক্তিগণের উপাসনা করিতে লাগিলেন । রামগোপালের বুদ্ধি বিদ্যা বা বিজ্ঞতা প্রায় কিছুই ছিল না, বিশেষতঃ তিনি নিতান্ত ধূমপান-পরতন্ত্র ছিলেন এবং নিরন্তর কেবল ধূমপানেই কাল ক্ষেপন করিতেন । সূচতুর কৃষ্ণচন্দ্র পিতৃব্যের এই ধূমপানাসক্তিকেই স্থায়ী মনোরথ পূর্ণ করিবার প্রধান অবলম্বন স্থির করিলেন । যে সময় রামগোপাল নবাবের সহিত সাক্ষাৎ করিতে যাইবেন, সেই সময়ে কৃষ্ণচন্দ্রের নিয়োগানুসারে মুরশিদাবাদের চকের রাজপথের উত্তর পার্শ্বে কয়েক ব্যক্তি অতি উৎকৃষ্ট সুগন্ধ তামাক খাইতে লাগিল, তিনি ঐ স্থানে উপনীত হইলে ঐ তামাকের সুসৌরভ তাঁহাকে এক কালে বিমোহিত করিল । তিনি নবাব সদনে উপস্থিত হইলে অনেক ক্ষণ তামাক খাওয়া ঘটবেক না, এবং ঐ তামাকটাও

অতি চমৎকার, এক ছিলম খাইয়া যাওয়া যাউক, এই মনে করিয়া, বাহকগণকে যান নামাইতে আদেশ দিলেন, এবং ভৃত্যকে কহিলেন, “উঁহারা যে তামাক খাইতেছে, ঐ তামাক এক ছিলম সাজিয়া দে ।” ধূমপায়ীরা পূর্বশিক্ষানুসারে নানা ছলে ও কৌশলে তামাক দিতে অতিশয় বিলম্ব করিল । এদিকে তাঁহার তামাক সাজা হইতে লাগিল, ও দিকে নবাববাটীতে নবাব সতাস্থ হইলেন । কৃষ্ণচন্দ্র, সমীপস্থ হইয়া, অশ্রুপূর্ণ নয়নে ও বিনয় বচনে, আপনার প্রার্থনা সিদ্ধির অনুকূল যাবতীয় কথা সবিশেষ সমস্ত নিবেদন করিতে লাগিলেন । নবাব তাঁহার বুদ্ধি, বিদ্যা ও বিজ্ঞতা দর্শনে যৎপরোনাস্তি সন্তুষ্ট হইয়া অমাত্যগণকে জিজ্ঞাসিলেন, “এমন উপযুক্ত পুত্র থাকিতে ভ্রাতাকে উত্তরাধিকারী করিবার কারণ কি ?” তাঁহারা কহিলেন, “বোধ হয়, পুত্রের বয়স অল্প বলিয়া ভ্রাতাকে স্থায়ী বিবরাধিকারী করিয়াছেন ; কিন্তু তাঁহার বুদ্ধিহীন ভ্রাতা অপেক্ষায় তরুণবয়স্ক এই বুদ্ধিমান তনয় বিষয়কার্য্য সূচাক্রমে সম্পাদন করিতে পারিবেন, তাহার সন্দেহ নাই ।” নবাব জিজ্ঞাসা করিলেন, “রামগোপাল কোথায় ?” কৃষ্ণচন্দ্রের স্বপক্ষ নবাবের এক জন কর্মচারী বলিলেন, “শুনিলাম তিনি চকের পশ্চিমধ্যে বসিয়া তামাক খাইতেছেন ।” এই কথায় সম্পূর্ণ বিশ্বাস না হওয়াতে, নবাব এক জন দূত প্রেরণের আদেশ করিলেন । ঐ দূত প্রত্যাগত হইয়া নিবেদন করিল, “যাহা ধর্ম্মাবতারের কর্ণগোচর হইয়াছে তাহা অযথার্থ নয় । আমি গিয়া দেখিলাম তিনি বাস্তবিক রাজপথে দোলাখানে বসিয়া তামাক খাইতেছেন ।” নবাব রামগোপালকে নিতান্ত অসার ও অপদার্থ ভাবিয়া কৃষ্ণচন্দ্রকে রঘুরামের স্থলাভিষিক্ত করিবার আদেশ দিলেন ।

কৃষ্ণচন্দ্র তরুণবয়সেই যেমন উদ্যোগী, সাহসী, কর্মদক্ষ হইয়াছিলেন, তেমনই বিষয়-সংক্রান্ত নানাবিধ ঘোরতর বিপদ তাঁহাকে উদ্বেজিত করিয়াছিল। তাঁহার পিতামহ রাজা রাম-জীবন এবং পিতামহের অগ্রজ রাজা রামচন্দ্র ও পিতামহের বৈমাত্র রাজা রামকৃষ্ণ এই তিন জন নির্দ্ধারিত রাজস্ব না দেও-রাতে ২০ লক্ষ টাকা দেনা হয়। তাহার মধ্যে তদীয় পিতামহ ও পিতা দশ লক্ষ পরিশোধ করেন। তিনি একেত পৈতৃক বিষয়াধিকারের সঙ্গে সঙ্গে অবশিষ্ট দশ লক্ষ টাকার দায়ী হন, তাহাতে আবার নবাব আলিবর্দি খাঁ, নজরানা বলিয়া তাঁহার স্থানে দ্বাদশ লক্ষ টাকা চাহেন, এবং ঐ টাকা দিতে না পারাতে তাঁহাকে কারাবদ্ধ করিয়া রাখেন। তাঁহার জমীদারী মহারাজীয়গণ কর্তৃক পুনঃ পুনঃ লুণ্ঠিত হওয়াতে, প্রজাদিগের এমন দুর্বস্থা হইয়াছিল যে, রাজার এ বিপদ উদ্ধারার্থ তাহারা যে কোন আনু-কূল্য করিবে, ইহার কোন সম্ভাবনা ছিল না। তিনি আপন প্রধান প্রধান কর্মচারীগণকে ডাকাইয়া এই দেনা পরিশোধের পরামর্শ করিতে লাগিলেন। এত অধিক টাকা কোথা হইতে সংগৃহীত হইবে, তাহার কোন উপায় প্রধান কর্মাধ্যক্ষদিগের মধ্যে কেহই উদ্ভাবন করিতে পারিলেন না। কায়স্থজাতীয় রঘুনন্দন নামে এক জন সামান্য কর্মচারী নিবেদন করিলেন, “মহারাজ! যদি কিছু দিনের নিমিত্ত, আপনার অধিকার ও ক্ষমতা আমাকে প্রদান করেন, তবে আমি মহারাজকে এ বিপদ হইতে উদ্ধার করিতে পারি।” এই বলিয়া যেরূপে তিনি কৃত-কার্য্য হইতে পারেন, তাহা সর্বিশেষ বর্ণন করিলেন। বিচক্ষণ রাজা, অনতিবিলম্বেই, তাঁহাকে দেওয়ানি পদ প্রদান ও আপ-নার ক্ষমতা অর্পণ করিয়া, কৃষ্ণনগরে পাঠাইলেন।

তৎকালে, রাজপুত্র, রাজজামাতা ও রাজভাগিনেয়গণ জমীদারীর অনেকাংশ ইজারা রাখিতেন, এবং স্বেচ্ছামত কর প্রদান করিতেন। দেওয়ানেরা তাঁহাদের উপর বিশেষ ক্ষমতা প্রকাশ করিতে পারিতেন না। সুতরাং, তাঁহাদের নিকট বিস্তর খাজানা বাকী পড়িয়া থাকিত। রঘুনন্দন দেওয়ানী পদে নিযুক্ত হইয়া, প্রথমেই, এক রাজজামাতার স্থানে তাঁহার দেয় কর চাহিয়া পাঠাইলেন। রাজজামাতা উত্তর করিলেন, “এক্ষণে আমার টাকা দিবার সঙ্গতি নাই।” এই কথা শুনিয়া দেওয়ান এক জন কর্মচারী দ্বারা তাঁহাকে আহ্বান করাইলেন। জামাতা তাহাতে উপেক্ষা করিয়া কহিলেন, “এখন ত আমার বাইবার অবকাশ নাই।” এরূপ উত্তর পাইবেন তাহা স্মৃচতুর দেওয়ান পূর্বেই বুঝিতে পারিয়াছিলেন। তিনি তৎক্ষণাৎ দশ জন পদাতিককে আপন মনোনীত আদেশ দিয়া তাঁহার নিকট প্রেরণ করিলেন। তাহার রাজজামাতার সমীপস্থ হইয়া করপুটে নিবেদন করিল যে, “দেওয়ানজী আপনাকে লইয়া বাইতে আমা-দিগকে পাঠাইয়াছেন।” রাজজামাতা নিকপায় হইয়া অবিলম্বে দেওয়ানের নিকট আগমন করিলেন। দেওয়ান যথোচিত অভ্যর্থনা ও সম্মান পুরঃসর তাঁহাকে বসিতে আসন দিয়া কহিলেন, “আমি যদর্থে আপনাকে এই ক্লেশ দিলাম, তাহা বোধকরি, আপনার অনুভূত হইয়াছে। অতএব, বাহাতে আর আপনার এরূপ ক্লেশ পাইতে না হয় তাহা শীঘ্র করুন।” জামাতা, দেওয়ানের মনের ভাব বুঝিয়া, তদীয় প্রস্তাবে তৎক্ষণাৎ সম্মত হইয়া প্রতিক্রিয়া করিলেন। ইহা দেখিয়া অন্য অন্য রাজজামাতাগণও সর্বাধিকারীর প্রস্তাবে সম্মত হইলেন। তদনন্তর, রঘুনন্দন রাজপুত্রগণের নিকট তাঁহাদের দেয় কর প্রদানের জন্য বলিয়া

পাঠাইলেন । তাঁহারা, দেওয়ান আমাদের ভগ্নাপতির সহিত
 যেরূপ ব্যবহার করিয়াছেন আমাদের সহিত সেরূপ ব্যবহার করিতে
 কখনই সাহসী হইবেন না, এইরূপ মনে করিয়া গর্কিত বচনে কহি-
 লেন, “আমাদের তহবিলে এক্ষণে টাকা নাই ।” দেওয়ান এই
 বাক্য শুনিয়া পরদিন তাঁহাদের নিত্য পূজার দ্রব্য জাত কেহ
 বাটীর মধ্যে লইয়া যাইতে না পারে, দ্বারপালগণের প্রাতি এই-
 রূপ আদেশ করিলেন, এবং তাঁহাদিগকে বলিয়া পাঠাইলেন,
 “আপনাদের পরমারাধ্য পিতৃদেব চিরদিন কারাবাস নিবন্ধন
 অশেষ ক্লেশ ভোগ করিবেন, আর এদিকে আপনারা স্বচ্ছন্দে
 ভোগস্বখে কালাতিপাত করিতে থাকিবেন, ইহা কোন মতেই
 আপনাদের কর্তব্য নহে । অতএব, অদ্য তাঁহাকে কারামুক্ত করি-
 বার উপায় করিয়া পূজাদি করুন । যদি আপনারা রিক্তহস্ত ও
 হন, এবং আশু ধনাহরণের উপায়ান্তর না থাকে, তথাপি ঠাকু-
 রানীদিগের (অর্থাৎ রাজপুত্রবধুদিগের) অভরণ বন্ধক দিয়াও
 এ অবশ্য কর্তব্য সাধন করা বিধেয় হইতেছে ।” রাজকুমারগণ,
 সর্বাধিকারীর এই ভয় প্রদর্শন বাক্যে ভীত হইয়া, অনতিবিলম্বে
 স্ব স্ব দেয় কর প্রদানের অঙ্গীকার করিলেন । ভাগিনেয় ও অপর
 কুটুম্বগণ অবিলম্বে তাঁহাদের দৃষ্টান্তের অনুগামী হইলেন । অপরাপর
 ইজারদারেরা, রাজনন্দন ও রাজজামাতাদিগের অবস্থা দর্শনে,
 সভয়চিত্তে অনতিবিলম্বে নিজ নিজ দেনা পরিশোধ করিলেন ।
 রঘুনন্দন এইরূপে অল্প কাল মধ্যে অনেক টাকা সংগ্রহ করিয়া
 মুরশিদাবাদ প্রেরণ করিলেন, এবং রাজা ঐ টাকা নবাব সরকারে
 দাখিল করিয়া অবশিষ্ট টাকা পরিশোধের বন্দবস্ত করিয়া গৃহে
 প্রত্যাগত হইলেন ।

কিয়ৎকালান্তর, দেওয়ান সমস্ত জমীদারী জরিপ করিতে

প্রবৃত্ত হইলেন, এবং তৎকার্য্য সম্পাদিত হইলে ভূমির উর্বরতার তারতম্যানুসারে যথোচিত কর নির্দ্ধারিত করিলেন। যে সমস্ত ভূমি নিষ্করাবস্থায় ছিল, তৎসমুদায়ের তদন্ত করিয়া, যাহা রাজদত্ত বলিয়া অবধারিত হইল, তাহার যুক্তিপত্র (ছাড়) দিলেন, এবং যে ভূমি রাজদত্ত নয় বলিয়া সাব্যস্ত হইল, তাহার কিয়দংশ দখলিকারকে দিয়া অবশিষ্টাংশ রাজসরকারে গ্রহণ করিলেন। এইরূপ বন্দবস্ত করাতে, জমীদারীর আয় পূর্বাপেক্ষা অনেক বৃদ্ধি হইল। তাঁহার স্বাক্ষরিত ছাড়পত্র (১) অদ্যাপি ভূমির নিষ্করত্ব প্রতিপাদক বলিয়া সর্বত্র পরিগৃহীত হইয়া থাকে। পরিমাণ-সংক্রান্ত কার্য্য সমাপ্ত হইলে, রাজা এক দিন তাঁহাকে যথোচিত প্রশংসাবাদ করিয়া কহিলেন, “দেওয়ান ! জরিপের কর্ম্মটি অতি সুন্দররূপে নির্দ্ধারিত হইয়াছে।” তিনি উত্তর করিলেন, “মহারাজ ! একার্য্য সুন্দররূপে সম্পন্ন হয় নাই, এবং হইবারও সম্ভাবনা নাই। যদি রসৌর এক প্রান্তে ঠাকুর স্বয়ং ও অপর প্রান্তে ঠাকুরপুত্রদের মধ্যে কেহ ধরিতেন, আর সেবক চিঠি লিখিত, তাহা হইলে জরিপ সূক্ষ্ম হইতে পারিত।”

রঘুনন্দন কেবল আয়ের বৃদ্ধি করিয়া নিশ্চিন্ত হন নাই, ব্যয়েরও অনেক লাঘব করিয়াছিলেন। এ নিমিত্ত, তিনি সমস্ত রাজ-পরিবারের ও সকল রাজকর্ম্মচারীর অপ্রিয় হইয়া পড়িলেন। সকলেই ঈর্ষাদগ্ধচিত্ত হইয়া তাঁহার নিধন-সাধনে ক্লতসংকম্প হইলেন। রাজসমীপে নানা কোশলে তাঁহার বিকল্পে কথা উত্থাপিত হইতে লাগিল ; কিন্তু তাঁহার প্রতি বিচক্ষণ রাজার যে অটল বিশ্বাস ও শ্রদ্ধা ছিল, তাহা কোন বড়যন্ত্র দ্বারা বিচলিত হইল না। কিয়ৎকাল পরে, অন্যত্র কোন এক ব্যক্তি তাঁহার

(১) ইহাকে রঘুনন্দনী ছাড় বলিয়া থাকে।

ভয়ঙ্কর শত্রু হইয়া উঠিল; তিনি অবশেষে তাহারই হস্তে নিহত হইলেন ।

একদা, মুরশিদাবাদে নবাবের সভায় বর্দ্ধমান ও রাজমাহী প্রভৃতি নানা প্রদেশীয় রাজাদিগের দেওয়ান, উকীল, এবং অন্য অন্য অনেক সম্ভ্রান্ত ব্যক্তি আসীন আছেন, এমত সময়ে, রঘুনন্দন ঐ স্থানে উপনীত হইলেন । সভা মধ্যে শূন্য স্থান অতি সঙ্কীর্ণ ছিল । এ কারণ, তন্মধ্যে প্রবেশ কালে তাঁহার পরিচ্ছদের নিম্নদেশ বর্দ্ধমানাধিপতির দেওয়ান মাণিকচাঁদের অঙ্গে লাগিল । ইহাতে মাণিকচাঁদ সাতিশয় কোপপ্রকাশপূর্ব্বক তাঁহাকে হিন্দি ভাষায় কহিলেন, “দেখতে নেহিঁ পাজি ।” রঘুনন্দন বলিলেন, “হাঁ নওকর সবহি পাজি হ্যায়, কোই ছোটা কোই বড়া ।” এই কৌতুকবহ ও সমুচিত উত্তর শ্রবণে সভাস্থ যাবতীয় ব্যক্তি উচ্চৈঃস্বরে হাস্য করিয়া উঠিলেন । এইরূপ উপহাসিত হওয়াতে তদবধি তাঁহার সহিত মাণিকচাঁদের বিষম বৈরানুবন্ধন ঘটিল । কিয়ৎকাল পরে মাণিকচাঁদ নবাবের দেওয়ানী পদ প্রাপ্ত হইলেন, এবং ঐ পদে নিযুক্ত হইবামাত্র বৈর-নির্ষাতনের উপায় চিন্তা করিতে লাগিলেন । তৎকালে এরূপ উচ্চপদস্থ ও ক্ষমতাপন্ন ব্যক্তি রঘুনন্দন সদৃশ লোকের অনিষ্ট সাধনে প্রতিজ্ঞারূঢ় হইলে, কোন না কোন ছল ধরিয়া অনায়াসে সকলষত্রু ও পূর্ণমনোরথ হইতে পারিতেন । বর্দ্ধমানের রাজার কয়েক লক্ষ টাকা রাজস্ব ভুগলি হইতে মুরশিদাবাদে প্রেরিত হইয়াছিল । ঐ টাকা রাজা কৃষ্ণচন্দ্রের জমীদারীর অন্তর্ভূত পলাশী গ্রামে পৌছছিলে রাত্রিযোগে বহুসঙ্খ্যক দস্যু আসিয়া গ্রহরি-গণের মধ্যে কাহাকে হত কাহাকে আহত ও পরাভূত করিয়া সমস্ত ধন হরণ করে । কৃষ্ণচন্দ্রের কর্মচারিগণ অপরিমেয় চেষ্টা

পাইয়াও হৃতধনের বা অপহারিগণের কোন অনুসন্ধান করিয়া উঠিতে পারিলেন না। কৃষ্ণচন্দ্রের বড়যন্ত্রে অথবা তাঁহার শাসন দোষে এই ব্যাপার ঘটিয়াছে বলিয়া, রায় মাণিকচাঁদ তাঁহার প্রধান কর্ম্মাধ্যক্ষ রঘুনন্দনকে অপরাধগ্রস্ত করিলেন, এবং প্রথমে তাঁহাকে সমধিক অবমাননা করিয়া, পরিশেষে কামানের গোলা দ্বারা উড়াইয়া দিলেন। রাজবাটীতে অতি দুঃখাবহ এই এক প্রবাদ আছে যে, রঘুনন্দন ইতিপূর্বে নিতান্ত প্রয়োজন বশতঃ রাজকুমারদের সঙ্গে যে আপাত কঠিন আচরণ করিয়াছিলেন, তাঁহারা ঐ বিষয় স্মরণ পূর্ব্বক তাঁহার এই দুর্দশায় দুঃখিত চিত্ত না হইয়া বরং পুলকিত হইয়াছিলেন। একারণ, যখন মুরশিদাবাদে রঘুনন্দনকে গর্দভারোহিত করিয়া নবাবের লোকেরা নগর ভ্রমণ করায়, তখন তিনি কৃষ্ণচন্দ্রের বাসস্থানের সমীপস্থ বস্ত্রে সমাগত হইলে, রাজপুত্র শিবচন্দ্র তাঁহার প্রতি নয়নপাত করিয়া দ্বিবে হাস্য করেন। তদর্শনে রঘুনন্দন অতীব ব্যথিত হৃদয় হইয়া তাঁহাকে কহিলেন, যে “এই অবমাননাতে আমার বাদৃশ যন্ত্রণা বোধ হইতেছে, তাহার সহস্র গুণ তোমাদের ব্যবহারে হইল। অবোধ রাজনন্দন, আমার এই অবমাননাতে কাহার অবমাননা হইতেছে, ইহা যে তুমি বুঝিলে না এই বড় পরিতাপের বিষয়। আমি এ গর্দভে আরোহণ করি নাই, তোমার পিতাই করিয়াছেন জানিবে”।

পূর্বে উল্লিখিত হইয়াছে নবাব আলিবর্দি খাঁ কৃষ্ণচন্দ্রের স্থানে নজরানা বলিয়া দ্বাদশ লক্ষ টাকা চাহেন, এবং তাহা দিতে না পারাতে তাঁহাকে কারাবদ্ধ রাখেন। তাঁহার দেওয়ান রঘুনন্দনের বিশেষ যত্নে ও বুদ্ধিকৌশলে যে অর্থ সংগৃহীত হয় রাজা নবাবকে এই অর্থ দিয়া কি প্রকার বন্দবস্ত করিয়া কারা-

মুক্ত হইয়া আসেন, কত টাকা দিবার বন্দবস্ত করেন, তাহার কত টাকা দিতে পারিয়াছিলেন, অথবা সমস্ত টাকা দিতে হইয়াছিল, কি কত টাকা মাফ পাইয়াছিলেন, এ সকল বিষয় জানিতে পারা যায় নাই। কিন্তু, তাঁহার পিতৃ পিতামহের সময়ের দেয় রাজস্ব ২০ লক্ষ টাকার মধ্যে যে দশ লক্ষ টাকা বাকী ছিল, তাহার বিষয়ে রাজবাটিতে এইরূপ এক প্রবাদ প্রচলিত আছে যে আলিবর্দি, প্রথমে, আপনার অধীন আর আর ভূম্যধিকারিদিগের উপর যেমন অসদয় ছিলেন, রাজা কৃষ্ণচন্দ্রের উপরও সেইরূপ ছিলেন। কিন্তু কিয়ৎকালানন্তর, কৃষ্ণচন্দ্রের নানাবিধ সদ্গুণে মোহিত হইয়া তাঁহার সঙ্গে যথেষ্ট সদয় ব্যবহার করেন। তিনি কৃষ্ণচন্দ্রকে সর্বদাই নিকট রাখিতেন, এবং তাঁহার সহিত ধর্ম ও বিষয় সম্বন্ধীয় নানা বিষয়ে সর্বদা আলাপ করিতেন। তিনি প্রায় প্রতি রজনীর প্রথম ভাগে নবাবের সমীপে থাকিতেন, এবং মধ্যে মধ্যে উর্দু ভাষায় মহাভারত প্রভৃতি পুরাণের অনুবাদ করিয়া শুনাইতেন। নবাব ইহাতে সাতিশর আমোদিত হইতেন। তিনি ক্রমশঃ আলিবর্দির এত অধিক প্রিয় পাত্র হইয়াছিলেন যে কিঞ্চিৎকাল অনুপস্থিত থাকিলে, নবাব তাঁহার অন্বেষণ করিতেন। নবাব তাঁহাকে যতই রূপা কড়ন না কেন, একাল পর্য্যন্ত আপন পূর্ব পুরুষের অধিকারকালের বাকী রাজস্বের নিমিত্ত নিশ্চিন্ত হইতে পারেন নাই। এই টাকা মাফ পাইবার জন্য, রাজা নবাবের নিকট সকাতে পুনঃ পুনঃ আবেদন করিয়াছিলেন, কিন্তু কোন রূপেই সফল যত্ন হইতে পারেন নাই। একদা নবাব জলপথে কলিকাতা অভিযুখে যাত্রা করিলেন। কৃষ্ণচন্দ্র এই সুযোগে আপনার মনোরথ পূর্ণ করিবার মানসে তাঁহার সঙ্গী হইলেন। নবাবের পোতাবলি পলাশী পরগণার সম্মিহিত হইলে, তিনি ঐ

পরগণার শস্যশূন্য সুবিস্তৃত ক্ষেত্রের দিকে অঙ্গুলী নির্দেশ করিয়া, কুতাজুলিপুটে সবিনয়ে নিবেদন করিলেন, “ধর্ম্মাবতার ! সেবকের জমীদারীর অবস্থার প্রতি একবার দৃষ্টিপাত করিতে আজ্ঞা হয়। এই পরগণার যেরূপ অবস্থা দেখিতেছেন, আমার সমুদায় পরগণারই প্রায় এইরূপ অবস্থা। কোন পরগণা জলশূন্য, কোন পরগণা বনাকীর্ণ, কোন পরগণা অনুর্বর। ইহাতে রাজস্বের পরিমাণে অর্থ সংগ্রহ করা নিতান্ত দুঃসাধ্য।” অনন্তর ক্রমশঃ তরনী সকল যেমন অগ্রসর হইতে লাগিল, তিনিও তেমনি ভাগীরথী-পূর্ব-তটস্থ গ্রাম সমূহের অবস্থা দেখাইতে লাগিলেন। কয়েক দিন পরে, নোঁকাবলি নবদ্বীপ সন্নিকটে উপনীত হইল। এই গ্রাম তৎকালে বংশশ্রেণীতে এমত পরিবেষ্টিত ছিল যে, ইহার মধ্যে লোকের বসতি আছে কি না, নদীগর্ভে হইতে তাহা স্পষ্ট বুঝা যাইত না। গ্রামের মধ্যে তৃণাচ্ছাদিত গৃহ ব্যতীত একটিও অটালিকা ছিল না। রুষ্কচন্দ্র গ্রামের দিকে লক্ষ্য করিয়া নবাব সমীপে সবিনয়ে নিবেদন করিলেন, “ধর্ম্মাবতার ! আমার জমীদারীর মধ্যে এই গ্রাম সর্ব্বাগ্রগণ্য ; আমি যেরূপ ভাগ্যবান্, এই গ্রামই তাহার পরিচয় প্রদান করিতেছে।” নবাব গ্রামের প্রতি দৃষ্টিপাত করিলেন, কিন্তু কোন বাঙনিজ্ঞাপ্তি করিলেন না। তথা হইতে নবাবের তরী কলিকাতায় উত্তীর্ণ হইল। ঐ নগর সে সময়ে, একখানি সামান্য গ্রাম ছিল, কেবল ইহার উত্তরাংশে গঙ্গার ধারে কতকগুলি লোকের বসতি ছিল। পূর্ব ও দক্ষিণাংশ এককালে বাদাবনে আচ্ছন্ন ছিল। তৎকালে মুরশিদাবাদ ও কলিকাতার মধ্যে ভাগীরথীর পূর্বতটস্থ কোন গ্রাম বা নগরের নিকট এতাদৃশ বন ছিল না। একারণ

সুচতুর কৃষ্ণচন্দ্র, তাঁহার জমীদারীর দুরবস্থা নবাবের হৃদয়ঙ্গম করিয়া দিবার নিমিত্ত, ঐ প্রদেশে দেখাইতে বিশেষ আগ্রহ প্রকাশ করিলেন। আলিবর্দি, রাজার প্রগাঢ় নিরীক্স উল্লঙ্ঘনে অসমর্থ হইয়া, জমীদারীর অবস্থা দর্শনার্থে নির্গত হইলেন, এবং জনস্থান অতিক্রম করিয়া যতদূর গমন করিলেন, কেবলই অরণ্যময় দর্শন করিতে লাগিলেন। এই সময়ে, রাজার শিক্ষানুসারে নবাবের সঙ্গিগণ এখানে ব্যাত্রাদি হিংস্রক জন্তুর ভয় আছে, পরস্পর বলাবলি করিতে লাগিলেন। এই কথা নবাবের কর্ণগোচর হইবামাত্র তিনি প্রতিগমনে উদ্যত হইলেন। রাজা সজ্জনমনে ও কাতরবচনে নিবেদন করিলেন, “যদি সৌভাগ্যক্রমে, ধর্ম্মাবতার রূপাপূর্ব্বক বিশেষ ক্লেশ স্বীকার করিয়া, এতদূর আসিয়াছেন, তবে আর কিছু দূর গমন কখন, তাহা হইলে সেবকের অভীষ্ট সিদ্ধির আর কোন সন্দেহ থাকে না।” নবাব উত্তর করিলেন, “কৃষ্ণচন্দ্র আর অধিক দূর গমনের প্রয়োজন নাই, অদ্য তোমাকে পৈতৃক দায় হইতে মুক্ত করা গেল।” রাজা নবাবকে অগণ্য ধন্যবাদ ও বারংবার আশীর্ব্বাদ করিয়া কৃতার্থমন্য চিত্তে স্বস্থানে প্রত্যাগমন করিলেন। এই দায়ে তাঁহার পিতামহ, পিতা ও তিনি নিজেও পুনঃ পুনঃ কারাবদ্ধ হন এবং অশেষ ক্লেশভোগ করেন। এ প্রদেশে এই দায় রাজাদের বিশলাখি দায় বলিয়া প্রসিদ্ধ আছে।

দ্বাদশ অধ্যায় ।

ষৎকালে তাঁহার জমীদারী মধ্যে মহারাষ্ট্রীয়গণের উপদ্রব সংঘটিত হয়, তৎকালে কৃষ্ণচন্দ্র অপেক্ষাকৃত কোন নিরাপদ

স্থানে বাস করিবার মানস করেন। অনেক বিবেচনার পর কৃষ্ণনগরের ছয় ক্রোশ অন্তরে ইচ্ছামতী নদীর নিকটস্থ একটি স্থান মনোনীত করিলেন। ঐ স্থান অরণ্যময় ও জলবেষ্টিত ছিল। নসরৎ খাঁ নামক এক জন ফকির তথায় বাস করিত বলিয়া, লোকে ঐ স্থানের নাম নসরৎ খাঁর বেড় রাখিয়াছিল। রাজা ঐ স্থান বনশূন্য করিয়া তাহাতে নগর পত্তন করিলেন। চতুর্দিকে যে জলাশয় ছিল, তাহার পূর্ব দিক্ হইতে দীর্ঘে সহস্র হস্ত পরিমিত এক খাল কাটাইয়া ইচ্ছামতী নদীর সঙ্গে, এবং পশ্চিম দিক্ হইতে প্রায় তিন ক্রোশ আর এক খাত কাটাইয়া হাঁসখালির উত্তরে অঞ্জনা নদীর মোহানার সহিত মিলাইয়া দিলেন। এই উভয় নদীর সহিত মিলিত হওয়াতে ঐ জলাশয় প্রবাহবিশিষ্ট হইল। কঙ্কণ সদৃশ গোলাকার ছিল বলিয়া রাজা তাহার নাম কঙ্কণ রাখিলেন। নগরের নাম শিবনিবাস দিলেন।

নগরমধ্যে কলত্র, পুত্র, ভাগিনেয় প্রভৃতি সমস্ত রাজ-পরিবারের বাসোপযোগী পৃথক পৃথক সুরম্য হর্ম্য, এবং পূজার বাটী দেবানখানা, নওবাংখানা, সিংহদ্বার ইত্যাদি নানাবিধ অটালিকা নির্মিত হইল। নগর প্রবেশের একমাত্র দ্বার পূর্ব দিকে থাকিল। দ্বারদেশে এবং নগরের চতুর্দিকে শত্রুর প্রবেশরোধার্থ নানাপ্রকার কল কোশল করিয়া রাখা হইল। কিছু কাল পরে, রাজা মন্দিরত্রয় প্রস্তুত করিয়া তন্মধ্যে রাজরাজেশ্বর, রাজীশ্বর, ও রামচন্দ্র নামে তিন দেবমূর্তি প্রতিষ্ঠা করিলেন। রাজরাজেশ্বরের মন্দিরের ন্যায় উচ্চ মন্দির এ প্রদেশে আর কোন স্থানে দেখিতে পাওয়া যায় না। রাজার যাবতীয় কুটুম্ব, পারিষদ ও অমাত্যাди কৃষ্ণনগরের বাস

পরিভ্রমণ করিয়া ঐ স্থানে গিয়া বসতি করিলেন। ঐ স্থান যেমন রমণীয়, নগরও তেমনি হইল। এ কারণ মহারাজ্যীয়-দিগের উপদ্রব নিবৃত্ত হইলেও রাজা আর কৃষ্ণনগরে আসিয়া বাস করিলেন না। ঐ নগরেই প্রায় সমস্ত জীবন যাপন করিলেন। আক্ষেপের বিষয় এই যে, পূর্ব পুৰুষ কৃত অতি সুদৃশ্য নওবৎ-খানা ও চকের রক্ষার বিষয়ে অমনোযোগী রহিলেন, এবং স্ব-নির্মিত অতি সুন্দর পূজার দালানের আর সংস্কারাদি কিছু করিলেন না। পূজার সম্মুখস্থ নাট্যশালা অসম্পূর্ণাবস্থায় থাকিল। কৃষ্ণনগরের চকের পূর্বদ্বার হইতে শিবনিবাসের সিংহদ্বার পর্য্যন্ত যে বট প্রস্তুত হইয়াছিল, তাহার প্রতি এক এক ক্রোশানন্তর এক এক তুলসি-মন্দির স্থাপিত হয়। ঐ পথ ক্রমশঃ বিলুপ্ত হইয়া গিয়াছে, কেবল দুই একটি ভগ্ন তুলসি-মন্দির অদ্যাপি বর্তমান আছে।

শিবনিবাসের দক্ষিণ দিকে কৃষ্ণপুর নামে এক গ্রাম পত্তন করিয়া তথায় বহু গোপজাতির বসতি করান। তাহারা রাজ-সরকারের নানাবিধ কার্য্য করিত। এক্ষণে তাহারা কৃষ্ণপুরে গড়ো বলিয়া খ্যাত। নগরের এক ক্রোশ পূর্ব উত্তরে ইচ্ছা-মতী নদীতীরে এক গঞ্জ স্থাপন করেন এবং তাহার নাম কৃষ্ণগঞ্জ রাখেন। ঐ গঞ্জের নিকটস্থ গ্রামও কৃষ্ণগঞ্জ বলিয়া খ্যাত। ইদানীং ঐ গ্রামের নিকট ইন্টারন বেল্ল রেল-ওয়ের কৃষ্ণগঞ্জ নামে এস্টেশন হইয়াছে। কিয়ৎকাল পরে, রাজা হরধাম ও আনন্দধাম নামে আর দুইটি গ্রাম পত্তন করেন। পূর্বের উল্লিখিত হইয়াছে যে অঞ্জনা নদী যাত্রাপুরের নিকট দ্বিধারা হয় ও পরে উভয় ধারা মামজোয়ান গ্রামের নিকট সমবেত হইয়া দক্ষিণে যায়। ঐ নদী শেষে হরধামের উত্তর

দিয়া গিয়া চাকদহের নিকট গঙ্গার সহিত মিলিত হয় । হরধাম হইতে শিবপুরের সমীপস্থ ভাগীরথী অধিক দূরবর্তী ছিল না ; এ কারণ কৃষ্ণচন্দ্র গঙ্গাস্নানের সুগমের নিমিত্ত, হরধাম হইতে শিবপুর পর্য্যন্ত এক খাল কাটাইয়া দেন, তাহাতেই শিবপুরের সম্মিহিত ত্রিমোহিনীর সৃষ্টি হয় । শিবনিবাস হইতে শিবপুর পর্য্যন্ত যে নদী আছে, তাহার চূর্ণী নাম রাজা কৃষ্ণচন্দ্র দেন, কি এই নদীর যে অংশ পূর্বে ছিল তাহার এই নাম থাকে, তাহা নিশ্চয় জানিতে পারা যায় নাই । শিবপুরের অর্দ্ধ ক্রোশ পূর্বে এই নদীর উভয় তটে দুই বাটী নির্মিত করান এবং তাহার একটির নাম হরধাম অপরটির নাম আনন্দধাম রাখেন । এই দুই বাটীর নামানুসারে গ্রামের নামও হরধাম ও আনন্দধাম হয় । আনন্দধামের বাটী অতি সামান্য ; কিন্তু হরধামের বাটী যেমন বৃহৎ তেমনি শোভনীয় ছিল । রাজা মধ্যে মধ্যে গঙ্গা স্নানোপলক্ষে ঐ বাটীতে বাস করিতেন । ইদানীং যদিও ঐ বাটীর প্রায় সমস্ত অংশই ভগ্ন হইয়া গিয়াছে, তথাপি দর্শনমাত্রেই ঐ বাটী কোন সময়ে, অতি প্রধান লোকের বাসস্থান ছিল ইহা দর্শকের মনে উদয় হয় ।

ত্রয়োদশ অধ্যায় ।

নবাব আলিবর্দি খাঁ পরলোক গমন করিলে পর, তাঁহার দৌহিত্র সিরাজদ্দৌলা মাতামহের সিংহাসনারূঢ় হইলেন । ইহঁার অত্যাচারে কি হিন্দু, কি মুসলমান, কি ভূম্যধিকারী, কি বণিক, কি কুটুম্ব, কি কর্মচারী সকলেই জ্বালাতন হইলেন, এবং আপনাদের ধন, মান, জীবন, সর্বদা সঙ্কটাপন্ন বোধ করিতে

লাগিলেন । এ প্রদেশস্থ যাবতীয় ভূম্যধিকারিগণ নবাবের দেওয়ানের নিকট আপনাদের দুঃখের কথা সবিশেষ সমস্ত জানাইলেন । দেওয়ান ঐ সকল বৃত্তান্ত নবাবকে জ্ঞাত করিয়া যথোচিত সৎপরামর্শ দিলেন । কিন্তু নবাব মন্ত্রীরা স্তম্ভগার প্রতি কর্ণপাত করিলেন না । ক্রমশঃ তাঁহার বিষম দৌরাভ্য সক্ষলের অসহ্য হইয়া উঠিল । অবশেষে রাজা মহেন্দ্র, রাজা রামনারায়ণ, রাজা রাজবল্লভ, রাজা কৃষ্ণদাস, মিরজাকর প্রভৃতি প্রধান প্রধান কয়েক ব্যক্তি, ছুদাস নবাবের উৎপীড়নের প্রতি বিধান করিবার নিমিত্ত, জগৎশেঠের ভবনে সমাগত হইয়া মন্ত্রণা করিতে লাগিলেন । সভাতে নানা প্রকার প্রস্তাব ও অনেক তর্ক বিতর্ক হইল, কিন্তু কি কর্তব্য কিছুই স্থির হইয়া উঠিল না । পরিশেষে অতি বিচক্ষণ ও পরিণামদর্শী রাজা কৃষ্ণচন্দ্রের সহিত পরামর্শ করিয়া এ বিষয়ের কর্তব্য অবধারণ করা যাইবে, সমস্ত ব্যক্তি একবাক্যে এই অভিপ্রায় প্রকাশ করিলেন । মুরশিদাবাদে আসিবার জন্য রাজাকে পত্র লেখা হইল । রাজা সহসা স্বয়ং না যাইয়া আপনার সুবিজ্ঞ দেওয়ান কালীপ্রসাদ সিংহকে পাঠাইলেন, এবং দেওয়ান তথা হইতে প্রত্যাগমন করিলে বিস্তারিত অবগত হইয়া, নিজে মুরশিদাবাদ গমন করিলেন । তিনি তথায় উপনীত হইলে, জগৎশেঠের বাটীতে পুনরায় একটি সভা হইল । প্রথম সভায় যাঁহারা উপস্থিত ছিলেন এ সভাতেও তাঁহারা সমাগত হইলেন । সভ্যগণের মধ্যে কোন ব্যক্তি, “বর্তমান নবাবকে সিংহাসনচ্যুত করিয়া অন্য কোন উপযুক্ত ব্যক্তিকে তাঁহার স্থলাভিষিক্ত করিবার প্রার্থনায় সত্রাটের সমীপে আবেদন করা যার্ডক” এই কথা উত্থাপন করিলেন । তাঁহার প্রস্তাবে অপর এক জন কহিলেন “সরকারাজ যাঁ নবাবের

সময়াবধি যেরূপ দেখিয়া আসা যাইতেছে, তাহাতে স্পষ্ট প্রতীয়মান হইতেছে যে, যখন কর্তৃত্বাধীন হিন্দুজাতির নিরাপদে কালাতিপাত করিবার কোন সম্ভাবনা নাই। অতএব, যাহাতে আর যবনের অধীন হইয়া থাকিতে না হয়, ইহারই মন্ত্রণা করা কর্তব্য।” এই প্রস্তাবে কেহ বা অনুমোদন, কেহ বা প্রতিবাদ করিতে লাগিলেন। রাজা কৃষ্ণচন্দ্র প্রায় কোনপক্ষেই কথা কহিলেন না। ফলতঃ— পূর্ব সভার ন্যায় এ সভাতেও কিছুই হইল না। সভা ভঙ্গ হইলে, জগৎশেঠ ও রাজা মহেন্দ্র দ্বয় বিরক্তি প্রকাশ করিয়া কৃষ্ণচন্দ্রকে কহিলেন, “উপস্থিত গুরুতর বিষয়ের ইতিকর্তব্যতা অবধারণার্থ আপনাকে এত আগ্রহ সহকারে আনাইলাম, কিন্তু সভাতে আপনি মৌনাবলম্বন করিয়া রহিলেন, আপন অভিপ্রায় কিছু মাত্র ব্যক্ত করিলেন না, ইহার কারণ কি?” তিনি বলিলেন, “যে সভায় মিরজাকর এক জন প্রধান সভ্য, তাহাতে যবনাধিপত্য নিরাকৃত করিবার প্রস্তাব হইল, দেখিয়া আমি মৌনাবলম্বন করিয়া রহিলাম। আমার যে অভিপ্রায় তাহা আপনাদের নিকট এক্ষণে ব্যক্ত করিতেছি, শ্রবণ করুন। যবনাধিপত্যে হিন্দুদিগের নিরাপদে ও স্বচ্ছন্দে কাল যাপন করিবার সম্ভাবনা নাই, একথা যথার্থ বটে, কিন্তু হিন্দুজাতির রাজত্ব সংস্থাপনের কি কোন সম্ভাবনা আছে? মিরজাকরের সহায়তা ব্যতীত আমরা উপস্থিত বিপদ হইতে কোন ক্রমে মুক্ত হইতে পারি না, ইহা বিলক্ষণ রূপে প্রতীয়মান হইতেছে, এবং তাঁহার নবাবী পদ প্রাপ্তির সম্পূর্ণ সম্ভাবনা না থাকিলে তিনি যে সহায়তা করিতে প্রবৃত্ত হইবেন না ইহাও স্পষ্টরূপে জানা যাইতেছে। এরূপ স্থলে আমার অভিমত এই যে, যাহাতে জাকরের অভীষ্ট সিদ্ধ ও আমাদের বিপদ শাস্তি হয়, এই রূপ কোন পথ অবলম্বন করা বিধেয়। এই উভয় সঙ্কল্প

সাধনের এক মাত্র উপায় দেখা যাইতেছে। আমার জমীদারী মধ্যে কলিকাতায় যে সকল ইঙ্গরেজের বাস আছে, তাঁহাদের সহিত মধ্যে মধ্যে আমার সাক্ষাতাদি ঘটে। আমি তাঁহাদের রীতি নীতি উত্তম রূপে অবগত আছি, তাঁহারা যেমন পরাক্রান্ত ও সাহসী, তেমনি আবার বুদ্ধিমান্ ও বিশ্বস্ত। নবাবের দৌরাণ্যে আমরা যেমন বিপদগ্রস্ত, তাঁহারাও তেমনি ব্যতিব্যস্ত হইয়াছেন। সুতরাং চেষ্টা ও যত্ন করিলে তাঁহাদের সাহায্য পাইবার বিলক্ষণ সম্ভাবনা আছে। তাঁহারা সহায়তা করিলে মিরজাকর পূর্ণ-মনোরথ হইবেন, এবং আমাদেরও ইফ্টি সিদ্ধি হইবেক। আর আমরা যেমন মিরজাকরের কর্তৃত্বের অধীন থাকিব, তিনিও তেমনি ইঙ্গরেজদের শাসনের অধীন থাকিবেন। ইহা হইলে তাঁহার এবং আমাদের উভয় পক্ষেরই অভীষ্ট সিদ্ধ হইবেক। অতএব, যদি আপনাদিগের অভিমত হয়, তবে আমি তাঁহাদের নিকট এ বিষয়ের প্রস্তাব করি।” এই সকল কথা শুনিয়া রাজা মহেন্দ্র কহিলেন, “তাঁহাদের স্বভাব ও চরিত্রের বিষয় আমি কিছু ভাল জানি না, সুতরাং তাঁহাদের উপর এতদূর বিশ্বাস করা কর্তব্য কি না, তাহা স্থির করিয়া উঠিতে পারিতেছি না।” রাজা মহেন্দ্রের বাক্যবসানে জগৎশেঠ কহিলেন, “আমি কখন কখন এই জাতির সহিত বিষয় ব্যাপার করিয়া থাকি, তাহাতে তাহাদের কোন অসদাচরণ দেখি নাই, বরং তাহাদের সদ্যবহার দর্শনে প্রীত হইয়াছি। বিশেষত রাজা কৃষ্ণচন্দ্র তাঁহাদের চরিত্রের যেরূপ বর্ণন করিলেন, আমিও লোকপরম্পরায় এইরূপ শুনিয়াছি।” তদনন্তর কৃষ্ণচন্দ্র এ বিষয়ে অনেক যুক্তি ও কারণ দর্শাইলে রাজা মহেন্দ্র ও জগৎশেঠ সন্মত হইলেন। রাজা কৃষ্ণচন্দ্র ইঙ্গরেজদিগের সহায়তা সাধনের ভার লইয়া শিবনিবাসে প্রত্যাগত হইলেন।

বঙ্গদেশ যে সাম্রাজ্যের অন্তর্ভূত, নবাব আলিবর্দি, সিরাজ-দৌল ও মীরজাফরের সময়ে তাহার অবস্থা কিরূপ ছিল, তাহা এস্থলে কিঞ্চিৎ ব্যক্ত না হইলে সিরাজদৌলার অত্যাচার হইতে দেশের নিষ্ফল সাধনার্থ বৈদেশিক লোকের আনুকূল্যের এত প্রয়োজন হইল কেন তাহা সুস্পষ্ট রূপে অনুভূত হওয়া দুর্ঘট, এই জন্য তাহার অতি সংক্ষিপ্ত বিবরণ পশ্চাৎ বর্ণিত হইতেছে।

সত্রাট মহম্মদ সাহার রাজত্ব কালে, এই সাম্রাজ্যের প্রায় অর্দ্ধাংশ মহারাষ্ট্রীয়দিগের অধিকৃত হইয়াছিল। আর্যাবর্তের কতিপয় দেশ মাত্র তাঁহার সম্বল ছিল; কিন্তু ঐ সকল দেশও সম্পূর্ণরূপে বশীভূত ছিল না। তাহার উপর আবার অতীব দুর্দাস্ত ও পরাক্রমশালী পারস্যশাসি নাদের সাহা আসিয়া তাঁহাকে সংগ্রামে পরাভূত করিয়া তদীয় যথাসর্বস্ব হরণ করেন, এবং ১৭৩৮ খৃঃ অব্দাবধি ১৭৪০ অব্দ পর্য্যন্ত, তাঁহার রাজ্য পীড়ন ও লুণ্ঠন করিতে থাকেন। নাদের স্বদেশে প্রস্থান করিলে, প্রদেশ শাসন কর্তাদিগের মধ্যে অনেকেই স্বাভাব্য অবলম্বন করিতে লাগিলেন। ১৭৪৮ খৃঃ অব্দে, সত্রাট পরলোক যাত্রা করিলে, তদীয় পুত্র আহম্মদ সাহা পিতৃ-সিংহাসনারূঢ় হইলেন। অবশিষ্ট যে কিছু রাজ্য ছিল, তাহাও ইহার সময়ে হস্তবহির্ভূত হইল। অবশেষে তাঁহার সর্বাধিকারী, ১৭৫৪ খৃঃ অব্দে, তাঁহাকে অন্ধ করিয়া, রাজকুলোদ্ভূত অন্য এক ব্যক্তিকে আলমগির নামে বিখ্যাত করিয়া তাঁহার সিংহাসনে আরোহিত করাইলেন। অনতিবিলম্বেই পারস্য দেশীয় আর এক জন রাজা আসিয়া মথুরা প্রদেশ পর্য্যন্ত লুণ্ঠন করিলেন। এই সুযোগে যাহার যে দেশ আয়ত্বাধীন হইল, তিনি সেই দেশ অধিকার করিয়া লইলেন। এই সময়ে, বঙ্গদেশের নবাব আলিবর্দি খাঁ সত্রাটের বশতা শৃঙ্খল হিন্ন করিয়া স্বাভাব্য

অবলম্বন করিলেন, এবং তিনি লোকান্তরবাসী হইলে, তাঁহার উত্তরাধিকারিগণও তদীয় দৃষ্টান্তের অনুবর্তী হইলেন । সাম্রাজ্য এককালে উৎসন্ন হইয়া গেল ।

তদনন্তর, রাজা রুক্ষচন্দ্র, পূর্বোন্নিখিত মন্ত্রণানুসারে কিছু দিন পরে কালীঘাট দর্শনচ্ছলে কলিকাতায় আগত হইলেন, এবং তদানীন্তন ইঙ্গরেজদিগের অধ্যক্ষ ক্লাইব সাহেবের সহিত সাক্ষাৎ করিয়া, সেরাজদ্দৌলাকে সিংহাসনচ্যুত করিয়া মীরজাফরকে তৎপদে অভিষিক্ত করিবার কল্পনা, ও তদ্বিষয়ে তাঁহারা সহায়তা করিলে তাঁহাদের প্রতিপত্তি ও ইফলাভের বিলক্ষণ সম্ভাবনা এই বিষয় সবিস্তর বর্ণন করিলেন । ইতিপূর্বে নবাব ইঙ্গরেজদিগকে এ দেশ হইতে এককালে বহিস্কৃত করিয়া দিবার মানসে, প্রথমে, তাঁহাদের উপর বিবিধ প্রকার দৌরাণ্য করিতে প্রবৃত্ত ও পরিশেষে, ১৭৫৬ খৃঃ অব্দে, কলিকাতা লুণ্ঠন ও তথাকার দুর্গ আক্রমণ করেন । তৎকালে কলিকাতায় ইঙ্গরেজদের অতি অল্প সৈন্য ছিল, সুতরাং তাঁহারা রণবিমুখ হইয়া পলায়ন করিবার চেষ্টা পাইলেন ; কিন্তু সম্পূর্ণরূপে রূতকার্য্য হইতে পারিলেন না । তাঁহারা ঐ সময়ে, এরূপ ভীত ও ব্যতিব্যস্ত হইয়াছিলেন যে সকলে উঠিতে না উঠিতে নাবিকেরা নৌকা খুলিয়া দিল । যাঁহারা পলাইতে পারিলেন না, তাঁহারা ২০এ জুন শত্রুহস্তে পতিত হইলেন । রজনীতে দুর্গাস্তম্ভগত অন্ধকূপ নামে একটি ক্ষুদ্র গৃহে তাঁহাদিগকে রাখা হইল । ঐ গৃহ মধ্যে বায়ু সঞ্চারের ভাল পথ না থাকায় তাঁহাদের যাতনার সীমা রহিলনা । পরদিন প্রাতে দৃষ্ট হইল, ১৪৬ জনের মধ্যে কেবল ২৩ টি লোকমাত্র জীবিত আছেন । মাদরাজবাসী ইঙ্গরেজেরা এই নিদাক্ষণ ঘটনার সম্বাদ পাইয়া

ক্লাইব নামক সুবিজ্ঞ ও সাহসী পুরুষকে ২৪০০ সৈন্য সহিত বাঙ্গালায় পাঠাইলেন। ক্লাইব ত্রিসেধর মাসে মায়াপুরে পৌঁছাইলেন এবং ১৭৫৭ খৃঃ অব্দের ২ রা জানুয়ারি নবাব সৈন্যকে পরাভব পূর্বক পুনর্বার কলিকাতা অধিকার করিলেন, ও নবাবের সহিত সন্ধিবন্ধনের যত্ন পাইতে লাগিলেন; কিন্তু দুর্বুদ্ধি ও দুর্বৃত্ত নবাবের রাজ্যে তাঁহাদের নিরাপদে থাকিবার কোন সম্ভাবনা নাই, ইহা বিলক্ষণ বুঝিতে পারিলেন। তিনি যতই বিচক্ষণ ও দূরদর্শী হউন না কেন, এদেশে যে, যবন বা হিন্দু জাতির হস্ত বহির্ভূত হইয়া তাঁহার স্বজাতির হস্তগত হইবে, এরূপ আশার ছায়াও কখন তাঁহার হৃদয়ে পতিত হয় নাই। তিনি এইমাত্র ভাবিয়াছিলেন যে, নবাবের অত্যাচারে লোকের যেরূপ কষ্ট হইয়াছে, তাহাতে অনতিবিলম্বে তদীয় রাজ্যাবসান হইবে, এবং কোন এক সুবিজ্ঞ ও সুহৃদয় ব্যক্তি তাঁহার স্থলাভিষিক্ত হইবেন। যাহা হউক, কৃষ্ণচন্দ্রের প্রস্তাব শ্রবণ মাত্র তাঁহার মনোমধ্যে যুগপৎ আনন্দ ও বিস্ময় উপস্থিত হইল। তাঁহার সভাসদেৱা, এক সামান্য বণিক সম্প্রদায়ের কোন রাজ্যেশ্বরকে রাজ্যচ্যুত করিবার যত্ন পাওয়া, আর বামনের চন্দ্র ধরিবার চেষ্টা করা, এ দুই অসাধ্যসাধন মনে করিয়া, এ বিষয়ে বিশেষ অসম্মতি প্রকাশ করিলেন। কিন্তু ক্লাইব যেমন অসীমসাহসী তেমনই অসাধারণ দূরদর্শী ছিলেন। তিনি, তাঁহাদের পরামর্শ অগ্রাহ্য করিয়া, এবিষয়ের যথাযথ মন্তব্য করিতে মুরশিদাবাদের রেসিডেন্টকে লিখিলেন। কি কর্তব্য স্থির করিতে, এপ্রেল ও মে দুই মাস অতিবাহিত হইল। ক্লাইব সাহেব, ১৭৫৭ অব্দের ১৭ জুন, সসৈন্য কাঁটোয়াতে উপনীত হইলেন। ২২ এ জুন, ভাগীরথী পার হইয়া রজনীতে পলাশীর উপবনে পৌঁছাইলেন। প্রভাত

হইবামাত্র যুদ্ধ আরম্ভ হইল । মীরজাফর স্বীয় সৈন্য সমভিব্যাহারে রণস্থলে উপস্থিত ছিলেন ; কিন্তু সংগ্রামে প্রবৃত্ত হইলেন না । নবাব এ যুদ্ধে জয়ী হইবেন সিদ্ধান্ত করিয়াছিলেন ; এজন্য, নিঃসন্দেহ চিত্তে শিবির মধ্যে চাটুকারদিগের সহিত আমোদে কালহরণ করিতে লাগিলেন । মীরমদন নামক তাঁহার এক জন সেনানী সাংঘাতিক রূপে আহত হইয়া তাঁহার সমীপে নীত হইলেন, এবং অবিলম্বে প্রাণত্যাগ করিলেন । তদর্শনে নবাব আপন ভৃত্যবর্গকে বিশ্বাসঘাতক বলিয়া সন্দেহ করিতে লাগিলেন । অতীব ব্যাকুলিত চিত্তে তৎক্ষণাৎ মীরজাফরকে ডাকাইয়া, এবং তাঁহার চরণে স্বীয় উষ্ণীষ স্থাপন পূর্বক, অতি কাতর বচনে কহিলেন “তুমি, আমার মাতামহকে স্মরণ পূর্বক, আমার অপরাধ ক্ষমা করিয়া আমাকে রক্ষা কর ।” মীরজাফর কপট মিত্রতা প্রদর্শন করিয়া উত্তর করিলেন, অদ্য অধিক বেলা হইয়াছে, সংগ্রামে বিরত হইবার আদেশ করুন, কল্য ঈশ্বরপ্রসাদে যথোচিতরূপে যুদ্ধ করা যাইবেক । ঐ সময়ে, মোহনলাল নামে নবাবের আর এক জম সেনাপতি ইঙ্গরেজদের সহিত ঘোরতর সংগ্রাম করিতেছিলেন, নির্কোষ নবাব, জাফরের বিশ্বাসঘাতী পরামর্শে প্রতারিত হইয়া, তাঁহাকে যুদ্ধে নিবৃত্ত হইতে অনুজ্ঞা পাঠাইলেন । সেনাপতি নিতান্ত অনিচ্ছাপূর্বক সমরক্ষেত্র হইতে প্রত্যাগমন করিলেন । তাঁহাকে যুদ্ধে বিরত হইতে দেখিয়া সমস্ত সৈন্য রণে ভঙ্গ দিয়া পলায়ন করিল । স্মৃতরাং ক্লাইবের অনায়াসে জয়লাভ হইল ; নবাব দ্রুত বেগে মুর্শিদাবাদে চলিয়া গেলেন । পর দিবস, তাঁহার অমাত্য বান্ধব ভৃত্য প্রভৃতি সকলেই তাঁহাকে পরিত্যাগ করিয়া গেল । তিনি রজনীযোগে নগর হইতে পলায়ন করিলেন, এ দিকে, সংগ্রামাবসানে, মীরজাফর ক্লাইবের সহিত মুর্শিদাবাদে

যাত্রা করিলেন, এবং নগরে উপনীত হইয়া দুর্ভাগ্য সেরাজ-
দৌলার শূন্য সিংহাসনে অধিরূঢ় হইলেন ।

চতুর্দশ অধ্যায় ।

বঙ্গদেশের ইতিহাস লেখক বিখ্যাত জন মার্শম্যান সাহেব
তদীয় বাঙ্গালার ইতিহাস মধ্যে লিখিয়াছেন “এ দেশে সেরাজ-
দৌলার হস্ত হইতে পরিত্রাণ লাভের জন্য, হিন্দুজমিদারগণের
ইঙ্গরেজদিগকে আহ্বান করিয়া আনিবার যে এক কথা আছে
তাহা সম্পূর্ণ অমূলক। বর্দ্ধমান, নদীয়া, রাজসাহী প্রভৃতি
কোন প্রদেশের জমিদার নিশ্চয়ই এই রাজবিপ্লবের কোন
সংশ্রবে ছিলেন না, তাঁহারা করসংগ্রাহক মাত্র ছিলেন ; সুতরাং,
এ বিষয়ে তাঁহাদের হস্তার্পণ করিবার কোন অধিকার ছিল
না। সত্ৰাটের কোষাধ্যক্ষ পরাক্রান্ত শেঠবংশীয়েরা; সৈন্য-
দিগের ধনাধ্যক্ষ ও সেনাপতি মীরজাফর, এবং উমিচাঁদ ও
খোজাবাজীদ নামক দুই জন ঐশ্বর্য্যশালী বণিক, এই কয়েক
ব্যক্তিই সিরাজদৌলাকে রাজ্যচ্যুত করিয়া মীরজাফরকে তৎ-
পদে নিবেশিত করণার্থ ক্লাইব সাহেবকে অনুরোধ জানান *।”
এস্থলে আমরাদিগের বক্তব্য এই যে, এ দেশস্থ ভূম্যধিকারি-
গণেরা নবাবকে রাজ্যচ্যুত করিবার নিমিত্ত, ইঙ্গরেজদিগের
সহায়তা লাভের যত্ন পান এই যে এক সংস্কার হিন্দুদিগের
মনে বদ্ধমূল হইয়া আছে তাহা অপ্রকৃত নহে ; বর্দ্ধমান ও
রাজসাহী প্রভৃতির রাজারা এই মন্ত্ৰণার মধ্যে থাকুন বা না
থাকুন, নবদ্বীপের রাজা যে উহার মধ্যে ছিলেন না, এ কথা

* Marshman's History of Bengal, p. 162.

আমরা স্বীকার করিতে পারি না। বিশেষতঃ উক্ত ইতিহাস লেখক ঐ চক্রান্তের মধ্যে ভূম্যধিকারীদের থাকিতে না পারার বিষয়ে যে যুক্তি প্রদর্শন করিয়াছেন; তাহা আমাদের বিবেচনায় সঙ্গত বলিয়া বোধ হয় না। আমরা রাজা কৃষ্ণচন্দ্রের সমকালীন লোকের এবং ঐ রাজবংশোদ্ভূত রাজাদিগের প্রমুখাৎ শুনিয়াছি, রাজা কৃষ্ণচন্দ্র এই রাজবিপ্লবের প্রবর্তক, মন্ত্রী ও প্রধান উদ্যোগী ছিলেন। তিনি এই বিষয়ে বিশেষ যত্নবান্ ও উদ্যোগী ছিলেন বলিয়া, এ প্রদেশস্থ প্রাচীন লোকেরা তাঁহাকে নেমকহারাম কহিত; অর্থাৎ যে জাতির অনুগ্রহে তাঁহার বংশের এরূপ আধিপত্য ও গৌরব বৃদ্ধি হয়, সে জাতির অধঃপাত সাধনে প্রবৃত্ত হওয়া তাঁহাদের অভিপ্রায়ে নিতান্ত কৃতঘ্নতার কার্য্য হইয়াছিল। এমন কি, যখন ইংরেজদের রাজত্বকালে রাজস্ব সংগ্রহের নিয়মানুসারে, তাঁহার পরপুরুষের জমীদারী নিলাম হইতে আরম্ভ হইল, তখন এতদিনে রাজা কৃষ্ণচন্দ্রের কৃতঘ্নতার ফল ফলিল, এই কথা এপ্রদেশস্থ বাবতীয় লোকের মুখে শুনা গিয়াছিল। বিশেষতঃ যখন ইঙ্গরেজদিগের সহিত নবাব মীরকাসিমের বিবাদ ঘটবার সম্ভাবনা হয়, তখন নবাব কৃষ্ণচন্দ্রকে ইঙ্গরেজদের পক্ষের লোক জানিয়া, তাঁহাকে ও তদীয় পুত্রকে মুঙ্গেরের দুর্গে কারাবদ্ধ করেন, ও পরে তাঁহাদের প্রাণসংহার করিতে আদেশ দেন। ইহার বৃত্তান্ত যথাস্থানে বর্ণিত হইবে।

ইতিহাসের একটা প্রধান মূল জনশ্রুতি। যদি এ স্থানে ঐ জনশ্রুতি এককালে অগ্রাহ্য করিয়া যুক্তিমাত্র অবলম্বনপূর্বক সত্যাসত্য স্থির করা যায়, তাহা হইলেও হিন্দুজাতির উপরোক্ত সংস্কার ভ্রান্তিমূলক বলিয়া প্রতিপন্ন হয় না। নবাব কেবল

জগৎশেঠ, উমিটাদ ও খোজাবাজীদ এই কয়েকজন শ্রেষ্ঠীর উপর অত্যাচার করেন এমন নহে; তিনি ভূম্যধিকারিগণের উপরেও যৎপরোনাস্তি দৌরাভ্যা করিয়াছিলেন। রাজবাটীতে প্রবাদ আছে যে, এমন কি, কৃষ্ণচন্দ্র, এক সময়ে নবাবের অত্যাচার আর সহ্য করিতে না পারিয়া জমীদারী পর্য্যন্ত এস্তফা করিয়াছিলেন। তৎকালে, এ প্রদেশস্থ ভূম্যধিকারীদের মধ্যে এই রাজার সদৃশ বিচক্ষণ ও উদ্যোগী দ্বিতীয় ব্যক্তি কেহ ছিলনা, একথা বাঙ্গলার সর্বত্র প্রসিদ্ধ আছে। তাঁহার জমীদারী মুরশিদাবাদ হইতে গঙ্গাসাগর পর্য্যন্ত বিস্তৃত ছিল। অতএব, দৈদৃশ সমৃদ্ধিশালী ও বুদ্ধিসম্পন্ন ভূম্যধিকারী হইয়া, নবাবের দুর্বিসহ দৌরাভ্যা নিবারণের চেষ্টা না পাইয়া, নিশ্চিন্ত হইয়া বসিয়াছিলেন, ইহা কোনক্রমে সম্ভাবিত বলিয়া বোধ হয় না। তাঁহার জমীদারীর প্রায় মধ্যস্থলে ইঙ্গরেজেরা বাস করিতেন। স্মরণ্য, তাঁহাদের চরিত্রাদি তাঁহার যেরূপ জানিবার সম্ভাবনা ছিল, তদপেক্ষা জগৎশেঠ বা উমিটাদ প্রভৃতি বণিকদের অধিক জানিবার সম্ভাবনা থাকা সম্ভব বলিয়া বোধ হয় না। অতএব ইঙ্গরেজদিগের সাহায্য ব্যতিরেকে কদাচ কৰ্ম্ম সিদ্ধ হইবে না, ইহা নবদ্বীপের রাজা কর্তৃক উত্থাপিত হওয়াই নিতান্ত সম্ভাবিত। আর শুদ্ধ করসংগ্রাহক হইলেও রাজা কৃষ্ণচন্দ্রের সদৃশ অবস্থা-পন্ন ও অতীব বুদ্ধিমান ব্যক্তির এরূপ মন্ত্রণার মধ্যে থাকা যে অসম্ভব ইহা কোনক্রমেই যুক্তিযুক্ত বলিয়া প্রতিপন্ন হয় না।

উক্ত সাহেব তাঁহার প্রণীত বাঙ্গলার ইতিহাস মধ্যে আর এক স্থানে লিখিয়াছেন “নবদ্বীপ, রাজসাহী ও দিনাজপুরের রাজাদিগের পূর্বপুরুষেরা কেবল করসংগ্রাহক ছিলেন, পরে, নবাব মুরশিদকুলি খাঁ, ১৭২৫ খৃঃ অব্দে, বঙ্গদেশ ১৩ চাকলায়

বিভক্ত করিয়া তন্মধ্যে ভাগীরথীর পূর্ব প্রদেশস্থ ৬ চাকলার কর সংগ্রহ কার্যে ভূম্যধিকারিগণকে নিযুক্ত করেন, এইরূপে নবদ্বীপ, রাজসাহী ইত্যাদির রাজাদিগের সৃষ্টি হয়। নবাব, রামজীবন নামক এক ব্রাহ্মণকে রাজসাহী, রামনাথ নামে এক ক্ষুদ্র ভূম্যধিকারীকে দিনাজপুর এবং রঘুরাম নামে এক বিপ্রকে নবদ্বীপ প্রদেশ প্রদান করেন *।” আর এই ইতিহাস লেখক স্বপ্রণীত ভারতবর্ষের পুরাতত্ত্বের মধ্যে কোন স্থানে লেখেন, “সত্ৰাট ফরখ্ সায়রের নিকট, ১৭১৫খৃঃ অব্দে, ইঙ্গরেজেরা কলিকাতার সম্বিহিত ৩৮ খানি গ্রাম ক্রয় করিবার অনুমতি প্রাপ্ত হন, কিন্তু, নবাব মুরশিদকুলি খাঁ ইঙ্গরেজদিগকে এক ফুট পরিমাণ ভূমিও প্রদান করিতে জমীদারদিগকে নিষেধ করেন” †। মার্শম্যান সাহেবের লিখনানুসারে এই সকল রাজাদিগের পূর্বপুরুষেরা ভূম্যধিকারী না থাকিবার বিষয় সপ্রমাণ হইলেও তাঁহারা যে ভূম্যধিকারী হইয়াছিলেন, এবং তাঁহাদের যে জমীদারী বিক্রয় করিবার পর্য্যন্ত অধিকার ছিল এ কথা তাঁহার প্রণীত উভয় ইতিহাস দ্বারাই বিলক্ষণ সাব্যস্ত হইতেছে। তথাপি তিনি নবাব সিরাজদ্দৌলার সময়ে, এই রঘুরামের পুত্র কৃষ্ণচন্দ্র ও অন্যান্য রাজাকে কেবল করসংগ্রাহক বলিয়া বর্ণন করেন কেন, তাহা অনুভূত হয় না।

এই রাজবংশোদ্ভব রাজা ভবানন্দ অবধি কৃষ্ণচন্দ্র পর্য্যন্ত সপ্তম পুরুষকে দিল্লির সত্ৰাটেরা জমীদারীর যে সকল করমাণ দিয়াছেন, তাহাতে এই রাজারা জমীদার বা চৌধুরী বলিয়া উল্লিখিত হইয়াছেন। (১) যদি তাঁহারা শুদ্ধ করসংগ্রাহক

* The History of Bengal, by J. Marshman, p. 98.

† The History of India by J. Marsman vol. I, p. 222.

(১) এই সকল করমাণ অদ্যাপি রাজবাটীতে বর্তমান আছে।

হইতেন, তবে তাঁহার তহসিলদার বা চৌধুরী বলিয়া কখনই সম্বোধিত হইতেন না, এবং প্রত্যেক পরগণার জুমা পুৰষানুক্রমে একরূপ থাকিত না । রাজারা আপন আপন জমীদারী স্বীয় সম্ভান-দিগের মধ্যে বিভাগ করিয়া দিয়াছেন, অপরের জমীদারী ক্রয় করিয়া সম্রাটের নিকট তাহার মঞ্জুরী করমাণ লইয়াছেন, বহু ব্যয় স্বীকার পূর্বক জমীদারীর মধ্যে নানা স্থানে বৃহৎ বৃহৎ দীর্ঘিকা ও পুষ্করিণী খনন ও সুবিস্তৃত উদ্যানাদি প্রস্তুত করিয়াছেন, আর অনেক নিষ্কর ভূমিও দান করিয়াছেন । শুদ্ধ তহসিলদার হইলে, এ সকল কার্য্য কখনই করিতে পারিতেন না । ঈদৃশ দানবিক্রয়ের স্বত্বাধিকারিগণকে কেবল করসংগ্রাহক বলিয়া নির্দেশ করা যে কত দূর সম্ভব, ইহা পাঠকবর্গ অনায়াসেই স্থির করিতে পারেন ।

এই রাজ বিপ্লব সংঘটন বিষয়ে রাজা কৃষ্ণচন্দ্রের যে বিশেষ যত্ন ও সংশ্রব ছিল, তাহার অনেক প্রত্যক্ষ প্রমাণও আছে । পলাশির যুদ্ধের পর, ক্লাইব সাহেব যে পাঁচটি কামান তাঁহাকে দিয়াছিলেন, সে কয়েকটি অদ্যাপি রাজবাটীতে বর্তমান আছে । ১৮৬০ খৃঃ অব্দের ৩১ আইনানুসারে, যখন, গবর্ণমেন্ট কামান ও অন্য অন্য অস্ত্রের কর লইবার আদেশ প্রচার করেন, তখন বঙ্গদেশের লেপ্টেনেন্ট গবর্ণর, “নবদ্বীপের মহারাজা সতীশ চন্দ্র রায় বাহাদুরের পূর্ব পুৰুষকে পলাশির যুদ্ধাবসানে যে পাঁচটি কামান প্রদত্ত হয়, তাহার কর গ্রহণোত্তর তাঁহাকে প্রত্যর্পন করিতে হইবেক” এই মর্মে, ১৮৬১ অব্দে, নদীয়া বিভাগের কমিশনর সাহেবকে পত্র লেখেন । আর পূর্বে কৃষ্ণচন্দ্রের কেবল মহারাজাবাহাদুর উপাধি ছিল, ক্লাইব সাহেব সম্রাটের নিকট হইতে তাঁহাকে মহারাজেন্দ্র বাহাদুর এই অত্যুচ্চ সম্মানসূচক উপাধির করমাণ আনাইয়া দেন । এই করমাণ

অদ্যাপি রাজবাটীতে আছে। রাজা কোন বিশেষ উপকার না করিলে ক্লাইব সাহেব কখনই তাঁহার প্রতি দ্বেশ অনুরাগ প্রদর্শন করিতেন না।

পঞ্চদশ অধ্যায় ।

কতিপয় বর্ষানন্তর, কৃষ্ণচন্দ্র এক বিষম সঙ্কটে পতিত হন ; কেবল স্ত্রীয়া অসাধারণ বুদ্ধি ও প্রত্যাশামতিত্ব বলে তাহা হইতে উদ্ধার পান। অভিনব নবাব মীরজাফর, বার্কক্য বশতঃ রাজ-কার্য্য পর্যালোচনায় অশক্ত হইয়া, আপন পুত্র মীরণের উপর রাজ্যের সমস্ত ভারার্পণ করেন। মীরণ অতি অবিজ্ঞ ও দুরাশ্রয় ছিল। অল্পকাল মধ্যেই তাহার দৌরাশ্রয় রাজ্যের সমস্ত লোক, যার পর নাই, অসন্তুষ্ট ও জ্বালাতন হইয়া উঠিল। ১৭৬০ খৃঃ অব্দে, বজ্রাঘাতে তাহার আয়ুঃশেষ হয়। নবাব পুত্র-শোকে এক কালে অভিভূত হইলে, তাঁহার জামাতা মীর কাসিম তদীয় সিংহাসনে অধিরোহণ করেন।

এই নবাব বিলক্ষণ বিচক্ষণ ও রাজকার্য্যদক্ষ ছিলেন। তিনি, অনতি-দীর্ঘকাল-মধ্যেই, রাজ্যের অনেক সুশৃঙ্খলা করিলেন, কিন্তু কোম্পানির কর্মচারীদিগের আত্মসত্ত্বিতায় অতিশয় ব্যতিব্যস্ত হইলেন। তাঁহাদের অন্যায়চরণ ক্রমশঃ তাঁহার অসহ্য হইয়া উঠিল। তিনি তাঁহাদের আধিপত্য শৃঙ্খল হইতে মুক্ত হইবার জন্য যত্ন পাইতে লাগিলেন। ক্রমে ক্রমে উভয় পক্ষের মধ্যে ঘোরতর বিবাদ ঘটিবার সম্ভাবনা হইয়া উঠিল। তিনি, ইংরেজদিগের আবাস স্থল হইতে দূরবর্তী থাকিবার মানসে, মুর্শিদাবাদ পরিত্যাগ করিয়া মুন্সেরে রাজধানী করিলেন, এবং সৈন্য সুশিক্ষিত ও কামানাদি বিবিধ অস্ত্র প্রস্তুত করিতে লাগিলেন। এ দেশস্থ প্রধান ব্যক্তিদিগের

মধ্যে তিনি যাহাদিগকে ইঙ্গরেজের পক্ষ বলিয়া জানিতেন, তাহাদিগকে নানা কৌশলে হস্তগত করিতে প্রযুক্ত হইলেন। একদা নবাব রাজা কৃষ্ণচন্দ্রকে হৃগলিতে আসিতে আদেশ করেন ; তদনুসারে রাজা আপন জ্যেষ্ঠ পুত্র কুমার শিবচন্দ্রকে সমভিব্যাহারে লইয়া তথায় সমাগত হন। নবাব তাঁহার সহিত অনেকক্ষণ কথোপকথন করিয়া তাঁহাকে বিদায় দেন। তাঁহার পিতাপুত্রে শিবপুরের মোহানার সন্নিহিত হইলে, নবাবের এক জন দূত আসিয়া কহিল “মহারাজ নবাব আপনাদিগকে পুনরায়, কি জন্য, ডাকিয়াছেন।” রাজা, এই কথা শ্রবণমাত্র অত্যন্ত ব্যাকুলচিত্ত হইয়া, শিবচন্দ্রকে কহিলেন “এ ডাক ভাল বলিয়া বোধ হইতেছে না। অমাত্যবর্গ কেহ সঙ্কে নাই, কি করিব, কিছুই স্থির করিতে পারিতেছি না। কিন্তু পুনর্বার গমন করিলে, যেন কোন বিপদ ঘটবে, এরূপ মনে লইতেছে।” শিবচন্দ্র বলিলেন “যখন গেলেও অনিষ্ট, না গেলেও অনিষ্ট পাতেই সম্ভাবনা আছে, সে স্থলে যাওয়াই ভাল বোধ হইতেছে।” অনন্তর, রাজা স্বয়ং কর্তব্য অবধারণে অসমর্থ হইয়া পুত্রের পরামর্শানুসারেই চলিলেন, এবং অতীব উৎকণ্ঠিত মনে হৃগলিতে উপনীত হইলেন। তিনি যাহা ভাবিয়াছিলেন তাহাই ঘটিল। তাঁহার তথায় উপনীত হইবার মাত্র বন্দীভূত এবং বহু-ক্ষেপণী-যুক্ত, অতিদ্রুত-গামী নৌকা যোগে মুঙ্গেরে প্রেরিত হইলেন। তাঁহার তথায় উত্তীর্ণ হইবামাত্র দুর্গ মধ্যে কারাকদ্ধ হইলেন। এই বিষম বিপদে মুক্তিলাতের জন্য, বহু-বিধ যত্ন ও চেষ্টা করিয়াছিলেন ; কিন্তু কোন মতেই মুক্ত্যবতর হইতে পারেন নাই। অবশেষে সর্বনিয়ন্তা পরমেশ্বরের উপর নির্ভর করিয়া কারাবাসে কালযাপন করিতে লাগিলেন। (১)

(১) ইহারা যে রূপে কারাকদ্ধ হন ও যে রূপে রক্ষা পান তাহা

১৭৬৩ খৃঃ অব্দের ১৯ এ জুলাই কাটোয়ার সম্মিলিত কোন স্থানে নবাবসৈন্যের সঙ্গে ইঙ্গরেজ সৈন্যের এক যুদ্ধ হইল। যদিও তৎকালে নবাবের সেনারা পূর্বাপেক্ষা যুদ্ধে নিপুণ হইয়াছিল, তথাপি পরাজিত হইল। ২রা আগষ্ট, গড়িয়া নামক স্থানে পুনর্বীর এক সংগ্রাম হয়, সে স্থানেও ইঙ্গরেজেরাই জয় লাভ করেন। নবাব এতাবৎ কাল যুদ্ধেরে অবস্থান করিতেছিলেন, স্বীয় সৈন্যের বারংবার পরাজয় সংবাদ পাইয়া অস্বস্তি রাজমহলে উপস্থিত হইলেন। কিন্তু অক্টোবর মাসে নিজেও পরাজিত হইয়া যুদ্ধেরে প্রত্যাবর্তন করিলেন, ইঙ্গরেজদের সৈন্য তাঁহার পশ্চাতে ধাবমান হইল। যে কারণে সেরাজদ্দৌলা নিধন প্রাপ্ত হইয়াছিলেন, সেই কারণেই মীরকাসিমের সর্বনাশ ঘটিল। নবাব গর্গিন নামক এক জন রণকুশল আর্ম্যানীকে স্বীয় সৈন্যপত্যে নিযুক্ত করিয়াছিলেন। ঐ সৈন্যপতির ভ্রাতা কলিকাতায় থাকিতেন, ইঙ্গরেজদের কর্তৃপক্ষ বান্‌সিটার্ট সাহেব তাঁহার সহিত সখ্য করিয়া, গর্গিনকে সপক্ষ করেন, এবং তাঁহারই বিশ্বাসঘাতকতায় নবাবের পরাজয় ঘটে। *

নবাব যুদ্ধের হইতে পাটনায় পলায়ন করিবার উদ্যোগ করিতে লাগিলেন। তিনি, সৈন্যপতির বিশ্বাসঘাতকতায় একান্ত বিরক্ত ও ধর্ম্মাধর্ম্ম জ্ঞানশূন্য হইয়া, বন্দীগণকে বধ করিতে আদেশ দেন। অনেক মাননীয় ও প্রধান প্রধান ব্যক্তি নানা প্রকারে নিহত হইয়াছিলেন। যে সময়ে যুদ্ধের হইতে নবাবের প্রস্থান করিতেই হইবেক, কৃষ্ণচন্দ্র, সেই সময়টি অবগত

পূর্বে প্রাচীন লোক মুখে ও পরে মহারাজা শ্রীশচন্দ্রের নিকট সবিশেষ সমস্ত শুনা হইয়াছে।

হইয়া, বাহাতে আপনাদের প্রাণদণ্ডের বিলম্ব ঘটে, তাহারই উপায় দেখিতে লাগিলেন। (১)

. যে সময়ে হতভাগ্য বন্দীদিগের প্রাণদণ্ডের আদেশ প্রকাশ হইবে, তাহার অব্যবহিত পূর্বে পিতাপুত্রে অন্যদিন অপেক্ষা বিশেষ সমারোহ সহকারে পূজায় বসিলেন। তাঁহাদের উভয়েরই গঠন অতি সুন্দর ছিল। বহুদিবসাবধি বন্দী হইয়া থাকায়, তাঁহাদের শ্মশ্রু, কেশ ও নখ সমধিক বাড়িয়াছিল। তাঁহারা সর্বদা গঙ্গামৃত্তিকা লেপন এবং গলদেশে কদ্রাক্ষমালা ধারণ করিয়াছিলেন। তাঁহাদের উভয় পার্শ্বে পুষ্পপাত্র, ধূপ দীপ নৈবেদ্যাদি নানাবিধ উপচার বিন্যস্ত ছিল। এইরূপে বাহু আড়ম্বর প্রকাশ পূর্বক আন্তরিক ভক্তি সহকারে ইচ্ছদেবতার পূজা করিতেছেন, এমন সময়ে, প্রহরীরা নবাবের নিষ্ঠুর আজ্ঞা পালনার্থ তাঁহাদিগকে লইতে আসিল। কিন্তু তাঁহাদিগকে দর্শনমাত্র তাহাদের এইরূপ বোধ হইল, যেন দুই দেবর্ষি কারাগারে অবতীর্ণ হইয়া ঈশ্বরের অর্চনা করিতেছেন। তাহারা স্থায়ী প্রভুর আদেশ প্রকাশ করিল। রাজা সজলনয়নে ও কাতরবচনে কহিলেন, “বাপু সকল, ক্ষণেক অপেক্ষা কর,

(১) জন মার্শম্যান সাহেবের বাঙ্গালার ইতিহাসে বর্ণিত আছে যে নবাব উদয়নালায় আসিবার কালে এই হত্যাকাণ্ড সমাপন করেন। কিন্তু রুকচন্দ্রের পরবর্তী পুরুষদিগের দৃঢ় বিশ্বাস ছিল, যে নবাব পাটনায় পলায়ন করিবার সময়ে রুকচন্দ্র ও শিবচন্দ্রকে বধ করিতে আদেশ দেন; এস্থলে এমনও অনুমান হইতে পারে যে কতক বন্দিগণকে উদয়নালায় আসিবার সময় ও অবশিষ্ট বন্দীদিগকে পাটনায় গমন কালে হত্যা করিবার আজ্ঞা হয়, অতএব রাজপরিবারদিগের মুখে যে রূপ অবগত হওয়া গিয়াছে তাহাই প্রামাণিক বলিয়া লিখিত হইল।

আমরা জন্মের মত পরমেশ্বরের পূজা করিয়া লই। পূজা সমাপ্ত হইলেই তোমাদের সঙ্গে যাইতেছি।” রক্ষকগণ তাঁহাদের আগমন প্রতীক্ষায় বাহিরে রহিল, তাঁহারা পূজা করিতে লাগিলেন। বিলম্ব দেখিয়া তাহারা ক্রমশঃ বিরক্ত হইতে ও পূজা সমাপ্তির জন্য বারংবার তাড়না করিতে লাগিল, কিন্তু তাঁহাদিগকে পূজার আসন হইতে বলপূর্বক উঠাইতে কাহারও সাহস বা প্রবৃত্তি হইল না। তাহারা যতবার তাড়না করে, ততবারই রাজা নিরতিশয় কাতর স্বরে “এই শেষ হইল, এই শেষ হইল” বলিয়া তাহাদিগকে নিরস্ত করিলেন। এদিকে এইরূপে বিলম্ব হইতেছিল ও দিকে নবাবের প্রস্থান কাল উপস্থিত হওয়াতে দুর্গ মধ্যে বিষম একটা কোলাহল উঠিল, এবং রক্ষীরা সমধিক ব্যস্তসমস্ত হইয়া প্রস্থান করিল। এইরূপে পিতাপুত্র আসন্ন মৃত্যু হইতে রক্ষা পাইলেন। এই দিবসে, তাঁহারা যে বেশে যে ভাবে পূজা করিতে বসিয়াছিলেন, তাহার অবিকল প্রতিকৃতি রাজবাটীতে বর্তমান আছে। (১)

রাজার দুই রাজ্তী ছিলেন। পিতা বর্তমানে প্রথমা মহিষীর সহিত পরিণয় হয়, কিয়ৎকালানন্তর রূপ লাভণ্যে মোহিত হইয়া কনিষ্ঠা রাজ্তীকে বিবাহ করেন। জ্যেষ্ঠা রাণীর গর্ভে শিবচন্দ্র, ভৈরবচন্দ্র, হরচন্দ্র, মহেশচন্দ্র ও ঈশানচন্দ্র জন্মেন, এবং কনিষ্ঠা রাজ্তীর গর্ভে শম্ভুচন্দ্রের জন্ম হয়। রাজনন্দনদিগের মধ্যে,

(১) যে কৌশলে রাজা ও রাজপুত্র আসন্ন মৃত্যু হইতে রক্ষা পান তাহা অনেকের আপাততঃ অলীক বোধ হইতে পারে, কিন্তু রূক্ষচন্দ্রের বৈরপ অসাধারণ বুদ্ধিমত্তা এবং নবাবী সময়ের যেমত কার্য প্রণালী ছিল তাহাতে এরূপ সজ্ঞাটন হওয়া কিছু মাত্র বিচিত্র নহে। ইহাও অসম্ভব নয় যে এই কৌশলের সঙ্গে সঙ্গে বিলক্ষণ প্রলোভনও প্রদর্শিত হইয়াছিল।

শিবচন্দ্র যেমন শাস্ত্রস্বভাব ও পিতৃভক্ত, শম্ভুচন্দ্র তেমনই উদ্ধত ও পিতার অবাধ্য ছিলেন। যৎকালে রাজা ও শিবচন্দ্র মুন্সেরে কারাকদ্ধ থাকেন, সে সময়ে শম্ভুচন্দ্র পৈতৃক জমীদারী ও ধনাগার অধিকার করেন ; এবং যখন মুন্সেরের কারাগারস্থ অপরাপার বন্দীদিগের হত্যা সংবাদ প্রচারিত হয়, তখন পিতা ও জ্যেষ্ঠ ভ্রাতার মৃত্যু ঘোষণা করিয়া দিয়া, বিশেষ সমারোহ পূর্বক পিতৃসিংহাসনে অধিরূঢ় হন। তাঁহাদের মুন্সেরে নীত হওয়া অবধি তিনি মনে মনে এই স্থির করিয়াছিলেন যে, তাঁহারা যে করালকবলে পতিত হইয়াছেন, তাহা হইতে আর কখনই তাঁহাদের নিষ্কৃতি সম্ভাবনা নাই। কিন্তু যখন তাঁহাদের মুন্সেের হইতে মুর্শিদাবাদে আসার সংবাদ প্রচারিত হইল, তখন তিনি, অতীব লজ্জিত ও অনুতপ্ত হইয়া, স্বীয় দোষ খণ্ডনার্থ নানাবিধ আরোপিত বাক্য বিন্যাস পূর্বক যৎপরোনাস্তি অনুনয়ের সহিত জনক সন্নিধানে পত্র লিখিলেন। রাজা মুনশীর দ্বারা তাহার বখোচিত উত্তর লেখাইয়া স্বাক্ষরের নিম্নদেশে স্বহস্তে এই কয়েক পংক্তি লিখিলেন যে

হস্তি শুঙে লক্ড়ি দিলে ছাড়ান মক্ষিল ।

কুশার ভুমিতে বীজ কাড়ান মক্ষিল ॥

মনঃশিলা ভাঙ্গিলে জোড় লাগান মক্ষিল ।

জাহাঁদিদা খামিদেরে ভুলান মক্ষিল ॥

মীর কাসিমের মুন্সেের হইতে পলায়ন করিবার অনতিকাল পরেই, মীর জাফর, ইঙ্গরেজদিগের সাহায্যে, পুনরায় বঙ্গদেশের আধিপতি হইলেন। কিন্তু অধিক কাল আধিপত্য ভোগ করিতে পারিলেন না। তিনি, ১৭৬৫ খৃঃ অব্দে, পরলোক গমন করি-

লেন। ইঙ্গরেজেরা তাঁহার পুত্র, নজমদৌলার নিকট সমধিক অর্থ গ্রহণ পূর্বক, তাঁহাকে পিতৃসিংহাসনে বসাইলেন, এবং তাঁহার সহিত এক নূতন বন্দবস্ত করিয়া দেশ রক্ষার ভার আপনাদের হস্তে লইলেন। কিছু কাল পরে, আর এক অভিনব নিয়ম নিবদ্ধ করিয়া, রাজ্যশাসনের সমস্ত ভার আপনারা গ্রহণ করিলেন, এবং তাঁহার সাংসারিক ব্যয় নির্বাহের নিমিত্ত, ৫০ লক্ষ টাকা বার্ষিক বৃত্তি নিরূপণ করিয়া দিলেন।

দিল্লীর সত্ৰাট্ আলমগির সর্বাধিকারী কর্তৃক হত হওয়াতে, তাঁহার পুত্র সাহাআলম পিতৃহলাভিবিত্ত হন। তিনি, মীর জাকর ও মীর কাসিমের সময়ে, বাঙ্গালা অধিকার করিবার জন্য কয়েক বার আইসেন; কিন্তু ইঙ্গরেজেরা, নবাবের সপক্ষ হইয়া, তাঁহাকে যুদ্ধে পরাজিত করিয়া দূরীভূত করিয়া দেন। শেষবারে সাহা আলম ইঙ্গরেজদিগের নিকট “তোমরা যখন প্রার্থী হইবে, তখনই তোমাদিগকে বাঙ্গালা, বেহার ও উড়িষ্যার দেওয়ানী দিব” এই অঙ্গীকার করেন। তদনুসারে রাজ্যচ্যুত ও ক্ষয়ভাগ্য সত্ৰাট্, ১৭৬৫ খৃঃাব্দের আগষ্ট মাসের দ্বাদশ দিবসে, কোম্পানি বাহাদুরকে উক্ত তিন রাজ্যের দেওয়ানী প্রদান করিলেন, ক্লাইব সাহেবও ঐ তিন রাজ্যের রাজস্ব হইতে তাঁহাকে মাসিক দুই লক্ষ টাকা দিতে প্রতিশ্রুত হইলেন।

ষোড়শ অধ্যায় ।

এই দেওয়ানী সনন্দ পাইবার পর, কি রূপে জমীদারীর রাজস্ব বৃদ্ধি হইবেক, কেবল সেই বিষয়েই রাজপুরুষদিগের মন নিবিষ্ট হইল। প্রথমতঃ, তাঁহারা এই সিদ্ধান্ত করিলেন যে,

যবনাধিকারের প্রথমাবস্থায় এই সকল ভূম্যধিকারীর পূর্বাধিকারিগণ কেবল রাজস্ব সংগ্রাহক ছিলেন ; জমীদারীতে তাঁহাদের কিছুমাত্র স্বত্ব ছিল না। শুদ্ধ কর সংগ্রহ কার্যে তাঁহাদের বিশেষ দক্ষতা থাকায় এই কর্ম পাইতেন। পরে, জমীদারীর সমস্ত কাগজ পত্র তাঁহাদের পরিবারের হস্তে থাকিত ; এবং তাঁহাদের সন্তানদের জমীদারীর অবস্থা বিশেষরূপে অবগত হইবার সুযোগ হইত। অতএব, তাঁহাদের দ্বারা এই কার্য সুন্দর রূপে নির্বাহ হইবে বলিয়া; পিতার মরণের পর পুত্র, পুত্রের মরণের পর পৌত্র, এইরূপে পুরুষানুক্রমে ক্রমান্বয়ে এই কর্মে নিযুক্ত হইতেন ; এবং কাল সহকারে জমীদার হইয়া উঠিতেন*। এক্ষণে যে কেহ অধিক রাজস্ব দিতে সম্মত হইবে, তাহারই সহিত আমরা জমীদারীর বন্দোবস্ত করিব, সর্বত্র এই রূপ ঘোষণা করিয়া দিলেন। কিন্তু দেশের প্রকৃত অবস্থা অজ্ঞাত থাকায়, ১৭৬৮ খৃঃাব্দ পর্য্যন্ত, এবিষয়ে কিছুমাত্র রূতকার্য হইতে পারিলেন না ; সুতরাং, এই চারি বৎসর, রাজ্যের সমস্ত কার্যের ভার পূর্বমত এ দেশীয় কর্মচারিগণের হস্তেই রহিল। ১৭৬৯ খৃঃ অব্দে, বাঙ্গালার প্রধান প্রধান বিভাগে এক এক জন “সুপার বাইজর্” নিযুক্ত হইলেন। ইতি মধ্যে অকস্মাৎ কোম্পানির বাসনা সিদ্ধির এক বিষম ব্যাঘাত জন্মিল। যাহার বৃত্তান্ত বর্ণন কালে, অদ্যাপি শ্রোতাদিগের হৃদয় কম্পিত হয়, এরূপ অপেক্ষিত এক ব্যাপার উপস্থিত হইল। ঐ ভয়ানক ব্যাপার, ১১৭৬ অব্দে সংঘটিত হয় বলিয়া, ছোয়াত্তরের মন্বন্তরা নামে এ প্রদেশে চির প্রসিদ্ধ আছে। ইদানীং ঐরূপ দুর্ঘটনা সংঘটিত হইলে, তন্নিবন্ধন অনিষ্ট নিবারণার্থ রাজপুরুষেরা যে রূপ যত্ন

* Marshman's History of India vol. I, p. 468.

করিয়া থাকেন, যদি তদানীন্তন রাজপুরুষেরা তাহার শতাংশের একাংশও যত্ন করিতেন, তাহা হইলে, কখনই লক্ষ লক্ষ মনুষ্য, অন্ন-ভাব জনিত দুঃসহ যন্ত্রণা ভোগ করিয়া অকালে কাল কবলে পতিত হইত না, এবং দেশেরও এতাদৃশ দুর্দশা ঘটিত না ।

ঐ ঘটনার সংক্ষিপ্ত বিবরণ এই—১৭৬৮ খৃঃ অব্দে, এ দেশে অল্প পরিমাণে শস্য জন্মে । ১৭৬৯ খৃঃ অব্দে প্রাথমিক, আশু ঋতুর গাছ উত্তম হয়, কিন্তু শেষে বৃষ্টির অভাবে শুষ্ক হইয়া যায় । হৈমন্তিক ধান্য ও রবি খন্দ এক কালে জন্মে না । নদ নদী সকল শুষ্ক প্রায় হয়, এবং বিল খাল পুষ্করিণী প্রভৃতি জলাশয় একবারে জল শূন্য হইয়া পড়ে । ১৭৭০ খৃঃ অব্দের জানুয়ারি মাস হইতে লোকের কষ্ট আরম্ভ হয় । ফেব্রুয়ারি হইতে অক্টোবর পর্য্যন্ত নয় মাসে, বাঙ্গালার তৃতীয়াংশ অধিবাসীরা অন্নভাবে প্রাণ ত্যাগ করে, কৃষকদিগের সংখ্যা প্রায় অর্দ্ধেক হইয়া যায় ; নয় মাসের মধ্যে প্রায় এক কোটি লোকের মৃত্যু হয় । পূর্বে যে তগুল টাকায় তিন মন পাওয়া যাইত, ঐ সময়ে টাকায় তিন সের হইয়াছিল । কৃষকেরা, উদরার্নের নিমিত্ত, আপনাদের লাঙ্গল, বিদা, মই প্রভৃতি যাবতীয় কৃষি যন্ত্র, গো মহীবাতি যাবতীয় জন্তু এবং ধান্যাদির বীজ বিক্রয় করে । কেহ কেহ জঠর জ্বালায় দগ্ধ হইয়া নয় মাংস পর্য্যন্ত ভক্ষণ করিয়াছিল, এরূপও শুনা গিয়াছে । চারি পাঁচ সের তগুলের বিনিময়ে বালক বিক্রীত হইয়াছে । দেশস্থ সঙ্গতিপন্ন লোকেরা যথাসাধ্য দুঃখীদিগের আনুকূল্য করিয়াছিলেন, কিন্তু ঈদৃশ দুঃসময়ে রাজার বাহা কর্তব্য রাজপুরুষেরা প্রায় তাহার কিছুই করেন নাই । যখন অন্নভাবে চতুর্দিকে হাহাকার রব উঠিয়াছিল তখন ইঙ্গরেজ বণিকদিগের শস্ত্রাগারে অপরিয়াপ্ত তগুল ছিল । কোন অঞ্চল হইতে কলি-

কাতায় তগুল আসিলে, ঐ বণিকেরা, তাহাও ক্রয় করিয়া লই-
তেন। যেক্ষণে ইউক মফস্বলের প্রজাদিগের বীজধান্য পর্য্যন্ত
কোম্পানির ভূত্যেরা ক্রয় করিয়াছিল।* দুর্ভিক্ষ নিবারণার্থে
নানাবিধ উপায় অবলম্বনের প্রসঙ্গ হয়, কিন্তু কার্যো কিছুই
ঘটে নাই। কতক রাজস্ব মাফ করিবার কথা হইয়াছিল, কিন্তু,
পরিণামে তাহার কিছুই করা হয় নাই। বিশ কোটি লোকের
আহারের সংস্থানের নিমিত্ত, কোম্পানি নব্বই ও নবাব সাত
চল্লিশ হাজার টাকা দান করিয়াছিলেন। কিন্তু, হতভাগ্য
অধিবাসীরা ঐ সমস্ত টাকা পাইয়াছিল কিনা সন্দেহ।†

দেশের তৃতীয়াংশ প্রজা নিধন প্রাপ্ত হইল, এবং তৃতীয়াংশ
ভূমি পতিত থাকিল, তথাপি রাজ পুরুষাদিগের রাজস্ব বৃদ্ধি
করিবার স্পৃহা, এক দিনের জন্যও, ন্যূন হইল না। রাইয়তকে
শতকরা ৫ টাকা খাজনাও মাফ করা হইল না, বরং পর বৎসরে
(১৭৭০, ৭১ অব্দে) শতকরা ১০ টাকার হিসাবে বৃদ্ধি করা হইল।
দুর্ভিক্ষের পূর্বে, ১৭৬৮। ৬৯ খৃঃঅব্দে, যে পরিমাণ রাজস্ব আদায়
হয়, ১৭৭১ অব্দে, তদপেক্ষা অধিক রাজস্ব রাজকোষে আইসে।
যথা ১৭৬৮। ৬৯ অব্দে ১৫২৫৪৮৫৬।।/৪ আদায় হয়, কিন্তু তিন
বৎসর গত না হইতেই, ১৭৭১। ৭২ অব্দে, ১৫৩৩৩৬৬০৬।।/৯ টাকা
রাজস্ব ধনাগারে বিন্যস্ত হয়।‡

১৭৭২ খৃঃঅব্দে, কোম্পানি বাহাদুর বঙ্গদেশের সমস্ত জমা-
দারী ইজারা বন্দোবস্ত করিতে প্রবৃত্ত হন, এবং ঐ কার্য সম্পাদনের
নিমিত্ত কমিটী অব সরকারে, নামে এক কমিটী নিযুক্ত করেন।¶

* Hunter's "Annals of Rural Bengal pp. 34, 412, 26, 36, 410.

† Do. Do. pp. 420, 23, 37, 38.

‡ Do. Do. pp. 39, 381.

¶ Do. Do. pp 287. 390.

যদিও জমীদারের সহিত ইজারা বন্দোবস্ত করিলে প্রজার পক্ষে মঙ্গল ও রাজস্ব সংগ্রহের সুবিধা হইবেক, বিশেষতঃ রাজস্ব বাকী পড়িলে জমীদারগণ আপন আপন জমীদারীর ন্যায্য বশতঃ অন্য ইজারাদারের ন্যায় পলায়ন করিতে পারিবেননা, এই সকল বিষয় কোম্পানি বাহাদুর অবধারিত জানিয়াছিলেন, তথাচ তাঁহাদের মনোমত রাজস্ব প্রদানে জমীদারগণ অসম্মত হইলে, জমীদারী যে সে ব্যক্তিকে ইজারা দিতে প্রবৃত্ত হইলেন।

উপরোক্ত কমিটির সাহেবেরা, সৰ্ব্বাশ্রয়ে কৃষ্ণনগরে আসিয়া, নদীয়া জমীদারীর রাজস্ব বন্দোবস্ত করিতে বসেন। রাজা কৃষ্ণচন্দ্র আপন জমীদারীর যে রাজস্ব দিবার প্রস্তাব করেন, তাহা শুনিয়া কমিটির সাহেবেরা সাতিশয় রাগান্বিত হইয়া উঠিলেন, এবং তাঁহার জমীদারী ডাক নিলামে বন্দোবস্ত করিতে উদ্যত হইলেন।* অর্থাৎ যে ব্যক্তি সৰ্ব্বাপেক্ষা অধিক রাজস্ব দিতে স্মীকৃত হইবে, তাহার সহিত বন্দোবস্ত করা যাইবে। রাজা নিকপায় হইয়া অগত্যা কমিটির প্রস্তাবেই সম্মত হইলেন, এবং জ্যেষ্ঠ পুত্র কুমার শিবচন্দ্রের নামে, ১৭৭৩ অব্দ হইতে ১৭৭৬ অব্দ অর্ধান্ত, চারিবৎসর মেয়াদে জমীদারী বন্দোবস্ত করিয়া লইলেন। গবর্ণমেন্ট হইতে তাঁহার বাৎসরিক যে দুই লক্ষ টাকা মোশাহেরা নির্দ্ধারিত হইয়াছিল, তাহা এই ইজারার জামিনি স্বরূপ রাখা হইল। ইজারা পত্রে এই নিয়ম লিখিত হয়, যে ইজারার খাজানা যে পরিমাণ বাকী পড়িবেক, সেই পরিমাণ টাকা তাঁহার মোশাহেরা হইতে কর্তন করিয়া লওয়া যাইবেক। কমিটি নদীয়া জমীদারী এইরূপে বন্দোবস্ত করিয়া, কাশিমবাজারে প্রস্থান করেন, এবং তথায় অবস্থিতি পূৰ্ব্বক রাজসাহী প্রভৃতি আর

* Hunter's Annals of Rural Bengal pp. 387, 385.

আর প্রদেশের জমীদারী বন্দোবস্ত করিতে প্রবৃত্ত হন । ঐ সকল প্রদেশের জমীদারেরা কমিটীর মনোমত রাজস্ব প্রদানে সম্মত হইয়া আপন আপন জমীদারী বন্দোবস্ত করিয়া লন * । এই ইজারার মেয়াদ গত হইলে, ১৭৭৭ খৃঃ অব্দ হইতে, বৎসর বৎসর নূতন ইজারা বন্দোবস্ত হইতে লাগিল ।

সপ্তদশ অধ্যায় ।

১৭৮০ খৃঃ অব্দে, (বাঃ ১১৮৭ অব্দ) রাজা, তৎকালীন গবর্নর জেনেরেল ওয়ারণ হের্টিংস সাহেবের নিকট আবেদন পূর্বক তাঁহার এক জন সভাসদ ও এক জন মুন্শিকে রাজ-বাটী লইয়া আসিলেন, এবং তাঁহাদের সমক্ষে বঙ্গভাষায় এক দান পত্র ও পারস্য ভাষায় এক তফবিজ নামা লেখাইয়া, তাহাতে ঐ সভাসদ সাহেবের ও মুন্শির স্বাক্ষর ও মোহর করিয়া লইলেন । বঙ্গ ভাষায় লিখিত ঐ দান পত্রের অবিকল প্রতিলিপি নিম্নে লেখা বাইতেছে ।

বাজপেয়ী শ্রীমন্মহারাজা
রাজজি কৃষ্ণচন্দ্র বাহাদুর

প্রাণাধিক প্রিয়তম বাজপেয়ী শ্রীযুক্ত শিবচন্দ্র রায়

পরম কল্যাণাম্পদেয় ।

আমার বয়ঃক্রম যে হইয়াছে তাহাতে এখন সদর মফস্বল

* Hunter's " Annals of Rural Bengal pp. 287, 390.

মল্লিকি কোন বিষয় মামলত যে আমি করি তাহার সময় নহে । পারলৌকিক যে যে ব্যাপার তাহাই আমার কর্তব্য একারণ আপনি স্বচ্ছরূপে মন্তকল মেজাজে এই স্থির করিলাম পুরুষ ক্রমে আপনারদিগের রাজ্য কখন হিসসা হয় নাহি অতএব উখড়া ওগয়রহ আমার সমস্ত জমীদারী ও ঝালরদার পালগা ও নওবৎ প্রভৃতি হুজুরের এনায়তি মরাতব ও ফরমান সাবেক ও দরি যে আছে দরবস্ত আপন খুশি ও রাজি রগবতে তোমাকে সমস্ত লিখিয়া দিলাম। শ্রীশ্রী দেবসেবা প্রভৃতি ও জমীদারী লওয়া জমা খরচ আখরাজাত ও নফা নোকসান সমস্ত তোমারই ; তোমার ভাতা ও ভাতুষ্পুত্রদিগের সহিত এলাকা নাহি প্রাণাধিক প্রিয়তম বাজপেয়ী শ্রীযুক্ত শম্ভুচন্দ্র দেবের পোষ্য অধিক এ কারণ আমার মোশাহেরা সরকারে যে পাওনা আছে তাহার মধ্যে সালিয়ানা পনের হাজার তাঁহার ও প্রাণাধিক প্রিয়তম বাজপেয়ী শ্রীযুক্ত মহেশদেবের দশ হাজার ও প্রাণাধিক প্রিয়তম বাজপেয়ী শ্রীযুক্ত দীপানচন্দ্র দেবের দশ হাজার ও ভৈরবচন্দ্র দেবের পুষ্যপুত্র প্রাণাধিক প্রিয়তম বাজপেয়ী শ্রীযুক্ত মাধবচন্দ্র দেবের আড়াই হাজার ও হরচন্দ্র দেবের পুষ্যপুত্র প্রাণাধিক প্রিয়তম বাজপেয়ী শ্রীযুক্ত যজ্ঞচন্দ্র দেবের আড়াই হাজার একুনে এই চল্লিশ হাজার টাকা এহাদিগের খরচের নিমিত্ত মোকরর করিয়া দিলাম । এই নিয়ম যে করিলাম ইহার উল্লঙ্ঘন তাঁহারা এবং তুমি কেহ কখন করিবে না, যদি কেহ কখন এ নিয়মের অন্যমত আচরণে উদ্যত হও, তবে লোকত ধর্ম্মত এবং হাকিমানের নিকট সে নামঞ্জুর ইতি সন ১১৮৭ শাল এগার শত সাতাশী শাল তারিখ ৯ জ্যৈষ্ঠস্য ।

এইরূপে দান পত্র লিখিয়া দিয়া, ১৭৮১খঃ অব্দে, রাজা

শিবচন্দ্রের নামে জমীদারীর রাজসনন্দ প্রাপ্তির উদ্যোগ করিতে প্রবৃত্ত হইলেন। ওয়ারণ হের্টিংস সাহেবের কর্তৃত্ব কালে, এই সকল ব্যাপার নির্বাহ বিষয়ে তাঁহার প্রধান কর্মসচিব বিখ্যাত গঙ্গাগোবিন্দ সিংহের প্রভূত ক্ষমতা ছিল। একারণ তাঁহার প্রসন্নতা লাভের জন্য, রাজা বহুতর যত্ন করেন। এরূপও প্রবাদ আছে যে গঙ্গাগোবিন্দের সম্ভোষার্থ তদীয় মাতৃশ্রাদ্ধের নিমন্ত্রণ রক্ষার নিমিত্ত, কৃষ্ণচন্দ্র স্বীয় জ্যেষ্ঠ পুত্র কুমার শিবচন্দ্রকে পাঠাইয়াছিলেন। ঐ শ্রাদ্ধে, যার পর নাই, সমারোহ হইয়াছিল। শিবচন্দ্র সভাস্থ হইয়া সাতিশর ওৎসুক্য-সহকারে কহিলেন “ঠিক যেন দক্ষ যজ্ঞ হইয়াছে।” গঙ্গাগোবিন্দ উত্তর করিলেন “তাহারও অধিক, কারণ সে যজ্ঞে শিবের আগমন হয় নাই।” কৃষ্ণচন্দ্র গঙ্গাগোবিন্দকে সম্ভ্রষ্ট করিতে যত্নের ক্রটি করেন নাই, কিন্তু তাঁহার অভীষ্ট সিদ্ধির এক বিশেষ বিঘ্ন উপস্থিত হইয়াছিল। রাজবাটীতে প্রথিত আছে, পিতার অবাধ্য কুমার শম্ভুচন্দ্র এইরূপ মনে করিয়াছিলেন যে, পৈতৃক জমীদারীর এক অর্দ্ধাংশ বৈমাত্র ভ্রাতারা পাইবেন, অপরাধাংশ তিনি পাইবেন। এই সঙ্কল্প সাধনার্থ রাজ-পুরুষদিগের সহায়তা লাভের নিমিত্ত নানাপ্রকার চেষ্টা করেন। তৎকালে অর্থব্যয় স্বীকার করিতে পারিলে, প্রায় কোন বিষয়-কার্যই সাধন করা অসাধ্য হইত না। একারণ, কৃষ্ণচন্দ্র এই দানপুত্র লিখিয়া দিবার পূর্বে, পুত্রদিগের মধ্যে তারি বিবাদ বিসংবাদ ঘটনা নিরাকরণের অভিপ্রায়ে, জমীদারীর দশাংশ শিবচন্দ্রকে, ও বষ্ঠাংশ শম্ভুচন্দ্রকে দেওয়া স্থির করেন; এবং শম্ভুচন্দ্রও তাহাতে সম্মত হন। এইরূপ বিভাগ বশতঃ অন্য রাজকুমারেরা জমীদারীতে এক কালে নিঃস্বত্ব

হইলেন দেখিয়া, ঐ বিষয়টি নিবারণার্থ মন্ত্ৰণা করিতে লাগিলেন। অনন্তর, তাঁহাদের মধ্যে, এক সূচতুর রাজকুমার এক দিবস প্রাতঃকালে শম্ভুচন্দ্রকে ছয় আনির জমীদার বলিয়া সম্বোধন করিলেন। ঈদৃশ সম্বোধনের তাৎপর্য্য কি জিজ্ঞাসিত হইলে, উত্তর করিলেন “যিনি দশ আনা রকম জমীদারী পাইলেন, তিনিই রাজপদ পাইলেন; সুতরাং আপনাকে ছয় আনার জমীদার বই আর কি বলিয়া সম্ভাষণ করিব।” এই চাতুর্য্যগর্ভ বচন শ্রবণে, অহঙ্কৃত শম্ভুচন্দ্রের হৃদয় ক্ষেত্রে ঈর্ষ্যা ও ক্রোধানল এক কালে প্রাজ্জ্বলিত হইয়া উঠিল। তিনি প্রতিজ্ঞা করিলেন “যেদ্রুপে ছয় অর্দ্ধেক রাজ্য লইব। ইহাতে ছয় মন্ত্ৰের সাধন কিংবা শরীর পতন হইবেক।” রাজা তাঁহার প্রতিজ্ঞার কথা শুনিয়া বৎপরোনাস্তি ক্ষুব্ধ ও অপ্রীত হইলেন, এবং অনেক চিন্তা করিয়া ঐ দানপত্রের উদ্ভাবন করিলেন।

দানপত্র লেখা হইলে পর, শম্ভুচন্দ্র, যদি জমীদারীর সনন্দ শিবচন্দ্রের নামে হয়, তবে আপনার আশা ভরসার এককালে মূলচ্ছেদ হইয়া যায়, এইরূপ চিন্তা করিয়া গঙ্গাগোবিন্দ সিংহের শরণাগত হইলেন, ; এবং তাঁহাকে যথেষ্ট অর্থলোভ প্রদর্শন দ্বারা আপন নামে সনন্দ পাইবার একান্ত চেষ্টা করিতে প্রবৃত্ত হইলেন। গঙ্গাগোবিন্দ, রাজার অতীষ্ট পূরণ করেন, কি আপন ইচ্ছা সাধন করেন, ইহার সহসা কিছুই স্থির করিতে না পারিয়া কালহরণ করিতে লাগিলেন। রাজবাটীতে প্রবাদ আছে এই সময়ে রাজা গঙ্গাগোবিন্দ সিংহকে যে এক পত্র লেখেন, তাহাতে স্বহস্তে এই কয়েকটি কথা লিখিয়াছিলেন যে, “পুত্র অবাধ্য, দরবার অসাম্য, যা করেন গঙ্গাগোবিন্দ”। অনন্তর রাজার দেওয়ান কালীপ্রসাদ সিংহ, গঙ্গাগোবিন্দের

কপট ব্যবহারে অতিশয় বিরক্ত হইয়া রাজাকে এক পত্র লিখেন। এই পত্রে গঙ্গাগোবিন্দ সিংহের অনেক নিন্দার কথা আছে, এই সন্ধান পাইয়া, শম্ভুচন্দ্র, পশ্চিমধ্যে পত্রবাহকের নিকট হইতে পত্র হরণ পূর্বক, গঙ্গাগোবিন্দ সিংহকে দেখান। পত্র দেখিবামাত্র সিংহের ক্রোধানল প্রদীপ্ত হইয়া উঠে, এবং তিনি রাজার বিপক্ষতাচরণে রূতসঙ্কল্প হন। পরদিন, হেক্টিংস সাহেব ধর্ম্মাসনে আসীন হইবামাত্র, এই রাজার সনন্দের বিষয় উত্থাপন করেন, এবং শিবচন্দ্র বিষয় কার্য্যে নিতান্ত অপটু, শম্ভুচন্দ্র কার্য্যদক্ষ ও বিচক্ষণ, রাজা কেবল পক্ষপাতিতার বশবর্ত্তী হইয়া, প্রথমোক্ত কুমারকে সমস্ত জমীদারী দিবার প্রার্থনা করিতেছেন, এইরূপ অনেক আরোপিত বাক্য বিন্যাস পূর্বক রাজার প্রার্থনা বিফল করিবার বিশেষ যত্ন পান। মন্ত্ৰি-পরতন্ত্র বিচারপতি, এই কপট বচনে প্রতারিত হইয়া, শম্ভুচন্দ্রের নামে সনন্দ দিবার আদেশ দিলেন।

দেওয়ান কালীপ্রসাদ এই বিষয়ের বিন্দু বিসর্গ কিছুই অবগত ছিলেন না। যেমন প্রত্যহ গঙ্গাগোবিন্দ সিংহের নিকট যাইতেন, সে দিবসও তেমনি গেলেন। গঙ্গাগোবিন্দ সক্রোধে সেই পত্রের প্রসঙ্গ করত, তাঁহাকে নানা প্রকার কটুকাটব্য বলিয়া গর্কিতভাবে গবর্ণর জেনেরেলের আজ্ঞা ব্যক্ত করিলেন। দেওয়ান নিরতিশয় অবমানিত ও বিষাদিত হইয়া, প্রভুসমীপে আগমন পূর্বক, সমস্ত রূতাস্ত্র নিবেদন করিলেন। রাজা শুনিয়া ষারপরনাই, ক্ষুব্ধ হইলেন, এবং মন্ত্ৰিবর্গের সহিত ইহার প্রতি-বিধানের পরামর্শ করিতে লাগিলেন। অনেক বিবেচনার পর, তৎকালে কলিকাতা ও হুগলির বাজারে যত বহুমূল্য মুক্তা পাওয়া সম্ভব, তাহা সংগ্রহ করিয়া একছড়া মালা প্রস্তুত করাইলেন। পর-

দিন প্রভাতে হেফ্টিংস সাহেব বায়ু সেবনার্থ নির্গত হইলে, কালী-প্রসাদ মণিকারের বেশে হেফ্টিংস সাহেবের ভবনে উপনীত হইলেন, এবং সাহেবের সহধর্মিণীকে ঐ মুক্তাহার দেখাইলেন । হেফ্টিংসপত্নী এই অপূর্ব মালা সন্দর্শনে মোহিত হইয়া, উহার মূল্য কি জিজ্ঞাসা করিলেন । ছদ্মবেশী মণিকার বলিলেন “মূল্য জানিবার জন্য এত ব্যগ্র হইতেছেন কেন ? কিরূপ শোভা হয় একবার গলায় পরিয়া দেখুন ।” এই কথা শুনিয়া তিনি ব্যস্ত সমস্ত হইয়া ঐ মালা গলায় পরিলেন, এবং অনিমিষ লোচনে উহার শোভা দেখিতে লাগিলেন । মণিকার সুযোগ পাইয়া “কি সুন্দর দেখাইতেছে, যেন সোণায় সোহাগা হইয়াছে । যেমন সুন্দর আকৃতি, মালা ছড়াটি তাহার উপযুক্ত হইয়াছে ।” এইরূপ স্ত্রীজাতির মনোরঞ্জন কথা কহিতে আরম্ভ করিলেন । তদনন্তর, হেফ্টিংসমহিলা পুনরায় মূল্যের কথা জিজ্ঞাসা করিলে, কালীপ্রসাদ বিনীতভাবে কহিলেন “ইহার অনেক মূল্য, তবে আপনাকে চল্লিশ হাজার টাকায় এ মালা গাছটি বিক্রয় করিতে পারি ।” মেম সাহেব, দীর্ঘ নিশ্বাস পরিত্যাগ পূর্বক, মালাগাছটি প্রত্যর্পণ করিতে উদ্যত হইয়া কহিলেন যে “আমার স্বামী এত অধিক টাকা দিবেন না ।” মুক্তার মালায় ঐ কামিনীর মন হরণ করিয়াছে, তাঁহার কথায় ও ভাব ভঙ্গীতে এইটি বিলক্ষণ বুঝিতে পারিয়া, কালীপ্রসাদ রুতাঞ্জলিপুটে নিবেদন করিলেন, “মালা কণ্ঠ দেশ হইতে মোচন করিবেন না, আপনাকে আমি এ হার উপহার দিতে আসিয়াছি” ইহা বলিয়া আপনার পরিচয় প্রদান, এবং বক্তব্য বিষয়ের আদ্যোপান্ত সমস্ত বর্ণন করিয়া অশ্রুপূর্ণ নয়নে ও কাতর বচনে আবেদন করিলেন “আপনার স্বামী, তদীয় মন্ত্রী গঙ্গাগোবিন্দ সিংহের আরোপিত বাক্যে

প্রতারিত হইয়া, এই অন্যায্য করিয়াছেন। এক্ষণে আপনার অনুগ্রহ ব্যতীত মহারাজার উপায়ান্তর নাই।” হেষ্টিংসমহিলা, ইহা শ্রবণ করিয়া, তাঁহাকে আশ্বাস প্রদান করিলেন, এবং হেষ্টিংস সাহেব গৃহাগত হইলে, তাঁহাকে, গঙ্গাগোবিন্দ সিংহের প্রতারণার আমূল বৃত্তান্ত অবগত করিয়া, রাজার প্রার্থনা সিদ্ধির নিমিত্ত বিশেষ অনুরোধ করিতে লাগিলেন। সাহেব, অনেক তর্কবিতর্কের পর, পত্নীর নির্বন্ধ উল্লঙ্ঘনে অসমর্থ হইয়া, রাজার প্রার্থনা সিদ্ধ করিতে সম্মত হইলেন। অনন্তর, অনতিবিলম্বে সনন্দ লিখিত হইয়া সাহেবের স্বাক্ষরিত হইল।

জমীদারীর সনন্দ হওয়ার অব্যবহিত পরে, রাজেন্দ্র বাহাদুর, নবাব ও গবর্ণর জেনেরেলের দ্বারা, শিবচন্দ্রকে মহারাজাধিরাজ উপাধি দেওয়াইলেন। তদনন্তর, বহু সমারোহ পূর্বক তাঁহাকে রাজ্যাভিষিক্ত করিলেন। রাজ্যাভিষেক দিবসে যে সভা হয়, তাহাতে প্রায় এপ্রদেশের যাবতীয় রাজন্যবর্গ অথবা তাঁহাদের প্রতিনিধি এবং অধ্যাপক, ব্রাহ্মণপণ্ডিত, কুলীন, কুলজ্ঞ, ভাট প্রভৃতি সমাগত হইয়াছিলেন। শাস্ত্রবিহিত দৈবকার্য্য সমাপনান্তে, রাজা সভাস্থ হইয়া কুমারের হস্ত ধারণ পূর্বক সিংহাসনে অধিরোহিত করাইলেন। মহোদরগণের মধ্যে, এক জন ভদ্রীয় মস্তকে রাজহুত্র ধারণ করিলেন, আর দুই জন চামর ব্যজন করিতে লাগিলেন। তৎপরে, রাজা স্বয়ং শিবচন্দ্রের সম্মুখীন হইয়া রাজ-সম্ভাষণ করিলেন, তদনন্তর, সম্পর্ক বিশেষে কেহ আশীর্বাদ কেহ বা অভিবাদন করিতে লাগিলেন।

শাস্ত্রে নির্দেশ আছে, রাজারা সম্ভ্রীক রাজ্যাভিষিক্ত হইবেন। পূর্বে রাজ্যাভিষেক সময়ে, রাজমহিষী সভা মধ্যে সর্ব সমক্ষে সিংহাসনোপরি স্বামীর পার্শ্বে বসিতেন। পরে, ভারতবর্ষ যবনা-

ধিকৃত হইলে, জেতুদিগের দৃষ্টান্ত অথবা তাঁহাদের ভয়ে, মহিলাগণের লোকসমাজে আগমন এক কালে রহিত হইয়া যায়, কিন্তু শাস্ত্রোক্ত নিয়ম রক্ষার্থ, রাজ্যাভিষেক সময়ে, রাজা রাজসভায় ও রাজ্যী অব্যবহিত নিকটবর্তী গৃহে উপবেশন করিতেন, একখানি সুদীর্ঘ বস্ত্রের এক প্রান্ত রাজার অঙ্গে এবং অপর প্রান্ত মহিষীর অঙ্গে সংলগ্ন থাকিত। শিবচন্দ্রও এই প্রকারে সস্ত্রীক রাজ্যাভিষিক্ত হইরাছিলেন ।

অষ্টাদশ অধ্যায় ।

রাজেন্দ্র বাহাদুর, শেষাবস্থায় নবদ্বীপের নিকট থাকিবার মানসে ১৭৭৪ খঃ অব্দের কিঞ্চিৎ পূর্বে, কৃষ্ণনগরের দুই ক্রোশ পশ্চিমে ও নবদ্বীপের এক ক্রোশ পূর্বে অলকানন্দ নদীতীরে, এক স্থানে নানা সুরম্য প্রাসাদ প্রস্তুত করেন, এবং ঐ স্থানের নাম গঙ্গাবাস রাখেন। তথায় এক মন্দির নির্মাণ করাইয়া তন্মধ্যে হরিহর নামে এক দেবমূর্তি প্রতিষ্ঠা করেন। জ্যেষ্ঠ কুমারকে রাজপদে নিবেশিত করণানন্তর, ঐ বাটীতে আসিয়া অবস্থিত হইলেন। ছোট রাণী, ও তদীয় পুত্র কুমার শম্ভুচন্দ্র, হরধামের বাটীতে যাইয়া অবস্থান করিতে লাগিলেন। কুমার শিবচন্দ্র, অন্যান্য রাজকুমারেরা এবং আর আর রাজপরিবারবর্গ শিবনিবাসেই থাকিলেন। গঙ্গাবাসে যে সকল প্রাসাদ ছিল, সে সমস্তই ভগ্ন ও ভূমিসাৎ হইয়া গিয়াছে; থাকিবার মধ্যে কেবল হরিহরের মন্দির অদ্যাপি বর্তমান আছে। কালসহকারে অলকানন্দের গর্ত্ত মৃত্তিকাপূর্ণ হইয়াছে, ঐ নদী পূর্ব-

কালে খড়িয়া নদী হইতে নিঃসৃত হইয়া ভাগীরথীর সহিত মিলিয়াছিল। ইদানীং কেবল বর্ষাকালে ভাগীরথীর সহিত উহার দক্ষিণাংশের মিলন হইয়া থাকে।

একদা কলিকাতার শোভাবাজারের রাজা নবকৃষ্ণের সহিত কৃষ্ণচন্দ্রের বিলক্ষণ অসম্ভাব ঘটে। ষাঁহার ঐ অকৌশলের বৃত্তান্ত অজ্ঞাত আছেন, তাঁহার অবগত হইলে আমোদিত হইবেন। নবদ্বীপ-নিবাসী, বৈষ্ণব-ধর্ম-প্রবর্তক, সুবিখ্যাত চৈতন্যের ঘোষ ঠাকুর নামে কায়স্থ জাতীয় এক জন শিষ্য ছিলেন। ঐ ব্যক্তি কাঁটোয়ার তিন ক্রোশ দক্ষিণ অগ্রদ্বীপ গ্রামে গোপীনাথের বিগ্রহ প্রতিষ্ঠা করেন। তিনি চৈতন্যের সঙ্গে থাকিতেন এবং প্রগাঢ় শ্রদ্ধা ও যত্ন সহকারে তাঁহার সেবা করিতেন। এক দিন চৈতন্য আহারান্তে মুখশুদ্ধির নিমিত্ত, তাঁহার নিকট হরিতকী চাহিলে, তিনি ভিক্ষা করিয়া একটি লইয়া আইসেন, এবং তাহার অর্দ্ধেক তাঁহাকে দেন। পর দিবস ভোজনান্তে চাহিবামাত্র অপারার্দ্ধ প্রদান করেন। চৈতন্য জিজ্ঞাসিলেন “চাহিবা মাত্র তুমি কোথা হইতে কি রূপে হরিতকী আনিয়া দিলে।” ঘোষ ঠাকুর বলিলেন “যাহার একাৰ্দ্ধ কল্য আপনাকে দিয়াছিলাম, এ তাহারি অপারার্দ্ধ।” এই কথা শুনিয়া চৈতন্য কহিলেন “অদ্যাপি তোমার বিলক্ষণ সঞ্চয়ের ইচ্ছা আছে দেখিতেছি। অতএব, আমার সঙ্গ পরিত্যাগ করিয়া গৃহে প্রতিগমন কর।” এই নিদাৰ্ণ বাক্য শ্রবণে ঘোষ ঠাকুর সজলনয়নে কাতরস্বরে কহিলেন “আমি আপনাকে পুত্র অপেক্ষাও অধিক ভালবাসি; আপনার বিরহে কিরূপে জীবন ধারণ করিব।” চৈতন্য বলিলেন “আমার প্রতি তোমার যেরূপ বাৎসল্য ভাব আছে, শ্রীকৃষ্ণের মূর্তি প্রতিষ্ঠিত করিয়া সেইরূপ বাৎসল্য ভাব প্রকাশ করিও।” ঘোষ ঠাকুর,

অগত্যা, চৈতন্যের সঙ্গ ত্যাগ করিয়া গৃহে প্রত্যাবর্তন করেন । তদনন্তর, তিনি স্বীয় প্রভুর উপদেশানুরূপ এক কৃষ্ণবিগ্রহ নির্মাণ করাইয়া অগ্রদ্বীপে প্রতিষ্ঠা পূর্ব্বক তাঁহার নাম গোপীনাথ রাখেন । ঘোষ ঠাকুর গোপীনাথকে যে অপত্যনির্ব্বিশেষে স্নেহ করিতেন, গোপীনাথও তাঁহাকে সেইরূপ পিতৃতুল্য জ্ঞান করিয়া শ্রদ্ধা ভক্তি প্রদর্শন করিয়া আসিতেছেন । অদ্যাপি গোপীনাথ, প্রতিবৎসর বাকগীর পূর্ব্ব চৈত্র মাসে কৃষ্ণপক্ষীয় একাদশী তিথিতে, তাঁহার শ্রাদ্ধ করিয়া থাকেন ।

ঐ সময়, অগ্রদ্বীপে সমারোহ সহকারে একটি মেলা হইয়া থাকে, ঐ দিবস তথায় বহুলোকের সমাগম হয় ; ঐ সমস্ত লোকে গোপীনাথের পিতৃকৃত্যের আনুকূল্যার্থে অর্থ প্রদান করে । গোপীনাথ পূর্ব্ব, এই পর্ব্ব উপলক্ষে, রাশি রাশি অর্থ পাইতেন, ইদানীং লোকের আর তাদৃশ ভক্তি নাই বলিয়া লাভের অনেক ধ্বংসতা ঘটিয়াছে, কিন্তু তথাপি চারি পাঁচ শত টাকা দ্বারা প্রাপ্তি হইয়া থাকে । অদ্যাপি কলিকাতা মুরশিদাবাদ প্রভৃতি নানা স্থানের দোকানী পশারী বহুবিধ দ্রব্যজাত লইয়া আইসে । মেলা ৫।৭ দিবস থাকে । অগ্রদ্বীপের অনতিদূরবর্তী কাশীপুর বিষ্ণুতলা গ্রামে ঘোষ ঠাকুরের বাটী ছিল ; তাঁহার জাতির বংশ অদ্যাপি তথায় আছে । গোপীনাথ ঠাকুরের অধিষ্ঠান বশতঃ অগ্রদ্বীপ হিন্দুদিগের এক প্রসিদ্ধ তীর্থ স্থান বলিয়া পরিগণিত হইয়াছে ।

প্রথমে, পাটুলির জমিদারেরা অগ্রদ্বীপের ভূস্বামী ছিলেন । পূর্ব্ব উল্লিখিত হইয়াছে গোপীনাথের পিতৃশ্রাদ্ধোপলক্ষে ঐ গ্রামে প্রতিবর্ষে চৈত্র মাসে এক মেলা হইয়া থাকে, এবং নানা দেশীয় লোক তথায় সমাগত হইয়া কয়েক দিন অব-

স্থিতি করে। রাজা কৃষ্ণচন্দ্রের পিতা রাজা রঘুনাথের সময়ে, একবার ঐ মেলাতে পাঁচ ছয় জন যাত্রী হত হয়। মুরশিদাবাদের নবাব, এই সংবাদ পাইয়া, অতিশয় কোপ প্রকাশ পূর্ব্বক যাবতীয় জমীদারের উকিলদের জিজ্ঞাসা করেন “ঐ গ্রাম কাহার জমীদারী।” পাটুলির জমীদারের উকিল, নবাবের ক্রোধ তাব দর্শনে, নিরতিশয় ভীত হইলেন, এবং ঐ গ্রাম তাঁহার প্রভুর, এ বিষয় প্রকাশ পাইলে, পাছে বিষম বিপৎপাত উপস্থিত হয়, এই আশঙ্কা করিয়া সর্ব্বাণেই কহিলেন “ঐ গ্রাম আমার প্রভুর অধিকারস্থ নহে।” ঐ গ্রামের নিকট বর্দ্ধমান ও নবদ্বীপের রাজাদিগের জমীদারী থাকায়, নবাব তাঁহাদের উকিলগণকে একে একে জিজ্ঞাসা করিলেন “ঐ গ্রাম তোমার প্রভুর কি না?” প্রথমোক্ত রাজার উকিল ঐ গ্রাম তাঁহার প্রভুর জমীদারীর অন্তর্গত নহে, এ কথা স্পষ্টাঙ্গরে কহিলেন। শেবোক্ত রাজার উকিল বিলক্ষণ বুদ্ধিমান ও সূচতুর ছিলেন। তিনি দেখিলেন, গ্রামের প্রকৃত স্বামীর কর্ম্মচারী প্রভুর স্বত্ব স্বীকারে পরাঙ্মুখ হইলেন, এবং আর কেহই ঐ গ্রামের স্বত্বাধিকার স্বীকারে সাহস করিলেন না, তখন এরূপ অনপেক্ষিত ও অতর্কিতপূর্ব্ব স্মরণ পরিহার করা কোন ক্রমেই বিধেয় নয়, এই ভাবিয়া কৃতাজ্জলিপুটে নিবেদন করিলেন, “ধর্ম্মাবতার ঐ গ্রাম আমার প্রভুর অধিকারস্থ, এবং ঐ গ্রামের হত্যাকাণ্ডও সত্য। কিন্তু ঐ মেলাতে এরূপ অসাধারণ জনতা হইয়া থাকে যে, পাঁচ ছয় জন কেন দশ পনের ব্যক্তি গতাশু হইলেও অসম্ভব কাণ্ড বলিয়া বোধ হয় না। লোকের প্রাণ রক্ষার্থে যথোচিত বড় ও পরিশ্রম স্বীকার করা হয়, এবং দিবারাত্রি অতিশয় সতর্ক থাকা

যায়, এই নিমিত্তই এত অস্পষ্ট লোকের প্রাণহানি হয়। ঐ মেলাতে যেরূপ অসাধারণ জনতা হইয়া থাকে, তাহা সভাস্থ কাহারও প্রায় অবিদিত নাই।” উকিলের বাক্যাবসানে, সভাসদ-গণের মধ্যে অনেকেই কহিলেন, “ধর্ম্মাবতার, যাহা শুনিলেন তাহার কিছুই অমূলক নহে।” নবাব “আচ্ছা আমি এবারের অপরাধ মার্জ্জনা করিলাম; কিন্তু বারান্তরে এরূপ ঘটিলে সমুচিত দণ্ড বিধান করিব” এই বলিয়া নিরস্ত হইলেন।

এই অসম্ভাবিত ও অনপেক্ষিত লাভে রঘুরামের সুখের সীমা রহিল না। গ্রাম লাভে যত আত্মলাভ হউক না হউক, গোপীনাথ লাভে তাহার শত গুণ হইল। তিনি অনতিবিলম্বে অগ্রদ্বীপ অধিকার করিলেন, ও মহা সমারোহপূর্ব্বক ঠাকুরের পূজা দিলেন। কিয়ৎকাল পরে ঠাকুরের সেবার্থে কুষ্টিয়া প্রভৃতি কতিপয় গ্রাম নির্দিষ্ট করিয়া দিলেন, এবং কুষ্টিয়া গ্রামের নাম গোপীনাথবাস রাখিলেন। এই কালাবধি গোপীনাথ নবদ্বীপের রাজার ঠাকুর বলিয়া প্রসিদ্ধ হইলেন।

কৃষ্ণচন্দ্রের বৃদ্ধাবস্থায় রাজা নবকৃষ্ণ ঐ ঠাকুর হরণপূর্ব্বক নৌকা যোগে আপন নিবাস স্থান কলিকাতায় লইয়া যান। নবকৃষ্ণ তৎকালে প্রভূত-প্রভাবশালী ছিলেন, সুতরাং কৃষ্ণচন্দ্র, এই অত্যাচারের অপর কোন প্রতিবিধানে প্রবৃত্ত না হইয়া গবর্ণর জেনেরেলের সমীপে অভিযোগ করিলেন। নবকৃষ্ণ, গোপীনাথ কৃষ্ণচন্দ্রের প্রতিষ্ঠিত বিগ্রহ নয়, এক উদাসীনের স্থাপিত, উহাতে রাজার কোন স্বত্ব নাই, ইত্যাদি নানা কারণ দর্শাইয়া কৃষ্ণচন্দ্রকে নিরাশ করিবার যত্ন করিলেন। গবর্ণর জেনেরেল, বিনা পক্ষপাতে উভয় পক্ষের প্রদর্শিত সমস্ত কারণ প্রণিধান করিয়া নবকৃষ্ণকে ঐ বিগ্রহ প্রত্যর্পণ করিতে আদেশ

দিলেন। নবকৃষ্ণ বিচারে পরাজিত হইয়া এক অপূর্ণ কৌশল অবলম্বন করিলেন। তিনি স্থনিপুণ কোন ভাস্করের দ্বারা এরূপ একটি অভিনব মূর্তি নির্মাণ করাইলেন যে, ঐ বিগ্রহের সহিত অকৃত্রিম গোপীনাথের আকারগত কিছুমাত্র বৈলক্ষণ্য রহিল না। রাজা এই চাতুরির সংবাদ শ্রবণে যৎপরোনাস্তি ক্ষুব্ধ ও বিস্ময়াবিষ্ট হইলেন, এবং অতীব ব্যথিত হৃদয়ে ভাবিতে লাগিলেন যে, আমার এত যত্ন ও এত পরিশ্রম বিফল হইল, বুঝিলাম গোপীনাথ আমার উপর নিতান্ত অপ্রসন্ন হইয়াছেন। রাজাকে এই রূপ বিবরণ দেখিয়া, ঠাকুরের পরিচারক সমীপস্থ হইয়া কহিল, মহারাজ আপনি কিছুমাত্র ক্ষোভ ও চিন্তা করিবেন না। আমার চিরসেবিত ঠাকুর আমি অবশ্যই চিনিয়া লইতে পারিব, এই বলিয়া কতিপয় রাজকর্মচারীকে সমভিব্যাহারে লইয়া, নবকৃষ্ণের আলয়াভিমুখে যাত্রা করিল। উপনীত হইয়া দেখিল একাসনে অভিন্ন দুই বিগ্রহ সমাসীন আছেন। পরিচারক প্রথমে বিগ্রহদ্বয়ের আকারের কিছুমাত্র বৈলক্ষণ্য অনুভব করিতে না পারিয়া অতিশয় কুণ্ঠিত-চিত্ত হইল। পরে, বিশেষ মনোনিবেশ পূর্বক নিরীক্ষণ করিয়া আপনার ঠাকুর চিনিতে পারিল। ইতিপূর্বে, কাহার ভাগ্যে কি ঘটে জানিতে নাপারায় উভয় পক্ষই যৎপরোনাস্তি উৎকণ্ঠিত ছিলেন, এক্ষণে এক পক্ষ অতীব ক্ষুব্ধ ও লজ্জিত হইয়া, অশ্রু-পূর্ণ-লোচনে অনুতাপ ও বিলাপ করিতে লাগিলেন, পক্ষান্তর আনন্দ সাগরে মগ্ন হইয়া হরি হরি ধ্বনি করত স্বস্থানে প্রস্থান করিলেন। রাজা নবকৃষ্ণ যে সকল বহুমূল্যে অভরণ ঠাকুরকে দিয়াছিলেন তাহা অদ্যাপি ঠাকুরের অঙ্গে আছে।

উনবিংশ অধ্যায়।

কৃষ্ণচন্দ্র ১১৮৯ অব্দের ২২ আষাঢ় (খৃঃ ১৭৮২ অব্দে) ৭৩ বৎসর বয়সে মানব লীলা সম্বরণ করেন। তাঁহার শরীর সুগঠিত ও গৌরবর্ণ ছিল। তিনি যেরূপ বুদ্ধিমান, বিচক্ষণ ও কার্যদক্ষ, তেমনিই দয়াশীল, ন্যায়বান্ এবং স্বধর্ম্মানুরত ছিলেন। যদিও তাঁহার কোন শাস্ত্রে বিশেষ অধিকার ও পারদর্শিতা ছিল না, কিন্তু সর্ব্বশাস্ত্রেই দৃষ্টি ছিল। শাস্ত্র-বিদ্যা ও অর্থ-চালনায়ও তিনি বিলক্ষণ নিপুণ ছিলেন। যখনদিগের রাজত্ব কালে কি ইঙ্গরেজদের সময়ে, যৌবনাবস্থায় কি বৃদ্ধ দশায়, সকল সময়ে ও সকল অবস্থাতে বহু সঙ্কট-সঙ্কুল ব্যাপারে ব্যাপৃত হইয়াছিলেন, কিন্তু তাঁহার উন্নত মন কখনই এককালে অবনত হয় নাই। চিন্তা ও উৎকণ্ঠা সত্ত্বেও তিনি সর্ব্বদা শাস্ত্রালোচনায় ও আমোদ প্রমোদে কালযাপন করিতেন। তাঁহার গুণিগণ-সমাগম-স্পৃহা যেমন বলবতী ছিল, তিনি তেমনিই তাহা চরিতার্থ করিতে সমর্থ হইয়াছিলেন। তাঁহার সময়ে এ প্রদেশে বিবিধ বিদ্যা-বিশারদ বহু ব্যক্তি প্রাদুর্ভূত হইয়াছিলেন। ঐ সময়ে নবদ্বীপে ন্যায়শাস্ত্র-ব্যবসায়ী হরিরাম তর্কসিদ্ধান্ত, কৃষ্ণানন্দ বাচস্পতি, রামগোপাল সার্ক-ভৌম, প্রাণনাথ ন্যায়পঞ্চানন; ধর্ম্মশাস্ত্রব্যবসায়ী গোপাল ন্যায়ালঙ্কার, রামানন্দ বাচস্পতি, বীরেশ্বর ন্যায়পঞ্চানন; ষড়্-দর্শনবেত্তা শিবরাম বাচস্পতি, রমাবল্লভ বিদ্যাবাগীশ, কদ্র-রাম তর্কবাগীশ, শরণ তর্কালঙ্কার, মধুসূদন ন্যায়ালঙ্কার, কান্ত বিদ্যালঙ্কার, শঙ্কর তর্কবাগীশ; গুপ্তিপাড়াগ্রামে প্রসিদ্ধ কবি বাণেশ্বর বিদ্যালঙ্কার, ত্রিবেণীতে জগন্নাথ তর্কপঞ্চানন, শান্তি-

পুরে রাধামোহন গোস্বামী ভট্টাচার্য্য প্রভৃতি পণ্ডিতগণ বিরাজ-
মান ছিলেন। ইহাদের মধ্যে কেহ কেহ নিয়ত রাজসন্নিধানে
থাকিতেন, অপর পণ্ডিতগণ রাজার আহ্বান মতে উপস্থিত
হইতেন। রাজা তাঁহাদিগকে বহু যত্ন ও সমাদর সহকারে
রাখিয়া, তাঁহাদের সহিত শাস্ত্র আলাপ করিতেন। তাঁহার
সভা নানাজাতি সুগন্ধ-সুন্দর-কুসুম-সুশোভিত উদ্যানের ন্যায়,
বিবিধ-গুণ-সম্পন্ন বুধগণে শোভমানা ছিল। নানাदिदेशीय
পণ্ডিতগণ সভায় সমাগত হইয়া নানা শাস্ত্রের আলাপ ও
বিচার করিয়া সাতিশয় সন্তোষ লাভ করিতেন। বাণেশ্বর
বিদ্যালঙ্কার প্রায় নিরন্তর রাজসদনে থাকিতেন; তিনি মধ্যে
মধ্যে রাজার প্রসঙ্গানুসারে বিবিধ ভাবের অতীব সুললিত ও
শ্রবণ-মধুর কবিতাচয় রচনা করিয়া সকলের মনোরঞ্জন করিতেন।
তাঁহার দ্রুতকবিত্ব শক্তিও অতি চমৎকার ছিল। একদা কৃষ্ণ-
চন্দ্র কতিপয় সভাসদ সমভিব্যাহারে নৌকারোহণে কলিকাতায়
যাইতেছিলেন। ত্রিবেণী অতিক্রম করিয়া, রাজা পারিষদগণকে
জিজ্ঞাসা করিলেন, “এ স্থানে ভাগীরথীর মন্দগতি কেন?”
অপর পণ্ডিতগণ এক এক ভাবের কবিতা রচনা করিয়া এই
প্রশ্নের উত্তর করিলেন, কিন্তু সে সকল কবিতায় রাজার প্রশ্নের
প্রকৃত উত্তর হইল না। বাণেশ্বর এই কবিতা রচনা করিলেন
যথা:—

সাগরসমুত্তিসমুত্তরণেচ্ছয়া প্রচলিতাতিজবেন হিষালয়াৎ ।

ইহ হি মন্দমুপৈতি সরস্বতী-যমুনায়া বিরহাদিব জাহুবী ॥

অর্থাৎ সাগর সমুত্তি উদ্ধারার্থ হিমালয়-নির্গতা বেগবতী গঙ্গা যেন
সরস্বতী ও যমুনা সখীদ্বয়ের বিরহ হেতু এই স্থানে মন্দগতি

হইয়াছেন । একদা রাজা বাণেশ্বরকে কহিলেন “কিমদ্ভুতম্” বিদ্যা-
লঙ্কার তৎক্ষণাৎ এই কবিতা দ্বারা প্রশ্নের উত্তর করিলেন যে

শিবস্ত নিন্দয়া তু যাত্যজদ্ বপুঃ স্বকীয়কম্ ।

তদজ্জ্বপঙ্কজদ্বয়ং শবে শিবে কিমদ্ভুতম্ ॥

অর্থাৎ যিনি শিবের নিন্দাবাদশ্রবণে স্বীয় শরীর পারিত্যাগ
করিয়াছিলেন, তাঁহার পাদপদ্মদ্বয় শিবের উপরে স্থাপিত হই-
য়াছে, ইহা অপেক্ষা আর অদ্ভুত কি ? বাণেশ্বরের এইরূপ অনেক
কবিতা আছে, কিন্তু গ্রন্থ বাহুল্য ভয়ে এই দুইটি মাত্র লিখিয়া
ক্ষান্ত হইলাম ।

বঙ্গভাষার কবিকুলচূড়ামণি ভারতচন্দ্র রায় গুণাকর রাজ-
সভার এক অপূৰ্ণ রত্ন ছিলেন । তিনি ১৬৩৪ শকে জন্ম
গ্রহণ করেন । তাঁহার পিতা নরেন্দ্রনারায়ণ বর্দ্ধমান প্রদেশের
ভুরমুট পরগণার অন্তর্ভুক্ত পেঁড়ো গ্রামে বাস করিতেন এবং
সম্ভ্রান্ত ভূম্যধিকারী ও সঙ্গতিশালী ছিলেন । বর্দ্ধমানের রাজা
কীর্তিচন্দ্র বাহাদুরের সহিত বিবাদ ঘটতে তিনি সর্বস্বান্ত হন ।
ভারত কিয়ৎকাল মাতুলালয়ে অবস্থিতিপূর্বক সংস্কৃত ব্যাকরণ
ও অভিধান পাঠ করেন । তৎপরে, ১৪ বৎসর বয়সে হুগলির
সম্মিহিত দেবানন্দপুরগ্রামে পারস্য ভাষা শিক্ষা করিতে প্রবৃত্ত
হন । পঞ্চদশ বর্ষ বয়ঃক্রমে দুই খানি সত্য নারায়ণের পুঁথি
রচনা করেন । ইহার পূর্বে তিনি আর কোন কবিতা রচনা
করিয়াছিলেন কি না জানা যায় না । যাহা হউক তিনি কিছু দিন
পরে গৃহে প্রত্যাগত হইয়া কিয়ৎকাল বিষয় কার্য্যে ব্যাপ্ত
রহেন । সে দিকে কিছু সুবিধা না দেখিয়া কটক প্রদেশে গমন
করেন, তথায় শ্রীমদ্ভাগবত পাঠ ও বৈষ্ণব ধর্ম্মের আলোচনায়

প্রবৃত্ত হন। কিছু কাল পরে উপার্জনার্থে করাসডেজায় আগমন করেন। এই স্থানে ঘটনাক্রমে রাজা কৃষ্ণচন্দ্রের সহিত তাঁহার সাক্ষাৎ হয়। গুণগ্রাহী রাজা তাঁহার গুণের পরিচয় পাইয়া তাঁহাকে সমভিব্যাহারে লইয়া আইসেন, এবং অতি যত্নপূর্ব্বক রাখেন। অনতিদীর্ঘকাল মধ্যে তাঁহার অসাধারণ কবিত্বশক্তি দেখিয়া তাঁহাকে অন্নদামঙ্গল গ্রন্থ রচনা করিতে বলেন, এবং তাঁহাকে রায় গুণাকর উপাধি দেন। কিয়ৎকালানন্তর তাঁহার প্রার্থনানুসারে তাঁহাকে মূলাজোড়গ্রাম ইজারা, ও তথায় বাসস্থানের জন্য কিয়ৎ পরিমাণ ভূমি দান করিয়াছিলেন। এই সময়ে বর্দ্ধমানাধিপতি তিলকচাঁদের জননী মহারাজীরগণ কর্তৃক নিতান্ত উৎপীড়িত হইয়া আপন পুত্র সমভিব্যাহারে মূলাজোড়ের সন্নিহিত কাউগাছি গ্রামে আসিয়া বাস করেন এবং নবদ্বীপাধিপতির নিকট আপন কর্ম্মচারী রামদেব নাগের নামে প্রথমোক্ত গ্রামের তালুকদারী পাট্টা লন। ঐ নাগ গ্রামবাসীদিগের উপর অতিশয় উৎপাত করাতে, ভারতচন্দ্র অষ্টশ্লোকাত্মক নাগাষ্টক প্রবন্ধ রচনা করিয়া রাজসমীপে প্রেরণ করেন। রাজা শ্লোক পাঠে সাতিশয় সন্তুষ্ট হইয়া নাগের বিষদস্ত ভাঙ্গিয়া দেন। ভারত চন্দ্র ১৬৮২ শকে (১৭৬০) লোকান্তর গমন করেন। তিনি যেমন স্মরসিক তেমনিই গুদ্বাচারী ছিলেন।

ভারতচন্দ্র যে সময়ে অন্নদামঙ্গল রচনা করেন, তৎকালে বঙ্গভাষার যেরূপ হীনাবস্থা ছিল, তাহাতে তিনি যে কি রূপে অমন বিশুদ্ধ ও সুমিষ্ট ভাষা বিন্যাস করিতে সমর্থ হইয়াছিলেন, তাহা ভাবিতে গেলে বিস্ময়াপন্ন হইতে হয়। তাঁহার রচনা অতি সুললিত, মধুর এবং প্রাজ্ঞ। তাঁহার কবিতা পাঠ বা

শ্রবণ করিলে যেমন অনায়াসে অর্থ বোধ হয় তেমনিই হৃদয় কন্দর আনন্দরসে প্লাবিত হইতে থাকে । গোলাব পুষ্প সন্নিহিত হইবা মাত্র যেমন সহসা দর্শন ও আশ্রয় পূর্ণ হয়, তেমনিই ভারত-চন্দ্রের অন্নদামঙ্গল পাঠে ও শ্রবণে হৃদয়ে ও শ্রুতিযুগলে তৃপ্তিসুখের সঞ্চার হয় (১) ।

এই রাজার সময়ে নবদ্বীপ অধিকার মধ্যে হালিসহর পরগণার অন্তর্গত কুমারহাট গ্রামে বৈভ্রজাতীয় রামপ্রসাদ সেন নামক এক জন বাঙ্গালা কবি প্রসিদ্ধ হইয়াছেন । তৎকালে ঐ স্থানে সংস্কৃত ভাষার বিলক্ষণ অনুশীলন ছিল । কৃষ্ণচন্দ্র ঐ কবির গুণ ও চরিত্র অবগত হইয়া যথেষ্ট অনুরাগ প্রকাশ করেন এবং তাঁহাকে রাজসভায় রাখিতে যত্ন পান ; কিন্তু রামপ্রসাদের কিছু মাত্র বিষয়ানুরাগ না থাকায় বিফল যত্ন হইল । রাজা মধ্যে মধ্যে তাঁহার অনেক আনুকূল্য করিতেন এবং তাঁহাকে কবিরঞ্জন উপাধি দিয়াছিলেন । রামপ্রসাদ কালীকীর্তন, কৃষ্ণকীর্তন, এবং বিদ্যাসুন্দর নামে তিন খানি কাব্য রচনা করেন । কেহ কেহ অনুমান করেন যে এই বিদ্যাসুন্দর অবলম্বন করিয়া ভারতচন্দ্র তদীয় বিদ্যাসুন্দর রচনা করিতে প্রবৃত্ত হইলেন ; কিন্তু রাজবাটীতে এরূপ প্রবাদের কোন প্রমাণ নাই । ভক্তিরস-পূর্ণ যে সকল সুমধুর সংগীত রামপ্রসাদী গান বলিয়া এ প্রদেশে প্রচলিত আছে, তাহা এই রামপ্রসাদের রচিত । ইনি একজন সিদ্ধপুরুষ বলিয়া প্রসিদ্ধ ছিলেন ।

১ । অন্নদামঙ্গলের কোন কোন স্থানে রাধানাথের নামে ভণিতা আছে । ঐ ভণিতা দৃষ্টে অনেকেই অনুমান করেন যে রাধানাথ ভারতেরিই নামান্তর হইবে ; কিন্তু বাস্তবিক তাহা নয় । রাজা কৃষ্ণচন্দ্রের রাশিনাম রাধানাথ ।

রাজসভায় মুক্তারাম মুখোপাধ্যায়, গোপাল ভাঁড়, এবং হাস্যার্ণব নামে তিন ব্যক্তি অসাধারণ রসিক ও পরিহাসক ছিলেন। তাঁহাদের রহস্য বাক্যে ও সরস উত্তরে, সকলেই নিরতিশয় আমোদিত হইতেন। তাঁহাদের যে দুই একটি কথা অদ্যাপি এ প্রদেশে প্রচলিত আছে, তাহা শুনিলে সকলেরিই আমোদ হয়। মুক্তারামের বাসস্থান বীরনগর। তাঁহার সহিত রাজার কোন বিশেষ সম্পর্ক ছিল না; কেবল অরসিক বলিয়া, রাজা তাঁহাকে বৈবাহিক সম্বোধন পূর্বক তাঁহার সহিত পরিহাস করিতেন। যথা, বীরনগরে কোন দুষ্ট লোকে কোঁশলে অন্য এক ব্যক্তির স্ত্রী বিক্রয় করাতে, রাজা তাঁহাকে জিজ্ঞাসেন। “মুখুয্যে তোমাদের ওখানে নাকি বউ বিক্রীত হয়।” তিনি উত্তর করেন “হাঁ মহারাজ, গত মাত্রেই।” মুক্তারাম এক দিবস মহারাজকে মাগুড় মৎস্য উপহার দেন। আহারানন্তর, রাজা তাঁহাকে কহেন, “মুখুয্যে, তুমি যাহা পাঠাইয়াছিলে, তাহার অন্ত নাই।” তিনি বলিলেন “মহারাজ, যাহার অন্ত নাই, তাহার আদিও নাই।” রাজা, এক দিন প্রত্যুষে, তাঁহাকে দেখিয়া কহেন, “মুখুয্যে, গত রাত্রে স্বপ্নে দেখিয়াছি, যেন তুমি বিষ্ঠার হ্রদে ও আমি পায়সের হ্রদে পড়িয়াছি।” তিনি উত্তর করেন, “ধর্ম্মাবতার, আমিও ঐরূপ স্বপ্ন দেখিয়াছি। কেবল বিশেষ এই, যেন হ্রদদ্বয় হইতে উত্থান করিয়া, আমরা পরস্পরের গাত্র লেহন করিতেছি।”

গোপাল ভাঁড় নরসুন্দর জাতীয় এবং শান্তিপুর নিবাসী। তাহার বংশ বিলুপ্ত হইয়াছে। এক্ষণে তাহার ভিটার অন্য এক জন ক্ষুরিজাতীয় বাস করিতেছে। এই গোপালের রহস্য-কারিতা শক্তি প্রদর্শনার্থ দুইটি বিষয় মাত্র বর্ণিত হইল। যথা, তাহার একটি পুত্র অতিক্রপবান ছিল। সে ঐ তনয়কে,

এক দিবস, রাজসম্মোপে লইয়া গেলে, রাজা কহিলেন, যে বা, এ যে রাজপুত্র দেখিতেছি। ঐ রসজ্ঞ, তৎক্ষণাৎ, পুত্রকে ক্রোড়ে লইয়া, মুখচুষ্মন পূর্ব্বক কহিল “ধন্য তুই। তোর কল্যাণে আজ আমি রাজপুত্রের বাপ হইলাম।” একদা, মুরশিদাবাদে রাজা কৃষ্ণচন্দ্র ও অন্য অন্য অনেক রাজা যখন নবাবের সভা হইতে বহির্গত হন, সেই সময় বেগমেরা গবাক্ষদ্বারদিয়া তাঁহাদিগকে দেখিতেছিলেন। গোপাল রাজার সঙ্গে ছিল, সে ঐ গবাক্ষ দিকে বারম্বার কটাক্ষ করিল। কিয়ৎক্ষণ পরে, এই বিষয় নবাবের গোচর হইলে, তিনি, অতীব ক্রোধান্বিত হইয়া, তখনই রাজা কৃষ্ণচন্দ্রের নিকট লোক পাঠাইলেন। রাজা বৃত্তান্ত শুনিবামাত্র এ নিঃসন্দেহ গোপালের কাণ্ড বুঝিতে পারিয়া অতিশয় চিন্তিত হইলেন। গোপাল জিজ্ঞাসিত হইবামাত্র নির্ভয়চিত্তে কহিল, “ধর্ম্মাবতার, এত বড় মহৎকর্ম্ম আর কাহার দ্বারা হইবার সম্ভাবনা? ঠাকুর কিছু মাত্র চিন্তিত হইবেন না” এই বলিয়া নবাব দূতের সঙ্গে যাত্রা করিল। ইতি মধ্যে, নবদ্বীপের রাজার লোক নবাব-মহিলাগণকে কটাক্ষ করিয়াছে, এবং সেই অপরাধে তাহার প্রাণদণ্ড করণার্থ তাহাকে দূতগণ লইয়া যাইতেছে, নগরের সর্ব্বত্র এই রূপ জনরব হইয়া উঠিল। সুতরাং যখন গোপালকে নবাবভবনে লইয়া যায়, তখন তৎপশ্চাতে বহুতর লোক ধাবমান হইল। অনন্তর গোপাল, নবাবনিকটে নীত হইলে, সভাস্থগণের মধ্যে যাঁহারা তাহাকে জানিতেন, এই বার ভাঁড় ভাঙ্গিল, এই মত ভাবিতে লাগিলেন। নবাব লোহিত লোচনে তাহার প্রতি দৃষ্টিপাত করিবামাত্র, সে প্রথমতঃ তাঁহাকে কয়েকবার কটাক্ষ করিল, ও তৎপরে সকলেরই প্রতি ঐ রূপ করিতে লাগিল। নবাব, তাহার

চক্ষুভঙ্গিমা স্বাভাবিক ভাবিয়া, অতিশয় লজ্জিত হইলেন, এবং ঈষৎ হাস্য করত তাকে বিদায় দিলেন।

হাস্যার্ণব বিল্লপুষ্করিণী নিবাসী ও বারেন্দ্রশ্রেণী ব্রাহ্মণ। তাঁহার অসাধারণ রহস্যকারিতা শক্তি প্রযুক্ত রাজা তাঁহাকে এই নামে বিখ্যাত করেন। তাঁহার নকল করিবার অদ্ভুত ক্ষমতা ছিল। তিনি যে ভাষা কিছুমাত্র জানিতেন না, সে ভাষায় কেহ কোন কবিতা পাঠ অথবা কথোপকথন করিলে, তিনি সেই ভাষায় এমন চমৎকার অনুরূপ করিয়া কবিতা আওড়াইতেন বা উত্তর প্রত্যুত্তর করিতেন যে, অপরিচিত ব্যক্তির যদিও তাহার অর্থগ্রহ হইত না তথাপি তিনি যে নকল করিতেছেন সহসা ইহা কোন প্রকারেই তাঁহার বোধগম্য হইত না। তিনি এরূপ আশ্চর্য্য কৃত্রিম সংস্কৃত বা অন্য কোন ভাষায় অপরিচিত পণ্ডিতগণের সহিত বিচার করিতেন যে, তৎশ্রবণে শ্রোতৃদিগের আমোদের অবধি থাকিত না।

বঙ্গদেশ মধ্যে সর্বত্র প্রসিদ্ধ আছে যে, রাজা বিক্রমাদিত্যের পর, ভারতবর্ষে স্বাধীন বা অধীন কোন রাজার সভা, রাজা কৃষ্ণচন্দ্রের সভার সদৃশ দৃষ্টিগোচর হয় নাই।

কৃষ্ণচন্দ্র আত্মীয় স্বজন এবং গুণিজ্ঞানদিগকে অকাতরে অর্থ প্রদান ও ভূমিদান করিয়াছেন। তাঁহার নাম অদ্যাপি বঙ্গরাজ্যের সর্বত্র সম্মান ও আদরের সহিত পরিগৃহীত হইয়া থাকে। তিনি অগ্নিহোত্র ও বাজপেয় নামে দুই যজ্ঞ করেন। প্রবাদ আছে যে, এই দুই যাগ সম্পাদনার্থ বিংশতিলক্ষ টাকা ব্যয়িত হয়। স্বাধীন রাজা ব্যতীত কোন জমীদার রাজা এই সকল যজ্ঞ করিয়াছেন, এরূপ শ্রুতিগোচর হয় নাই।

রাজা কৃষ্ণচন্দ্র, যত দূর বুদ্ধিমান, বিচক্ষণ ও সাহসী হউন,

স্বদেশের কোন কলুষিত ব্যবহার পরিশুদ্ধ করণে কখন হস্তক্ষেপ করেন নাই। তাঁহার সময়ে এ প্রদেশে যেরূপ সর্বশাস্ত্র-বিশারদ পণ্ডিতগণ আবির্ভূত হইয়াছিলেন, এবং তিনি যেমন শাস্ত্রজ্ঞ ও সুবিজ্ঞ বলিয়া বিখ্যাত ছিলেন, আর তৎকালীন হিন্দু-সমাজের উপর তাঁহার যে প্রকার প্রভুত্ব ছিল, তাহাতে বোধ হয়, তিনি যত্নশীল হইলে, শাস্ত্রবিরুদ্ধ ব্যবহারমূলক অনেক বিগর্হিত রীতি নিরসন, ও হিতজনক রীতি সংস্থাপনে কৃতকার্য হইতে পারিতেন। তিনি তাহা না করিয়া বরং যাহাতে ঐ পূর্ব কুরীতি বলবতী থাকে, তৎপ্রতিই সর্বদা যত্ন করিয়াছেন, এবং অন্য কোন ক্ষমতাশালী ব্যক্তি স্বদেশের কোন দূষিত ও অহিত ব্যবহার নিরাকরণে যত্নবান্ হইলে, তাঁহার চেষ্টা বিফল করিয়া দিয়াছেন। একাদশী তিথিতে দুঃখিনী বিধবাদিগের পক্ষে উপবাসের অনুকম্পা বিধান, তাহাদের অশেষ ক্লেশকর বৈধব্যযন্ত্রণা বিমোচন, অথবা সহমরণ এবং বহুবিবাহ ও বাল্যপরিণয় প্রথা অপনয়ন প্রভৃতি অত্যাবশ্যক বিষয়ে প্রবৃত্ত না হইয়া, কেবল এই তিথিতে, এই মাসে, এই বারে, এই এই দ্রব্য তক্ষণে নিষেধ ইত্যাদি যৎসামান্য বিষয়েই ব্যাপৃত থাকিতেন। বিক্রমপুর ও নবদ্বীপ প্রদেশের ভদ্র সমাজে অদ্যাপি এই প্রবাদ চলিয়া আসিতেছে যে, বিক্রমপুরবাসী প্রসিদ্ধ রাজা রাজবল্লভ, স্বীয় তরুণবয়স্কা তনয়ার বৈধব্য যন্ত্রণা দর্শনে, যৎপরোনাস্তি ব্যথিত হৃদয় হইয়া, বিধবাবিবাহ প্রচলিত করিবার বিশেষ প্রয়াস পাইয়াছিলেন। বিধবাবিবাহ শাস্ত্র বিরুদ্ধ নহে, ইহার ব্যবস্থা পূর্ব পশ্চিম প্রভৃতি নানা অঞ্চলের পণ্ডিতগণের নিকট সংগ্রহ করিয়া, নবদ্বীপস্থ পণ্ডিতদিগের ব্যবহার জন্য, রাজা কৃষ্ণচন্দ্রের সম্মিধানে কতিপয় পণ্ডিত প্রেরণ করেন। রাজবল্লভ, তৎকালে, ঢাকার নবাব ও

প্রভূত-ক্ষমতাশালী রাজপুরুষ ছিলেন। সুতরাং তিনি মনে করিয়াছিলেন “যখন অন্য অন্য অঞ্চলের পণ্ডিতদিগের নিকট অনুকূল ব্যবস্থা পাইয়াছি, তখন রাজা কৃষ্ণচন্দ্রকে অনুরোধ করিলে, অনায়াসেই নবদ্বীপস্থ পণ্ডিতগণেরও নিকট ঐ রূপ ব্যবস্থা পাইব।” তাঁহার প্রেরিত পণ্ডিতেরা রাজবাটীতে উপনীত হইলে, কৃষ্ণচন্দ্র অতীব আদরের সহিত তাঁহাদের অভ্যর্থনা করিলেন, এবং তাঁহাদের প্রভুর অভীষ্ট সাধনে যথাসাধ্য যত্ন করিতে অঙ্গীকৃত হইলেন। তদনন্তর সভাস্থ ও নবদ্বীপস্থ প্রধান প্রধান পণ্ডিতগণকে গোপনে রাজবল্লভের প্রেরিত ব্যবস্থা দেখাইলেন। তাঁহারী, ইহা পাঠ করণানন্তর, “এ ব্যবস্থা সম্পূর্ণ শাস্ত্রসম্মত” কহিলেন। ইহা শ্রবণ মাত্র কৃষ্ণচন্দ্র নিরতিশয় দীর্ঘাদঙ্কচিত্ত হইয়া বলিলেন “এ ব্যবস্থা শাস্ত্র বিরুদ্ধ না হইলেও ব্যবহার বিরুদ্ধ বলিয়া, রাজবল্লভকে নিরাশ করিতে হইবেক। এক জন বৈদ্য জাতীয় যে এই চির অপ্রচলিত ব্যবহার প্রচলিত করিয়া যাইবেন, ইহা কোন মতেই সহনীয় নহে। কিন্তু, এক্ষণে রাজবল্লভের যেরূপ প্রভাব, তাহাতে আমি তাঁহাকে, কোন মতেই, বিরক্ত করিতে পারি না। অতএব তাঁহার সন্তোষার্থ আমি আপনাদিগকে এই ব্যবস্থায় স্বাক্ষর করিবার নিমিত্ত, যৎপরোনাস্তি অনুরোধ করিব, এবং আপনারা অসম্মত হইলে, আপনাদিগের প্রতি তাড়নাও করিব। আপনারা এই কহিবেন যে, মহারাজা বা কাহারও অনুরোধে আমরা, এরূপ ব্যবস্থা দিয়া, পাপগ্রস্ত হইতে পারিবি না (১)।”

(১) মহারাজা শ্রীশচন্দ্রের মুখে শুনিয়াছি, কৃষ্ণচন্দ্র রাজবল্লভের প্রেরিত ব্যবস্থা পাঠ করিয়া বহু আক্ষেপ করিয়া কহেন, “হায় আমি কেন ইতিপূর্বে এবিষয় সাধনে স্বত্বশীল হই নাই।”

অনন্তর, পর দিবস রাজবল্লভের পণ্ডিতেরা রাজার সভাস্থ হইলে, রাজা নবদ্বীপস্থ পণ্ডিতদিগকে কহিলেন, “রাজা রাজবল্লভ যে ব্যবস্থা প্রেরণ করিয়াছেন, তাহা অবশ্যই শাস্ত্রসম্মত হইবেক । যদি শাস্ত্রসম্মত নাও হয়, তথাপি, যখন তিনি আমাকে ইহার জন্য অনুরোধ করিয়াছেন, তখন আপনাদিগকে এ ব্যবস্থায় স্বাক্ষর করিতেই হইবেক ।” পণ্ডিতেরা, রাজার পূর্ব নির্দেশানুসারে, নানা প্রকার আপত্তি উত্থাপন করিয়া, উক্ত ব্যবস্থাতে স্বাক্ষর করিতে অসম্মত হইলেন । রাজবল্লভের প্রেরিত পণ্ডিতগণ, নিরাশ হইয়া, স্বদেশে প্রত্যাগমন করিলেন । রাজবল্লভ কৃষ্ণচন্দ্রের চাতুরী বুঝিতে না পারিয়া, এই মহৎ অনুষ্ঠান সাধনে ক্ষান্ত হইলেন (১) ।

(১) এপ্রদেশে এরূপ কোঁতুকাবহ প্রবাদ আছে যে, রাজবল্লভের প্রেরিত পণ্ডিতগণের জন্য রাজবাটী হইতে যে সকল আহারীয় দ্রব্য পাঠান যায়, তৎসঙ্গে একটি মহিষশাবক প্রেরিত হয় । পণ্ডিতেরা মহিষশাবক দর্শনে, বিস্মিত হইয়া, রাজার কর্মচারীকে জিজ্ঞাসা করিলেন “এ মহিষবৎস কি নিমিত্ত ?” কর্মচারী উত্তর করিলেন “আপনাদের আহারের নিমিত্ত ।” পণ্ডিতগণ কহিলেন “আমরা ইহার মাংস ভক্ষণ করিনা ।” কর্মচারী বলিলেন “কেন ? ইহা ভোজন করিতে শাস্ত্রে তো নিষেধ নাই ।” পণ্ডিতেরা উত্তর করিলেন “হঁ। শাস্ত্রে নিষেধ নাই বটে কিন্তু এ দেশে এ মাংস ভোজনের ব্যবহার নাই ।” কর্মচারী জিজ্ঞাসিলেন “যখন শাস্ত্রসিদ্ধ স্বীকার করিয়াও ব্যবহার বিরুদ্ধ বলিয়া ইহা ভোজনে পরাঙ্মুখ হইতেছেন, তখন চির অপ্রচলিত ও দেশাচারবিরুদ্ধ বিধবাবিবাহ আপনারা কিরূপে প্রতিপন্ন করিবেন ?” পণ্ডিতগণ নিরুত্তর হইয়া থাকিলেন ।

বিংশ অধ্যায়।

রাজা কৃষ্ণচন্দ্রের লোকান্তর গমনানন্তর, রাজা শিবচন্দ্র, মেয়াদী বন্দবস্তানুসারে, জমীদারীর অধিকারী থাকেন, এবং কোম্পানির দত্ত যে দুই লক্ষ টাকা মোশাহেরা নির্দ্ধারিত ছিল, তাহা হইতে তাঁহার ভাত ও ভাতুস্পুত্রগণ, রাজেন্দ্র বাহাদুর কৃত নিয়মানুসারে, বার্ষিক চল্লিশ সহস্র টাকা পাইতেন, এবং অবশিষ্ট তিনি লইতেন। জমীদারীর উৎপন্ন হইতে রাজস্ব পরিশোধনাশ্তে কি পরিমাণ লাভ থাকিত, তাহার কোন নিদর্শন পাওয়া যায় নাই। তাঁহার সময়ে, কোন জমীদারের সহিত চিরস্থায়ী বন্দবস্ত হয় নাই। সকলেই আপন আপন জমীদারী মেয়াদী বন্দবস্ত করিয়া আপনাদের অধিকারে রাখিতেন, কিন্তু রাজস্ব বাকী পড়িলে জমীদারী নিলাম হইয়া যাইত। রাজা ভবানন্দের সময়াবধি রাজা কৃষ্ণচন্দ্রের সময় পর্য্যন্ত এই জমীদারী পুকষানুক্রমে নিয়তই বৃদ্ধি হইয়া আসিয়াছিল, রাজা শিবচন্দ্রের সময়াবধি ক্ষয় হইতে আরম্ভ হইল। রাজস্ব বাকী পড়াতে, তাঁহার কুবেজপুর পরগণা নিলাম হইয়া গেল। এই রাজা বিষয় কার্যে অপটু, বা আলস্য-পরবশ, অথবা অপরিমিতব্যয়ী ছিলেন না ; কেবল নির্দিষ্ট কাল মধ্যে দেয় রাজস্ব প্রদানে অসমর্থ হওয়াতেই, এই দুর্ঘটনা ঘটয়া ছিল। রাজবাটীতে প্রবাদ আছে, তিনি, এই পৈতৃক সম্পত্তি রক্ষা করণে অশক্ত হওয়াতে, আপনাকে পাপগ্রস্ত মনে করিয়া, অতীব শৌকাকুল হন, এবং ত্রিরাত্রি উপবাসী থাকিয়া, এই পাপের প্রায়শ্চিত্ত করেন। ১৭৮৮ খৃঃ অব্দে, উৎকট রোগাক্রান্ত হইলে, তাঁহার একমাত্র পুত্র ঈশ্বরচন্দ্রকে, স্বীয় সমস্ত সম্পত্তির উত্তরাধিকারী করিয়া, নিম্ন লিখিত দানপত্র লিখিয়া দিলেন। যথা,

প্রাণাধিক প্রিয়তম বাজপেয়ী শ্রীযুক্ত ঈশ্বরচন্দ্র রায়

পরম কল্যাণবরেন্দ্র ।

আমার অস্বাস্থ্য হইয়াছে বৈদ্যরা কহিলেন এবং আমিও
ভাবে বুঝিতেছি এ ব্যাধি হইতে মুক্ত হইব না ৷ পিতাঠাকুর
মহারাজেন্দ্র বাহাদুর অনুগ্রহ করিয়া উখড়া ওগয়রহ সমস্ত
জমীদারী এবং ঝালরদার পালকি ও নওবত প্রভৃতি হুজুরের
এনাতি মরাতব ও সাবেক ও দরি ফরমান ও আছাছা যে আছে
সমস্ত আমাকে দিয়া তোমার খুড়াদিগের ও খুড়তিত ভাতাদিগের
মোশাহেরার নিয়ম করিয়া দিয়াছিলেন আমি এ পর্য্যন্ত রাজ্য
ভোগ করিলাম তুমি আমার এক পুত্র এ সকল বিষয় তোমার
সিদ্ধই আছে তখাচ লৌকিক ব্যবহার প্রযুক্ত রাজ্য প্রভৃতি
যাহা ষঠাকুর আমাকে দিয়াছেন আমিও আপন খুশি ও রেজা-
রগবতে তোমাকে সমস্ত লিখিয়া দিলাম, শ্রীশ্রী সেবা প্রভৃতি
জমীদারী লওয়া জমা খরচ আখরাজাত ও নফা নোকমান
সমস্ত তোমারি আর কাহার সহিত এলাকা নাহি, মোশাহেরা
তো এখন কোম্পানিতে সমস্ত ক্রোক ভাবে বুঝিতেছি মোশা-
হেরা সমস্ত বহাল থাকিবেক না মোশাহেরা যাহা বহাল হয় তাহা
হইতে তোমার খুড়াদিগের ও খুড়তিত ভাতাদিগের মোশাহেরা
যাহা দিতে কোম্পানির হুকুম হয় সেই মত দিবা, জমীদারীতে
তোমার নাম লিখিয়া দিতে শ্রীযুত মে, রিটফরণ সাহেবকে কহিয়া
আসিয়াছি হুজুরে আপন নামে আপন জমীদারী লেখাইয়া সদর
মালগুজারী করিয়া পুত্র পৌত্রাদি ক্রমে পরম সুখে ভোগ করহ
ইতি সন ১১৯৫ সাল ২৯ জ্যৈষ্ঠস্য । (১)

(১) রাজবাটিতে এই দানপত্রের যে প্রতিলিপি আছে তাহার অবিকল
নকল ।

ইসাদি ।

শ্রীদুর্গানারায়ণ শৰ্ম্মণঃ	শ্রীজয়নারায়ণ শৰ্ম্মণঃ
সাং গদখালি ।	সাং হরিপুর ।
শ্রীশ্রীকৃষ্ণ নাগ	শ্রীহরহিত পাল
সাং রঘুনাথপুর ।	সাং শিবনিবাস ।
শ্রীহরিমতি পাল	শ্রীরামনাথ শৰ্ম্মণঃ
সাং বৈকুণ্ঠশড়ক ।	সাং গোয়াড়ি ।
	শ্রীশঙ্কর শৰ্ম্মণঃ
	সাং গোয়াড়ি ।

শিবচন্দ্র ১১৯৫ অব্দের আষাঢ় মাসে, (১৭৮৮ খৃঃ অদ) ৬০ বর্ষ বয়সে, লোকান্তর গমন করেন । তিনি প্রসিদ্ধ রূপবান, বিখ্যাত ধার্মিক, অতীব সুশীল, এবং পরম দয়ালু ছিলেন । সংস্কৃত, আরব্য ও পারস্য ভাষায় তাঁহার বিলক্ষণ পরিদর্শিতা ছিল । তাঁহার সহোদর ও বৈমাত্রেয় ভাতা ও ভাতৃস্পুত্রেরা সকলেই তাঁহাকে যৎপরোনাস্তি ভক্তি ও স্নেহ করিতেন । তিনি ও তাঁহার সহোদরগণ প্রভৃতি সকল রাজপরিবারেরা শিব-নিবাসে থাকিতেন, কেবল তাঁহার বৈমাত্রেয় ভাতা শম্ভুচন্দ্র হরধামের বাটীতে অবস্থান করিতেন । শিবচন্দ্র কখন কখন কৃষ্ণনগরের বাটীতেও বাস করিতেন । রাজেন্দ্র বাহাদুরের সময়ে যে সকল পণ্ডিতগণ এতদ্দেশ বিদ্যা-জ্যোতিঃ দ্বারা উজ্জ্বল করিয়াছেন, এ রাজার সময়েও, তাঁহাদের মধ্যে প্রায় সকলেই বর্তমান ছিলেন ।

একবিংশ অধ্যায়।

রাজাধিরাজ শিবচন্দ্র লোকান্তর গমন করিলে, রাজা ঈশ্বর-চন্দ্র রাজ্যাভিষিক্ত হইলেন। (১) পূর্বে উল্লেখ করা গিয়াছে, ১৭৭২ খৃঃ অব্দে, বাঙ্গালার সমস্ত জমীদারী, জমীদার বা অন্য লোকের সহিত চারিবৎসরের জন্য, ইজারা বন্দোবস্ত হয়। ঐ মেয়াদ অতীত হইলে, ১৭৮৫ খৃঃ অব্দ পর্য্যন্ত, দশ বৎসর, মেয়াদী বন্দোবস্ত হইতে থাকে। এই সকল বন্দোবস্তে কোম্পানির জমীদার, ইজারদার, অথবা রাইয়ত কাহারও মঙ্গল হয় নাই। যাঁহাদের সহিত এবার বন্দোবস্ত হইল, তাঁহাদের সহিত পুনর্বার বন্দোবস্ত হইবেক কি না, ইহার স্থিরতা না থাকাতে, জমীদারের জমীদারী বা রাইয়তের অবস্থার উন্নতি সাধনে যত্ন রহিল না, এবং রাইয়তেরাও আপন আপন জমীদারের বশবর্তী থাকিল না। সুতরাং জমীদার ও রাইয়ত উভয়েরই পরস্পরের প্রতি যে স্নেহ ছিল, তাহা তিরোহিত হইল, এবং ইহাতে উভয়েরই, যার পর নাই, দুঃবস্থা হইয়া উঠিল। জমীদার বা অপর ইজারদারগণ, রাজপুরুষদিগের আদেশ বা ইচ্ছানুযায়ী উচ্চ জমায় ইজারা লইতেন, কিন্তু রাজস্ব পরিশোধে অসমর্থ হইতেন; একারণ অনেক রাজস্ব বাকী পড়িতে লাগিল, এবং আদায়ের উপায়াভাবে, তাহা কোম্পানির রেহাই দিতে হইল। সুতরাং, কোম্পানির লাভ দূরে থাকুক, বিলক্ষণ ক্ষতি হইতে লাগিল। *

অবশেষে, অসাধারণ বিচক্ষণ ও দূরদর্শী লর্ড কর্ণওয়ালিস সাহেব, ডাইরেক্টর সাহেবদের ১৭৮৬ খৃঃ অব্দের ১২ ই এপ্রেল-

(১) ১১৫৪ বাঃ অব্দে ঈশ্বরচন্দ্র জন্ম গ্রহণ করেন।

* Hunter's Annals of Rural Bengal p 266.

লের আদেশানুসারে, বাঙ্গালার জমীদারী সকল জমীদারদিগের সম্মিত, দশ বৎসরের নিমিত্ত, বন্দোবস্ত করিলেন * এবং যদি ডিরেক্টরেরা স্বীকার করেন, তবে এই বন্দোবস্তই চিরস্থায়ী হইবেক, এইরূপ ঘোষণা করিয়া দিলেন। আর, এই বন্দোবস্ত চিরস্থায়ী হইবার জন্য, উক্ত কর্তৃপক্ষকে অনুরোধ করিলেন।† এই সাধারণ নিয়মানুসারে, রাজা ঈশ্বরচন্দ্র, নদীয়া জমীদারী বাৎ ১১৯৭ অব্দ হইতে ১২০৬ অব্দ পর্য্যন্ত, দশ বৎসর মেয়াদে, বন্দোবস্ত করিয়া লইলেন। প্রথম বৎসরে ৮৪০৬০২ টাকা, ও পর বর্ষাবধি বৎসর বৎসর কিছু কিছু বৃদ্ধি হইয়া, ১২০১ অব্দ হইতে ১২০৬ অব্দ পর্য্যন্ত, ৮৫১৫১২ টাকা জমা দিতে হইবেক, এইরূপ ধার্য্য হইল। ১৭৯৩ খৃঃ অব্দের ২২এ মার্চে, ঐ বন্দোবস্তই চিরস্থায়ী বন্দোবস্ত বলিয়া পরিগণিত হইল। প্রথমে, এই বন্দোবস্ত দশ বৎসরের নিমিত্ত হয়, একারণ ইহা দশ সালা বন্দোবস্ত নামে প্রসিদ্ধ হইয়াছে।

এই কাল পর্য্যন্ত ভারতবর্ষে হিন্দুসমাজ মধ্যে পৈতৃক সম্পত্তির যদৃচ্ছা দান করিবার রীতি না থাকাতে, হিন্দু মাত্রেই মনে এই দৃঢ় সংস্কার ছিল যে, কোন ব্যক্তি আপন পৈতৃক সম্পত্তি; স্বেচ্ছানুসারে দান করিলে, তাহা সিদ্ধ থাকিতে পারে না। একারণ কেহ সম্ভান বা অন্য উত্তরাধিকারী সত্ত্বে, পৈতৃক সম্পত্তির কোনরূপ দানপত্র করিতেন না। অধিকারী পরলোকগামী হইলে তাঁহার উত্তরাধিকারিগণ, তদীয় ত্যক্ত সম্পত্তি, শাস্ত্রের বিধানানুসারে আপনাদিগের মধ্যে বিভাগ করিয়া লইতেন। একারণ যে বৎসর, রাজা ঈশ্বরচন্দ্র জমীদারী বন্দোবস্ত

* John Marshman's History of India Vol. I. p. 467.

† Do. Do. Do. p. 473.

করিয়া লইলেন, সেই বৎসর, তাঁহার পিতৃব্য রাজা দীর্শানচন্দ্র পৈতৃক জমীদারীর অংশ পাইবার নিমিত্ত তাঁহার নামে উপযুক্ত ধর্ম্মাধিকরণে অভিযোগ করিলেন। ইহার সংক্ষিপ্ত বিবরণ এই যে, অশ্বী এই বলিয়া অভিযোগ করেন, রাজা কৃষ্ণচন্দ্রের ছয় পুত্র, তাহার মধ্যে দুই পুত্র গতান্ব হওয়াতে, এক্ষণে আমি ও উমেশচন্দ্র ও শম্ভুচন্দ্র এবং শিবচন্দ্রের পুত্র প্রত্যর্থী দীর্শর-চন্দ্র উক্ত সম্পত্তির তুল্য অধিকারী। দীর্শরচন্দ্র ধর্ম্মশাস্ত্রানুসারে অংশ চতুর্ভুজের একাংশের অধিকারী। অতএব, জমীদারীতে আমার যে একাংশের স্বত্ব আছে, আমি তাহার অধিকার পাই। প্রত্যর্থী রাজা দীর্শরচন্দ্র তাহার এই উত্তর দেন যে, প্রথমতঃ রাজা কৃষ্ণচন্দ্র নবাব মহবতজঙ্গের অনুমতি লইয়া, আমার পিতা রাজা শিবচন্দ্রকে যুবরাজ করেন, তৎপরে সম্রাট ও নবাব তাঁহাকে জমীদারীর ফরমাণ দেন ; এবং রাজা কৃষ্ণচন্দ্র, গবর্ণর জেনেরেল ও তাঁহার কোম্পলের অনুমতি লইয়া তাঁহাকে সমস্ত জমীদারী ও বংশমর্য্যাদা প্রদান করেন ; তদনন্তর, গবর্ণর জেনেরেল ও তাঁহার কোম্পল তাঁহার নামে জমীদারীর সনন্দ দেন। তিনি, যাবজ্জীবন ঐ জমীদারী ভোগ করিয়া, পরলোক গমন কালে, আমাকে দান করিয়া দিয়াছেন। জমীদারী আমার দখলে আছে, ও আমারই সহিত তাহার বন্দোবস্ত হইয়াছে। যদি পিতামহ-কৃত দান-পত্র শাস্ত্র-বহির্ভূত হইত, তবে যৎকালে, তিনি তাঁহার অন্য অন্য পুত্র ও পৌত্রদিগের নিমিত্ত মোশাহেরা নির্দিষ্ট করিয়া দিয়া, আমার পিতাকে সমস্ত জমীদারী দান করিয়া রাজ্যাভিষিক্ত করেন, তৎকালে, ইহারা অবশ্যই আপত্তি উত্থাপন করিতেন, এবং পিতার ও আমার নিকটে মোশাহেরা গ্রহণ করিতেন না।

অর্থী ঈশানচন্দ্র ইহার এই প্রত্যুত্তর দেন যে, দানপত্রের বিষয় আমরা কিছুমাত্র অবগত ছিলাম না। যখন গবর্ণর জেনেরেলের প্রেরিত সাহেব ও মুন্সী রাজবাটীতে আইসেন, তখন আমরা ভাবিয়াছিলাম, পিতা পীড়িত থাকাতে, গবর্ণর জেনেরেল, তাঁহার শারীরিক তত্ত্বাবধান করণার্থ উক্ত রাজ-পুরুষদ্বয়কে পাঠাইয়াছিলেন। জমীদারী প্রথমতঃ খামে, ও পরে ইজারা বন্দোবস্ত থাকাতে, পিতা ও ভ্রাতার সময়ে, এ অভিযোগ উপস্থিত করি নাই, এবং অপ্রতুল বশতঃ ইতিপূর্বে প্রত্যাখ্যাত সময়েও এই অভিযোগ করিতে সমর্থ হই নাই। আর, নিতান্ত অনুপায় প্রযুক্ত ইহার সময়ে মোশাহেরা লইয়াছি। বাহা ইউক, আমার এই অভিযোগ বিধিবিহিত কালের মধ্যে উত্থাপিত হইয়াছে, এবং উপরোক্ত কোন কারণে এ মোকদ্দমার হানি হইতে পারে না।

বিচারপতি এ বিষয় সম্বন্ধে এদেশের বর্ষশাস্ত্রে কি নির্দেশ আছে, তাহা জ্ঞাত হইবার জন্য, উভয় পক্ষকে কতিপয় প্রধান ও প্রসিদ্ধ পণ্ডিতের নাম লিখিয়া দিতে আদেশ করিলেন। ঈশ্বরচন্দ্র, নবদ্বীপ নিবাসী রূপারাম তর্কভূষণ, ত্রিবেণীবাসী জগন্নাথ তর্কপঞ্চানন, কলিকাতার শোভাবাজার নিবাসী হরিনারায়ণ সার্কভৌম, এই তিনজন পণ্ডিতের নাম লিখিয়া দিলেন। তাঁহাদের নিকট এই প্রশ্ন প্রেরিত হইল যে, “পুরুষানুক্রমে বিভক্ত হয় নাই বলিয়া, যদি কোন ব্যক্তি, স্বীয় পৈতৃক সম্পত্তি জ্যেষ্ঠ পুত্রকে দান করিয়া, কনিষ্ঠ পুত্রদিগের জীবিকা-নির্বাহোপায়িত্ব মোশাহেরা নির্দিষ্ট করিয়া দেন, এবং ঐ জ্যেষ্ঠপুত্র আপন যাবজ্জীবন, ঐ সম্পত্তি ভোগ করণান্তর স্বীয় পুত্রকে দান করিয়া পরলোক গমন করেন ও ঐ পুত্র তাহার অধিকারী

রহেন, এবং দাতার কনিষ্ঠ পুত্রগণ, একাল পর্য্যন্ত তাঁহাদের নিকট আপন আপন নির্দিষ্ট মোশাহেরা গ্রহণ করিয়া থাকেন, তবে এক্ষণে তাঁহারা ঐ পৈতৃক জমীদারীর অংশ পাইবার দাওয়া করিলে, তাহা শাস্ত্রসিদ্ধ হইতে পারে কি না ? (১) । পণ্ডিতগণ, রাজা কৃষ্ণচন্দ্র-কৃত দানপত্র, শাস্ত্রসম্মত এবং ঈশানচন্দ্রের দাওয়া শাস্ত্র-বহির্ভূত এই মর্মে ব্যবস্থা পাঠাইলেন, এবং তদনন্তর ধর্ম্মাধ্যক্ষদিগের আদেশানুসারে, বিচারালয়ে উপস্থিত হইয়া, দায়ভাগ প্রভৃতি অষ্ট গ্রন্থ হইতে তাহার প্রমাণ উদ্ধৃত করিয়া লিখিয়া দিলেন । ঈশানচন্দ্র, স্বনাম স্বাক্ষরিত এক বিরুদ্ধ ব্যবস্থা দর্শাইয়া, উপরোক্ত ব্যবস্থার প্রতিবাদ করিলেন । বিচারপতি এই উভয় ব্যবস্থার পরস্পরের বিরুদ্ধার্থ দর্শনে, মুরশিদাবাদ, জাহাঁগির নগর, দিনাজপুর, বারানসী এবং গয়ায় পণ্ডিতদিগের নিকট এ বিষয়ের ব্যবস্থা চাহিয়া পাঠাইলেন, এবং তাঁহাদের প্রেরিত ব্যবস্থা সমস্ত পর্যালোচনাপূর্ব্বক, প্রত্যর্থীর দাওয়া শাস্ত্র-বিরুদ্ধ স্থির করিয়া, মোকদ্দমা ডিসমিস্ করিলেন (২)

বঙ্গদেশের জমীদারীর অবস্থা এক্ষণে যে রূপে উন্নত হইয়াছে, পূর্ব্বের সেরূপ ছিল না ; তৎকালে, বিস্তর ভূমি জলমগ্ন, জঙ্গলময়, এবং পতিত থাকিত । ১৮১৯ অব্দের ৮ আইনের ন্যায়, তালুকদারের স্থানে অর্গোণে কর আদায় করিবার কোন আইন প্রচলিত না থাকাতে, জমীদারগণের সমস্ত জমীদারী

(১) পণ্ডিতগণের নিকট যে পত্র যায়, ইহা তাহার প্রতিলিপির অবিকল নকল ।

(২) পণ্ডিতগণ আপন আপন ব্যবস্থার প্রমাণার্থে যে সকল সংস্কৃত বচন উদ্ধৃত করিয়া দেন, আমি বাহুল্য হয় বলিয়া, কেবল তাঁহাদের কৃত ঐ সকল বচনের ব্যাখ্যার অবিকল প্রতিলিপি পরিশিষ্টে লিখিলাম ।

খামে রাখিতে হইত। বিস্তৃত জমিদারীর জমিদারেরা আপন আপন অধিকারের সমস্ত কার্য্য স্বচক্ষে দেখিয়া করিতে পারিতেন না; নায়েব ও তহসিলদারগণ প্রজার নিকট যে খাজানা আদায় করিত, তাহার কিয়দংশ আত্মসাৎ করিত। ইহার উপর আবার কোন কোন বৎসরে, জলপ্লাবন অনাবৃষ্টি প্রভৃতি দুর্ঘটনা নিবন্ধন শস্য অজন্মা হইলে, প্রজাগণ কর প্রদানে এক কালে অশক্ত হইত। রাজস্ব বৃদ্ধি হওয়াতে জমিদারীর, পূর্বাপেক্ষা লাভের লাঘব হইল, অথচ জমিদারগণের বংশ মর্যাদা রক্ষার্থ পূর্বমত ব্যয় হইতে লাগিল। মহাজনের সঙ্ঘা এত অল্প ছিল যে, জমিদার বা প্রজার প্রয়োজন হইলে, হঠাৎ অধিক টাকা পাওয়া যাইত না; সুতরাং, রাজস্বের অকুলান হইলে, তাহা কুলান করা দুঃসাধ্য হইত। জমিদারীর লাভ ইদানীং যে পরিমাণ হইয়াছে, সে পরিমাণ তৎকালে ছিল না, সুতরাং, কোন জমিদারী, রাজস্বের দারে নিলাম হইলে অথবা স্বেচ্ছানুসারে বিক্রয় করিতে হইলে, এক্ষণে তাহার যেরূপ মূল্য হয়, পূর্বকালে মেরূপ হইত না; একারণ কোন মহাল নিলাম হইলে তাহার যে মূল্য হইত, তাহা হইতে সেই মহালের রাজস্ব পরিশোধিত হইয়া এত অল্প টাকা উদ্ধৃত থাকিত যে, তদ্বারা অন্য কোন মহালের বাকী রাজস্ব পরিশোধ করিবার সম্ভাবনা হইত না। অথবা, দুই চারি মহালের খাজানা বাকী পড়িলে, তন্মধ্যে এক খানি মহাল বিক্রয় করিয়া, অপর মহাল সকল রক্ষা করিবার উপায় করা যাইত না। আমরা এই রাজাদিগের বিষয়সংক্রান্ত পূর্বকালীন কাগজে দেখিয়াছি যে, বাকী খাজানার নিলামে, ইহাদিগের দক্ষিণাঞ্চলের জমিদারীর অনেক মহালের মূল্য এক বৎসরের

রাজস্বের পরিমাণেরও অধিক হয় নাই। আবার গবর্ণমেন্ট জমীদারী যেমন উচ্চ জমায় বন্দোবস্ত করেন, রাজস্ব আদায়ের নিয়মও তেমনি কঠিন করিয়াছিলেন। প্রজার নিকট হইতে খাজানা না পাওয়াতেই হউক আর অন্য কোন কারণেই হউক, নির্দিষ্ট কালের মধ্যে, রাজস্ব রাজকোষে নীত না হইলেই জমীদারী নিলাম হইত। এই সকল কারণেই, বঙ্গরাজ্যের অনেক পুরাতন ভূম্যধিকারীর পৈতৃক ভূসম্পত্তির অধিকাংশ, দুই এক পুরুষের মধ্যেই হস্তান্তরিত হইয়া যায়।

পুরাতন ভূম্যধিকারিগণের জমীদারী হ্রাস হওয়ার যে সকল কারণ উপরে বর্ণিত হইল, রাজা ঈশ্বরচন্দ্রের জমীদারীর ন্যূনতা হইবার আরও কয়েক কারণ উপস্থিত হইয়াছিল। জ্ঞাতদিগের সহিত জমীদারী সংক্রান্ত যে মোকদ্দমা হয়, তাহাতে অনেক টাকা ব্যয় হইয়া যায়, এবং কয়েক বৎসর তাঁহাদের মোশাহেরা না দেওয়াতে, তাঁহারা, রাজদ্বারে অভিযোগ করিয়া, আপন আপন প্রাপ্য মোশাহেরা, সুদ ও খরচা সমেত যে ডিক্রি পান, তাহাতে এককালে অনেক টাকা দেনা হয়। আর ঈশ্বরচন্দ্র তাঁহার শেষাবস্থায়, বিষয় ব্যাপারে যথোচিত মনোযোগ না করিয়া সর্বদা আমোদ প্রমোদে কাল অতিবাহিত করিতেন। যথোপযুক্ত তত্ত্বাবধারণ অভাবে লাভের খর্ব্বতা হয়, অথচ সাংসারিক ব্যয় পূৰ্ব্বমতই হইতে থাকে। রাজস্ব পরিশোধের প্রতি যথোচিত মনোযোগ থাকিত না; যে টাকা সংগৃহীত হইত, তাহা অন্য দেনা পরিশোধে বা সাংসারিক নিত্য নৈমিত্তিক ক্রিয়াতে ব্যয় হইয়া যাইত, সুতরাং রাজস্বের দায়ে, দুই এক খানি করিয়া, পরগণা সকল নিলাম হইতে লাগিল, এবং তাঁহার জীবনের শেষাবস্থায়, এই বৃহৎ জমীদারীর অর্দ্ধেক

মাত্র রহিল। ঈশ্বরচন্দ্র তিন চারিটি পরগণা খোসকবালাতেও বিক্রয় করেন।

রাজা বিবিধ শারীরিক নিয়ম লঙ্ঘন পাপে উৎকট রোগাক্রান্ত হইয়া, শ্ববিরাবস্থা উপস্থিত না হইতেই জীর্ণ হইয়া পড়েন, এবং কয়েক বর্ষাবধি, প্রায় হতজ্ঞান হইয়া থাকেন। পরে ১২০৯ সালে, (খৃঃ ১৮০২ অব্দে) গিরীশচন্দ্র নামে এক পুত্র রাখিয়া, পঞ্চান্ন বৎসর বয়সে লোকান্তর গমন করেন। ঈশ্বরচন্দ্র যৌবনাবস্থায় অতি রূপবান্ ও বলবান্ ছিলেন। পূর্ব পুঙ্খের ন্যায় ইহাঁরও বিদ্যোন্নতির বিষয়ে যত্ন ছিল, বিশেষতঃ সঙ্গীত শাস্ত্রের সাতিশয় উৎসাহী ও অনুরাগী ছিলেন। তাঁহার উৎসাহ প্রযুক্ত কৃষ্ণনগরে ও তন্নিকটস্থ অন্য অন্য স্থানে অনেকগুলি বিখ্যাত গায়ক হইয়াছিলেন। তিনি নিজেও এক জন প্রসিদ্ধ সঙ্গীত-বিদ্যা-বিশারদ ছিলেন। এই রাজার সভাস্থ বিখ্যাত পণ্ডিতবৃন্দের মধ্যে, বিনয় বাকুপতি নামে এক জন প্রসিদ্ধ জ্যোতির্বেত্তা ছিলেন। তৎকালে তাঁহার তুল্য জ্যোতির্বিদ এ প্রদেশে আর ছিল না এবং অদ্যাপিও হয় নাই। তিনি কবিও ছিলেন। সারদামঙ্গল নামে বঙ্গ ভাষায় একখানি সঙ্গীত গ্রন্থ রচনা করেন (১)। ঈশ্বরচন্দ্র অতিশয় দুঃশীল, নির্দয় ও ইন্দ্রিয়পরায়ণ ছিলেন। রাজবাটীর লোকেরা বলেন তাঁহার পিতা রাজাধিরাজ শিবচন্দ্র, আসন্ন কালে, যৎপরোনাস্তি আক্ষেপ করিয়া কহিয়াছিলেন, “যদি আমার আর একটি অঙ্গপুত্রও থাকিত, তাহা হইলে আমি এ দুর্বৃত্তকে আমার উত্তরাধিকারী

(১) কৃষ্ণনগরের কতিপয় গোপ, তৈলকার, ও আচার্য্য ব্রাহ্মণেরা ঐ মঙ্গল গীত গাইয়া বিলক্ষণ ধন উপার্জন করিতেন, এবং শ্রোতাগণ তজ্জবনে সাতিশয় প্রীত হইতেন।

করিতাম না।” দীর্ঘরচন্দ্র এককালে শিবনিবাস পরিত্যাগ করিয়া কৃষ্ণনগরের রাজবাটিতে অবস্থিত হন। এক্ষণে এ বাটিতে বিষ্ণু-মহাল, রওনসনমহাল, বারদারী ইত্যাদি নামে যে কয়েকটি প্রাসাদ আছে তাহা তিনিই নির্মাণ করেন।

এই রাজা, কৃষ্ণনগরের পূর্ব দক্ষিণ এক ক্রোশ অন্তর, অঞ্জনা নদী তীরে, এক সুরম্য হর্ম্য প্রস্তুত করান, এবং ঐ স্থানের নাম শ্রীবন রাখেন। এই স্থান অতি রমণীয়। অঞ্জনা, যদিও ইদানীং স্থিরসলিলা হইয়া, গতিবিহীনা হইয়াছে, তথাপি তদীয় পূর্বকালীন মনোহারিণী শোভা এক কালে তিরোহিত হয় নাই। প্রায় অর্দ্ধ ক্রোশ পর্য্যন্ত, ইহার উভয় কূলে গ্রাম্য বৃক্ষ সমূহ শ্রেণীবদ্ধ থাকাতে, এরূপ অপরূপ শোভা হইয়া রহিয়াছে, যেন, কোন প্রকৃতিপ্রিয় মহাপুরুষ, স্বভাবের সৌন্দর্য্য প্রদর্শন করিবার বাসনায়, নিবিড় কানন মধ্যে এই জলাশয় প্রস্তুত করিয়া রাখিয়াছেন। প্রাচ্যে, অপরাচ্যে, অথবা রজনী কালে, এই নদীতে নৌকারোহণ করিয়া ইতস্ততঃ নয়ন সঞ্চারণ করিবারাত্র অসুস্থ হৃদয়ের সুস্থতালাভ হয়। কতিপয় বর্ষ পূর্বে আমাদিগের সুপ্রসিদ্ধ কবিবর মাইকেল মধুসূদন, এই নদীর অপূর্ব শোভা সন্দর্শনে, কহিয়াছিলেন “হে অঞ্জে, তোমাকে দর্শন করিয়া আমি অতিশয় প্রীত হইলাম, তোমাকে কখনই ভুলিব না এবং তোমার বর্ণনা করিতেও ক্রটি করিব না।” এই রাজার পূর্বপুরুষেরা, এই নদী-তটস্থ প্রাসাদের দক্ষিণদিকে যে কানন আছে তাহাতে বিবিধ সুস্বাদু ফলের বৃক্ষ রোপণ করিয়া তাহার নাম মধুপোল, এবং ঐ কাননের পূর্বাংশে যে উপবন আছে, তাহার নাম আনন্দকানন রাখেন। মধুপোলে অশোক, চম্পক, বক, কাঞ্চন, নাগকেশর, মুচুন্দ, কিংশুক, শাল্মলী ইত্যাদি পুষ্পবৃক্ষ শ্রেণীতে শোভিত

ছিল, এক্ষণে কেবল কিংশুক ও শাল্মলি বৃক্ষ মাত্র আছে ; তথাপি বসন্ত কালে, এই তরুরাজি, বিকসিত রক্তবর্ণ কুসুমাবলিতে অলঙ্কৃত হইয়া, অপূর্ব শোভা ধারণ করে । প্রায় পঞ্চবিংশ বৎসর অতীত হইল, একদা আমাদের সুবিখ্যাত কবি মদনমোহন কাব্যরত্নাকর, এই শোভা সন্দর্শনে লিখিয়াছিলেন, “জগদীশ্বর সর্বভূতকে অদ্ভুত প্রদর্শনার্থ যেন রাশীভূত সিন্দূর রক্ষা করিয়াছেন ।”

এই রাজার সময়ে, নবদ্বীপে শিবনাথ বিজ্ঞাবাচস্পতি, কালীনাথ চূড়ামণি, কৃষ্ণকান্ত বিজ্ঞাবাগীশ, রামনাথ তর্কপঞ্চানন, রামলোচন ন্যায়ভূষণ প্রভৃতি প্রসিদ্ধ নৈয়ায়িক, এবং রামনাথ তর্কসিদ্ধান্ত, রামদাস সিদ্ধান্ত, কালীকিঙ্কর বিদ্যাবাগীশ, কৃপারাম তর্কভূষণ প্রভৃতি বিখ্যাত স্মার্ত ছিলেন । ত্রিবেণী-নিবাসী সুপ্রসিদ্ধ জগন্নাথ তর্কপঞ্চানন ও শান্তিপুর-বাসী সুবিখ্যাত রাধামোহন গোস্বামী ভট্টাচার্য্য ও তদানীং বিদ্যমান ছিলেন ।

দ্বাবিংশ অধ্যায় ।

রাজা গিরীশচন্দ্র যখন বিষয়াধিকারী হন, তখন তাঁহার বয়ঃক্রম ষোড়শ বর্ষ ; সুতরাং তাঁহার সম্পত্তি-সমূহ কোর্ট অব ওয়ার্ডসের অধীনে যায় । তিনি বয়ঃপ্রাপ্ত হইলে, প্রথমে, বিষয়-কার্য্য-পর্যালোচনায় বিশেষ মনোনিবেশ করেন, কিন্তু কিয়ৎকাল পরে, কর্মচারিগণের প্রতি সমস্ত কার্য্যের ভারপর্ণ করিয়া, ধর্ম্মানুষ্ঠানে নিবিষ্টমনা হন । প্রথমতঃ নবদ্বীপস্থ গঙ্গাতীরে তৃণাচ্ছাদিত গৃহ মধ্যে ত্র্যক্ষচারীর বেশে অবস্থান পূর্বক অনেক মহাপুর-

শ্চরণ করেন । অল্পকাল পরে, কৃষ্ণনগরে ছোট বড় দুই মন্দির প্রস্তুত করাইয়া, বড় মন্দির মধ্যে এক কালী মূর্তি ও ছোট মন্দির মধ্যে এক শিব মূর্তি প্রতিষ্ঠিত করেন । কালীর নাম আনন্দময়ী ও শিবের নাম আনন্দময় রাখেন । যবনরাজত্ব কালে, তাঁহার পূৰ্ব্বপুৰুষদের আপন জমীদারী হইতে নিষ্কর ভূমি দানের যে অধিকার ছিল, তাহা ইংরেজ অধিকারে রহিত হওয়াতে, তিনি রাণীদিগের নিষ্কর ভূমির কিয়দংশ ঐ দেব দেবীর সেবার জন্য, নির্দিষ্ট করিয়া দিলেন, এবং প্রতিবৎসর ঐ দেবীর নৈমিত্তিক পূজাতে বিস্তর অর্থ ব্যয় করিতে লাগিলেন । কিয়ৎকালানন্তর, একদা অমাত্য ও সভাসদগণকে আহ্বানপূৰ্ব্বক কহিলেন “গত-রজনীতে আমি এক অমূৰ্ছ স্বপ্ন দর্শন করিয়াছি ; যেন কোন দেবতা আমাকে কহিতেছেন, ‘আমি নবদ্বীপের ভাগীরথী-তীরস্থ ভূগর্ভে অবস্থান করিতেছি, আমাকে নিজ নিকেতনে লইয়া স্থাপন কর’ ।” স্বপ্ন বৃত্তান্ত কেহ বা বিশ্বাস করিল, কেহ বা উপহাসাম্পদ মনে করিতে লাগিল । যাহা হউক রাজা অমাত্য ও কর্মচারিগণ সহিত, সুরধুনী তীরে উপনীত হইয়া, কোন এক স্থান নির্দেশ করিয়া খনন করিতে আদেশ করিলেন । কর্মচারীরা, ইতস্ততঃ খনন করণানন্তর, এক বালুকাময় ভূমি খণ্ড বিদারণ করিলে, দুই তিন হস্ত পরিমিত ভূতলে, এক গোপাল মূর্তি সকলের নয়নগোচর হইল । রাজা বহু সমারোহ পূৰ্ব্বক ঐ বিগ্রহকে রাজবাটী লইয়া গেলেন, এবং অনতিবিলম্বে তাঁহাকে প্রতিষ্ঠা করিয়া তাঁহার নাম নবদ্বীপনাথ রাখিলেন । কিছু দিন পরে, নবদ্বীপে তাঁহার এক বাটী প্রস্তুত করাইয়া দিলেন, এবং তাঁহার নিত্য নৈমিত্তিক ক্রিয়াদিতে অপৰ্য্যাপ্ত অর্থ ব্যয় করিতে লাগিলেন । রথযাত্রার সময়ে, কয়েক দিন,

নবদ্বীপস্থ সমস্ত ব্রাহ্মণকে ভোজন করান হইত, এবং কাংসা ও পিত্তল নির্মিত জলপাত্র ও ভোজনপাত্র স্তুপাকার করিয়া, তাহার কিয়দংশ ব্রাহ্মণ-পণ্ডিতগণকে বিতরণ করা হইত, ও অবশিষ্টাংশ সাধারণ লোকে লুটিয়া লইত। যখন রথ চালিত হইত, তখন তাহার উপর হইতে রজত পুষ্প বর্ষণ হইত, এবং উভয় পার্শ্বস্থ দণ্ডায়মানা কামিনীগণের উপর রোপ্যাভরণ নিক্ষিপ্ত হইত। দোলযাত্রার সময়েও, অল্প অর্থ ব্যয় হইত না। এই কালে কয়েক দিন, নবদ্বীপের প্রায় সমস্ত রাজপথ আবীরে আচ্ছাদিত থাকিত। কোন পথে ঘূলি দর্শন হইলে, রাজার বিরক্তির সীমা থাকিত না। শুনিয়াছি, এতাদৃশ অপরিমিত ধনক্ষয় দেখিয়া, একদা নবদ্বীপস্থ প্রধান প্রধান পণ্ডিতগণ, কাতরাস্তম্ভকরণে ও বিনয়বচনে রাজসম্মিধানে নিবেদন করেন “মহারাজ ! যদিও এই সকল অর্থ সংকর্মে ব্যয় হইতেছে, কিন্তু শাস্ত্রকারেরা, মিতব্যয়িতাও রাজাদিগের এক প্রধান ধর্ম বলিয়া নির্দেশ করিয়াছেন। অতএব, এ বিষয়েও রাজাদিগের দৃষ্টি রাখা কর্তব্য।” রাজা বলিলেন “আপনারা একবার চক্ষু নিম্নীলিত করিয়া দেখুন দেখি, ধন জন কিছু দেখিতে পান কি না ?” পণ্ডিতগণ, এই উত্তর শুনিয়া, আর কিছু কহিতে সাহস করিলেন না, বরং রাজার প্রীতিকর বাক্যই কহিলেন, কিন্তু মনে মনে ভাবিলেন ইনি অচিরাৎ সর্বস্বান্ত হইবেন।

পূর্বে উল্লিখিত হইয়াছে রাজা দৈশ্বরচন্দ্রের সময়ে, পৈতৃক জমিদারীর অর্দ্ধাংশ হস্তান্তরগত হওয়াতে, আয়ের বিস্তর ন্যূনতা হয়। গিরীশচন্দ্র, আপন আয়ের প্রতি কিঞ্চিৎদূর দৃষ্টিপাত না করিয়া, কেবল বৃদ্ধা ব্যয় করিতে ভাল বাসিতেন। এই রাজবংশের যাঁহার পুরাতন দেওয়ান ছিলেন, তাঁহাদের

বংশোদ্ভূত কোন ব্যক্তি তাঁহার পিতার শেষাবস্থায় বা তাঁহার প্রথমাবস্থায় দেওয়ানী পদে নিযুক্ত ছিলেন না। এই উভয় কালেই নুতন দেওয়ান ছিলেন। পুরাতন দেওয়ানদিগের ন্যায়, অভিনব দেওয়ানদের প্রভুভক্তি ও প্রভুর হিতাভিলাষ প্রবল ছিল না। এই সময়ে, রামলোচন বন্দ্যোপাধ্যায় নামে এক ব্যক্তি দেওয়ানীপদে নিযুক্ত ছিলেন। রাজা আপন প্রীতিকর কার্য্য নিষ্পাদিত না হইলেই তাঁহার প্রতি বিরক্তি প্রকাশ ও কটুক্তি প্রয়োগ করিতেন; সুতরাং, তিনি রাজার শেষ দশা কি হইবে বিবেচনা না করিয়া বাহাতে তাঁহার আশু সম্ভাব হয় তাহাতেই যত্ববান হইতেন। জমীদারীর যে কর সংগৃহীত হইত, তাহার অধিকাংশ রাজার মনোরঞ্জক কার্য্যে ব্যয় হইয়া যাইত, সুতরাং রাজস্ব বাকী পড়িতে লাগিল, এবং ক্রমশঃ ছুই এক খানি করিয়া, বাঃ ১২১৩ সালের মধ্যে অনেকগুলি পরগণা নিলাম হইয়া গেল। এক্ষণে যাহা রহিল তাহা রক্ষা করিতে পারিলেও, এ রাজবংশের মান সম্ভ্রম কথঞ্চিৎরূপে রক্ষা হইতে পারিত। কিন্তু কে রক্ষা করিবেক? রাজার বিষয়বুদ্ধির সম্পূর্ণ অভাব ছিল, এবং কর্ম্মচারিগণের ধর্ম্ম বা প্রভুভক্তি কিছুমাত্র ছিল না। ১২২০ বাঃ অব্দে যখন তাঁহার প্রধান পরগণা উখড়া, রাজস্ব দায়ে, নিলাম হইবার সম্ভাবনা হইল, তখন তিনি এই পরগণা নিলাম হইলে “আমার কি গতি হইবে” এই ভাবিয়া, যার পর নাই চিন্তাকুল হইলেন, এবং বাহাতে প্রয়োজনীয় টাকা সংগৃহীত হয়, কর্ম্মকারকগণের প্রতি তাহার বিশেষ চেষ্টা করিতে আদেশ করিলেন। রাজবাটীতে এ বিষয় লইয়া বিলক্ষণ আন্দোলন হইতে লাগিল; আত্মীয় বংশ বান্ধব সকলেই সাতিশয় ব্যাকুল-

চিত্ত হইলেন; ঋণ করিবার জন্য মহাজন স্থির হইল; তথাপি পরিশেষে নির্দিষ্ট কাল মধ্যে, কালেক্টরিতে খাজানা দাখিল হইল না। ১২২০ বাৎ অব্দের পৌষ মাসে যখন ঐ পরগণার নিলাম উপস্থিত হইল, তখন রাজা, তাঁহাদের প্রাচীন দেওয়ান-বংশোদ্ভূত রত্নেশ্বর রায় ও কতিপয় সুহৃদ্বরের কথা ক্রমে, দেওয়ান রামলোচন ও তৎসহযোগী অন্য অন্য কর্মচারীর দুষ্কাভিসন্ধি বুঝিতে পারিয়া, মহাল অন্যের নামে ডাকিয়া রাখা স্থির করিলেন।

নিলাম উপস্থিত হইলে, রত্নেশ্বর আপন নামে নিলাম ডাকিতে আরম্ভ করিলেন, আর তেলিনিপাড়াবাসী কাশীনাথ বন্দ্যোপাধ্যায় ও কলিকাতাবাসী মধুসূদন সাওয়াল দুই ধনাঢ্য ব্যক্তিও ডাকিতে লাগিলেন। ইতি মধ্যে, বিশ্বাসঘাতক রামলোচন ও কতিপয় কর্মচারী একত্রিত হইয়া রাজসমীপে উপস্থিত হইলেন এবং “কাশীনাথ বন্দ্যোপাধ্যায় মহারাজার পক্ষেই ডাকিতেছে, অতএব রত্নেশ্বর রায়ের দ্বারা আর ডাকাইবার প্রয়োজন নাই” নির্কোষ রাজাকে ইহাই প্রতীত করাইলেন। রাজা, রত্নেশ্বরকে আর ডাকিতে নিষেধ করিয়া পাঠাইলেন। রত্নেশ্বর, এই মহানর্থকর রাজাদেশ শ্রবণে, শিরে করাঘাত পূর্বক, ডাকিতে নিবৃত্ত হইলেন এবং অশেষবিধ বিলাপ করিতে করিতে প্রস্থান করিলেন। কাশীনাথ ও মধুসূদন পঞ্চাশ লক্ষের সম্পত্তি আট লক্ষে পাইলেন, সকল লোকে হাহাকার করিতে লাগিল; কিন্তু দুর্ভাগ্য, নিবুদ্ধি রাজার তখনও চৈতন্যোদয় হইল না। তিনি ধূর্ত-চুড়ামণি রামলোচনের ইন্দ্রজালে বিমোহিত হইয়া, তাঁহার কপট বাক্যে বিশ্বাস পূর্বক নিশ্চিন্ত হইয়া থাকিলেন। কয়েক দিন পরে, রামলোচন কহিলেন, “ক্রেতারা পরগণার মফস্বল

কাগজ দেখিলেই তাহা মহারাজার নামে লিখিয়া দিবেন, এই অবধারিত হইয়াছে।” নির্বোধ-শিরোমণি রাজা সে কথাও বিশ্বাস করিলেন ; অনতি কাল মধ্যে কতক কাগজও তেলিনি-পাড়ায় প্রেরিত হইল ।

অবশেষে, রাজার নয়নোন্মীলিত হইল । তিনি তখন রাজস্ব পরিশোধের টাকা সংগৃহীত না হওয়া, রত্নেশ্বরকে নিলাম ডাকিতে নিষেধ করা, মফস্বলের কাগজ পত্র কাশীনাথ বন্দ্যোপাধ্যায়দিগকে দেওয়া, ইত্যাদি সমস্ত বিষয়ের নিগূঢ় তাৎপর্য বুঝিতে পারিলেন, এবং যাহাতে নিলাম অসিদ্ধ হয়, তাহার যত্ন করিতে প্রবৃত্ত হইলেন । অতি অল্প বাকী খাজানার নিমিত্ত এতাদৃশ বৃহৎ পরগণা সম্যক্ রূপে নিলাম হওয়া, ও ইহার প্রকৃত মূল্যের অনেক ন্যূন মূল্যে বিক্রীত হইয়া যাওয়া, ইত্যাদি কারণ দর্শাইয়া এক আবেদন পত্র রেবিনিউ বোর্ডে দিলেন, এবং স্বয়ংও, বোর্ডের সাহেবদিগের সন্নি-
ধানে গমন করিয়া, এই নিলামের আচ্ছোপান্ত সমস্ত বৃত্তান্ত বর্ণন করণানন্তর, যাহাতে এই নিলাম অসিদ্ধ হয়, তন্নিমিত্ত বিস্তর স্তব স্তুতি করিলেন । সাহেবেরাও তাঁহার প্রার্থনা সিদ্ধি বিষয়ে যথাসাধ্য যত্ন করিতে সম্মত হইলেন । রাজা, রাজপরিবার, আত্মীয় স্বজন, এবং যাবতীয় পুরবাসিগণ, যৎপরোনাস্তি সংশ-
য়াপন্ন চিত্তে, কাল যাপন করিতে লাগিলেন । সাহেবদিগের আদেশ প্রকাশ হইতে কিছু বিলম্ব হইল, এই সুযোগে, রাম-
লোচন ও তন্তুল্য কতিপয় বিশ্বাসঘাতক কর্মচারী রাজাকে বুঝাইলেন, যে নিলাম খরিদারগণ, বোর্ডের সাহেবদিগকে স্বপক্ষ করিবার নিমিত্ত, অশেষবিধ যত্ন করিতেছেন ; বোর্ড নিলাম মঞ্জুর করিলে আর কোন উপায় থাকিবেক না । অতএব তাঁহারা যে অন্যায় নিলাম করিয়াছেন, তাহার প্রতিবিধানার্থ এই সময়ে

তাঁহাদের নামে গবর্ণর সাহেবের সমীপে অভিযোগ করা কর্তব্য।
হিতাহিত জ্ঞান শূন্য রাজা পূৰ্ণ বৃত্তান্ত সমস্ত বিস্মৃত হইয়া, পুনরায়
ঐ বিশ্বাসঘাতকদিগের কথায় প্রত্যয় করিলেন এবং তাঁহাদের
পরামর্শানুবর্তী হইলেন।

উখড়ার নিলাম নিতান্ত বিধিবিৰুদ্ধ হয় নাই; তবে বোর্ডের
সাহেবেরা, করুণাপরবশ হইয়া, নিলাম অসিদ্ধ করিবার মানস
করিয়াছিলেন; কিন্তু রাজার এইরূপ ব্যবহারে বিরক্ত হইয়া তাঁহার
প্রার্থনা অগ্রাহ্য করিলেন। নিলাম খরিদারেরা, অনতি কাল মধ্যেই,
যথানিয়মে পরগণা অধিকার করিলেন। অনন্তর, রাজা, কলিকাতায়
থাকিয়া এই পরগণা পুনঃ প্রাপ্তির জন্য অনেক যত্ন করিতে
লাগিলেন, কিন্তু কোন মতেই তাহা সফল করিতে পারিলেন
না; লাভের মধ্যে, আর এক খানি মহাল বিক্রীত হইয়া গেল।
এই রাজাদিগের তৎকালীন প্রথানুসারে, জাতি, কুটুম্ব, আত্মীয়,
গুরু, পুরোহিত, প্রভৃতি বহু ব্যক্তি তাঁহার সমভিব্যাহারে থাকাতে
বিপুলার্থ ব্যয় হইল, এবং ঐ অর্থ সংগ্রহার্থে কলিকাতার নিকটস্থ
মদরসা নামে এক খানি পরগণা বিক্রয় করিতে হইল।

ছুর্ভাগা গিরীশচন্দ্রের পৈতৃক জমিদারীর অন্তর্গত ৮৪ পরগণা
ছিল, এক্ষণে, পাঁচ সাত খানি পরগণা ও কতক গুলি নিষ্কর গ্রাম
মাত্র থাকিল। তাঁহার মনের সুখপ্রভা একবারে অন্তর্মিত হইল;
আত্মহত্যা কি স্বদেশ-পরিত্যাগ করেন ইহাই ভাবিতে লাগিলেন।
পরে তাঁহার সুহৃদ্বর্গ, তাঁহাকে অনেক প্রবোধ দিয়া ও বহু বিনয়
করিয়া বাটী আনিলেন; তিনি, বাটী উপনীত হইয়া, ক্ষিপ্তপ্রায়
হইয়া রহিলেন। জননীকে এ মুখ কিরূপে দেখাইব, এই চিন্তা
করিয়া, নানা কোশলে তাঁহার সহিত দীর্ঘকাল সাক্ষাৎ
করিলেন না।

রাজবাটীতে এই জমিদারী নিলামসংক্রান্ত একটি আশ্চর্য্য প্রবাদ আছে । প্রথমা মহিষী অপূত্রবতী থাকাতে, রাজা, ১২১৬ বাঃ অব্দের কিঞ্চিৎ পূর্বে বা পরে পুনরায় দার-পরিগ্রহ করেন । জ্যেষ্ঠা রানী যেমন সুন্দরী তেমনিই সুশীলা ছিলেন । রাজা তাঁহাকে সাতিশয় ভাল বাসিতেন এবং আর আর সকলেই তাঁহাকে যথেষ্ট স্নেহ করিতেন । কিন্তু তিনি স্বশ্রু ঠাকুরাণীর বিষ নয়নে পতিত হওয়াতে, কখনই সুখী হইতে পারেন নাই । স্বামী মাতৃভয়ে তাঁহাকে সমুচিত স্নেহ ও আদর প্রদর্শন করিতে পারিতেন না, এবং অন্য আত্মীয় স্বজনও তাঁহাকে মনোমত যত্ন করিতে সাহসী হইতেন না । তাঁহার ভাবী অবস্থার তুলনায়, এ দুর্বস্থাও তাঁহার পক্ষে সুখের অবস্থা ছিল । তিনি অনেক দুর্ভাগা হিন্দুমহিলাগণের ন্যায়, কিছুদিন পরে, চিরজুঃখিনী হইলেন । তাঁহার বন্ধ্যাত্ম স্থির হইলে, রাজা, মাতৃ অনুরোধে, পুনরায় বিবাহ করিলেন । এই বিবাহের কয়ৎকালানন্তর, অভাগিনী রানী উন্মাদিনী হইলেন ; কাহারও সহিত কথা কহিতেন না, জাগ্রদবস্থায় মস্ত্র জপ করিবার ভাবে, কেবল বৃদ্ধাঙ্গুলি অপর অঙ্গুলির উপর সর্বদা সঞ্চালন করিতেন । এক দিবস রাজমাতা ঐ রানীর গৃহে, সহচরিগণকে সম্বোধিয়া কহিতেছিলেন “এত দিন হইল, তবু গিরীশ কলিকাতা হইতে কেন আসিতেছে না ।” অন্য কেহ উত্তর করিতে না করিতে, উন্মাদিনী রানী কহিলেন “সে সোণার রাজ্য বিক্রয় করেছে, আর তার এসে কি হবে ।” রাজমাতা, তাঁহার বাক্য শ্রবণে অতীব বিস্ময়াপন্ন হইয়া, কহিলেন “যে বউ কোন কথা কহে না, সে একথা কেন কহিল ।” অন্য অন্য উপস্থিতা রমণীগণ যদ্যপিও জানিতেন যে, সোণার রাজ্য যথার্থই বিক্রীত হইয়াছে, তথাপি তাঁহাকে কহিলেন “পাগলের

কত মত ভাব হয় ও তাহারা কত প্রকার কথা কয়, অতএব আপনি ইহাঁর কথা শুনিয়া, কেন উৎকণ্ঠিত হইতেছেন ?”

রাজা কৃষ্ণচন্দ্র তদীয় জ্যেষ্ঠ পুত্রকে জমীদারী দিয়া আর আর পরিবারগণের ভরণপোষণের নিমিত্ত, বাৎসরিক যে চল্লিশ হাজার টাকা দিবার নিয়ম করিয়া যান, তাহার মধ্যে রাজা ঈশ্বরচন্দ্রের সময়ে, শম্ভুচন্দ্রের বার হাজার ও তাঁহার জননীর তিন হাজার, মহেশচন্দ্রের ছয় হাজার এবং ঈশানচন্দ্রের ছয় হাজার ধার্য্য থাকে। তৈরবচন্দ্র ও হরচন্দ্রের পোষ্য-পুত্র-দ্বয়ের মৃত্যু হওয়ায় তাঁহাদের মোশাহেরা রহিত হইয়া যায়। কৃষ্ণচন্দ্রের দানপত্রে এইমাত্র লিখিত ছিল যে, “এই এই পুত্র ও পৌত্রদের গ্রাসাচ্ছাদনের নিমিত্ত, এত টাকা নির্দ্ধারিত করিলাম”। ইহাঁরা পুত্র পৌত্রাদিক্রমে, এই টাকা পাইবেন কি না, তাহা পরিষ্কার করিয়া লিখিত হয় নাই, একারণ ঈশানচন্দ্র লোকান্তর গমন করিলে, গিরীশচন্দ্র, তদীয় তনয়দিগের, তাঁহাদের পৈতৃক মোশাহেরা রহিত করিলেন। ঈশানচন্দ্রের পুত্রগণ, ঐ মোশাহেরা পাইবার নিমিত্ত, ধর্মাধিকরণে অভিযোগ করিলেন। ধর্মাধ্যক্ষগণ, যখন, দাতা পুত্রের পোষ্যপুত্রকে মোশাহেরা দিয়াছেন, তখন তিনি যে পুত্রের ঔরসজাত পুত্রকে পৈতৃক মোশাহেরাতে বঞ্চিত করিবেন, তাঁহার একরূপ অভিসন্ধি থাকা কোনরূপেই প্রতীয়মান হইতে পারে না, এই বিবেচনা করিয়া, অর্থীদিগের প্রার্থনা সিদ্ধ করিলেন, এবং এই মীমাংসানুসারে, শম্ভুচন্দ্র ও মহেশচন্দ্রের পুত্র পৌত্রগণও মোশাহেরা পাইতে লাগিলেন। পরে, যৎকালে, উখড়া পরগণা নিলাম হইলে, রাজা গিরীশচন্দ্র তাহার পণ কাজিলের টাকা গ্রহণে উদ্রুত হইলেন, তখন শম্ভুচন্দ্র, মহেশচন্দ্র ও ঈশানচন্দ্রের

পুল্লগণ, গবর্ণর সাহেবের নিকট, এই আবেদন করিলেন, “যে পরগণার উপস্থিত হইতে আমরা মোশাহেরা পাইয়া আসিতেছি, তাহা যখন বিক্রীত হইয়া গেল, তখন যে পরিমাণ টাকার কোম্পানির কাগজ (প্রোমেসরি নোট) খরিদ হইলে, আমাদিগের মোশাহেরার সঙ্কুলান হয়, সেই পরিমাণ টাকা ঐ পণ ফাজিলের টাকা হইতে আমাদিগকে দিতে আজ্ঞা হয়।” গিরীশচন্দ্র, বিবিধ কারণ প্রদর্শন করিয়া, তাঁহাদের প্রার্থনার প্রতিবাদ করিলেন, এবং আপনার অভিপ্রেত সাধনের নিমিত্ত, প্রভূত প্রয়াস পাইলেন। অনন্তর, গবর্ণর সাহেব, উভয় পক্ষের তর্কবিতর্ক শ্রবণানন্তর, এই আদেশ দিলেন যে, “যে পরিমাণ কোম্পানির কাগজের অুদে অভিযোক্তাদের মোশাহেরা পূরণ হইতে পারে, সেই পরিমাণ কোম্পানির কাগজ, গিরীশচন্দ্রের নামে ক্রীত হইয়া, সদর দেওয়ানীর কোষাগারে গচ্ছিত থাকিবেক, অভিযোক্তারা ছয় মাস অন্তর আপন আপন অংশ মত টাকা উক্ত ধর্ম্মাধিকরণের রেজিষ্টার সাহেবের নিকট প্রাপ্ত হইবেন ; আর যদিও অভিযুক্ত ও অভিযোক্তাদিগের মধ্যে কেহ ঐ গচ্ছিত টাকা পাইবার বাঞ্ছা করেন, তবে তিনি, উপযুক্ত বিচারালয়ে আপন স্বত্ব সাব্যস্ত পূর্ব্বক ডিক্রী লাভ করিলে, তাহা পাইবেন।

গিরীশচন্দ্র প্রথমতঃ অতিশয় শুদ্ধাচারী ছিলেন। তিনি, বিষয়াধিকারী হইবার অব্যবহিত পরেই, পিতার মদ্যপানের সহযোগীগণকে রাজবাটী হইতে বহিষ্কৃত করিয়া দেন। পরে যখন, উখড়া পরগণা বিক্রীত হইলে, তিনি অত্যন্ত শোকাভিভূত ও আকুলিত চিত্ত হইয়াছিলেন, সেই সময়ে, এক জন দণ্ডী গোস্বামী উপস্থিত হন, এবং কিয়দ্দিন রাজসন্নিধানে অবস্থান করণানন্তর একদা রাজাকে জিজ্ঞাসা করেন, “মহারাজ আপনাকে সর্বদাই

অশ্রু-হৃদয় দেখিতে পাই, ইহার কারণ কি ?” রাজা উত্তর করিলেন, “যে কুলান্দার, আপন দোষে, পৈতৃক সমস্ত সম্পত্তি বিসর্জন দিয়াছে, তাহার স্বচ্ছন্দান্তঃকরণে থাকিবার সম্ভাবনা কি ?” সন্ন্যাসী বলিলেন যে “আপনি, বিদ্বান্ ও বুদ্ধিমান্ হইয়া, অনিত্য বিষয়ের নিমিত্ত এতাদৃশ শোকাভিভূত কেন হইতেছেন ? আমার উপদেশানুযায়ী কার্য্য করুন, আপনার সমস্ত মনঃপীড়া দূরীভূত হইবেক ।” অনন্তর, রাজা, দণ্ডীর নিদেশানুসারে পূর্ব্ব পুরুষানুগত তন্ত্রোক্ত মন্ত্র গ্রহণ করিলেন এবং যাবজ্জীবন সুরাদেবীর উপাসক হইয়া রহিলেন ।

রাজা যে অভিসন্ধিতে দ্বিতীয় বার দ্বারপরিগ্রহ করেন, তাহা সিদ্ধ না হওয়াতে, দত্তক গ্রহণাভিলাষী হইলেন । তাঁহার গর্ভবতী মাতুল-পুত্র-পত্নীকে রাজবাটীতে আনিয়া রাখা হইল । ঐ রমণী ১২২৬ বাঃ অব্দের জ্যৈষ্ঠ মাসে এক পুত্র প্রসব করিয়া, কিয়দ্দিন পরে, লোকান্তর গমন করিলেন । কনিষ্ঠা রাজমহিষী ঐ শিশুকে লালন পালন করিতে লাগিলেন । বালক ষষ্ঠমাস বয়ঃপ্রাপ্ত হইলে, রাজা তাহাকে শাস্ত্রোক্ত বিধি অনুসারে দত্তক গ্রহণ করিলেন এবং নামকরণ সময়ে তাহার নাম ত্রীশচন্দ্র রাখিলেন (১) ।

(১) তৎকালে নবদ্বীপে স্মার্তের ছই দল প্রবল ছিল । এক দলের প্রধান রাজপুরোহিত লক্ষ্মীকান্ত ন্যায়ভূষণ, অপর দলের প্রধান রামমোহন বিদ্যাবাচস্পতি । ন্যায়ভূষণের মতানুসারে এই দত্তক গৃহীত হইয়াছিল, একারণ বাচস্পতি, কালার্শোচগ্রস্ত বালককে দত্তক গ্রহণ করা শাস্ত্র ও ব্যবহার বিরুদ্ধ বলিয়া, এক ব্যবস্থা প্রকাশ করেন । ইহা শুনিয়া, রাজা এ প্রদেশস্থ অনেক প্রধান প্রধান পণ্ডিতগণকে আহ্বান করিলেন । এ বিষয়ের তুমুল বিচার হইল । বহুতর বিতর্কের পর, লক্ষ্মীকান্ত, এই সিদ্ধান্ত করিয়া, প্রতিবাদিগণকে পরাজিত করিলেন যে, “যখন শাস্ত্রকারেরা স্পষ্টাক্ষরে নির্দেশ করিয়াছেন, অর্শোচ গ্রহণ না করিলে, কেহ অশুচী হয় না, তখন অর্শোচ সংজ্ঞা বাহ্যসংজ্ঞান গোচর হইতে পারে না, তাহার অশুচী হইবার সম্ভাবনা কি ?

রাজা এত ধনহীন হইয়াছিলেন, তথাপি তাঁহার ধর্ম্য কর্মে ব্যয় করিবার ইচ্ছার ন্যূনতা হয় নাই। তিনি, ১২৩২ বাঃ অব্দে, নবদ্বীপে দুই বৃহৎ মন্দির প্রস্তুত করিয়া, এক মন্দিরের মধ্যে কালীরূপা পাষণময়ী মূর্তি ও গৃহান্তরে এক প্রকাণ্ড শিব মূর্তি প্রতিষ্ঠিত করিলেন। দেবীর নাম ভবতারিণী ও দেবের নাম ভবতারণ রাখিলেন এবং তাঁহাদের সেবার নিমিত্ত কিয়ৎ পরিমাণ নিষ্কর ভূমি নির্দিষ্ট করিয়া দিলেন। অর্থের এত অভাবেও তিনি দেবোত্তরের উপস্থিত অধিকাংশ দেবসেবাতেই ব্যয় করিতেন। গিরীশচন্দ্রের বিষয়কার্য্যে ঔদাস্য থাকাতে তদীয় দত্তক পুত্র কুমার শ্রীশচন্দ্র, ত্রয়োদশ কি চতুর্দশ বর্ষ বয়সেই, সাংসারিক ভার গ্রহণ করেন। তিনি অতি বুদ্ধিমান ছিলেন, একারণ অল্প-কাল মধ্যেই, বিষয় কার্য্যের প্রণালী অনেক বুঝিতে পারিলেন। এই রাজবংশের ষাদৃশ মান, তাদৃশ ধন নাই বলিয়া, যাহাতে সম্পত্তি বৃদ্ধি হয়, তৎ প্রতি তাঁহার অতিশয় আগ্রহ হইল। কিন্তু তদানীং, রাজসংসারের যেরূপ অপ্রতুল ও তাঁহার পিতার যেরূপ বহু-ব্যয়-স্পৃহা ছিল, তাহাতে বিষয়ের উন্নতিসাধন সুদূর-পর্য্যন্ত, তাহার অবনতি নিবারণ করাই ছুফর হইয়াছিল। খাস মহাল সমস্ত ইজারা দেওয়া যাইত, এবং ইজারদারদিগের নিকট চারি পাঁচ বৎসরের অগ্রিম কর লওয়া হইত। যে নিয়মিত কর সংগৃহীত হইত, তাহা হইতে রাজস্ব পরিশোধনান্তর অতি অল্প টাকা উদ্ধৃত্ত থাকিত। কোন বিশেষ প্রয়োজন হইলেই, ঐ ইজারার মেয়াদ বাড়াইয়া পুনরায় আগাও খাজানা লওয়া হইত। ইজারদারগণ, “আপাততঃ আমার হস্তে টাকা নাই, অন্যের নিকট কর্জ করিয়া টাকা দিতে হইবে” ইত্যাদি নানা রূপ কৌশলে, আগামী কালের খাজানার অনেক সুদ কর্তন করিয়া

টাকা দিত। অগ্রিম কর গ্রহণানুরোধে কোন মহাল খাসে রাখা হইত না এবং অতি অল্প জমায় ইজারা দেওয়া হইত। এই অনিষ্টকর রীতি বশতঃ বার্ষিক আয়ের বিস্তর লাঘব হইত। এই দুর্দশার উপর আবার, রাজা, তৎকালে, এক নীচ-জাতীয়া দুষ্-প্রকৃতি রমণীর অতিশয় বশতাপন্ন হইয়াছিলেন, এবং তাহার মনোরঞ্জন করিতে নিরতিশয় ব্যগ্র ছিলেন, সুতরাং রাজার যতই ক্ষতি হউক না কেন, তাঁহাকে সম্মুখ করিতে পারিলেই, স্বার্থপর ব্যক্তির মনোরথ পূর্ণ হইত। কুমার একে বালক, তাহাতে আবার আত্মস্তরির কর্মচারী বেষ্টিত, সুতরাং বিষয়ের উন্নতি সাধনে কৃতকার্য হইবার কোন সম্ভাবনা ছিল না। সংসার ক্রমশই অবসন্ন হইতে লাগিল; ইহার উপর আবার গবর্ণমেন্ট রাজার দেবোত্তর ও ব্রহ্মোত্তরের প্রতি হস্ত প্রসারণ করিলেন (১)।

(১) ধনাভাবে রাজসংসারের এতদূর পর্য্যন্ত ছরবস্থা হইয়াছিল, যে এক দিবস প্রাতঃকালে, রাজবাটীর প্রধান কর্মচারী, সেই দিনের আবশ্যিক ব্যয় কিরূপে নিরূপিত করিবেন, এই চিন্তা করিতেছেন, এমন সময়ে, রাজসংসারের মেথুরানী (যে রাজবাটিতে মৎস্য আমু কাঁটাল ইত্যাদি যোগাইয়া থাকে) সহসা তাঁহার সমীপস্থ হইয়া কহিল “আমার অনেক টাকা পাওনা হইয়াছে, আপনি, আজ কাল করিয়া, এত দিবস ভাঁড়াইতেছেন, আমার আর চলে না, আমি আজ টাকা না লইয়া উঠিব না।” কর্মকারক ঐ রমণীর অঙ্গের আভরণের প্রতি দৃষ্টি করিবার মাত্র, “অদ্যকার চলিবার উপায় ত হইল,” এই মনে ভাবিয়া, দীর্ঘ কৃত্রিম রোষ প্রকাশ পূর্বক কহিলেন, “তুই সর্বনাশ করেছিস; তুই অন্তঃপুরে অলঙ্কার পরিয়া কেন যাস। তোর হাতের ঐ রূপার বাউটি দেখিয়া, রানী আদেশ করিয়া পাঠাইয়াছেন, ঠিক ঐ প্রকারের সোণার বাউটি অবিলম্বে প্রস্তুত করিয়া দিতে হইবে। দেখ-দেখ এখন আমি এত টাকা কোথায় পাই। যাহা হউক, তোর বাউটি খুলিয়া আমাকে দিয়া যা, সেকরাকে দেখাইতে হইবেক। মেথুরানী, আমার আভরণ দেখিয়া রানীর আভরণ হইবেক এই ভাবিয়া আত্মলাভে গদগদ হইয়া, তৎক্ষণাৎ বাউটি, হস্ত হইতে মোচন পূর্বক, কর্মচারীর হস্তে অর্পণ করিল। কর্মকর্তা, ঐ ভূষণ বন্দক দিয়া, প্রয়োজনীয় ব্যয় সম্পাদন করিলেন।

ত্রয়োবিংশ অধ্যায় ।

১৭৯৩ খৃঃ অব্দে, যখন গবর্ণমেন্ট জমীদারীর দশসালা বন্দোবস্ত করেন, তখন জমীদারের সহিত এই নিয়ম বদ্ধ হয় যে, জমীদারীর মধ্যে যে সকল নিষ্কর মহাল বা ভূমি আছে, তাহার সহিত জমীদারের কোন সম্বন্ধ থাকিল না, তাহার উপর গবর্ণমেন্টের সম্পূর্ণ স্বামিত্ব রহিল। ১২০২ বাঃ অব্দে, এই জেলার কালেক্টরী হইতে এই মর্মে এক ঘোষণা পত্র (ইস্তাহার) দেওয়া হয় যে, নিষ্কর ভূমির অধিকারিগণ, আপন আপন অধিকৃত মহাল বা ভূমির দাতা, গৃহীতা ও বর্তমান অধিকারীর নাম, ভূমির পরিমাণ, গ্রাম, বা ভূমি যে গ্রামে থাকে, তাহার নাম, রাজদত্ত সনন্দ ও দানের সন তারিখ ইত্যাদি বিষয়ের হকিকত অর্থাৎ বিবরণ পত্র, নির্দিষ্ট কালের মধ্যে কালেক্টরীতে দাখিল করেন। এই ঘোষণায় নিষ্করভূমি-ভোগিগণ, আগ্রহের সহিত, ঐ আদেশানুযায়ী বিবরণ পত্র কালেক্টরীতে প্রদান করেন এবং কালেক্টর সাহেবের স্বাক্ষরিত এক এক তায়দাদ, অর্থাৎ নিরূপণপত্র, প্রাপ্ত হন। ১২০৯ বাঃ অব্দে, পুনরায় উপরোক্তরূপ ঘোষণা দেওয়া হইলে, যাঁহারা পূর্বে হকিকত দেন নাই, তাঁহারা তাহা প্রদান করিয়া তায়দাদ লন। এই জেলাতে যত নিষ্করভূমি আছে, তাহা এইরূপে কালেক্টরীর কাগজবদ্ধ হয়। ১৮৩৪ কি ৩৫ খৃঃ অব্দে, প্রকৃত ও অপ্রকৃত নিষ্কর ভূমির নিরূপণের বিচার আরম্ভ হয়। এই কার্য্য করিবার নিমিত্ত, প্লোডিন সাহেব নামে এক জন, এস্পেশাল ডেপুটি কালেক্টর নিযুক্ত হইয়া

আইসেন। তিনি, রাজসরকারের সমস্ত দেবোত্তর ও অপর নিষ্কর ভূমির মোট অষ্ট সহস্র টাকা বাৎসরিক রাজস্ব স্বীকার করিতে, অথবা ঐ সকল ভূমির নিষ্কর থাকিবার যে যে কারণ ও প্রমাণ থাকে তাহা দর্শাইতে, আদেশ করিলেন। রাজা, অপ্রাপ্ত মন্ত্রীর মন্ত্রণায়, প্রস্তাবিত রাজস্ব প্রদানে অসম্মত হইয়া, নিষ্কর ভূমির প্রমাণ দিতে উদ্যত হইলেন। রাজারা নিজে দাতা, স্মৃতরাং আপনাদের বিষয় আপনাদিগকে দান করিবার সম্ভাবনা ছিল না; কেবল আপনাদের প্রতিষ্ঠিত কয়েকটি বিগ্রহকে, তাঁহাদের সেবার নিমিত্ত, কয়েক খানি গ্রাম ও কিয়ৎপরিমাণ ভূমি, এবং এই রাজবংশের মধ্যে কেবল রাজা কৃষ্ণচন্দ্র, আপনার দুই রাজ্যীকে নানা গ্রামের কিছু কিছু ভূমি দান করেন। ইহারা যে সকল ব্যক্তিকে ভূমি দান করেন, তাঁহারা ইহাদের দত্ত সনন্দ ও অন্য অন্য প্রমাণ সংগ্রহ করিয়া রাখিয়াছিলেন। কিন্তু যাহারা নিজে সহস্র সহস্র ব্যক্তিকে সহস্র সহস্র বিঘা ভূমি দান করিয়াছেন, তাঁহাদের যে, আপনাদের স্থাপিত দেবতার বা রাণীদিগের ষৎকিঞ্চিৎ নিষ্কর ভূমি রক্ষার্থ, এরূপ প্রমাণের প্রয়োজন আদৌ হইবেক, ইহা কখন রাজাদিগের মনে উদয় হয় নাই। স্মৃতরাং, তাঁহাদের এই সকল নিষ্কর ভূমির সনন্দ বা অন্য কোন প্রকার বিশেষ প্রমাণ সংগৃহীত ছিল না, এবং এক্ষণে গবর্ণমেন্টের নির্দেশানুযায়ী প্রমাণ প্রদানের সামর্থ্য হইল না। যে কিছু প্রমাণ দেওয়া গেল, তাহা বিচারে দুর্বল বোধ হইল, এবং ক্রমশঃ প্রায় সমস্ত মহাল, করের যোগ্য স্থির হইয়া, জরিপ জমাবন্দি আরম্ভ হইল। আর এই সমস্ত কার্য্য সমাধানান্তে বন্দোবস্ত করিয়া লইবার আদেশ হইতে

লাগিল । রাজা খাসকমিশনর সাহেবের নিকট আপীল করি-
বেন বলিয়া, মহাল আপন হস্তে রাখিবার প্রয়াস পাইলেন ।
গবর্ণমেন্ট, খাস কমিশনরের বিচারকাল পর্য্যন্ত, তাঁহার নিষ্কর
ভূমির আনুমানিক রাজস্বের পরিমাণের প্রতিভূ চাহিলেন ।
রাজা তাহা দিতে অসম্মত হওয়াতে, তাঁহার প্রার্থনা অগ্রাহ্য
হইল, এবং কোন কোন মহালে গবর্ণমেন্টের খাস তহসিল
হইতে আরম্ভ হইল ও কোন মহাল অন্যের সহিত ইজারা
বন্দোবস্ত হইতে লাগিল ।

ছঃসময়ে, বিপদ কত প্রকার আকার ধারণ করিয়া উপ-
স্থিত হয়, তাহা কেহই জানিতে পারে না । পূর্বে বর্ণিত
হইয়াছে, রাজা কৃষ্ণচন্দ্রের অন্য অন্য পুত্রপৌত্রদিগের সহিত
এ রাজাদিগের প্রথমে জমীদারী, ও পরে মোশাহেরা সংক্রান্ত
অনেক বিবাদ হয়, ও তন্নিবন্ধন উভয় পক্ষের মধ্যে সাতিশয়
শত্রুতাব্যাপ্ত থাকে । ঈশানচন্দ্রের পুত্রদিগের সহিত শেষবার
মোশাহেরা সম্বন্ধীয় যে মোকদ্দমা উপস্থিত হয়, উভয় পক্ষ
স্বহস্তাবে তাহার নিষ্পত্তি করেন । তৎকালে, ঈশানচন্দ্রের
তিন পুত্র বর্তমান, তাঁহার মধ্যে জ্যেষ্ঠ নরহরিচন্দ্র অতি
বুদ্ধিমান ও গুণবান ছিলেন ; গিরীশচন্দ্র, তাঁহার সহিত
আলাপ করিয়া, অতীব প্রীত হন এবং ১২৩৯ বাঃ অব্দে,
তাঁহাকে আপনার বিষয়ের সর্বাধ্যক্ষ করেন । নরহরি, রাজ-
বাটীতে অবস্থান করিয়া, বিষয়ের উন্নতিসাধনে প্রবৃত্ত হই-
লেন ; কিন্তু তাঁহার কর্তৃত্বে ইচ্ছা হওয়া দূরে থাকুক, বিলক্ষণ
অনিষ্ট হইয়া উঠিল । তৎকালেও রাজসংসারে ন্যূনাধিক চারি
লক্ষ টাকার মণি মুক্তা প্রবাল ও রজত কাঞ্চন ছিল । রাজারা,
বিবিধ বিপদ ও ক্রেশ সত্ত্বেও, তাহার এক খানিও অপচয়

করেন নাই। পূর্বে ঐ সমস্ত দ্রব্য তোষাখানা নামে এক বৃহৎ অটালিকা মধ্যে থাকিত, রাণীদিগের আভরণ বা কাঞ্চন রজত নির্মিত পাত্রাদি, প্রয়োজনানুসারে, অন্তঃপুরে প্রেরণ করা যাইত, এবং প্রয়োজন সমাধানান্তে পুনরায় নির্দিষ্ট স্থানে ন্যস্ত হইত। এই রাজার সময়ে, এই সুরীতি বলবতী থাকে নাই। কনিষ্ঠা রাজ্যের নিকট যে সকল দ্রব্য যাইত, তৎসমুদয় প্রায়ই পুনরাগত হইত না। রাজমহিষী আমার নিকট থাকিবে বলিয়া রাখিতেন, কিন্তু বাস্তবিক তাহা অন্তঃপুরে থাকিত না ; তৎসমুদয় চিরদিনের নিমিত্ত তাঁহার পিতৃভবনে যাইত। রাজা এ সকল সম্বাদ শুনিতে পাইতেন, এবং দুঃখিত হইতেন ; কিন্তু ইহার প্রতিবিধানের কোন চেষ্টা করিতেন না। তোষাখানা ভগ্ন হইলে, রাজবাটীর প্রবেশ দ্বারের উভয় পার্শ্বে স্নাখানা (অস্ত্রাগার) নামে যে দুই বৃহৎ গৃহ ছিল, তাহারই মধ্যে সমস্ত রত্নাদি কাষ্ঠের সিন্দূকের মধ্যে থাকিত। বিশ্বস্ত রক্ষকগণ রাত্রে দ্বার রুদ্ধ করিয়া, ঐ সকল সিন্দূকের উপর শয়ন করিয়া রহিত ; প্রহরীগণ বহির্দিশে থাকিয়া, দ্বার রক্ষা করিত। নব সর্বাধ্যক্ষ নরহরিচন্দ্র, ঐ সকল দ্রব্যের তালিকা করিবেন বলিয়া, গৃহ-দ্বয়ের দ্বার রুদ্ধ করিয়া, তাহাতে বাস্তাবন্দি করিলেন, এবং এই বন্দোবস্ত করিবার পরে, প্রয়োজনানুরোধে, নিজ নিকেতনে গমন করিয়া, কয়েক দিন থাকিলেন। তৎকালে রাজা কলিকাতায় ছিলেন। রাজনন্দনের বর্ষবৃদ্ধির দিন উপস্থিত হওয়াতে তিনি, দ্বার মুক্ত করিয়া, আপন ব্যবহারের অলঙ্কার বাহির করিতে আদেশ দিলেন। কর্মচারীগণ, দ্বার উদ্ঘাটিত করিয়া, গৃহ মধ্যে প্রবেশপূর্বক দেখিলেন, যে সকল সিন্দূকে মণিমুক্তা প্রবাল ও মূল্যবান বস্ত্রাদি ছিল, তাহা উদ্ঘাটিত রহিয়াছে

এবং তন্মধ্যস্থিত দ্রব্যজাত অন্তর্হিত হইয়াছে ; সিন্ধুকের নিকট কতকগুলি দন্ধ তৃণ পড়িয়া রহিয়াছে। অনুমান হইল, গৃহের ছাতে যে বাতায়ন ছিল, তৎকরেরা তাহাতে রজ্জুসংযোগপূর্বক গৃহমধ্যে অবশোহন করিয়া তৃণ জ্বালিয়া প্রদীপ প্রজ্জ্বলিত করিয়াছিল, এবং দ্রব্যাদি অপহরণ করণানন্তর পুনরায় ঐ বাতায়ন দিয়া বহির্গত হইয়াছিল। শাল কমাল ইত্যাদির কিয়দংশ লইয়াছে ও কিয়দংশ ফেলিয়া গিয়াছে। অপহৃত দ্রব্যের আনুমানিক মূল্য তিন লক্ষ টাকার ন্যূন নহে। এই চুরটনার পরে, নানা কারণে, নরহরিচন্দ্রের সহিত রাজার অসম্ভাব হইতে লাগিল, এবং অনতিকাল মধ্যে বিলক্ষণ চিত্তভেদ হইয়া উঠিল। পরিশেষে উভয়ের মধ্যে যে নূতন সম্বন্ধ হইয়াছিল তাহা ১২৫১ বাঃ অব্দে দূরীভূত হইল।

পূর্বের উল্লিখিত হইয়াছে রাজা বন্দোবস্ত করিয়া না লওয়াতে, অথবা রাজস্বের পরিমাণ জামিন দিয়া খাসকমিশনারীতে আপীল না করাতে, তাঁহার প্রায় সমস্ত নিষ্কর মহাল, কালেক্টরি হইতে অন্যের সহিত বন্দোবস্ত হইয়াছিল। ১২৪৫ বাঃ অব্দে, তিনি বাঙ্গালার গবর্ণমেন্টের নিকট এই রূপ আবেদন করিলেন যে, “আমার প্রায় সমস্ত জমীদারী নীলাম হইয়া গিয়াছে,—এক্ষণে কেবল নিষ্কর ভূমির উপস্থত্বের উপর নির্ভর করিয়া, অতি কষ্টে সংসার যাত্রা নির্বাহ করিতেছি। যদি তাহার উপর কর-স্থাপন করা হয়, তবে আমার জীবিকা-নির্বাহের আর কোন উপায় থাকিবেক না। আমার পূর্বপুরুষ রাজা কৃষ্ণচন্দ্র, এ প্রদেশে আপনাদের অধিকৃত হইবার বিষয়ে, বহুতর যত্ন ও পরিশ্রম করিয়াছিলেন ; অতএব আপনাদিগের রাজত্বে আমার এতাদৃশ দুর্গতি হওয়া ন্যায্য ও বিচার সঙ্গত হয় না। এক্ষণে আমার

প্রার্থনা, আমার ঐ পূর্ব পুরুষকৃত উপকার স্মরণ পূর্বক আমার প্রতি রূপা করিয়া, আমার নিষ্কর ভূমির যুক্তিদান করুন, অথবা আমার জীবিকা নির্বাহোপযোগী বৃত্তি দিয়া, আমার সমস্ত নিষ্কর ভূমি গ্রহণ করুন ।” এ বিষয়ে সদর বোর্ডের সাহেবেরা, ১৮৪৬ খৃঃ অব্দে, বাঙ্গালা গবর্ণমেন্টকে এই রূপ লেখেন যে, “রাজার পূর্বপুরুষ গবর্ণমেন্টের কত দূর সাহায্য করিয়াছিলেন, তাহা আপাততঃ জানা যাইতেছে না, কিন্তু এই রাজা অতি প্রাচীন ও সম্ভ্রান্ত-বংশোদ্ভূত, এবং ইদানীং সাতিশয় দুর্দশাগ্রস্ত ; অতএব ইঁহার প্রতি গবর্ণমেন্টের রূপাবলোকন করা উচিত । রাজা বিষয় ব্যাপারে যেরূপ অপটু এবং ইঁহার কর্মচারিগণ যেরূপ বিশ্বাস-যাতক, তাহাতে ইঁহার সহিত এই নিষ্কর মহাল সকল বন্দোবস্ত করিলে, তিনি যে তাহার রাজস্ব যথানিয়মে দিতে পারিবেন, এরূপ বোধ হয় না ; অতএব আমাদিগের বিবেচনায় এইরূপ করিলে ভাল হয় যে, যাবৎ এই রাজা জীবিত থাকেন, তাবৎ তাঁহাকে মাসিক এক সহস্র টাকা মোশাহেরা এবং তাঁহার নিষ্কর মহাল সমস্ত, কোন প্রকার বন্দোবস্ত করিয়া, তাহার বার্ষিক উৎপন্নের শত করা দশ টাকা মালিকানা দেওয়া যায়, এবং তাঁহার লোকান্তর গমনের পর, তাঁহার দত্তক পুত্র, যাঁহাকে মিতব্যয়ী বোধ হইতেছে, তাঁহার সহিত এই সকল মহালের বন্দোবস্ত করা হয় ।” গবর্ণমেন্টের সেক্রেটারি এক, জে, হেলিডে সাহেব বোর্ডের পত্রের এই উত্তর লেখেন যে “তোমাদের প্রস্তাবিত বন্দোবস্তে রাজা সম্মত আছেন কি না ইহা জানিয়া লিখিবা ।” রাজা এই রূপ বন্দোবস্তে অসম্মত হওয়াতে গবর্ণমেন্ট ঐ বিষয়ে আর মনোযোগ করিলেন না ।

যে প্রণালীতে রাজার নিষ্কর ভূমির বিচার হয়, সেই প্রণা-

লীতে নদীয়া জেলার অন্য অন্য লোকেরও নিষ্কর ভূমির বিচার হইয়াছিল । অতি অল্প ভাগ্যবান পুরুষ ব্যতীত প্রায় সমস্ত লোকেরই নিষ্কর ভূমি করের যোগ্য স্থির হয় এবং তাহার উপর এত অধিক কর ধার্য্য হয় যে, তাহা দিতে হইলে তাঁহাদের নিজের কিছুমাত্র লাভ থাকে না ; সুতরাং, প্রথমে অনেকেই বন্দোবস্ত করিয়া লইতে অসম্মত হইলেন । কালেক্টর সাহেব তাঁহাদের মধ্যে কাহারও ভূমি অন্যকে ইজারা দিতে এবং কাহারও ভূমিতে তহসিলদার নিযুক্ত করিতে আরম্ভ করিলেন । দুর্ভাগা নিষ্কর-ভোগীদিগের মধ্যে কেহ বা, আপন বিষয় হস্তান্তর গত হইতেছে দেখিয়া, কেহ বা, তহসিলদার কর্তৃক আপনার রাইয়তগণকে প্রণীড়িত দর্শন করিয়া, অবশেষে ঐ উচ্চ জমাই স্বীকার পূর্বক বন্দোবস্ত করিতে প্রবৃত্ত হইলেন । যাঁহারা কিছু ধনশালী ছিলেন তাঁহারা কোনরূপে রাজস্ব প্রদান করিতে লাগিলেন ; কিন্তু যাঁহাদের নিষ্কর ভূমির উপস্থিত মাত্র উপজীবিকা ছিল, তাঁহারা অল্প কালের মধ্যেই নির্দ্ধারিত কর প্রদানে অসমর্থ হইলেন । যদিচ গবর্ণমেন্ট এই নিয়ম করিয়াছিলেন যে, এই রূপ নিষ্কর ভূমির বার্ষিক উৎপন্নের অর্দ্ধাংশ গবর্ণমেন্ট লইবেন ও অর্দ্ধাংশ নিষ্কর ভোগীরা পাইবেন, তথাচ নিষ্কর-ভোগীদিগের কোন উপকার হয় নাই । রাজপুরুষেরা এই সকল ভূমির এত উচ্চ জমা ধার্য্য করিয়াছিলেন যে, তাহাতে ভূমির উৎপন্ন হইতে গবর্ণমেন্টের প্রাপ্যাংশ পরিশোধ করণান্তে প্রায় কিছুই উদ্ধৃত থাকিত না । সুতরাং, অধিকাংশ লাখেরাজ-ভোগীরা, প্রথমে গ্রামাচ্ছাদনের কষ্ট সহ করিয়াও এবং সর্বস্ব বন্দক দিয়াও নির্দ্ধারিত রাজস্ব প্রদান করিলেন ; কিন্তু দুই তিন বর্ষ পরে নিরুপায় হইয়া বহু-পুরুষের স্নেহের বস্তুর আশা পরিত্যাগ করিতে বাধ্য হইলেন ।

অনতি দীর্ঘকাল মধ্যে রাজস্ব বাকী পড়াতে, চারিশত নম্বর লাখেরাজ নিলাম হইয়া গেল । যাহা অর্দ্ধসভ্য যবন ভূপালেরা, অথবা তাঁহাদের জমীদারেরা কাহারও ধর্মের পুরস্কার, কাহারও গুণের পুরস্কার, বলিয়া, প্রজাগণকে দান করিয়াছিলেন, তাহাও বর্তমান সভ্য শাসনকর্তাগণ, অকাতর অন্তঃকরণ ও স্বচ্ছন্দ চিত্তে আত্মসাৎ করিলেন ।

যৎকালে গবর্ণমেন্ট ভারতবর্ষস্থ নিষ্করভোগীদিগের প্রতি এইরূপ নিষ্পাদন করেন, তৎকালে এদেশস্থ কোন সুপ্রসিদ্ধ ব্যক্তি, তাঁহার ইংলণ্ডবাসী জনৈক আত্মীয়কে লেখেন “আপনারা, ইংলণ্ডে বসিয়া, কেবল পূর্ব, পশ্চিম, ও উত্তরে আমাদের যে যুদ্ধ উপস্থিত হইয়াছে, তাহারই সংবাদের প্রতি মনোনিবেশ করিয়াছেন, কিন্তু এদেশের নিষ্কর ভূমি গ্রহণের অতি নিদাক্ষণ উপায় অবলম্বন করাতে, ভারতবর্ষের ইঙ্গরেজাধিকারস্থ প্রজারা, গবর্ণমেন্টের উপর, যে কত দূর অসন্তুষ্ট হইয়াছে, তাহা আপনারা কিছুই জানিতে পারিতেছেন না । এক্ষণে ‘আমি এই ভূমির অধিকারী’ ইহা কেহই বলিতে পারেন না । রাজপুরুষেরা গবর্ণমেন্টভুক্ত করিবার মানসে, বিবিধ ছলে, সূচ্যত্র ভূমি পর্য্যন্ত অনুসন্ধান করিতেছেন । তাঁহাদের কার্য্যপ্রণালী, স্পেনিশ্ ইনকুইজিসন্ হইতেও অপরূপ, ইহা বলিলেও স্বরূপ বর্ণনা হয় না । ভূমিই যাঁহাদিগের সর্বস্ব ধন, যাঁহারা এ পর্য্যন্ত ভূমির উপস্বত্ব দ্বারাই আপনাদের ও সম্মানসম্মতিদিগের গ্রাসাচ্ছাদন সম্পন্ন করিয়াছেন, এবং যাঁহারা, ঐ ভূমি আপন সম্পত্তি ভাবিয়াও, মরণান্তে ঐ ভূমি তাঁহাদের সম্মানদিগের উপজীবিকাস্বরূপ হইবে এই আশয়ে নিশ্চিন্ত হইয়া, সুখে কালাতিপাত করিয়া আসিতেছেন, সেই সকল ব্যক্তি, এক্ষণে এক জন অনীতিজ্ঞ কর্ম্মচারীর

লেখনীর সঞ্চালন প্রভাবে সেই সর্বস্ব ধনে বঞ্চিত হইলেন । ইহাও সম্ভব যে ঐ কর্মকারকগণ প্রভুর ইচ্ছামাধনে আপনারা কত দূর ব্যগ্র ইহা দেখাইবার জন্য, অথবা আপনাদের পদের উন্নতির নিমিত্ত এইরূপ বিচার করিতেছেন * ।

রাজা, ১২৪৮ বাঃ অব্দের অগ্রহায়ণ মাসে, উৎকট-জ্বরাক্রান্ত হইয়া, নবদ্বীপে নীত হন, এবং তথায় কয়েক দিন অবস্থান করণানন্তর ঐ মাসের ষড়্বিংশতি দিবসে মানবলীলা সম্বরণ করেন । তাঁহার বয়ঃক্রম পঞ্চান্ন বৎসর হইয়াছিল ।

গিরীশচন্দ্র অতি স্মৃতি ছিলেন, কিন্তু যৌবনাবস্থা অতিক্রম না করিতেই, শারীরিক নিয়ম লঙ্ঘনবশতঃ স্বাসরোগাক্রান্ত হইয়া ক্লেশ ও দুর্বল হইয়াছিলেন । ইনি কোন বিদ্যায় পারদর্শী ছিলেন না, কিন্তু সংস্কৃত ও পারস্য ভাষা অনর্গল কহিতে ও অনায়াসে বুঝিতে পারিতেন । সঙ্গীত শাস্ত্রে একরূপ ব্যুৎপত্তি ছিল ; অতি অল্প বুদ্ধি, লঘুচিত্ত, এবং নিতান্ত অসার ছিলেন ; সকলের কথাই শুনিতেন এবং সকলের প্রতিই বিশ্বাস করিতেন । তাঁহার দয়া ও ধর্ম যথেষ্ট ছিল, কিন্তু কুসংস্কার দোষে তাহা হইতে কোন হিতজনক ফল উৎপন্ন হয় নাই । ব্যয় করিবার বিলক্ষণ ইচ্ছা ছিল, কিন্তু আয়ের প্রতি দৃষ্টি ছিল না । পূর্বপুরুষের ন্যায়, ইহারও শাস্ত্রালাপে ও রহস্য বিষয়ে আমোদ ছিল । ইহার সভাতে নদীয়া জেলার অন্তর্গত বাগোয়ানের সমিহিত বাঁড়েবাঁকা গ্রামবাসী বারেন্দ্রশ্রেণীর ব্রাহ্মণ কৃষ্ণকান্ত ভাট্টা নামক এক জন অসাধারণ দ্রুতকবি, সুরসিক, ও সদ্ভক্তা ছিলেন । রাজা তাঁহার নাম রসমাগর রাখেন, এবং তিনি ঐ নামেই সর্বত্র প্রসিদ্ধ হন । কেহ কোন

ভাবের এক বা সার্ব্ব চরণ অথবা এক চরণের কিয়দংশ বলিলে, তিনি ক্ষণ বিলম্ব ব্যতিরেকে, উপর্যুপরি ভিন্ন ভিন্ন ভাবে ও ভিন্ন ভিন্ন ছন্দে, তাহা অনায়াসে পূরণ করিতেন। তাঁহার নিজের ও প্রাচীন লোকের মুখে তদীয় রচিত যে সকল কবিতা শুনিয়াছি, দুর্ভাগ্যবশতঃ তন্মধ্যে উৎকৃষ্টগুলি বিস্মৃত হইয়াছি; সুতরাং, তাঁহার গুণের সম্পূর্ণ পরিচয় দিতে পারিলাম না। যে সকল কবিতা এখনকার প্রায় সকল প্রাচীন লোকেই জানেন তাহার মধ্যে কয়েকটি পশ্চাৎ উদ্ধৃত করিতেছি। যথা, একদা রাজমহিষী রাজার অপ্রিয় বাক্য শ্রবণে, ব্যথিতান্ত্রকরণে স্বামিকে কহিলেন “বল বল বল।” রাজা অন্তঃপুর হইতে বহির্গত হইয়া রসমাগরকে কহিলেন “বল বল বল।” কবিবর তৎক্ষণাৎ ঐ সমস্যার এইরূপ পূরণ করিলেন ;—

দম্পতি কলহে স্বামী হয়ে ক্রোধ মন ।

কহেন প্রেয়সী প্রতি অপ্রিয় বচন ॥

পতিবাক্যে মতী চক্ষে জল ছল ছল ।

বলিতে দিয়াছে বিধি বল বল বল ॥

মহারাজা মতীশচন্দ্র জন্ম গ্রহণ করিলে, রাজা, পৌত্রলাভে, যার পর নাই পুলকিত হইয়া, রসমাগরকে কহিলেন “মহী দূর কর মেয় নৃত্য করি।” তিনি ইহার এইরূপ পূরণ করিয়া দিলেন,

নৃপনন্দননন্দন রাজধানী অবতীর্ণ

য্যায়সে গোকুলে অবতার হরি ।

চউদ্য ভুবন জন নাচেত গাওয়েত

চৌমট্ যোগিনী তাল ধরি ॥

অপ্সর কিন্নর দশদিগধীশ্বর
 তর্ তর্ শ্রীল গিরীশপুরী ।
 এংনেক বোলে অহিরাজ কহে
 মহী দূর কর মেয় নৃত্য করি ॥

পূর্বে উল্লেখ করা গিয়াছে, যৎকালে প্লোডিন সাহেব নামে
 এক জন বিশেষ ক্ষমতা প্রাপ্ত ডেপুটীকালেক্টর রাজার
 সমস্ত দেবোত্তর ও ব্রহ্মোত্তর আটক করেন, তৎকালে রাজ-
 সংসারের যৎপরেণাস্তি অপ্রতুল হয়, এবং তদানীন্তন কর্ম্মাধ্যক্ষ
 রামমোহন মজুম্ভার নানা কৌশলে রাজার সংসার যাত্রা নির্বাহ
 করেন। তিনি ধনাভাবে সকলকে মিথ্যা আশ্বাস দিতেন এবং
 মিথ্যা অঙ্গীকার করিতেন ; তিনি, দিব দিচ্চি বলিয়া, অনেক
 দিন রসমাগরের বেতন দেন নাই। মজুম্ভার এক দিবস রাজ-
 সভায় আছেন, এমন সময়ে, রসমাগর তাঁহার নিকট বেতন
 চাহিলেন। মজুম্ভার বিরক্ত হইয়া কহিলেন “আর মেনে
 পারিনে।” রাজা কহিলেন, “রসমাগর আর মেনে পারিনে।” কবি
 অবিলম্বে ইহার পাদপূরণ করিলেন, যথা ;

দাঁড়ি ফেলে শ্রীফেঁদে, স্নুধু হাঁড়ি পাত বেঁদে,
 রেখেছি বচনে ছেঁদে, আশা ভঙ্গ করিনে ।
 সবে বলে মজুম্ভার, দয়া ধর্ম্ম কি তোমার,
 তিরস্কার পুরস্কার, তুণ বোধ করিনে ॥
 খরচ চাই দণ্ড দণ্ড, নামিলে রজত খণ্ড,
 কোনরূপে কর্ম্মকাণ্ড, ক্রিয়ে-পণ্ড করিনে ।
 কোম্পানি কুপিত তায়, দ্বাদশ সূর্য্য উদয়,
 প্লোডিনের পূর্ণোদয়, বাঁচিওনে মরিওনে ॥

সকলি দুঃখের পাড়া, এ রসমাগরে চড়া,
 শ্রীচরণ ছায়া ছাড়া, কার ধার ধারি নে ।
 তিন দিগে তিন তেতয়া, কি হইবে অপরাধা,
 কুল দেও মা জগদম্বা, আর মেনে পারিনে ॥

এক দিবস, রাজা নগর পরিভ্রমণ করিয়া আসিবামাত্র রসমা-
 গরকে কহিলেন “গাভীতে ভক্ষণ করে সিংহের শরীর ।” কবির
 কিঞ্চিৎ কাল চিন্তা করিয়া উত্তর করিলেন,—

কৃষ্ণের নগর কৃষ্ণনগর বাহির ।
 বারোয়ারি মা ফেটে হয়েছেন চৌচির ॥
 ক্রমে ক্রমে খড় দড়ি হইল বাহির ।
 গাভীতে ভক্ষণ করে সিংহের শরীর ॥

একদা রাজা অৰ্দ্ধগ্রাস চন্দ্রগ্রহণ দর্শন করিয়া কহিলেন,
 রসমাগর “খেতে খেতে খেলেনা ।” তিনি কহিলেন,—

কেঁদে কহে বিরহিণী, মণিহারী যেন কণি,
 অভাগীর পক্ষে হিত, কেহ ত করিলে না ।
 অবলার ভাগ্যফলে, পশুপতির কোপানলে,
 মদনেরে এক কালে, দহিয়ে দহিলে না ॥
 সেতুবন্ধে নানাগিরি, উপাড়িয়া বাঁধে বারি,
 হনুমান্ বলবান্, মলয়া ভাঙ্গিলে না ।
 হেদে বেটা চণ্ডালিয়ে, পূর্ণ শশী মুখে পেয়ে,
 গ্রহণেতে গ্রাসিয়ে, খেতে খেতে খেলেনা ॥

এক দিন শান্তিপুরের ঘাটে নৌকাতে রাজা ও রসমাগর
 আছেন, এমন সময়ে এক ডাকবাহক, ডাক পুলিন্দা স্বন্ধে করিয়া

ভাগীরথী তীরে উপনীত হইল, এবং পারশ্বাটের নৌকার নাবিককে দেখিতে না পাইয়া, মুকুন্দ নামে কর্ণধারকে উর্দ্ধৈঃস্বরে ডাকিতে লাগিল। রাজা কহিলেন, ‘রসমাগর মুকুন্দ মুরারে।’ তিনি বলিলেন,—

পাপের পুলিন্দা বতে ভগ্ন হল পা রে ।

নিয়মিত ঘণ্টা মধ্যে যেতে হবে পারে ॥

নায়েতে নাহিক মাঝি ডাক রসনা রে ।

গোপাল গোবিন্দ কৃষ্ণ মুকুন্দ মুরারে ॥

রসমাগরের রচিত এই রূপ পাদপূরণ কবিতা বিস্তর আছে। কেবল তাঁহার প্রম্বকর্তার মনোগত ভাব অনুভব করিবার যে আশ্চর্য ক্ষমতা ছিল, তাহা প্রদর্শনার্থ উপরোক্ত কবিতা কয়েকটি লিখিলাম। এই সকল কবিতাতে যে সমুদয় ছন্দঃপতন দোষ দৃষ্ট হয়, তাহা কেবল দ্রুতরচনা নিবন্ধন হইয়াছে, নচেৎ যে সকল সংস্কৃত বা ভাষা কবিতা অন্য অন্য সময়ে মনো-নিবেশ পূর্বক রচনা করিতেন, তৎসমুদয়ে এ সমস্ত দোষ স্পর্শ হইত না; কিন্তু, তাঁহার ঈদৃশ দ্রুতকবিত্ব শক্তি থাকাতাই, তিনি এতাদৃশ খ্যাতি লাভ করিয়াছিলেন। কেহ সমস্যা দিলে, তিনি যে উপর্য্যুপরি ভিন্ন ভিন্ন ভাবে ও নানা ছন্দে, তাহা পূরণ করিতেন সে আরও চমৎকার। যথা, একদা রাজসভায় কোন ব্যক্তি সমাগত হইয়া এই সমস্যা উল্লেখ করিলেন যে, “নন্দের আলায়ে কৃষ্ণ রাধা সঙ্কে দোলে।” নন্দ নিকেতনে কৃষ্ণের রাধার সঙ্কে ছুলিবার অসম্ভাবনা প্রযুক্ত সমস্যাদাতার মনে এই সমস্যার উদয় হয়। রসমাগর প্রথমে চারি চরণে ইহা পূরণ করিলেন, রাজা, কবিতার অপূর্ব ভাবে সাতিশর

প্রীত হইয়া, তাঁহাকে চারি টাকা পুরস্কার দিবার ইচ্ছিত করিলেন। কবি মহারাজকে কহিলেন “যদি অনুজ্ঞা হয় তবে পুনরায় আর একভাবে ছয় চরণে ইহা পূরণ করি।” রাজা অনুমতি দিলেন, কবি দ্বিতীয় বার যাহা রচনা করিলেন তাহাও অতি চমৎকার হইল। রাজা পুনর্বার ছয় টাকা দিবার ইচ্ছিত করিলেন। রসসাগর, চরণে চরণে পুরস্কার দর্শনে উৎসাহিত হইয়া, রাজার অনুমতি গ্রহণপূর্বক তৃতীয়বার নূতন ভাবে আট চরণে এ সমস্যা পূরণ করিলেন (১)।

তাঁহার দ্রুতকবিত্ব ও পাদ-পূরণ-শক্তি যেমন চমৎকার ছিল, তাঁহার উপস্থিত বাকুপটুতাও তেমনি সকলের মনোরঞ্জন করিত। তিনি মধ্যে মধ্যে যে সরস বাক্য কহিতেন এবং সুমধুর উত্তর দিতেন, তাহার দুইটি পশ্চাৎ উল্লিখিত হইতেছে। একদা তিনি চৈত্রসংক্রান্তির পূর্বদিবস, রাজসংসারের কর্ম্মাধ্যক্ষ রামমোহন মজুমদারের নিকট, পরদিন কলসী উৎসর্গ করিতে হইবে বলিয়া, কিঞ্চিৎ বেতন চাহিলেন, এবং তাঁহার মনোরথ সিদ্ধ না হওয়াতে অতিশয় বিষাদিত হইয়া যুবরাজ শ্রীশচন্দ্রের সন্নিধানে গমন করিলেন। যুবরাজ কতিপয় বয়স্য সমভিব্যাহারে বসিয়া আছেন, এমন সময়ে তিনি উপস্থিত হইলেন। রাজকুমার তাঁহাকে জিজ্ঞাসা করিলেন “আজ নূতন কি?” তিনি উত্তর করিলেন “শাস্ত্রকারেরা নির্দেশ করিয়াছেন, কোন পিতৃক্রিয়া পণ্ড হইলে অরণ্যে রোদন করিয়া এই পাপের প্রায়শ্চিত্ত করিবে, একারণ আমি কিয়ৎক্ষণ মজুমদারের নিকট রোদন করিয়া আইলাম।” কোন সময়ে, এই জেলায় কোন বৈদ্য

(১) এই কয়েকটি কবিতা আমি কবির নিজের মুখে শুনিয়াছিলাম, কিন্তু হৃর্ভাগ্যবশতঃ স্মরণ না থাকাতে পাঠকদিগের গোচর করিতে পারিলাম না।

জাতীয় ভূম্যধিকারীর ভবনে কলিকাতানিবাসী, অধুনা লোকান্তর-বাসী, প্রসিদ্ধ স্মরসিক, সদ্বক্তা ও পাঁচালি গায়ক লক্ষ্মীকান্ত বিশ্বাস আইসেন ; ভূম্যধিকারী কোঁতুকাভিলাষী হইয়া রসমাগরকে সেই সময়ে লইয়া যান। এই উভয় বিখ্যাত স্মরসিকের পরস্পর বচনবৈদগ্ধ্যী শ্রবণার্থ সকলেই কোঁতুকাবিষ্ট হইলেন ; এজ্ঞাত এক সমৃদ্ধ সভা হইল। এই রাজাদিগের অধিকার মধ্যে, কোন বৈদ্য গলদেশে যজ্ঞোপবীত ধারণ করিতে পারিতেন না। যে গ্রামে এই ভূম্যধিকারীর বাস তাহা, ভিন্নরাজার অধিকার ; সে স্থানের বৈদ্যেরা ব্রাহ্মণের স্থায় পৈতা গলায় দিতেন ; স্মরণ্য, সেখানকার বিপ্র ও বৈদ্য শ্রেণী মধ্যে কিছুমাত্র প্রভেদ প্রত্যক্ষ হইত না। রসমাগর আপন পৈত্নাতে এক কড়া কড়ি বাঁধিয়া উপস্থিত হইলেন এবং ইহার কারণ কি, জিজ্ঞাসিত হইলে উত্তর করিলেন “এ বায়ুণে পৈতে” ইহা শ্রবণ মাত্রে ব্রাহ্মণেরা অতীব হাস্য করিয়া উঠিলেন, এবং বৈদ্যেরা অতিশয় লজ্জিত হইলেন। লক্ষ্মীকান্ত একচক্ষুহীন এবং রসমাগর ত্রিবিহীন ছিলেন। লক্ষ্মীকান্ত “আমুন আটপুণে ঠাকুর” বলিয়া রসমাগরকে সম্ভাষণ করিলেন ; রসমাগর তৎক্ষণাৎ “থাকুরে বেটা চারিপুণে” বলিয়া, এই শিষ্টাচারের প্রতিশোধ দিলেন। সভাস্থগণ উভয়কেই জিজ্ঞাসা করিলেন “আপনাদের কি বাক্‌চাতুর্য্য হইল, তাহা আমরা বুঝিতে পারিলাম না।” রসমাগর কহিলেন “প্রথম সম্ভাষণকারীকে জিজ্ঞাসা করুন।” লক্ষ্মীকান্ত উত্তর করিলেন “এ ঠাকুরটির আটপুণের (অর্থাৎ দৈবজ্ঞ ব্রাহ্মণের) আকার কি না ; দেখুন।” রসমাগর প্রত্যুত্তর দিলেন “হাঁ, আমি আটপুণে বটে, কারণ আমার দুই চোখ, কিন্তু ও বেটার চারি পোণে এক চোখ।

এ রাজার সময়েও সংগীত শাস্ত্রের আলোচনা ভাল রূপ ছিল । তাঁহার পিতার সময়ের কএক জন বিদেশীয় ও স্বদেশীয় (১) বিখ্যাত গায়ক ও বাদক তাঁহার সময়েও বর্তমান ছিলেন । এতদ্ব্যতীত তিনি বিষয়াধিকারী হইবার অব্যবহিত পরেই, দিল্লি হইতে কায়েমখাঁ নামক এক জন গায়ক সপরিবারে হঠাৎ উপস্থিত হন । তাঁহার তুল্য ব্যুৎপন্নকেশরী গায়ক বঙ্গ রাজ্যে আর কখন আইসেন নাই । তিনি রাজসভায় উপনীত হইয়া নিবেদন করিলেন, মহারাজ, আমি দিল্লীশ্বর মহম্মদ সাহার গায়ক ছিলাম, তিনি স্বর্গারোহণ করাতে নিরাশ্রয় হইয়াছি । দিল্লী হইতে যে সকল গুণিগণ এদেশে আসিতেন, তাঁহাদের মুখে আপনার গুণমর্যাদক জনকের প্রভূত প্রশংসা শুনিয়াছিলাম ; একারণ তাঁহার আশ্রয়ে থাকিব ভাবিয়া বহু ক্লেশ স্বীকার পূর্বক এত দূর আসিয়াছি ; কিন্তু তাঁহার পরলোক গমন হওয়াতে আমার সে আশাও মিথ্যা হইল ।” গিরীশচন্দ্র কহিলেন “আমি নির্ধন ব্রাহ্মণ, যদি আপনি অনুগ্রহ করিয়া আমার আশ্রয়ে থাকেন, তবে আমি আপনাকে স্বচ্ছন্দে রাখিতে ক্রটি করিব না ।” রাজা, এই বলিয়া, তাঁহার নিত্য ব্যয়ের নিমিত্ত মাসিক পাঁচশত টাকা নির্দ্ধারিত করিয়া দিলেন । কায়েম খাঁ অতি প্রাচীন হইয়াছিলেন, একারণ তিনি প্রায়ই গাইতেন না । মিয়াঁ খাঁ, হুমু খাঁ ও দেলাওর খাঁ নামে তাঁহার যে তিন স্ত্রপণ্ডিত পুত্র সঙ্গে ছিলেন, তাঁহারা গান করিতেন । কিছু কাল পরেই কায়েম লোকান্তর গমন করেন ও তদনন্তর মিয়াঁ ও তাঁহার পশ্চাদ্গামী হন । হুমু খাঁ বহুকাল রাজবাটীতে থাকেন ।

(১) এদেশীয় গায়ক দিগের মধ্যে গণপতি নামে একজন প্রসিদ্ধ গায়ক ছিলেন ।

তঁাহার স্বরের মাধুর্যের ন্যূনতা হইলে, তিনি, রাজার নিকট বিদায় লইয়া, প্রথমে কিয়ৎকাল শান্তিপুরে থাকেন, ও তৎপরে অবশিষ্ট জীবন কলিকাতায় বাপন করেন । কলিকাতার প্রসিদ্ধ গায়ক কালীপ্রসাদ মুখোপাধ্যায় ইহারি শিষ্য ছিলেন । কায়েমের কনিষ্ঠ পুত্র দেলাওর খাঁ যাবজ্জীবন রাজবাটীতেই থাকেন ; মহারাজা ত্রিশচন্দ্র ইহারি শিষ্য ছিলেন ।

চতুর্বিংশ অধ্যায় ।

যখন রাজা গিরীশচন্দ্র পরলোক গমন করেন, তখন তদীয় দত্তক পুত্র মহারাজা ত্রিশচন্দ্র দ্বাবিংশতি বর্ষ বয়ঃক্রম অতিক্রম করিয়াছিলেন । পিতা বর্তমানেই তিনি সাংসারিক ভার গ্রহণ করেন ইহা পূর্বেই বর্ণিত হইয়াছে । বাল্যাবস্থা হইতেই, তিনি বিষয় বৃদ্ধি করিবার নিমিত্ত যথেষ্ট যত্ন ও শ্রম করিয়াছিলেন, কিন্তু পিতা বর্তমানে কোন রূপেই পূর্ণমনোরথ হইতে পারেন নাই । এক্ষণে স্বাধীন হওয়াতে আপনার বাঞ্ছা পূর্ণ করিতে বদ্ধপরিকর হইলেন । তিনি প্রথমে সাংসারিক ব্যয়ের অনেক সঙ্কোচ করিলেন, তদনন্তর যে সকল নিষ্কর মহাল, গবর্ণমেণ্ট সকার করিয়া, তঁাহার পিতার হস্ত-বহিভূত করত, খাস তহসিলে রাখিয়াছিলেন, অথবা অত্রেকে ইজারা দিয়াছিলেন, তৎসমুদায় ক্রমশঃ বন্দোবস্ত করিয়া লইতে লাগিলেন, এবং এই সকল মহালের পূর্বকার যে রাজস্ব দেনা ছিল, তাহা পরিশোধ করিবার কিস্তিবন্দি করিলেন । এই রূপে, সংসারের আবল্য অনেক দূরীভূত হইলে, তিনি সম্পত্তির উন্নতি সাধনে প্রবৃত্ত হইলেন ।

কাশীনাথ বন্দ্যোপাধ্যায় ও মধুসূদন সাণ্ড্যাল উখড়া এজ-
মালিতে নিলাম খরিদ করেন ; কিন্তু পরে, ঐ পরগণা বিভাগ
করিয়া লন । মধুসূদন, ডিহি উসতপুর ও ডিহি শড়ক গোবিন্দ-
নগর পান । কিছু কাল পরে, প্রথমোক্ত ডিহি ডেবিড্ সাহে-
বের নিকট ও শেষোক্ত ডিহি হারিস্ সাহেবের নিকট বিক্রয়
করেন । রাজা ১২৫৩ বাঃ অব্দের ১২ ই ফাল্গুনে, ডেবিড্ সাহে-
বের অংশ ও ১৮৪৮ খৃঃ অব্দের ৫ ই এপ্রিলে, হারিস সাহেবের
অংশ ক্রয় করিলেন । এই দুই ডিহি পাওয়াতে রাজার যার পর
নাই আচ্ছাদ হয় ; কারণ এই উভয় ডিহি অধিকৃত হওয়াতে
কৃষ্ণনগরের মধ্যে পাঁচ মৌজা ও তাহার সন্নিহিত সতের মৌজার
উপর তাঁহার প্রভুত্ব হইল । পূর্বে কৃষ্ণনগরের চারি আনা মাত্র
তাঁহার ছিল, এফগে বারো আনা হইল । রাজা, কিছু দিন পরে,
নবদ্বীপ অধিকার করিবার জন্য অতিশয় ব্যগ্র হইলেন । নবদ্বীপ
উখড়া পরগণার অন্তর্গত, সুতরাং ঐ পরগণা নিলাম হওয়াতে
তাহাও নিলাম হইয়া যায় । ইদানীং এই নগরের মধ্যে, তেঘরি
ও কালীনগর নামে দুই নিকর মৌজা ও একটি পাড়া মাত্র
রাজসংসারের ছিল ।

যখন উভয় ক্রেতা এই পরগণা পরস্পর বিভাগ করিয়া লন,
তখন নগরের দক্ষিণাংশ কাশীনাথের ও উত্তরাংশ মধুসূদনের হয়,
এবং বুঁইচিআড়া নামে এক মৌজা সাধারণের থাকে । কিয়ৎ
কালানন্তর মধুসূদনের অংশ রাসমণি ক্রয় করেন ; রাজা ঐ
দুই অংশই ক্রয় করিবার অথবা পত্তনী লইবার যত্ন করিতে
লাগিলেন । পরে বহু যত্নে ও উচ্চ পণে কাশীনাথের অংশের
কিয়দংশ ১২৫৯ বাঃ অকীতে ও অবশিষ্টাংশ ১২৬১ অকীতে,
পত্তনি লইলেন ; রাসমণির অংশ কোন রূপেই পাইলেন না ।

তাঁহার পিতা পাঁচবাড়িয়া, সন্দহ ও ঘৃণী নামে যে তিন মৌজা পত্তনী দিয়াছিলেন, তিনি তাহা কৃষ্ণনগরের সংলগ্ন বলিয়া, বহু যত্নে ও ব্যয়ে ছেপত্তনী লইলেন। কৃষ্ণনগরের অবশিষ্টাংশও তিনি লইতে বিলক্ষণ রুতসংকল্প হইয়াছিলেন ; কিন্তু তাঁহার এক জন লোকের বিশ্বাসঘাতকতা প্রযুক্ত এ বিষয়ে সফল-যত্ন হইতে পারেন নাই।

ইংলণ্ডে রাজা কর্তৃক কেহ লাভ বা অন্য কোন সম্ভ্রান্ত উপাধি প্রাপ্ত হইলে তাহা যেমন পুঙ্খানুক্রমে তাঁহার বংশের থাকে, ভারতবর্ষে যখন অধিকার কালে সেরূপ প্রথা ছিল না। কোন সম্ভ্রান্ত উপাধি কেহ রাজার নিকট স্বয়ং না লইলে, তাঁহার পূর্ব পুঙ্খের ঐ উপাধি ছিল বলিয়া তাহা ধারণ করিতে পারিতেন না। এ সকল উপাধি কেবল সম্রাটেরাই দিতেন ; নবাব অথবা অন্য কোন রাজপুঙ্খরা দিতে পারিতেন না ; একারণ, এ দেশ ইংরাজদের অধিকৃত হইলে, কোম্পানিও এই সকল উপাধি দিবার অধিকার আপন হস্তে রাখিলেন। রাজা শিবচন্দ্র নবাবের নিকট মহারাজাধিরাজ উপাধি গ্রহণ করেন ; কিন্তু গবর্ণর জেনেরলের মঞ্জুর করিয়া লন। রাজা ঈশ্বরচন্দ্র ও গিরীশচন্দ্র “ইঙ্গরেজ দিগের নিকট উপাধি লইলে কি মান বাড়িবেক” এই অহঙ্কার করিয়া পৈতৃক উপাধির প্রার্থী হন নাই। রাজা ক্রীশচন্দ্র পিতা ও পিতামহ অপেক্ষা বুদ্ধিমান ছিলেন, সুতরাং তিনি, তাঁহাদের দৃষ্টান্তের অনুগামী না হইয়া, ইঙ্গরেজ গবর্ণমেন্টের নিকট পৈতৃক উপাধির প্রার্থী হইলেন। গবর্ণর জেনেরল ডালহৌসি সাহেব, ১৮৪৮ খৃঃ অব্দের জুলাই মাসের সপ্তবিংশ দিবসে, তাঁহার মহারাজা উপাধির ফরমান লেখাইয়া নদীয়া জেলার কালেক্টর সাহেবের নিকট পাঠাইয়া দিলেন।

কালেক্টর সাহেব কৃষ্ণনগরের কালেক্জ গৃহে, বহু সমারোহ পূর্বক, এক সভা করিয়া রাজাকে ঐ ফরমাণ প্রদান করিলেন । কিছু দিন পরে, প্রেসিডেন্সি বিভাগের কমিশনর সাহেব কৃষ্ণনগরে আসিয়া এ জেলাস্থ সমস্ত স্বদেশীয় ও বিদেশীয় সম্ভ্রান্ত ব্যক্তিগণকে আহ্বান পূর্বক, এক সভা করেন এবং ঐ সভাতে রাজার বহু প্রশংসাবাদ করিয়া, তাঁহাকে গবর্ণমেন্ট প্রদত্ত খেলত দেন ।

কিয়ৎকালানন্তর, শ্রীশচন্দ্র নদীয়া জেলাস্থ অনেক ভদ্র ও বুদ্ধিমান লোকের সহিত পরামর্শ করিয়া, রাজবাটিতে এক সাধারণ-হিতকরী সভা সংস্থাপন করিলেন এবং স্বয়ং ইহার সভাপতি হইলেন । সভ্যগণ প্রথমে নিষ্কর ভূমি-ভোগীদিগের দুর্বস্থার প্রতিকার করিতে প্রবৃত্ত হইলেন এবং ১৮৫০ খৃঃ অব্দে নদীয়া জেলাস্থ প্রায় বাবতীয় নিষ্কর ভূমির অধিকারিগণের স্বাক্ষরিত এক আবেদন পত্র সদর বোর্ডে দেওয়াইলেন । তৎকালে বোর্ডের প্রধান মেম্বর প্রসিদ্ধ সূহৃদয় ও সুবিচারক শ্রীযুত এইচ রিকেটস সাহেব ছিলেন । তিনি নদীয়া জেলার তদানীন্তন কমিশনর জে. জে. হার্বি সাহেবের নিকট ঐ আবেদন পত্রের উত্তর চাহিলেন । কমিশনর, আপনার কৃত-কার্য স্থিরতর রাখিবার জন্য, যার পর নাই প্রয়াস পাইলেন এবং রোষাবিষ্ট চিত্তে রাজার আরও অনিষ্ট করিতে প্রবৃত্ত হইলেন ; কিন্তু কিছুতেই তিনি আপনার দুষ্ট চেষ্টা সফল করিতে পারিলেন না । বোর্ডের সাহেবেরা, বাঙ্গালা গবর্ণমেন্টের অনুমতি লইয়া, লাখেলাজ ভূমির খাজানার নিরিখ তদন্ত করণার্থ, ই, টি, ট্রিবার সাহেবকে, ২৮ এ ডিসেম্বর, মফস্বলে পাঠাইলেন এবং তদন্তে হার্বি সাহেবের অবিচার সপ্রমাণ হইলে, ১৮৫২ খৃঃ অব্দের সেপ্টেম্বর মাসের দ্বিতীয় দিবসে, দুই শত টাকার অনধিক জমার মহালের রাজস্বের

তৃতীয়াংশ ও দুই শত টাকার অধিক জমার মহালের চতুর্থাংশ বাদ দিবার, এবং ঐ সকল মহাল, গবর্ণমেন্টভুক্ত হওয়ার ছয় মাসের পর হইতে, অধুনাতন ন্যূন জমানুসারে সদর খাজানার হিসাব করিলে, লাখেরাজদারগণের যে টাকা প্রাপ্য হয়, তাহা তাঁহাদিগকে ক্ষুদ্র সহিত প্রত্যর্পণ করিবার, আর বাকী খাজানার নিমিত্ত যে সকল মহাল নিলাম হইয়া গবর্ণমেন্টকর্তৃক ক্রীত হইয়াছিল, তৎসমুদায় লাখেরাজদারগণকে ফিরিয়া দিবার জন্য, বাঙ্গালা গবর্ণমেন্টকে অনুরোধ করিলেন। তৎকালে, বাঙ্গালা গবর্ণমেন্টের প্রধান সেক্রেটারি মহামতি জে, পি, গ্রাণ্ট সাহেব ছিলেন; তিনি, কেবল ক্ষুদ্র দিবার অনুরোধ ব্যতীত, বোর্ডের আর সমস্ত অনুরোধ রক্ষা করিয়া, সেপ্টেম্বর মাসের সপ্তদশ দিবসে, বোর্ডে পত্র লিখিলেন (১)। এই ব্যাপার সম্পন্ন করিতে, রাজার বিস্তর অর্থ ব্যয় ও প্রভূত পরিশ্রম হয়। অন্য অন্য লাখেরাজদারগণের আবেদন পত্রে আপন আপন নাম স্বাক্ষর করা ব্যতীত আর কিছুই করিতে হয় নাই। রাজা স্বীয় লাভে যতদূর সম্ভব হইয়াছিলেন, তাঁহার দ্বারা শত শত লোকের মহোপকার হওয়াতে, তাহার চতুর্গুণ সম্ভব হন। তাঁহার পূর্বপুরুষেরা ভূমি দান করিয়া যেরূপ আশীর্বাদ-ভাজন হইয়াছিলেন, তিনি, ঐ সকল রক্ষা করিয়া দেওয়াতে, সেইরূপ আশীর্বাদ ভাজন হইলেন। হার্বি সাহেব, কমিশনরের পদের অযোগ্য স্থির হইয়া, অন্য পদে নিযুক্ত হইলেন।

(১) বাঙ্গালার গবর্ণমেন্টের উপরোক্ত পত্রের এক স্থানে এইরূপ লিখিত আছে যে, “অসঙ্গত কর স্থাপনে নদীয়া জেলার লোকেরা যে বিষম ক্লেশ পাইয়াছে, এবং ভগ্নবন্ধন রাজস্ব সংক্রান্ত বিচারের যে কলঙ্ক হইয়াছে, যদি এত ক্ষতি (অর্থাৎ অনেক টাকা লাখেরাজদারগণকে ফিরিয়া দিতে হইবেক) স্বীকার করিলেও, তাহার অপনয়ন হয়, তথাপি মঙ্গল বলিতে হইবেক।

কিছু দিন পরে, রাজা এতদ্দেশে বেদবিহিত ধর্ম সংস্থাপন ও স্বদেশের কলুষিত রীতি সংশোধন করিতে যত্নবান্ হইলেন। তিনি, প্রথমতঃ, মনু, স্মৃতি, ভগবদ্গীতা, উপনিষদ, ইত্যাদি গ্রন্থ পাঠে প্রবৃত্ত হন, তদনন্তর, নবদ্বীপ ও ভাটপাড়া প্রভৃতি নানা স্থানের বৈদান্তিক, নৈয়ায়িক, ও স্মার্ত পণ্ডিতগণের সহিত বেদবিহিত পরব্রহ্মের উপাসনা এবং শাস্ত্রানুমোদিত বিধবা-বিবাহ বিষয়ের বিচার করেন। বুদ্ধিমান্ ও বিদ্বান্ পণ্ডিত-গণের মধ্যে যাঁহারা সরলচিত্ত, তাঁহারা মহারাজের অভিপ্রায় শাস্ত্র-সম্মত ও সর্ব-জন-হিত বলিয়া স্বীকার করিলেন, কিন্তু দেশাচার ভয়ে, জন সমাজে আপনাদের মত প্রকাশ করিতে, বা তদনুযায়ী ব্যবস্থা দিতে, সাহস করিতে পারিলেন না। তাঁহাদের প্রধান ভয় এই হইল যে, তাঁহারা এই মত ব্যক্ত করিলে, সাধারণে, তাঁহাদিগকে নাস্তিক বলিয়া, তাঁহাদের নিম-স্রণ রহিত করিবেন। কেহ কেহ কহিলেন, “যদি আমাদিগের অন্যের দ্বারে যাইতে না হয়, জীবিকা-নির্বাহের এরূপ সংস্থান করিয়া দিতে পারেন, তবে যুক্তকণ্ঠে আমাদিগের মত প্রচারিত করিতে পারি। রাজার তাদৃশ ধন ছিল না, স্মরণ্যে তাঁহাদের আনু-কূল্য পাইলেন না। এই সময়ে, তিনি মধ্যে মধ্যে অত্যন্ত আক্ষেপ পূর্বক কহিতেন “যদি আমার ন্যায় আমার পূর্বপুরুষদিগের ইচ্ছা থাকিত, কিম্বা তাঁহাদের তুল্য আমার বিভব ও প্রভুত্ব রহিত, তাহা হইলে, বঙ্গদেশের এ সকল দূষিত আচার ব্যব-হারের সংস্কার করা ঈদৃশ দুর্লভ হইত না। যাহা হউক, তিনি আপন অভিপ্রেত সাধনে হতাশ হন নাই।

১২৪৩ কি ৪৪ বাঃ অব্দে, কৃষ্ণনগর নিবাসী দেশহিতৈষী শ্রীযুক্ত শ্রীপ্রসাদ লাহিড়ী নিজ নিকেতনে এক অবৈতনিক

ইংরাজি বিদ্যালয় স্থাপন করেন। তিনি একাদশ কি দ্বাদশ বৎসর বয়সে, কলিকাতার সুবিখ্যাত হেয়ার সাহেবের স্কুলে প্রবিষ্ট হন, এবং সে বিদ্যালয়ের অধ্যয়ন সমাপন করিয়া বাটী আইসেন। তিনি আন্তরিক যত্ন ও পরিশ্রম পূর্বক অধ্যাপনা করিতেন, এবং দরিদ্র ছাত্রগণকে পাঠ্য পুস্তক ও কাগজ কলম দিতেন। এই সকল কারণে, অনতিকাল মধ্যে, তাঁহার বিদ্যালয়ে অনেক বালক পড়িতে লাগিল। ইদানীং এ প্রদেশে ইংরাজি বিদ্যা শিক্ষার যেরূপ আগ্রহ হইয়াছে, তদানীং সেরূপ ছিল না, তথাপি, ছাত্রের সংখ্যা প্রায় এক শত হইয়াছিল। শ্রীপ্রসাদের অগ্রজ সুপ্রসিদ্ধ শ্রীযুক্ত রামতনু লাহিড়ী, সে সময়ে, কলিকাতার হিন্দু কলেজের এক জন শিক্ষক ছিলেন। তিনি অবকাশ মতে যখন বাটী আসিতেন, তখন এই বিদ্যালয়ের ছাত্রগণকে ধর্ম-সংক্রান্ত নানা প্রকার সুপদেশ দিতেন। তৎকালে, শ্রীপ্রসাদের স্বদেশীয় প্রচলিত ধর্মের প্রতি সম্পূর্ণ অন্ধা ছিল, সুতরাং, তিনি, প্রথমে এই ধর্ম বিরুদ্ধ কোন উপদেশ দিতেন না। ক্রিয়াকালানন্তর, তিনি ও তাঁহার সমবয়স্ক দুই তিন জন ছাত্র স্বদেশের ধর্ম ও রীতিনীতির গুণাগুণের বিষয় আলোচনা করিতে আরম্ভ করেন, এবং ক্রমশঃ সাকার উপাসনার অলীকতা ও প্রচলিত আচার ব্যবহারের দোষ গুণ বুঝিতে পারেন। তিনি পূর্বে ছাত্রগণের মনোবৃত্তির উন্নতিসাধনে যেমন যত্ন করিতেন, ইদানীং ধর্মপ্রবৃত্তির উৎকর্ষ সম্পন্ন করণেও তেমনি যত্নবান হইলেন।

কিছুদিন পরে, তিনি এবং তাঁহার মতাবলম্বী ছাত্রগণ আপন আপন প্রতিবেশী ও আত্মীয় গণের কুসংস্কার দূরীভূত করিতে প্রগাঢ় যত্ন করিতে লাগিলেন। ঐ সময়ে, সোনডেকানিবাসী অধুনা

কৃষ্ণনগরবাসী শ্রীযুক্ত ব্রজনাথ মুখোপাধ্যায় এই নগরস্থ মিশনরি স্কুলের শিক্ষক ছিলেন ; মিশনরির। তাঁহাকে খৃষ্টীয় ধর্মাবলম্বী করিতে বহু প্রয়াস পাইয়াছিলেন, কিন্তু সফলযত্ন হইতে পারেন নাই । তিনি এক ব্রহ্মবাদী হইয়াছিলেন বটে, কিন্তু খৃষ্টির ঈশ্বরত্বের প্রতি তাঁহার বিশ্বাস হয় নাই । তিনিও শ্রীপ্রসাদের অনুকরণ করিয়া আপনার ছাত্র ও বান্ধবদিগের দূষিত সংস্কার সকল দূরীভূত করণে প্রবৃত্ত হন ; এইরূপে কৃষ্ণনগরে প্রচলিত ধর্মের বিপ্লব হইয়া উঠে । ক্রমে ক্রমে নগরের অনেক যুবা এই অভিনব মতের অনুরাগী হইলেন ; যদিও তাঁহাদের বাহ্যিক ভাবের বড় বৈলক্ষণ্য হইল না, কিন্তু আন্তরিক ভাবের প্রভূত পরিবর্তন হইল । নূতন সম্প্রদায়ের আন্তরিক ভাব যে এক কালে সাধারণের অগোচর ছিল এমনও নহে, নগরের অনেক প্রধান-বংশোদ্ভূত যুবকগণ ঐ সম্প্রদায়ভুক্ত হইয়া ছিলেন, এবং রাজা তাঁহাদিগকে যথেষ্ট শ্রদ্ধা ও আদর করিতেন, এই বলিয়া, কোন গোলযোগ উপস্থিত হইত না । ১৮১৬ খৃঃঅব্দে, মহামতি লার্ড হারডিঞ্জ মহোদয় কর্তৃক কৃষ্ণনগরে কলেজ প্রতিষ্ঠিত হইলে, শ্রীপ্রসাদ আপন ছাত্রগণকে ঐ বিদ্যালয়ে প্রবিষ্ট করাইয়া নিজের স্কুল উঠাইয়া দিলেন । তাঁহার ছাত্রদিগের মধ্যে, শ্রীযুক্ত উমেশচন্দ্র দত্ত ও শ্রীনাথ সেন প্রভৃতি কয়েক জন, কলেজের প্রথম বৎসরের পরীক্ষাতেই জুনিয়ার ছাত্ররূপে পান ।

১৮৩৭ খৃঃঅব্দে, রাজা শ্রীশচন্দ্র ইন্দরেজি ভাষা পড়িতে আরম্ভ করেন । তাঁহার এই বিদ্যা শিখিবার বিলক্ষণ আগ্রহ ছিল, কিন্তু সর্বদা বিষয় ব্যাপারে ব্যাপৃত ও বিবিধ সাংসারিক কার্যে অস্থির চিত্ত থাকাতে তিনি যথোচিত মনোনিবেশ করিতে পারিতেন না । তথাচ ইউরোপের অনেক রীতিনীতি জানিতে পারিবেন বলিয়া

তাহাতে অনুরাগী হন ; কিন্তু তৎকালে পিতার ভয়ে, চিত্ত-গত ভাব প্রকাশ বা মনোমত কার্য্য করিতে পারেন নাই ; কেবল গোপনে নবমস্প্রদায়কে উৎসাহ প্রদান করেন । পূর্বে সাধারণ বালকদিগের সহিত একাসনে উপবেশন ও কালেজের সাধারণ নিয়ম পালন করিতে হইবে বলিয়া, এদেশস্থ পুরাতন রাজ-বংশোদ্ভূত ভূম্যধিকারীরা, আপনাদের পুত্রগণকে কোন কালেজে বা স্কুলে দিতেন না । রাজা গিরীশচন্দ্রের পরলোক গমনের পর, রাজা শ্রীশচন্দ্র, ঐ প্রথা অবহেলন করিয়া, আপন জ্যেষ্ঠ পুত্র কুমার সতীশ চন্দ্রকে কৃষ্ণনগর কালেজে অধ্যয়ন করিতে দিলেন এবং আপনি কালেজ কমিটীর সভ্য হইলেন । তিনি, ঐ কমিটীর প্রতি অধিবেশন কালে উপস্থিত হইয়া, সভার কার্য্য নির্বাহ করিতেন, এবং প্রতিবৎসর ছাত্রগণের বঙ্গভাষার পরীক্ষার ভার লইতেন ।

তিনি ১৮৪৪ খৃঃাব্দে, এপ্রদেশস্থ তিন ব্যক্তিকে ব্রাহ্মধর্মে দীক্ষিত করিয়া, রাজা রামমোহন রায়ের স্থাপিত কলিকাতার তদানীন্তন ব্রাহ্ম সমাজের প্রণীত ব্রাহ্মধর্ম্ম গ্রন্থের নিয়ম পত্রে তাঁহাদের স্বাক্ষর করাইলেন, এবং ব্রাহ্মধর্ম্ম বিস্তার করণার্থ একজন বেদবিৎ উপদেষ্টাকে পাঠাইতে, তৎকালীন উক্ত সমাজাধ্যক্ষ শ্রীযুক্ত দেবেন্দ্রনাথ ঠাকুরকে পত্র লিখিলেন । তিনি সহসা বেদজ্ঞ ব্রাহ্মণ পণ্ডিত না পাইয়া, হাজারি লাল নামে একজন ব্রাহ্মধর্ম্ম প্রচারককে পাঠাইয়া দিলেন । হাজারি একে শূদ্র জাতি, তাহাতে আবার স্তম্ভের বেদবেত্তা ছিলেন না, একারণ রাজা সাতিশয় ক্ষুণ্ণ-মনা হইলেন । তৎকালে রাজার নিকট ভাটপাড়ানিবাসী গোবিন্দ-চন্দ্র বেদান্তবাগীশ নামে একজন পণ্ডিত ছিলেন ; তিনি বেদান্ত ও ন্যায় প্রভৃতি শাস্ত্রে সর্বিশেষ ব্যুৎপন্ন ছিলেন, কিন্তু লোক-

নিন্দাভয়ে, প্রকাশ্য রূপে বেদান্তধর্ম প্রচারে সম্মত ছিলেন না ; সুতরাং রাজা, হাজারিকে তৎক্ষণাৎ বিদায় না করিয়া, রাজ-বাটীতে তাঁহার বাসস্থান নির্দিষ্ট করিয়া দিলেন । দুই তিন দিবস পরে, রাজা কোন প্রয়োজনানুরোধে মুরশিদাবাদে গমন করিলেন, এবং হাজারি ও ব্রজনাথ মুখোপাধ্যায়ের প্রতি ব্রাহ্মধর্ম প্রচারের ভার অর্পণ করিয়া গেলেন । রাজা মাসাবধি মুরশিদাবাদে অবস্থান করেন ; এই কাল মধ্যে কৃষ্ণনগরে প্রায় চল্লিশ জন যুবা ব্রাহ্মধর্মে দীক্ষিত হইলেন, এবং জ্যৈষ্ঠ কি আষাঢ় মাসে দুই বুধবারে, সকলে একত্রিত হইয়া, পরব্রহ্মের উপাসনা করিলেন । রাজা, শূদ্র জাতীয় হাজারি সমাজের উপাচার্যের কার্য সম্পাদন করিতেছেন শুনিয়া সাতিশয় বিরক্ত হইলেন, এবং বাটী প্রত্যাগত হইয়া ব্রাহ্মদিগকে রাজবাটীতে সমাজ করিতে নিষেধ করিলেন । ব্রাহ্মগণ, আমিনবাজারে একটি ক্ষুদ্র বাটী ভাড়া করিয়া, তন্মধ্যে সমাজ সংস্থাপন করিলেন ; এবং আপাততঃ ব্রজনাথ মুখোপাধ্যায় উপাচার্যের কার্য সম্পাদন করিতে লাগিলেন । অল্পদিন মধ্যেই, দেবেন্দ্রনাথ ঠাকুর এক জন বেদবেত্তা ব্রাহ্মণ উপাচার্য প্রেরণ করিলেন । ব্রাহ্মগণের শ্রেণী যেমন বর্দ্ধিত হইতে লাগিল, নগর মধ্যে এ বিষয়ের আন্দোলনও তেমনি হইয়া উঠিল । গ্রামান্তরবাসী বাঁহারা বিষয়-কর্মোপলক্ষে গোয়াড়িতে বাস করেন, তাঁহারা ব্রাহ্ম ধর্মের অত্যন্ত বিদ্বেষী হইলেন । তাঁহারা বীরনগর-নিবাসী শ্রীযুক্ত বামনদাস মুখোপাধ্যায়কে সহায় করিয়া, গোয়াড়িতে এক ধর্মসভা প্রতিষ্ঠিত করিলেন, এবং ব্রাহ্মদিগের অনিষ্ট সাধনে প্রতিজ্ঞারূঢ় হইলেন, কিন্তু মহারাজা ব্রাহ্মগণের স্বপক্ষ থাকাতে, ব্রাহ্মধর্মের উন্নতি ব্যতীত অবনতি হইল না । কিছু দিন

পরে, দেবেন্দ্রনাথ ঠাকুরের আনুকূল্যে ও ব্রাহ্মগণের প্রযত্নে, ১৭৬৯ শকে (১৮৪৭ খৃঃ অব্দে) বর্তমান সমাজ মন্দির নির্মিত হইল। দেবেন্দ্রনাথ ঠাকুর, এই গৃহ নির্মাণার্থ, এক সহস্র টাকা দান করেন।

রাজা বেদানুমোদিত পরব্রহ্মের আরাধনা প্রচলিত করিবার নিমিত্ত অত্যন্ত ব্যস্ত হইয়াছিলেন, তথাপি বিধবাকামিনীদিগের অবস্থা এক দিনের নিমিত্তও বিস্মৃত হন নাই। তিনি এই স্থির করিয়াছিলেন যে, এ প্রদেশে বিধবা বিবাহ প্রচলিত করা শাস্ত্রের সহায়তার যতদূর হইবেক, কেবল যুক্তি অবলম্বন করিলে তত দূর হইবেক না; একারণ, যদ্যপিও এ দেশস্থ পণ্ডিতগণ বিধবাবিবাহ শাস্ত্রানুমোদিত স্বীকার করিয়াও তাহার ব্যবস্থা দিতে অসম্মত হন, তথাপি রাজা, এই ব্যবস্থা পাইবার নিমিত্ত, বিবিধ কৌশল অবলম্বন করেন। অবশেষে, নবদ্বীপস্থ কয়েক জন পণ্ডিতও পুরস্কার লাভাশয়ে ব্যবস্থা দিতে সম্মত হন। ব্যবস্থা গ্রহণের উদ্যোগ হইতেছে, এমন সময়ে, নগরস্থ নব্য সম্প্রদায় সহসা এখানকার কালেজ গৃহে এক সভা করিয়া স্বদেশের প্রচলিত রীতিনীতির বহুবিধ নিন্দাবাদ করণানন্তর বিধবাবিবাহ প্রচলিত করিতে যথাসাধ্য যত্ন করিবেন এইরূপ প্রতিজ্ঞা প্রকাশ করিলেন। ইহাতে বিকল্পবাদিগণ, নবমতাবলম্বীরা কালেজে একত্র হইয়া স্বহস্তে গোহত্যা করিয়া, তাহার মাংস ভোজন ও মদিরা পান করিয়াছেন, এইরূপ অপবাদ সর্বত্র রটনা করিয়া দিলেন। এই অমূলক কথা দূর ও অদূরবর্তী নানা স্থানে আন্দোলিত হইতে লাগিল। প্রথমে, বীরনগরবাসী বামনদাস মুখোপাধ্যায় আপন সম্পর্কীয় বালকগণের কালেজে যাওয়া রহিত করিলেন, এবং দুই তিন দিনের

মধ্যে অনেক ভদ্র লোক তাঁহার দৃষ্টান্তের অনুগামী হইলেন। কালেজে এরূপ সভা করিবার অনুমতি দিয়াছিলেন বলিয়া, কর্তৃপক্ষ কর্তৃক কালেজের অধ্যক্ষ তিরস্কৃত হইলেন। মহারাজা, যাহাতে কালেজের হানি না হয়, তদ্বিষয়ে সান্তিশয় যত্ন করিতে লাগিলেন। কিছু দিন পরেই, উপরোক্ত জনরবের মূল বৃত্তান্ত প্রচারিত হইল, এবং যে সকল বালক কালেজ পরিত্যাগ করিয়াছিল, তাহারা পুনরায় কালেজে প্রবেশ করিল, কিন্তু নগর মধ্যে এক বিবম দলাদলি হইয়া উঠিল। যাহা হউক, মহারাজার আনুকূল্য প্রযুক্ত নবদল সবল থাকিল, এবং দুই তিন বৎসরের মধ্যে, সমস্ত গোল তিরোহিত হইল। রাজা যে ব্যবস্থা লইবার উদ্দেশ্য করিয়াছিলেন, তাহা এই গোলযোগে বিফল হইয়া গেল।

এই নগরের মিশনারি স্কুলে অনেক দরিদ্র বালক অধ্যয়ন করিত। মিশনারিগণ ছাত্রদিগকে খৃষ্টীয় ধর্মাবলম্বী করণার্থ, হিন্দুধর্মের অলৌকিকতা ও খৃষ্টীয় ধর্মের সত্যতা প্রতীতি করাইবার নিমিত্ত, যথাসাধ্য প্রয়াস পাইতেন। তাঁহাদের উপদেশে, ছাত্রদিগের স্বদেশের ধর্মের প্রতি অশ্রদ্ধা জন্মিত, কিন্তু উপদেষ্টাদিগের ধর্মের প্রতিও বিশ্বাস হইত না; তাঁহারা কেবল নিরাকার-বাদী হইয়া উঠিতেন। পরে নগরে ব্রাহ্ম ধর্ম প্রচারিত হইতে আরম্ভ হইলে, অনেকেই ব্রাহ্ম ধর্ম গ্রহণ করিতে লাগিলেন, সুতরাং মিশনারিদিগের অভীষ্ট কোন মতে সিদ্ধ হইত না। বহু কালের পর, তাঁহাদের স্কুলের এদেশস্থ একজন খৃষ্টীয়-ধর্মাবলম্বী শিক্ষক, কৃষ্ণনগরের সম্বিহিত ভাৎজাংলা গ্রাম-বাসী চিন্তামণি নামক এক জন অপ্রাপ্ত-বয়স্ক ব্রাহ্মণ বালককে নানা কৌশলে খৃষ্টীয় ধর্ম গ্রহণ করিতে সম্মত

করেন। এক জন মিশনরি সাহেব তাহাকে নিজ নিকেতনে রাখেন, বালকের পিতা এই সংবাদ পাইয়া, প্রথমতঃ ঐ মিশনরি সাহেবের বাটী গমন পূর্বক পুত্রকে গৃহে আনিবার জন্ত অনেক যত্ন পাইলেন। গৃহে আসা সুদূরপর্যন্ত, পিতা, পুত্রের সহিত সাক্ষাৎ করিতেও পারিলেন না। দুর্ভাগ্য পিতা অতঃপর উপযুক্ত ধর্ম্যাধিকরণে মিশনরিদিগের নামে অভিযোগ করিলেন ; কিন্তু বিচারেও পরাজিত হইলেন। অনতিকাল মধ্যে, পুত্র খৃষ্টীয় ধর্ম গ্রহণ করিল। মিশনরিদিগের এইরূপ ব্যবহার ও ধর্ম্যাধ্যক্ষের এইরূপ বিচার দর্শনে, অনেকেই, সাতিশয় শক্তিত হইয়া, আপন আপন বাটীর বালকগণের মিশনরি বিদ্যালয়ে যাওয়া রহিত করিলেন। তৎকালে কালেজ ও মিশনরি স্কুল ব্যতীত, এ নগরে অন্য বিদ্যালয় ছিল না ; মিশনরি স্কুলে যে সকল বালক অধ্যয়ন করিত, তাহাদের কর্তৃপক্ষদের এরূপ সঙ্গতি ছিল না, যে, তাহাদিগকে কালেজে দেন ; সুতরাং নির্ধন বালকদিগের শিক্ষা এককালে রহিত হইবার সম্ভাবনা হইয়া উঠিল। যদ্যপিও তৎকালে, রাজা শ্রীশচন্দ্রের অবস্থা বড় ভাল ছিল না, তথাপি তিনি, ককণা-পরবশ হইয়া, আপন ভবনে এক অবৈতনিক বিদ্যালয় প্রতিষ্ঠিত করিলেন ; এই বিদ্যালয় অনেক দিবস উত্তম রূপে চলিয়াছিল। যৎকালে, লেপ্টেন্যান্ট গবর্নর হেলিডে সাহেব কৃষ্ণনগরে আগমন করেন, তখন তিনি, এই স্কুল দেখিয়া, সাতিশয় সন্তুষ্ট হন।

রাজা, বাল্যাবস্থা হইতে পঁত্রিশ বর্ষ বয়ঃক্রম পর্য্যন্ত, নিজের ও স্বদেশের হিত-চিন্তনে ও মঙ্গল-সাধনে সতত রত ছিলেন। তাহার পর, কলিকাতা-বাসী কতিপয় মধুর-ভাষী ধন-শালী ব্যক্তির সুধাচ্ছাদিত বিষপূরিত সংসর্গে তাঁহার আন্তরিক

ও বাহ্যিক ভাবের বিস্তার বিপর্যয় হইল। তাঁহার বিষয় কার্যে মনোনিবেশ করা অতি ক্লেশকর জ্ঞান হইতে লাগিল, এবং সুহৃদ্বর্গের সুহৃদ্বাক্য কর্ণকুহরে কর্ণকবৎ বোধ হইয়া উঠিল। আহার, বিহার, শয়ন, সকলই নিয়ম বহির্ভূত হইতে আরম্ভ হইল ; দিবানিশি, কেবল মদিরা পানে ও গীতবাদ্যের আমোদে কালান্ধিত করিতে লাগিলেন। দুই বৎসর মধ্যে, তাঁহার মনোবৃত্তি নিস্তেজ হইয়া উঠিল এবং শরীর অবসন্ন হইয়া আসিল ; অবশেষে, ১২৬৩ বাৎ অব্দের অগ্রহায়ণ মাসের ত্রয়োবিংশ দিবসে, ৩৮ বৎসর বয়সে, অকালে, কালগ্রাসে পতিত হইলেন।

শ্রীশচন্দ্র শ্রীমান্ ও বলবান্ ছিলেন ; তাঁহার স্থায়ী সুশীল, মিষ্টভাষী, নিরহঙ্কৃত, ও অক্রোধ পুরুষ, ধনবান্ লোকের মধ্যে অতি বিরল। তিনি বাল্যাবস্থায়, সংস্কৃত বিদ্যা ভালরূপে শিক্ষা করেন নাই, কিন্তু যৌবনাবস্থায়, সর্বদা মনু, স্মৃতি, ভগবদ্গীতা, বেদান্ত ইত্যাদি শাস্ত্রের অনুশীলন ও পণ্ডিতগণের সহিত তাহার আলোচনা করিয়া, এতদূর ব্যুৎপত্তি লাভ করেন যে, প্রায় সকল সংস্কৃত গ্রন্থেরই মর্ম্মগ্রহণে সমর্থ হইয়াছিলেন। পরাম্পরোক্ত যে বচন মূল করিয়া, মহামতি শ্রীযুক্ত ঈশ্বরচন্দ্র বিদ্যাসাগর, বিধবা-বিবাহের অখণ্ডনীয় ব্যবস্থা দেন, রাজা, অনেক দিন পূর্বে, সেই বচন সহায় করিয়া, বহু ব্রাহ্মণ পণ্ডিতের সহিত বিচারে প্রবৃত্ত হন, এবং যখন বিদ্যাসাগর মহাশয়ের সহিত তাঁহার প্রথম সাক্ষাৎ হয়, তখন তিনি বিধবা-বিবাহের প্রসঙ্গে, ঐ বচন উল্লেখ করেন। সঙ্গীত শাস্ত্রে তাঁহার বিশেষ পারদর্শিতা ছিল, বাঙ্গালাতে তাঁহার তুল্য সুগায়ক অল্প লোক জন্মিয়াছিলেন। তাঁহার বিষয়-বুদ্ধিও অতি চমৎকার ছিল ; তিনি স্বয়ং বিবেচনা না করিয়া আপন কর্ম্মচারী বা

মোক্তার ও উকিলকে কোন কার্য্য করিতে অনুমতি দিতেন না । এই সকল কারণে এফ, জে, হেলিডে সাহেব, তাঁহাকে সাতিশয় ভাল বাসিতেন । সংস্কৃত ও ইঙ্গরেজি উভয় বিদ্যার উন্নতি বিষয়ে তাঁহার যথেষ্ট উৎসাহ ও যত্ন ছিল । অধ্যাপকগণকে যথা-সাধ্য আনুকূল্য করিতেন এবং তাঁহাদের টোলের ব্যয়ের জন্য বার্ষিক বৃত্তিও দিতেন । কৃষ্ণনগর কলেজ গৃহ নির্মাণার্থ এ জেলার সমস্ত ভূম্যধিকারী অপেক্ষা, অধিক অর্থ প্রদান এবং ঐ বাটীর জন্য, তাঁহার অধিকারস্থ যে ভূমির প্রয়োজন হয়, তাহা দান করেন । কৃষ্ণনগরের গবর্ণমেন্টের দাতব্য চিকিৎসালয় সংস্থাপনে যথেষ্ট আনুকূল্য করেন, এবং ঐ চিকিৎসাগৃহের নিমিত্ত যে ভূমির প্রয়োজন হয়, তাহাও দান করেন, অধিকন্তু মাসিক ২০ টাকা করিয়া টাঁদা দিতেন । এই চিকিৎসালয় ১৮৪৯ খৃঃ অব্দে সংস্থাপিত হয় ।

শ্রীশচন্দ্রের তিন পুত্র ও এক কন্যা জন্মে, তন্মধ্যে দ্বিতীয় পুত্র স্মৃতিকাগারে ও তৃতীয় পুত্র কুমার ক্ষিত্রীশচন্দ্র ত্রয়োদশ বৎসর বয়সে, গতাস্থ হন । বেলগড়িয়া-বাসী ফুলের মুখটী শ্রীযুক্ত অঘোরচন্দ্র মুখোপাধ্যায়ের সহিত রাজকুমারী কালীকুমারীর বিবাহ হয় । রাজদ্রুহিতার ভরণ পোষণের জন্য, রাজা বার্ষিক দুই সহস্র টাকা বৃত্তি নির্দিষ্ট করিয়া দেন । জ্যেষ্ঠ পুত্র কুমার সতীশ চন্দ্র বিষয়াধিকারী হন ।

পঞ্চবিংশ অধ্যায় ।

যখন মহারাজা শ্রীশচন্দ্র লোকান্তর গমন করেন, তখন কুমার সতীশ চন্দ্রের বয়ঃক্রম বিংশতি বৎসর । ১২৪৪ বাঃ অব্দে, ইহার

জন্ম হয় ; ইনি কৃষ্ণনগর কালেজে অধ্যয়ন করেন ; যদিও পাঠ অধিক করেন নাই, কিন্তু বাল্যাবস্থাবধি সর্বদা ভদ্র ইঙ্গরেজদিগের সংসর্গে থাকাতে, অবিকল উচ্চশ্রেণীস্থ ইঙ্গরেজের ন্যায়, ইঙ্গরেজী ভাষা কহিতেন । পিতা বর্তমানে, তিনি কখন বিষয় ব্যাপারে লিপ্ত হন নাই, কেবল আমোদ প্রমোদে কাল যাপন করিতেন । এক্ষণে বিষয়াধিকারী হইয়াও প্রকৃত প্রস্তাবে বিষয়ের ভার গ্রহণ করিলেন না ; তাঁহার পিতার সময়ে, যিনি দেওয়ান ছিলেন, তিনিও তাঁহাকেই দেওয়ানী পদে নিযুক্ত রাখিলেন এবং তাঁহার উপর সমস্ত কার্যের ভার অর্পণ করিলেন । এই দেওয়ান তদীয় বাল্যাবস্থায় তাঁহার শিক্ষক ছিলেন এবং তাঁহাকে পুত্র নির্বিশেষে স্নেহ করিতেন । দেওয়ান অভিনব রাজাকে বিষয় কার্যে আবিষ্ট করিবার নিমিত্ত, বহুতর যত্ন পাইলেন, কিন্তু কোন প্রকারে পূর্ণ মনোরথ হইতে পারিলেন না । যাহা হউক, তিনি বিষয় কার্যে মনোযোগ না দেওয়াতে তাঁহার কোন অনিষ্ট হয় নাই ; দেওয়ান প্রাণপণে সকল কার্য সম্পাদন করিতে লাগিলেন । রাজা শ্রীশ-চন্দ্র একলক্ষ পঞ্চাশ সহস্র টাকার অধিক ঋণ রাখিয়া গিয়াছিলেন, এবং অনেক মহালের অনেক অগ্রিম কর লইয়াছিলেন । এই আগামী খাজানা লওয়াতে, তৎকালে জমীদারীর আয় এত অল্প হইয়াছিল যে, সাংসারিক সমুদয় ব্যয় নির্বাহ করণানন্তর প্রায় কিছুই উদ্ধৃত থাকিত না ; সুতরাং জমীদারীর উৎপন্ন হইতে ঋণ পরিশোধের উপায় ছিল না ; একারণ জমীদারীর কিয়দংশ পত্তনী দিয়া পণ গ্রহণ পূর্বক ঋণ পরিশোধ করিতে হইয়াছিল । সৌভাগ্যক্রমে পত্তনী দেওয়াতে পূর্ব জমার কিছু মাত্র হ্রাস হয় নাই, বরং বৃদ্ধি হইয়াছিল । খাস মহালের ভাল রূপ তত্ত্বাবধারণ করাতে, ক্রমশঃ জমীদারীর আয়েরও অনেক বৃদ্ধি হইল ।

সতীশচন্দ্র, বিষয়াধিকারী হইবার অব্যবহিত পরেই গবর্ণমেন্ট হইতে পৈতৃক উপাধি ও খেলেত্ প্রাপ্ত হন । ইনি, ইঁহার পিতামহ মহারাজা গিরীশচন্দ্রের ন্যায়, আয়ের প্রতি দৃষ্টিপাত না করিয়া, কেবল ব্যয় করা ভাল বাসিতেন, এবং অতিশয় ভ্রমণ-প্রিয় ছিলেন । প্রায় প্রতিবৎসর বর্ষাকালে, পশ্চিমদেশ ও পর্বত প্রদেশ পর্য্যটন করিতেন এবং ছুর্গোৎসবের অব্যবহিত পূর্বে বাটী আসিতেন ; কিন্তু ১২৭৭ বাঃ অব্দের আষাঢ় মাসে, যে গমন করিলেন, আর প্রত্যাগমন করিলেন না । যাওয়ার সময়, তাঁহার শরীর অসুস্থ ছিল, একারণ, যাহাতে তাঁহার যাওয়া না হয়, তদ্বিষয়ে তাঁহার রানী ও আত্মীয় স্বজন সকলেই বিবিধ প্রকার যত্ন করেন, কিন্তু তিনি, তাঁহাদের কথা উপেক্ষা করিয়া, যাত্রা করিলেন এবং কাশী ও আত্রায় কিছু দিন যাপন করিয়া, অবশেষে মসুরি শৈলে অবস্থিত হইলেন । পূজার সময়ে তাঁহাকে বাটী আনিবার জন্য মহারানী অনেক প্রকার যত্ন করিলেন, কিন্তু কোন মতেই আনিতে পারিলেন না । পরে, ১ লা কার্তিক, অপরিমিত সুরাপান জনিত উৎকট পীড়ায় আক্রান্ত হইয়া ৯ম দিবসে (১৮৭০ খৃঃ অব্দের ২৫ অক্টোবর) মানব লীলা সম্বরণ করিলেন । হরিদ্বারে তাঁহার অন্ত্যেষ্টিক্রিয়া সম্পাদিত হইল । যদিচ তদীয় পিতা রাজা ক্ষিতীশচন্দ্রও অকালে প্রাণত্যাগ করেন, তথাপি তাঁহার উপযুক্ত পুত্র বর্তমান থাকাতে, পুরবাসীদিগের বিশেষ শোকাভ্যুত্তব হয় নাই । কিন্তু সতীশচন্দ্র অসময়ে বিগত-জীবন হওয়াতে সকলের শোকের সীমা থাকিল না ।

সতীশচন্দ্রের স্বভাব অতীব সুমধুর ছিল ; অহঙ্কার, অভিমান, ঘেঁষ, হিংসা, তাঁহার হৃদয়ে কখন স্থান পায় নাই । যিনি তাঁহার সহিত একবার আলাপ করিয়াছেন, তিনি আর তাঁহাকে

কস্মিন্‌কালে বিস্মৃত হইতে পারেন নাই। রাজ্য যেমন সুশীল, তেমনি দয়ালু ছিলেন, তাঁহার অন্তঃকরণ দয়ার আকর ছিল। কি স্বজাতি কি বিজাতি, কি স্বদেশী কি বিদেশী, কি আশ্রিত কি অনাশ্রিত, সকলেরই প্রতি তিনি দয়া করিতেন, এবং স্বীয় অপকার করিয়াও পরোপকার সাধনে তৎপর হইতেন। ইউরোপ দেশীয় রীতিনীতি ও আচার ব্যবহারের নিরতিশয় অনুরাগী ছিলেন। যে সকল ইউরোপীয়দিগের সহিত তাঁহার আলাপ ছিল; তাঁহারা সকলেই তাঁহার প্রতি সাতিশয় শ্রদ্ধা ও অনুরাগ করিতেন। তিনি, মধ্যে মধ্যে, অত্রত্য ভদ্র ইঙ্গরাজ ও অধিবাসীদিগকে নিমন্ত্ৰণ করিয়া, রাজবাটীতে একত্রিত করিতেন। ইহাতে উভয় সম্প্রদায়ই, পরস্পরের আলাপে সাতিশয় আনন্দিত ও প্রীত হইতেন। তাঁহার মৃত্যুর অব্যবহিত কাল পরেই, কৃষ্ণনগর কালেজে, ছাত্রদিগের পারিতোষিক প্রদান উপলক্ষে, যে সভা হয়, তাহাতে কালেজের অধ্যক্ষ স্যামুয়েল লব সাহেব, বহু বিলাপ পূর্বক, কহেন “এখানকার ইংরেজ ও বাঙ্গালীদিগের মধ্যে মহারাজা গ্রন্থিস্বরূপ ছিলেন, তাঁহার অভাবে সেই গ্রন্থি ছিন্ন হইয়াছে, এবং অচিরে আর কেহ যে ঐ রূপ গ্রন্থিস্বরূপ হইবেন তাহারও প্রত্যাশা নাই।”

রাজার, প্রথমে, এক সৰ্ব্বমূলক্ষণা বালিকার সহিত বিবাহের সম্বন্ধ হয়; ঐ কামিনী, কৃষ্ণনগরে আনীত হইলে, বিবাহের নিরূপিত দিবসের তিন দিন পূর্বে, হঠাৎ ওলাউঠা রোগাক্রান্ত হইয়া পরলোক গমন করেন। রাজা শ্রীশচন্দ্র, উদ্ধাহের সমস্ত আয়োজন হইয়াছে, এবং নানা স্থান হইতে নিমন্ত্রিত কুটুম্ব, ব্রাহ্মণ পণ্ডিত, ও সম্ভ্রান্ত ব্যক্তি সমূহ সমুপস্থিত হইয়াছেন বলিয়া, নির্দ্ধারিত দিবসেই এ পরিণয় সংস্কার সম্পাদন করিবার সংকল্প

করিলেন, এবং নবদ্বীপনিবাসী রাজপুরোহিত-বংশোদ্ভূত এক বালিকার সহিত বিবাহ স্থির করিয়া, তাঁহাকে আনিতে লোক পাঠাইলেন । ঐ বালিকার সহিত বিবাহের প্রস্তাব পূর্বেও হইয়াছিল, কিন্তু বালিকাটি সর্বাঙ্গসুন্দরী নয় বলিয়া, পূর্বোক্ত কামিনীর সহিত বিবাহ স্থির হয় । কাহার ভাগ্যে কখন কি ঘটে তাহা কিছুই বলা যায় না ; যে দিনে ও যে পথে অর্দ্ধবিবাহিতা রাজপুত্র-বধূর মৃত দেহ দাহনার্থ নবদ্বীপাভিমুখে লইয়া যায়, সেই দিনে ও সেই পথে, ভাবি রাজপুত্র-বধূকে, যথোচিত আড়ম্বর পূর্বক, নবদ্বীপ হইতে আনা হয় । এক জনের মৃত শরীর বংশে বন্ধন করিয়া, তাঁহার আত্মীয় স্বজন, রোদন করিতে করিতে, লইয়া যাইতেছে ; আর এক জনকে, স্নসজ্জীভূত যানে আরোহণ করাইয়া, তাঁহার বন্ধু বান্ধবগণ উল্লাস পূর্বক লইয়া আসিতেছে । উদ্বাহ কার্য্য বহু সমৃদ্ধি ও আনন্দের সহিত সম্পাদিত হইল বটে, কিন্তু পরিণয়টি সুখের হইল না । যদিও নববধূ বিলক্ষণ বুদ্ধিমতী ও গুণবতী ছিলেন, কিন্তু সম্পূর্ণ রূপবতী না থাকাতে, এবং রমণীর কালস্বরূপ বহুবিবাহ প্রথা প্রচলিত থাকাতে, তিনি শ্বশুর শ্বাশুড়ী বা স্বামী কাহারও স্নেহপাত্রী হইতে পারিলেন না । বিবাহের কয়েক বর্ষ পরেই, রাজা ও রাজ্ঞী উভয়েই মনোমত কামিনীর অন্বেষণ করিতে লাগিলেন, এবং ১২৬৩ বাঃ অব্দের বৈশাখ মাসে, বালীনিবাসী হরিমোহন মুখোপাধ্যায়ের পরম সুন্দরী ছুহিতার সহিত সতীশচন্দ্রের বিবাহ দিলেন । উভয় মহিষীই অপূত্রবতী থাকাতে, রাজা সতীশচন্দ্র, ১২৬৬ বাঃ অব্দের তাদ্র মাসের সপ্তম দিবস, এইরূপ এক অনুমতি পত্র করিলেন যে “রাজ্ঞীরা যদি পুত্রবতী না হন, তাহা হইলে, আমার অবর্তমানে, কনিষ্ঠা রাণী দত্তক গ্রহণ করিবেন । যদি তিনি দত্তক না লন,

তবে জ্যেষ্ঠা রাজ্ঞী লইবেন ।” এই অনুমতি পত্র হওয়ার কিয়ৎ-কালানন্তর, জ্যেষ্ঠা রাণী বিগত-জীবন হইলেন । কিছু কাল পরে, রাজা দত্তক গ্রহণের উদ্দেশ্য করিতে লাগিলেন, কিন্তু তাঁহার মনোরথ পূর্ণ হইবার পূর্বেই তিনি পরলোক গমন করিলেন ।

মহারাজা লোকান্তর গমন করিলে, তাঁহার কনিষ্ঠা পত্নী মহা-রাণী ভুবনেশ্বরী পতির সমগ্র সম্পত্তির উত্তরাধিকারিণী হন ; এবং কমিশনর সাহেবের উপদেশানুসারে, ১২৭৭ বাঃ অন্দের ২২শে পৌষ, (১৮৭১ খৃঃ অন্দের ৫ই জানুয়ারি) স্বীয় সমস্ত সম্পত্তির কর্তৃত্বভার কোর্ট অব ওয়ার্ডসের প্রতি অর্পণ করেন । আর ১২৭৮ বাঃ অন্দের অগ্রহায়ণ মাসের ৯ম দিবসে, (১৮৭১ খৃঃ অন্দের ২৪ নবেম্বরে) নদীয়া জেলার অন্তর্গত আড়পাড়া-নিবাসী শ্রীযুক্ত মাধবচন্দ্র চট্টোপাধ্যায় (১) নামক জ্ঞানৈক ভদ্র কুলীনের পুত্রকে দত্তক গ্রহণ করিয়াছেন । দত্তক গ্রহণ সময়ে এই জেলার জজ মর উইলিয়ম হর্শেল সাহেব, কালেক্টর সি, সি, ফিবনস্ সাহেব এবং ডবলিউ বি, ওলডহাম সাহেব প্রভৃতি কয়েক জন রাজপুরুষ এবং এ প্রদেশস্থ অনেক সম্ভ্রান্ত ভদ্র ব্যক্তি সমাগত হইয়াছিলেন । দত্তক পুত্র ক্ষিতীশচন্দ্র নামে খ্যাত হইয়াছেন । কুমারটি অসাধারণ বুদ্ধিমান্ । ১২৭৫ বাঃ অন্দের ৩০ বৈশাখ ইহঁার জন্ম হয় ।

সমাপ্ত ।

(১) ইনি রাজা ভবানন্দের পুত্র গোবিন্দদেবের পুত্রের দৌহিত্রের বংশোদ্ভূত ।

পরিশিষ্ট ।

এই রাজবংশীয়েরা যে যে স্থানে বাস করিয়াছেন
ও করিতেছেন তাহার বিবরণ ।

কাশীনাথ রায়ের কয়েক পূর্বপুরুষ কিশোরগ্রামে ও কয়েক পূর্ব পুরুষ কাঁকদি গ্রামে বাস করেন ; কাশীনাথ কাঁকদি হইতে এ প্রদেশে আইসেন । তাঁহার অগ্রজ বাণীপতি রায়ের বংশ কাঁকদি ও গোবরাগোবিন্দপুর গ্রামে আছেন । কাশীনাথের পুত্র রামচন্দ্র সমাদ্রার বাগোয়ানে থাকেন ; রামচন্দ্রের পুত্রাদির মধ্যে, ভবানন্দ প্রথমে বাগোয়ানে ও পরে মাটিয়ারিতে বাস করেন, জগদীশের সন্তানেরা কুড়ুলগাছি, হরিবল্লভের সন্তানেরা কতেপুর, এবং শ্রুবুদ্ধির সন্তানেরা পাটকাবাড়ি, রাঢ়িপাড়া, বাদ তেহট ও বড়গাছিতে বাস করিতেছেন । ভবানন্দের পুত্রদিগের মধ্যে, গোপাল মাটিয়ারিতেই থাকেন, শ্রীকৃষ্ণের সন্তানেরা শ্রীকৃষ্ণপুর, শিবালয় সন্তোষপুর, ও কোড়কদি গ্রামে, এবং গোবিন্দের সন্তানেরা গোটপাড়া, আড়পাড়া, বামনপুখুরিয়া, আকাইপুর, ঘাটেশ্বর বেজপাড়া, নবদ্বীপ, দিগম্বরপুর, জয়রামপুর, ও খাসকুল গ্রামে অবস্থান করিতেছেন । গোপালের তিন পুত্রের মধ্যে, রাঘব কৃষ্ণনগরে উপনিবেশ করেন, নরেন্দ্রের পর-পুরুষেরা নবলা, সিমলা, আনুলে, তুর্গাপুর ও শাল গাঁ গ্রামে, এবং রামেশ্বরের বংশীয়েরা বেড়িপলতায় অবস্থিত আছেন । রাঘবের প্রথম পুত্র কদ্রনারায়ণ কৃষ্ণনগরেই থাকেন, দ্বিতীয় পুত্র প্রতাপনারায়ণ বাগোয়ানে যাইয়া বাস করেন । কদ্রের পুত্রদিগের মধ্যে রামজীবন পৈতৃক বাটীতেই থাকেন, রামকৃষ্ণের সন্তানেরা আসানগরে আছেন । রামজীবনের পুত্রদের মধ্যে, রঘুরাম কখন কৃষ্ণনগরে

কখন ত্রীনগরে থাকিতেন, রামগোপালের পর-পুরুষেরা কৃষ্ণনগরের সম্মিহিত দোঁগাছিয়াতে বাস করিতেছেন। রঘুরামের পুত্র কৃষ্ণচন্দ্র প্রথমে কৃষ্ণনগরে ও পরে শিবনিবাসে অবস্থান করেন। ইঁহার প্রথম পুত্র শিবচন্দ্র কখন শিবনিবাসে কখন কৃষ্ণনগরে থাকিতেন ; শিবচন্দ্রের সন্তানেরা কৃষ্ণনগরে বাস করিতেছেন। কৃষ্ণচন্দ্রের অপর পুত্রদিগের মধ্যে শম্ভুচন্দ্রের বংশীয়েরা হরধামে ও ঈশানচন্দ্রের বংশীয়েরা আনন্দধামে বাস করিতেছেন, তৈরবচন্দ্রের দৌহিত্রের সন্তানেরা এবং মহেশচন্দ্রের পৌত্রের দৌহিত্রগণ কৃষ্ণনগরের চাঁদ-সড়কে আছেন। তৈরবচন্দ্রের কন্যার বংশের মধ্যে এক্ষণে রায় বহুনাথ রায় বাহাদুর প্রসিদ্ধ।

রঘুরামের জ্যেষ্ঠা কন্যা রাজেশ্বরীর সন্তানেরা চাঁদসড়কে এবং কনিষ্ঠা কন্যা ভুবনেশ্বরীর সন্তানেরা শিবনিবাসে আছেন। কৃষ্ণচন্দ্রের প্রথম রাজ্যীর কন্যা অন্নপূর্ণার বংশীয়দিগের মধ্যে, কেহ শিবনিবাসে কেহ কৃষ্ণনগরে বাস করিতেছেন। দ্বিতীয়া রাণীর হুহিতা বিশ্বেশ্বরী, ভূর্গেশ্বরী, উমেশ্বরী, এই তিন জনের মধ্যে ভূর্গেশ্বরীর সন্তানেরা হরধামে আছেন, উমেশ্বরী নিঃসন্তান, বিশ্বেশ্বরীর বংশ ধ্বংস হইয়াছে। শিবচন্দ্রের তনয়া দক্ষিণাকালীর সন্তানেরা কৃষ্ণনগরের দেউলিয়া, এবং ত্রিশচন্দ্রের হুহিতা কালীকুমারীর পুত্র ত্রীযুত শ্যামাধব রায় কৃষ্ণ-নগরে অবস্থান করিতেছেন।

ফরমানের মর্ম্ম ।

সত্ৰাট
জাহানগিরের
মোহর।

ভবানন্দ চৌধুরীকে বাঙ্গালা স্রবার অন্তর্গত নিম্ন লিখিত পরগণা ও মহালের চৌধুরায়ী ও কানুনগুয়ী দেওয়া গেল। তাঁহার কর্তব্য যে যাহাতে এই সকল প্রদেশের হিতসাধন ও অনিষ্ট নিবারণ হয় ও দুর্ব্বলের উপর সবলে দৌরাঅ্য করিতে না পারে, তদ্বিষয়ে

বিশেষ যত্নবান থাকেন, এবং প্রতিবর্ষের শেষে উক্ত সুবার রাজ-পুরুষদিগের নিকট ঐ সকল পরগণা ও মহালের জমা ওয়াসিল বাকী প্রভৃতি কাগজ প্রদান করেন। সুবার রাজকর্মচারিগণের কর্তব্য যে, তাঁহার উপরি উক্ত ব্যক্তিকে উল্লিখিত রাজদত্ত পদ সকল অর্পণ করেন এবং প্রতি বৎসর ইহার হুতন সনন্দ না চাহেন। ঐ সকল পরগণার অধিবাসীদিগের কর্তব্য যে, তাঁহার উক্ত ব্যক্তিকে আপনাদের চৌধুরী ও কানুনগুই জানিয়া তাঁহার পরামর্শানুসারে কার্য্য করিতে থাকেন। তারিখ ১০২২ হিজরি (১)।

সম্রাট
সাহা জাহানের
মোহর।

ফরমানের মর্ম্ম ।

মাটিয়ারি ও আসলামপুর পরগণার চৌধুরী আনন্দ নারায়ণ, আপনার এলাকা অয়রাণ্ করাতে, তাহার মালগুজারী করিতে অশক্ত হইয়া স্বেচ্ছা পূর্ব্বক, ঐ দুই পরগণা প্রজার পরম হিত সাধক রাখব চৌধুরীর পুত্র বিশ্বনাথের নিকট বিক্রয় করিয়া তাহার কাগজ পত্র অর্পণ করিয়াছে। একারণ এক্ষণে আদেশ করা যাইতেছে যে, বিক্রয়ের সনন্দ অনুসারে উক্ত দুই পরগণায় ক্রেতার নাম জারি করা হয়, এবং ক্রেতা উল্লিখিত পরগণা দ্বয়ের উন্নতি সাধনের

(১) সম্রাট দত্ত যে সকল ফরমান রাজবাটিতে ছিল, তাহার অধিকাংশ ধ্বংস হইয়া গিয়াছে। ইদানীং অষ্টাদশ খানি মাত্র রাজবাটিতে বিদ্যমান আছে। তাহার মধ্যেও কোন কোন ফরমানের অক্ষর সকল এত বিকলাঙ্গ হইয়া গিয়াছে যে, তাহা পাঠ করা হুঃসাধ্য হইয়া উঠিয়াছে। রাজা মানসিংহ ভবানন্দকে প্রথমে মহুৎপুর প্রভৃতি যে কয়েক পরগণা দেন, তাহার ফরমান রাজবাটিতে আছে। কিন্তু তাহার কোন কোন স্থানের অক্ষর সকল এক কালে নষ্ট হইয়া যাওয়াতে তাহার মর্ম্ম লিখিতে পারিলাম না। ঐ ফরমানের তারিখ ১০১৫ হিজরি।

প্রতি দৃষ্টি রাখিয়া সরকারের যথোচিত মালগুজারী করেন, এবং কোন জমীদারকে আপন অধিকারের উপর অত্যাচার করিতে না দেন। আর কোন ব্যক্তি এই আদেশের অন্যথাচরণ না করেন।
তারিখ ১০৬৬ হিজরি।

ফরমানের মর্ম ।

সত্ৰাট
আলমগিরের
মোহর।

বিদিত হইল যে বাঙ্গালা স্রবার অধীন সলিমাবাদ সরকারের অন্তর্গত মূলগড় পরগণা ও সপ্তগ্রাম সরকারের অন্তর্ভূত আঙ্গুরীয়া পরগণার চৌধুরী বিষ্ণুদেব, রাঘবানন্দ, রঘুনাথ ও রামবিনোদ মালগুজারী করিতে অসমর্থ হইয়া পলাইয়াছে, এবং ১০৮০ হিজরি অব্দে মূলগড়ে এগার হাজার ও আঙ্গুরীয়ার আড়াই হাজার টাকা মালগুজারী বাকী পড়িয়াছে। উখড়া প্রভৃতি পরগণার চৌধুরী কৃষ্ণ জমীদারীর উন্নতি সাধন ও সরকারের মালগুজারী যথোচিত-রূপে প্রদান করিয়া থাকেন এবং ঐ দুই পরগণার বাকী খাজানা সরকারে দাখিল করিলেন। একারণ উক্ত দুই পরগণার চৌধুরারী, তালুকদারী ও জমীদারী পূর্বোক্ত চৌধুরীদিগের হস্ত-বহির্ভূত করিয়া ইহাঁকে অর্পণ করা গেল। বর্তমান ও ভবিষ্যৎ মুতসদ্দিদিগের কর্তব্য যে, ইহাঁর চৌধুরারী ও জমীদারী পদ বলবৎ রাখেন, ইহাঁকে নান্কার প্রভৃতি কার্য যথারীতি অর্পণ করেন, এবং ইহাঁর কাগজ পত্র ও দস্তখৎ মাতব্বর বলিয়া জ্ঞান করেন। ইহাঁর কর্তব্য যে সরকারের মঙ্গলাভিলাষী থাকেন, রাইয়তদিগকে স্বচ্ছন্দে রাখেন, তাহাদের স্থানে নিষিদ্ধ আবোয়াব ও অতিরিক্ত খাজানা না চাহেন এবং কৃত্রিম হিসাব প্রস্তুত বা অন্য কোনরূপ মন্দ ব্যবহার না করেন। তারিখ দ্বাবিংশ জলুদ।

ফরমানের মর্ম ।

সত্ৰাট
আমলগিরের
মোহর ।

সুবে বাঙ্গালার অন্তর্গত সপ্তগ্রাম ও সলিমাবাদের অন্তর্ভুক্ত
পৃষ্ঠের লিখিত নদীয়া ও উঞ্চড়া প্রভৃতি পরগণার রাজকর্মচারি-
দিগকে জ্ঞাত করা যাইতেছে যে রাজদত্ত ফরমান ও অন্য অন্য
সনন্দ অনুসারে ভবানন্দের পৌত্র রাঘবের ঐ সকল পরগণার
চৌধুরায়ী, কানুনগুরী এবং জমীদারীতে অধিকার ছিল। রাঘব
নানকারও ঐ সকল কর্ম আপন জীবদ্দশায় তাঁহার জ্যেষ্ঠ পুত্র
কদ্রকে দিয়া যান এবং কাজির ও আপনার মোহর করা পত্র
দেন। আর উজিরের নিকট হইতে সনন্দ দেওয়ান। রাঘবের
কনিষ্ঠ পুত্র প্রতাপনারায়ণ প্রজাদিগের উপর অত্যাচার করি-
তেন, এবং পিতার সহিত নানাবিধ অসদ্ব্যবহার করিয়া স্থানান্তরে
থাকিতেন, এ কারণ রাঘব তাঁহাকে বিষয়ের অনধিকারী করেন।
পরে, নদীয়া, মহৎপুর, আসলামপুর ও মাটিয়াগি প্রভৃতি যে সকল
পরগণা পূর্বরীত্যনুসারে তাঁহার নিজস্ব হইয়াছিল, তদ্ব্যতিরেকে
অন্যান্য মহালের দশমাংশ জ্যেষ্ঠ পুত্র কদ্রকে ও ষষ্ঠাংশ কনিষ্ঠপুত্র
প্রতাপনারায়ণকে দেন। কদ্র প্রতাপনারায়ণকে সম্মত করিয়া
তাঁহাকে বাগওয়ান প্রভৃতি কয়েক পরগণা প্রদানপূর্বক অবশিষ্ট
সমস্ত পরগণা আপনি অধিকার করিয়া সরকারের মালজমারী
দিতেছেন এবং প্রজাদিগের সহিত স্নহদ্ব্যবহার করিতেছেন।
এক্ষণে তিনি এই বিষয়ের ফরমান পাইবার প্রার্থনা করাতে,
হজুরের ফরমান ও বিক্রয় পত্র দৃষ্টি করিয়া এই আদেশ করা যাই-
তেছে যে, উল্লিখিত সমস্ত মহালের চৌধুরায়ী, কানুনগুরী এবং

জমীদারী সম্পূর্ণরূপে ধ্বংসই থাকিবে। তাঁহার কর্তব্য যে জমীদারীর ও রাইয়তের অবস্থার উন্নতি সাধনে বিশেষ যত্ন করেন এবং রাইয়তের স্থানে নির্দ্ধারিত কর অপেক্ষা এক কপর্দক অধিক না লন; কৃষক ও অন্য অন্য রাইয়তকে তুষ্ট রাখেন এবং কেহ তাহাদের প্রতি অত্যাচার করিতে না পারে তদ্বিষয়ে বিশেষ যত্ন-বান্ থাকেন। বৎসরের শেষে মহালের কাগজ স্মার দাওয়ানের নিকট দাখিল করেন এবং চৌধুরায়ী ও কানুনগুরীর রসুম ও জমীদারীর মালিকানা ধারাবাহিকরূপে আদায় করিতে থাকেন। ইহা ব্যতীত রাইয়তের নিকট কোন অন্যায্য দাওয়া না করেন। স্মার সমস্ত কর্মচারিগণের কর্তব্য যে ইহাঁকে উক্ত সমস্ত মহালের চৌধুরায়ী, কানুনগুরী এবং জমীদারী প্রদান করেন ও কোন ব্যক্তিকে ইহাঁর সহাধিকারী করিয়া না দেন। আর, রাইয়তদিগের কর্তব্য যে তাহারা ইহাঁর উপদেশের বহির্ভূত না হন এবং কেহ ইহাঁর স্থানে প্রতিবৎসর হুতন রাজ সনন্দ না চাহে। তারিখ উনবিংশ জলুস।

ফরমানের মর্ম্ম ।

সত্ৰাট
আলমগিরের
মোহর ।

অবগতি হইল যে সপ্তগ্রাম ও সলিমাবাদ সরকারের অন্তর্গত উখড়া, নদীয়া ও পাঁচ নগর প্রভৃতির জমীদার রাজা ঋজ সরকারের হিতাকাঙ্ক্ষী, এবং যথা নিয়মে মালগুজারী করিয়া থাকেন ও হুজুরের ফরমান এবং পৃষ্ঠের লিখিত অন্য অন্য বিশিষ্ট সনন্দ ইহার হস্তে আছে। এ কারণ, তাঁহার উল্লিখিত পরগণা সমূহের দরবস্ত জমীদারী ও চৌধুরায়ী পূর্ব রীত্যনুসারে বহাল রাখা গেল। বর্তমান ও ভাবিকালের রাজকর্মচারীদিগের কর্তব্য যে তাঁহারা, এই আজার অনুবর্তী হইয়া তাঁহাকে স্বীয় পদে

প্রতিষ্ঠিত রাখেন, চৌধুরায়ী ও নানকারের রস্মুম পূর্বমত গ্রহণ করিতে দেন এবং তাঁহার কাগজ পত্র ও দস্তখৎ মাতব্বর বলিয়া জ্ঞান করেন। তাঁহার কর্তব্য যে সর্বদা সরকারের সহিত সদ্য-বহার করেন, সরকারের মঙ্গলাভিলাষী থাকেন, এবং প্রজাপুঞ্জের হিত সাধনে তৎপর রহেন।

ফরমানের মর্ম ।

সত্ৰাট
সাহা আলমের
মোহর ।

একান্ত রাজানুগত, বিবিধ গুণাবিত এবং রাজানুগ্রহের যোগ্য পাত্র মহারাজেন্দ্র কৃষ্ণচন্দ্র বাহাদুর জাত হইবে যে বর্তমান শুভ সময়ে তোমাকে অনুগ্রহপূর্বক মহারাজেন্দ্র বাহাদুর উপাধি, পতাকা, নাকারা, ঝালরদার পাল্কি প্রদান করা গেল। তোমার কর্তব্য যে এই অসীম অনুগ্রহের নিমিত্ত আপনাকে চরিতার্থ জ্ঞান করিয়া সক্রতজ্জ চিত্তে বাদসাহীর মঙ্গল সাধনে তৎপর থাক। তারিখ সপ্তম জলুস।

ফরমানের মর্ম ।

গবর্ণর জেনেরল
ড্যালহৌসি বাহাদুরের
মোহর ।

Dalhousie

নদীয়ার জমীদার মহারাজা ক্রীশচন্দ্র রায় বাহাদুরের পূর্ব পুঙ্খ কর্তৃক সরকারের হিতসাধনের এবং ইহঁার নিজের সচ্চরিত্রের

বিষয় যশোহর বিভাগের কমিশনর সাহেবের দ্বারা অবগত হইয়া ইহাকে মহারাজা বাহাদুর উপাধি এবং তুপযুক্ত মর্যাদা সূচক পরিচ্ছদ প্রদান করা গেল। এই বিশেষ অনুগ্রহের নিমিত্ত ইহার কর্তব্য যে পূর্বাপেক্ষা আরও সংক্রিয়ান্বিত হইয়া সরকারের হিত সাধনে তৎপর থাকেন। তারিখ, ১৮৪৮ সাল ২৭এ জুলাই।

পং আরজবেগী বনু ।

শ্রীশ্রীকৃষ্ণ—

শরণং—

মুজিব্বত
নিজস্ব
স্বত্ব

মহারাজেন্দ্র
কৃষ্ণচন্দ্র বাহাদুরের
মোহর।

কৃষ্ণনগর চাকলার সোনদহ ও খাঁপুরের ইজারদারের গোমস্তা প্রতি আগে। নদিয়ার রামভদ্র সিদ্ধান্তের পৌত্র শ্রীরামসুন্দর ভট্টাচার্য্য ও উম্মতপুরের শ্রীরতিকান্ত মুহরির দুইজনে রত্নির ভূমি লইয়া বিরোধ করিয়া আসিয়াছিল। মুকাবিলায় জিজ্ঞাসা করা গেল ভট্টাচার্য্য কহিল সোনদহ খাঁপুরে আমার বহালরত্নির ভূমি যে আছে তাহা কারসাজি করিয়া মুহরির ভোগ করেন। মুহরির কহিল আমার পৈতৃক বহাল রত্নির ভূমি অবিরোধে অনেক কালাবধি ভোগ করিয়া আসিতেছি ভট্টাচার্য্যর ভূমির সহিত আমার বিষয় কি। পরে মুহরির স্থানে ভূমির সনদ চাহিলে কহিলেন সনদ পত্র যে ছিল তাহা কালক্রমে নষ্ট হইয়াছে তাহার নমুদ কিছু নাহি। ভট্টাচার্য্য মিত্র দেওয়ানের দস্তখতি বহালি ফর্দ দৃষ্ট করাইল এবং আর আর লিখনও আছে পরে সন্দেহ প্রযুক্ত এবিষয় তহকিক করিয়া আনিতে দুই গ্রামের কর্মচারি ও হালমানার নামে লিখন গিয়াছিল তাহার। ওয়াকিবহাল প্রজা লইয়া তজ্জবিজ করিয়া যে লিখিয়াছে তাহা দৃষ্ট হইল সোনদহের কর্মচারি লিখিয়াছে

এ ভূমি ভট্টাচার্যেরদিগের বহালরত্নির পূর্ব ভট্টাচার্যরা জোত-দারের স্থানে খাজানা লইয়া যাইতেন পরে বৎসর কয়েক মুহুরিরা লইয়াছেন। খাঁপুরের কর্মচারি লিখিয়াছে ভট্টাচার্যর বহালরত্নির ভূমি জীরঘুনাথ মুহুরিরের দখলে আছে তাহার পুত্র রতিকান্ত জোত-দারের স্থানে খাজানা লইয়া যান ইহাতে রতিকান্তের রত্নি ছাবেত হয় না এ বিষয় আদালতে এই নিষ্পত্তি করিয়া দেওয়া গেল মুহুরির সনদ পত্র কিছু দিতে পারিল না কর্মচারিরা ওয়াকেবহাল জাজা লইয়া তজবিজ করিয়া যে লিখিয়াছে তাহাতে ভট্টাচার্যের রত্নির ভূমি প্রমান হইল অতএব মিত্র দেওয়ানের দস্তখতি ফর্দ দৃষ্টে ভট্টাচার্যকে ভূমিতে দখল দিবা রতিকান্ত এভূমির খাজানা যে লইয়াছেন তাহা ভট্টাচার্যকে ফিরিয়া দিবেন। ইতি সন ১১৮৬ ৬ জ্যৈষ্ঠস্য সহি।

আজ্ঞে হয়।

শ্রীশ্রীকৃষ্ণ—

শরণং—

মহারা
জেন্দ্র
কৃষ্ণচন্দ্র
বাহাদুরের
মোহর।

মহারা
জেন্দ্র
কৃষ্ণচন্দ্র
বাহাদুরের
মোহর।

কৃষ্ণনগরের গোমস্তা প্রতিআগে ।

কৃষ্ণনগরের গোবিন্দ চাটুয্যার। তিন সহোদর ছিল। চাটু-য্যার বহালরত্নির বাটী ও বাগিচা ও ভূম্যাদি লইয়া তাঁহার দুই ভ্রাতা পূর্ব বিরোধ করিয়াছিল। তাহাতে স্বাক্ষর লিখন ক্রমে আমিন নীলকণ্ঠ রায় ও কালিদাস সিদ্ধান্ত ভট্টাচার্য ও কৃষ্ণ মুখর্ষা ও মুক্তিরাম মুখর্ষা ইহারা তজবিজ করিয়া নিষ্পত্তি করিয়া দিয়া ফারখত লিখাইয়া দিয়াছেন ফারখতে রায় আমিনের দস্তখতে ৩ নামও আছে কালিদাস সিদ্ধান্তের অক্ষরও

জানা গেল অতএব যে ফারখত পূর্ব হইয়াছে সেই প্রমান বাগিচা ও বাটী গোবিন্দ চাটুর্ঘ্যারই আছে গোবিন্দের জাতার সম্ভানের দিগের সহিত তাহার দাওয়ার বিষয় নাই গোবিন্দের দুই পুত্র রামনাথ ও গোকুল ছিল। রামনাথের পুত্র সম্ভান নাই তাঁহার দৌহিত্র হরিনদীর শ্রীমনোহর বখসী ও গোকুলের পুত্র শ্রীফকির চাটুর্ঘ্য। ইহার। দুইজনে গোবিন্দের বাটী ও বাগিচা ও ভূম্যাদির বিরোধ করিয়া এখানে আসিয়াছিল। তাহাতে ব্রাহ্মণ পণ্ডিতের ব্যবস্থা-নুসারে রামনাথের অংশ তাঁহার দৌহিত্র মনোহর বখসী পাইল। বস-তিও সপরিবারে রামনাথের বাটীতে করিতেছেন যেখানে ভূম্যাদি থাকে এইমত দখল দেয়াবা গোকুলের অংশ ফকির চাটুর্ঘ্য-রই আছে এই নিষ্পত্তি হইল ইহার অতিক্রম করিয়া কেহ কখন বিরোধ করিতে না পারেন তাহা করিবা ইতি সন ১১৮৭ সাল ২৫ জ্যৈষ্ঠশ্রী—

রাজাদিগের জন্মতিথিরূপে যথাশাস্ত্র মহোৎসব হইয়া থাকে । জন্মদিনে “স্বনক্ষত্রধাপি পিতরো তথা দেবপ্রজাপতিঃ” এই শাস্ত্রা-নুসারে পিতৃপূজার বিধি থাকাতে রাজকুমারেরা পূজার অন্যান্য উপচারের সহিত পিতৃবন্দনার সংস্কৃত কবিতা লিখিয়া দিতেন এবং রাজারাও তৎকালে সংস্কৃত শ্লোকে প্রত্যুত্তর-ব্যাজে পুত্রদিগকে আশী-র্ব্বচন প্রয়োগ করিতেন । তদানীন্তন রাজা ও রাজকুমারদিগের সংস্কৃত ভাষায় কিরূপ ব্যুৎপত্তি ও কিরূপ অনুরাগ ছিল, তৎপ্রদর্শনার্থ নিম্নে উক্ত বিষয়ের কতিপয় কবিতা উদ্ধৃত হইল ।

সুবরাজ শিবচন্দ্র বাহাদুরের লিখিত কবিতা ।

প্রজানামীশত্বাং সলিলনিধিকন্যাদৃততয়া

বিভূত্যা যুক্তত্বাদ্বিধিহরিমহেশৈশ্চ সমতা ।

তবাস্তে ভূপোষার্চিতচরণ তেষাং পুনরহো

ন চ ত্রিত্বং কস্মিন্ ত্বয়ি জনক নিত্যং ত্রিতয়তাং ॥

বর্ষান্তরে তদীয় কবিতা ।

আত্মীয়ানুগচক্রবাকনিকরে দুহুচ্চকোরত্রেজে
দোঃশীল্যানয়গামিনেত্রকুমুদে সল্লোকহংপক্কেজে ।
দারিদ্ৰ্যালয়কুজ্জাটৌ শ্ৰুতিপথব্যক্তীকৃতৌ সৰ্বদা
তাত স্মাপতিবৃন্দসেবিত নমঃ সূর্য্যায়মাণায় তে ॥

প্রত্যুত্তর আজ্ঞা ।

ভক্ত্যা নির্মলয়া তথা কবিতয়া পূজোপচারাদিনা
প্রীতোহহং ভবতাং সতাং প্রতিদিনং প্রাণাধিকানাং তথা ।
প্রীতির্ম্বত্রকলত্রসমুত্তিগণৈঃ পুত্রৈশ্চিরংজীবিত্তি-
স্তেষামপ্যনুবাসরং ভবতু সা যুগ্মাস্তু ভক্তিঃ স্থিরা ॥

মধ্যম রাজকুমার কৃত কবিতা ।

ভূদেবেন্দ্রং মহীন্দ্রং গুণগগনিলয়ং রাজরাজেন্দ্রসংজ্ঞং
নানাশাস্ত্রাভিরামং নিখিলজনহিতং ধীরধীরং সুসেব্যম্ ।
শ্রীমন্তং ধর্মরূপং হরিহরচরণান্তোজয়ুগ্মৈকচিত্তং
ধ্যাত্বা স্তব্ধা শরণ্যং নৃপমুকুটমণিং তাতমগ্র্যং নমামি ॥

চতুর্থ রাজকুমারের কৃত কবিতা ।

শ্রীমহারাজরাজেন্দ্র প্রসীদ রূপয়া পিতঃ ।
কঃ প্রসাদয়িতুং শক্তঃ শক্তিস্বযেব সর্কিকা ॥
যত্র শ্রীমান্ কবীন্দ্রো নৃপতিবর মহারাজরাজাধিরাজ-
সুদ্বন্দ্বোত্তমকনীয়ান্ নৃপতিকুলতিলকঃ শ্রীমহেশোমহেশঃ ।
তস্ম্যাং শ্রীমৎসতায়ামম বচনমহো বালকশ্চেব সত্যং
ততাত ত্বংপদাজেহবরমপি রমতে যৎ সুধা শৈশবোক্তিঃ ॥
নমঃ পদাজায় মনোরমায় মিত্রপ্রিয়ায়াশ্রিততাপহায় ।
সন্তুস্তদ্বৎস্বচ্ছজলালয়ায় রজঃপরিভ্রায় লসদ্দলায় ॥

কনিষ্ঠ রাজকুমারের কৃত কবিতা ।

প্রেষিতং ভক্তিতঃ স্তোকং পূজোপকরণং পিতঃ ।
 গৃহাণ রূপয়া ভূপ ভূপালভালভূষণ ॥
 নৃপতিগণকিরীটস্থায়িরত্নাংশুজালৈ-
 র্দিনকরকরবিশেষঃ শোভিতং লোভিতঞ্চ ।
 প্রণতজনসমূহস্বাস্থ্যাম্বাধীকপানাং
 জনকপদসরোজং সাদরোচ্ছ্বং নমামি ॥

বর্ষান্তরে ছোট রাজকুমারের কৃত কবিতা ।

যংপার্থং প্রবদন্তি ভার-তরণপ্রখ্যাতকীর্ত্যা বুধাঃ
 সিন্ধুং কেচন বাহিনীপতিতয়া কেচিৎ সূধাদীধিতিম্ ।
 ত্রৈলোক্যে করসঞ্চরেণ চ মহাসেনাশ্রয়ত্বাং শিবং
 গোবিন্দং বসুদেবতোষকতয়া তং তাতমীশস্তজে ॥

বর্ষান্তরে চতুর্থ রাজকুমারের কৃত কবিতা ।

নো চিস্তামণিরিষ্যতে স তু যতশ্চিস্ত্যার্থমাত্রপ্রদ-
 শ্চিস্তাতীতশুভন্দদাতি সততস্তাত ত্বদজ্জিহ্বয়ম্ ।
 পদ্মং মিত্রবিকাশকং বিকশিতঞ্চন্দ্রেন থে রাজিতং
 সেবাপ্যশ্রু স্মৃখান্নিকেত্যবনমন্নাশ্রয়েসারস্তজে ॥

বর্ষান্তরে ছোট রাজকুমারের কৃত কবিতা ।

কৌণীভুং ক্ষময়া দধাসি জলতাং মেহাশ্রয়েণ ক্রুধা
 বহিভুং বলবন্তয়া পবনতাং খত্বং বিভুত্বেন চ ।
 ষাগাদৈর্যজমানতাং তনুচ্চা রাত্রীশতামোজসা
 সূর্য্যত্বং শিবরূপধারক পিতস্তভ্যং নমঃ কোটিশং ॥

রাজা ঈশ্বরচন্দ্রের পৈতৃক জমিদারী লইয়া জাতিদিগের সহিত যে মোকদ্দমা হয় তাহাতে পণ্ডিতেরা আপন আপন ব্যবস্থায় যে বাদ্ধলা অনুবাদ করিয়া দেন তাহার প্রতিলিপি ।

রূপারাম তর্কভূষণ, জগন্নাথ তর্কপঞ্চানন এবং হরিনারায়ণ সার্ক-ভোমের ব্যবস্থা ।

প্রথম রত্নাকরে নারদ মুণির বচন শ্রবণে প্রযুক্ত পুত্র প্রভৃতিকে দিলে সিদ্ধ হয় দ্বিতীয় বিবাদ চিন্তামণিতে রূহস্পতি মুণির বচন অনুগ্রহ করিয়া পুত্র প্রভৃতিকে দিলে সিদ্ধ হয় তৃতীয় দায়ভাগ দায়তত্ত্ব রত্নাকর বিবাদ চিন্তামণিতে নারদ মুণির বচন যুদ্ধে প্রাপ্ত-ধন বিবাহ কালে প্রাপ্তধন বিছাদন পিতৃ প্রভৃতির স্থানে প্রসাদ-লব্ধ ধন এই চারি ধনে অগ্র ভ্রাতারা অংশ পান না চতুর্থ দায়-ভাগে ব্যাস মুণির বচন পিতৃ পিতৃব্য প্রভৃতির স্থানে প্রসাদ যে পান তাহাতে অগ্র ভ্রাতাদিগের অংশ নাই, পঞ্চম দায়ভাগ রত্নাকরে ব্যাস মুণির বচন পিতামহ পিতা মাতা ইহারা প্রীত পূর্বক পৌত্রকে এবং পুত্রকে যাহা দেন তাহাতে ভ্রাতাদিগের অংশ নাই ষষ্ঠ বিবাদ রত্নাকর বিবাদ চিন্তামণিতে রূহস্পতি মুণির বচন পিতা পিতাম-হের মরণোত্তর পুত্র পৌত্র যে ধন পায়, তাহার নাম দায় ; পথে কুড়াইয়া যে অস্থায়িক ধন পায়, তাহার নাম লাভ ; মূল্য দিয়া কিনিয়া লয়, তাহার নাম ক্রয় ; যুদ্ধে জয় করিয়া লুটিয়া যে ধন পায়, তাহার নাম জয় ; কর্জ দিয়া যে সুদ পায়, তাহার নাম প্রয়োগ ; কৃষি বাণিজ্যাদি করিয়া যে ধন উপার্জন করে, তাহার নাম কর্ম-যোগ ; বিশিষ্ট লোকের স্থানে ভিক্ষা করিয়া যে ধন পায়, তাহার নাম সংপ্রতিগ্রহ ; এই সাত প্রকার ধনের মধ্যে যে যে ধন স্থাপন গৃহ ক্ষেত্রাদি দেয় তাহা দিতে পারে এই কল্পতরু মত লিখিয়া আপন মত লেখেন রত্নাকরকার যাবত প্রকার ধন উপার্জন পাইয়া থাকে সকল প্রকার উপার্জিত ধন মধ্যে কুটুম্ব ভরণোচিত রাখিয়া অধিক দিতে পারে ইহা দিলে সিদ্ধ হয় ইতি পরের দ্রব্য আপনার স্থানে গচ্ছিত যে থাকে তাহা দিতে পারেনা দিলেও সিদ্ধ হয় নাই ইতি

বিবাদ চিন্তামণিতে এইরূপই অর্থ ইতি বিবাদ চিন্তামণিকার স্মৃতি-
সারের মত লিখেন যদি কুটুম্ব ভরণোচিত দ্রব্য না রাখিয়া সর্বস্ব
দান করে তথাপিও দান সিদ্ধ হয় কিন্তু দাতার পাপ হয় কুটুম্ব
ভরণ বাদ করিয়া সকল স্থাবর দান নিষিদ্ধ ইতি এখানে নিষেধ
কখনই দান করিলেই দান সিদ্ধ হয় কিন্তু দাতার অধর্ম হয় যদি
সদ্বচন দানাভাব বোধক থাকে তথাপি যে দান হইয়াছে তাহা
অসিদ্ধ হয় না দান করিলে অধর্ম হয়, পিতৃমরণাদির পর যে
দ্রব্য পঁচ ভ্রাতার অধিকার যে খানে হইয়াছে সে খানে এক ভ্রাতা
অথ ভ্রাতার অনুমতি ব্যতিরেকে যে দ্রব্য দিলে দান সিদ্ধ হয়
কিন্তু উভয়রি অংশের মত দান সিদ্ধ হয় অতএব আপন মাত্রের
ধন যদি কেহ দেয় তবে অবশ্য সিদ্ধ হয় এই স্মৃতিসারাদি অনেক
শ্রম্ভকার সম্মত দায়ভাগ দ্বিত যাজ্ঞবল্ক্য বচনানুসারে পিতামহ
স্থাবরাদিতে পিতা পুত্র দুয়েরি সমান স্বামিভ্ব অতএব পিতা দিলেও
পুত্রাংশের দান হয় না এই রূপ প্রকার তাহাতে অত্যন্ত দোষ
হয় এই কারণ জীমূতবাহন আর প্রকার অর্থ করেন এই বচন
যাজ্ঞবল্ক্য সংহিতায় বিভাগ প্রকরণে আছে যদি পিতামহ
বর্তমানে পিতা মরণে সে সময়ে পৌত্র বাঁচিলে তখন পিতামহ ধনে
পিতার যেমন স্বামিভ্ব হইত পৌত্রেরও তেমতি স্বামিভ্ব হয় অতএব
আপন পিতৃব্যের স্থানে পিতৃযোগ্য অংশ পৌত্র লইবেন এই একত্র
পিতা পুত্র দুয়েরি স্বামিভ্ব হয় এমত অর্থ নয় তাহাতে দেবল মুনির
বচন ইহাতে পিতৃ বর্তমানে তাঁহার ধনে পুত্রের স্বামিভ্ব হয় না
এই অর্থ স্বার্জিত ধন পর দেবল মুনির বচন ইহা কহেন প্রমাণ
নাই। স্মার্তভট্টাচার্য্য প্রভৃতিও এমতি বাক্যার্থ করেন। পিতার
অনুগ্রহে বস্ত্রালঙ্কার ভোগ হয় স্থাবর ভোগ হয় না, এই রূপ
প্রকার ইহাতে সমাধা যদি দান সিদ্ধ না হয় এ বচনের অর্থ তহে
জীমূত বাহনের শ্রম্ভ লগ্ন হয় না অতএব পূর্ব বচনের মত স্থাব
দানেতে পিতার পাপ হয় এই বচনার্থ এবং স্মার্ত ভট্টাচার্য্যের মতে
এই অর্থ বাল্মীকি রামায়ণ অযোধ্যা কাণ্ডে দশরথের পৈতৃক রাও

রামে সমর্পণ প্রস্তাবে কৈকেয়ীর প্রতি মন্থরার বাক্য রাম রাজা হইলে ইহার পুত্র রাজা হইবেন এই ক্রমে ইহারি বংশে রাজা হইবেন ভরত বংশে রাজা হইবেন না পর বচনের অর্থ রাজারা জ্যেষ্ঠ পুত্রে রাজ্য সমর্পণ করেন জ্যেষ্ঠ পুত্র নিগুণ হইলে ইতর পুত্রে গুণ থাকিলে তাহাকেই সমর্পণ করেন জ্যেষ্ঠ পুত্রের গুণ থাকিলে তাহাকে অবশ্য রাজ্য সমর্পণ করেন ভ্রাতাকে রাজ্য দেন না ইতি ইহা বুঝিয়া যদি গুণবান জ্যেষ্ঠ পুত্রকে দান করেন তবে অবশ্য সিদ্ধ হয় পিতার আজ্ঞা ব্যতিরেকে পিতার অভিমত কর্ম যে করে সেই উত্তম পুত্র পিতার আজ্ঞায় যে পিতার অভিমত কর্ম করে সে মধ্যম পিতার আজ্ঞা-তেও যে না করে সে পুত্র মল স্বরূপ ইতি অতএব সে পিতার ধনে অধিকারী নহে আমাদের পুরুষানুক্রমে কখন রাজ্য বিভাগ হয় নাহি এই কথা যদি দান পত্রে লেখা থাকে পশ্চাৎ যদি কোন পুরুষে রাজ্য বিভাগ প্রতিপন্ন হয় তাহাতেও দান অসিদ্ধ হয় এ সং শাস্ত্রে নাহি তথাহি বিবাদ রত্নাকর চিন্তামণিতে নারদ মুণির বচন ইনি আমার এই উপকার করিবেন এই ক্রমে যদি দান করে যদি বা সে উপকার সে ব্যক্তি না করে তবেই দান অসিদ্ধ ইহাই অর্থ ।

মুরশিদাবাদের পণ্ডিতগণের ব্যবস্থার ভাষ্যার্থ কনিষ্ঠ পুত্রদিগের জীবনোপভোগী ধন নির্বন্ধ করিয়া দিয়া জ্যেষ্ঠ পুত্রকে নিজ পৈতৃক জমিদারী দান করিয়াছে জ্যেষ্ঠপুত্র তৎকালাবধি সেই জমিদারীভোগ করিয়াছে এরূপ দান সিদ্ধ হয় ইহা অগ্রথা হয় না অতএব কনিষ্ঠ পুত্রেরা জমিদারির দাওয়া করিলে অংশ পায় না ইতি সকল শিষ্ট পরম্পরা শাস্ত্রে সম্মত ব্যবস্থিত ।

শ্রীগৌরহরি শর্মাণঃ ।

জাঁহাগির নগরের পণ্ডিতগণের ব্যবস্থার ভাষ্যার্থ ।

পিতা যদি পৈতৃক জমিদারী জ্যেষ্ঠ পুত্রকে দান করিয়া থাকেন কনিষ্ঠ পুত্রদিগের জীবিকা দিয়া থাকেন কনিষ্ঠ পুত্রেরা সম্মতি

ক্রমে গ্রহণ করিয়া থাকেন এবং পিতা যদবধি দানপত্র দিয়াছেন তদবধি জ্যেষ্ঠ পুত্রও দানপত্রানুসারে জমিদারী আমল করিয়া থাকেন তবে সেই দান সিদ্ধ হয় আর কনিষ্ঠ পুত্রেরা সেই জমিদারীর হিস্যার দাওয়া করিয়া লইতে পারেন না এই দায়ভাগাদি শাস্ত্র সম্মত ব্যবস্থা ।

শ্রীরামজীবন বিদ্যালঙ্কার শ্রীরামনাথ বিদ্যাভূষণস্য
শ্রীমহাদেব পঞ্চাননস্য শ্রীপার্বতিচরণ বিদ্যাবাচস্পতি
শ্রীরঘুনাথ বাচস্পতি ।

দিনাজপুরের পণ্ডিত দিগের ব্যবস্থার ভাষ্যার্থ ।

ছল ব্যতিরেকে দান করিয়া থাকে তবে শাস্ত্রানুসারে এমত দান সিদ্ধ হয় এবং কনিষ্ঠ পুত্রেরা অংশ পায় না ছল ক্রমে দান করিয়া থাকে তবে দান সিদ্ধ হয় না কনিষ্ঠ পুত্রেরা অংশ পায় শাস্ত্রানুসারে এই ব্যবস্থা (১) ।

শ্রীসদাসিব শর্ম্মণঃ শ্রীসত্বনাথ শর্ম্মণঃ
শ্রীগোকুলচন্দ্র শর্ম্মণঃ শ্রীকালী শঙ্কর শর্ম্মণঃ

বারাণসী ও গয়াবাসী পণ্ডিত গণের ব্যবস্থা পারস্য ভাষায় লিখিত হইয়া আইসে । বারাণসী নিবাসী পণ্ডিত দিগের ব্যবস্থার স্থূল মর্ম্ম এই যে, যদি কোন রাজা, কনিষ্ঠ পুত্রগণকে মোশাহের

(১) এই সমস্ত ব্যবস্থার যে অবিকৃত প্রতিলিপি রাজবাটীতে ছিল তাহার অবিকল নকল লিখিলাম । তৎকালীন পণ্ডিত দিগের লিখিবার রীতি প্রদর্শনা আমি ইহার কিছুমাত্র তারতম্য করিলাম না । হুশ, দীর্ঘ, ছেদ ইত্যাং সমস্তই অপরিবর্তিত রহিল ।

দিয়া, গুণবান জ্যেষ্ঠ পুত্রকে রাজ্য দান করেন, তবে সে দান শাস্ত্রসিদ্ধ, এবং অন্য পুত্রেরা ঐ রাজ্যের অংশের দাওয়া করিতে পারেন না। যদি কোন জমীদার অন্য পুত্রদিগের মোশাহেরা নির্দিষ্ট করিয়া দিয়া, জ্যেষ্ঠ পুত্রকে পৈতৃক জমীদারী প্রদান করেন তবে সে দান সিদ্ধ হয়। অপর পুত্রগণ ঐ জমীদারীর অংশ পাইতে পারেন না।

গয়া নিবাসী পণ্ডিত দিগের ব্যবস্থার স্থূল মর্ম্ম এই যে, যদি কোন ব্যক্তি কনিষ্ঠ পুত্রগণকে মোশাহেরা প্রদান পূর্ব্বক জ্যেষ্ঠ পুত্রকে পৈতৃক জমীদারী দান করিয়া দান পত্র লিখিয়া দেন তবে অন্য পুত্রেরা অগ্রজের জীবনাবধি ঐ জমীদারীর অংশের দাওয়া করিতে পারেন না। কিন্তু ঐ অগ্রজ যদি অনুজ বর্ত্তমানে পুত্রকে আবার ঐ জমীদারী দান করেন তবে সে দান সিদ্ধ থাকিতে পারে না। অগ্রজেরা ঐ জমীদারীর অংশ পাইতে পারেন (১)।

(১) এই ব্যবস্থাটি নূতন আকারের বোধ হওয়াতে, আমি নবদ্বীপস্থ অধুনাতন স্মার্ত্ত প্রধান ত্রজনাথ বিদ্যারত্ন প্রভৃতি কতিপয় ধর্ম্মশাস্ত্র ব্যবসায়ীর নিকট ইহার কথা উত্থাপন করিয়াছিলাম, তাঁহারা সকলেই কহিয়াছেন “আমরা এরূপ ব্যবস্থা কখন দৃষ্টি বা শ্রবণ গোচর করি নাই।”

শুদ্ধিপত্র

পৃষ্ঠা	পংক্তি	অশুদ্ধ	শুদ্ধ
৩	৩	সুপ্ পুথরিয়া	সুখপুথরিয়া
৪	৬	মহিমপুর	মহেশপুর
৬	৭	প্রসারণ	প্রসারণ
৭	১৬	ছেপতনি	সে-পতনি
১১	২৫	ভূতাদিগের	কর্মচারিগণের
১২	২৩	ত্রক্ষত্তর	ত্রক্ষোত্তর
১৫	৫	ভূতোরা	কর্মচারিগণ
১৯	৬	কখন	কখন কখন
৩০	২	সমাজ চলিত	সমাজে চলিত
৪২	২২	পূর্ব পারস্ব	পূর্বপারস্ব অতি অ
৪৯	২৫	উদ্ধ	উদ্ধৃত
৫৬	২১	শাত	সাত সাত
৮২	২২	নদীয়	নদীয়া
৮৪	২২	বহুনাশিষ্ঠানামতঃ	বহুনাশিষ্ঠানামতঃ
৮৮	২০	রাজা	রাজ
৯১	২২	উপায়	উপায়ঃ
৯৬	৫	বৈমাত্র	বৈমাত্রেয়
১৩৪	১৬। ১৮	পুণ্যপুত্র	পৌণ্ড্যপুত্র
১৩৫	১৬	বৈমাত্র	বৈমাত্রেয়
১৪৭	২১	হিমালয়াং	হিমালয়াং
১৫৮	৮ ১৮	খুড়তিত	খুড়তুত
১৬২	১৯	দিয়াছেন	গিয়াছেন

পৃষ্ঠা	পংক্তি	অশুদ্ধ	শুদ্ধ
১৬৪	১৮	জঙ্গলময়	জঙ্গলময়
১৭০	১৬	স্বরধ্বনী	স্বরধ্বনী
১৭১	৪	লুটিয়া	লুটিয়া
১৭৪	১৬	স্ততি	বিনয়
২২৫	১৮	ভট্টাচার্যর	ভট্টাচার্যের
২২৬	১	ভট্টাচার্যেরদিগের	ভট্টাচার্যদিগের
ঈ	৯	প্রমান	প্রমাণ
ঈ	১৮	চাটুয্যারা	চাটুয্যেরা
২৩০	মুনিশব্দ	মণিওমুণি	মুনি
ঈ	১৯	লুটিয়া	লুটিয়া
২৩২	১৪	মুণি	মুনি
ঈ	১৪	ঐসদাশিব	ঐসদাশিব
ঈ	ঈ	ঐলভুনাথ	ঐলভুনাথ



